

[KASİDELER]

1.

Münâcât-ı Bârî ‘Azze Şânuhu

Mef‘ûlû Mefâ‘ilün Fe‘ûlün

Hezec - - . / . - - / . - -

- ‘İşkuñ dile hem-dem eyle yâ Rab
‘Uşşâkuña mahrem eyle yâ Rab
- Câm-ı mey-i lutfuñ ile cânı
Mest eyle de bî-ğam eyle yâ Rab
3. Çeşm-i emele ‘izâr-ı kâmı
Düş eyle de mükrem eyle yâ Rab
- Lutfuñ meyine idüp dili câm
Pür-neş’e vü pür-dem eyle yâ Rab
- Kalbümde esâs-ı kâh-ı ‘ışkuñ
Lutfuñ gibi muhkem eyle yâ Rab
6. Esrâr-ı nihân-ı *küntü kenzün*
Fehmiyle mu‘azzam eyle yâ Rab
- Nefs itdi fesâd iddi‘âsın
Fazluñ ile mülzem eyle yâ Rab
- Her-bâr likâ-yı zât-ı pâküñ
Kalbümde musammem eyle yâ Rab
9. Hemvâre peyâm-ı vasl-ı zâtüñ
Bî-dillere mülhem eyle yâ Rab
- Lutf u keremünle ehl-i ‘ışkı
Her-bâr mükerrerem eyle yâ Rab
- Esrâr-ı tecellî-i cemâle
‘Âşıkları a‘lem eyle yâ Rab
12. Bu bende de hisse-yâb olsun
İhsânı mu‘ammem eyle yâ Rab
- Pür-zahm güneh durur ten-i zâr
‘Afvuñ ile merhem eyle yâ Rab
- Çok çekdi gam-ı firâkı göñlüm
Şimden-girü hurrem eyle yâ Rab
15. Gülzâr-ı vas[ı]lda eşk-i çeşmüm
Berg-i güle şeb-nem eyle yâ Rab

VAHYÎ-i gam-âşnâya lutfun
Her lahza vü her dem eyle yâ Rab

2.

**Âgâz Kerden-i Tasîr Nu'ût-i Celîle-i Rabbü 'l-Âlemin ve Hâtemü 'n-Nebiiyyin
ve Şefî'ü 'l-Müznibin 'Aleyhi 's-Selâm**

Mef'ûlü Mefâ'ilün Fe'ûlün

Hezec - - . / . - - / . - -

Ey pâdşeh-i cihân-ı i'câz
Oldı suhanuñ mekân-ı i'câz
Ey husrev-i ceyş-i nükte-sencan
Endîşeñe 'âlem oldı hayran

3. Ey hâkim-i milket-i ma'ârif
Kim nükteñ olur şeh-i letâ'if

Ey h^vâce-i çâr-sûy-ı 'irfan
Nazmunıda nühüfte şâhid-i an

Ey bülbül-i gülşen-i fesâhat
Güftârıñ kimde var liyâkat

6. Kalbümdeki nükte-i musavver
Âyîne de 'aks-i rûy-ı dil-ber

Tab'umdaki her hayâl-i dil-keş
Hâr u has-ı nazm-ı gayre âteş

Bir gülşen-i feyzdür hayâlüm
Pür-gûy ku'aytdur makâlüm

9. Hâmemdür o cây-ı feyz-i 'allâm
Fevvâre-i Kevser-i leb-i kâm

Bir şâhid-i dil-keş-i Habeşdür
Ser-safha-i nazma gâze-keşdür

Tab'umdur o şûh-ı pür-zarâfet
Kim cünbişi vaz'-ı hûr-ı cennet

12. Fikrümdür o verd-i bâğ-ı hurrem
Kim feyz-i Hudâdur aña şeb-nem

Dildâr-ı tahayyülüm görenler
'Âlemde görür mi gayri dil-ber

Tîzî-i tabî'atım göreydi
N'idüğini mi dahı bileydi

15. Mazmûnum olur idersem ibrâz
Şeh-beyt-i kasîdehâ-yı i'câz

- Görseydi nikât-ı şî'rüm ey dil
Meşk eyleye idi sihr-i Bâbil
Bir remzümi fehm ideydi Sâ'ib
Olurdu hayâl-i şî're tâ'ib
18. Bir sehvüme nâ'il olsa Tâlib
Dahı niye olur idi tâlib
Ol nükteñe bende cilve eyler
Reşk-âverî gamzehâ-yı dil-ber
Ey hâme nedür bu hod-fürûşî
Ey tab' nedür bu pür-hurûşî
21. Fehm oldu ki kasd-ı midhat itdün
Bir na't-i şerîfe niyyet itdün
Vasf eyle o zât-ı pâki ey dil
Maksûduñ olur anuñla hâsıl
Medh eyle cenâb-ı Mustafâyı
Ol zât-ı şerîf-i pür-safâyı
24. Tâc-ı ser-i halk-ı 'âlem Ahmed
Şâhenşeh-i dü-cihan Muhammed
Ey şâh-ı sarây-ı *kün fe-kânî*
Ey bâ'is-i hilkat-i cihânî
Ey mihr-i münîr-i evc-i îman
Ey nûr-ı meh-i sipihr-i 'irfan
27. Ey gâliye-i 'izâr-ı İslâm
Ey gâze-i rûy-ı lutf-ı 'allâm
Ey ân-ı cemâl-i şâhid-i din
Ey nûr-ı cebîn-i 'arz-ı temkin
Ey mahzen-i Kevser-i tecellî
Ey micmer-i 'anber-i tecellî
30. Ey mürşid-i hân-kâh-ı 'âlem
Ey 'illet-i halk-ı cinn ü âdem
Ey evvel-i hutbe-i bidâyet
Ey âhir-i nüsha-i nihâyet
Ey bülbül-i bâğ-ı vasl-ı Rahman
Ey gonçe-i revza-i dil ü can
33. Ey ma'den-i dürr ü gevher-i 'ışk
Ey nâfe-i müşg-ezfer-i 'ışk

- Ey şem‘a-i bezm-i âfirîniş
Ey nûr-dih-i dü-çeşm-i bîniş
Ey h^vâce-i kârgâh-ı rahmet
Ey bâ‘is-i nâ‘ilî-i ‘izzet
36. Ey dürr-i yetîm-i bahr-i ‘irfan
Ey bende-kün-i hezâr sultan
Ey tâcver-i hitâb-ı *levlâk*
Ey mefhar-i ins ü cinn ü eflâk
Ey hâdî-i vâdî-i dalâlet
Ey ahter-i burc-ı kurb-ı ‘izzet
39. Ey mazhar-i lutf-ı hazret-i Hak
Ey genc-i le‘âl-i hikmet-i Hak
Sen husrev-i taht-ı ıstifâsuñ
Sultân-ı gürûh-ı asfiyâsuñ
Sen olmasañ ey recâ-yı ‘âlem
Galtân idi âb u kilde âdem
42. Bir mihr-i münîr-i evc-i cansuñ
‘Uşşâkuña her nefes ‘iyansuñ
Eflâk-i mahabbet üzre mehsuñ
Şâhenşeh-i enbiyâ-sipehsuñ
Hem evvel-i lafz-ı ibtidâsuñ
Hem âhir-i harf-i intihâsuñ
45. Hem râmiz-i remz-i kevn-i ‘âlem
Hem gâmiz-i gamz-ı halk-ı âdem
Hem şâhid-i gül-‘izâr-ı hazret
Hem ‘âşık-ı bî-karâr-ı hazret
Hem şâh-ı serîr-i âfirîniş
Hem h^vâce-i çâr-sûy-ı dâniş
48. Hem bâ‘is-i lutf-ı Rabb-i hâdî
Hem vâye-i şevk-i hoş-nihâdî
Hem gonçe-i gülsitân-ı vuslat
Hem bûlbûl-i pür-fiğân-ı vuslat
Hem nûr-ı cevâmi‘-i hidâyet
Hem şem‘-i mecâlis-i ‘inâyet
51. Mahbûb-ı cenâb-ı kuds-i hazret
Ser-mâye-i h^vâcegân-ı rahmet

- Vassâfuñ olınca Rabb-i ‘izzet
Evsâfuña kim bula liyâkat
Lîkin ğarazum şefâ‘atüñdür
Bir nîm-nigâh-ı şefkatüñdür
54. Rahm eyle bu zâr u nâ-tüvâna
Gam-h^vârda gerdiş-i zamâna
Mağlûb-ı hevâ vü nefs olupdur
Mecrûh-ı belâ vü nefs olupdur
Rahm eylemez-isen ey şehenşâh
Ahvâline sad figân u sad âh
57. Güm-kerde sirâc-ı bezm-i ğamdur
Bî-reh-rev-i vâdî-i sitemdür
Makhûr-ı sipâh-ı nefs-i bed-kîş
Taht-ı melik-i telâş ü teşvîş
Bir bahr-i ‘amîk-i cürmdür âh
Hemvâre ğarîk-i cürmdür âh
60. Rahm ile himâyet eyle şâhâ
Lutf ile şefâ‘at eyle şâhâ
Makbûl olup hemin recâsı
‘Afv eyleye cürmini Hudâsı
Âzâd olup cahîmden tâ
Gülzâr-ı na‘îmi ide me’vâ
63. Yâ Rab be-hakk-ı nûr-ı Ahmed
Matlûb-ı cihâniyan Muhammed
Yâ Rab be-giryehâ-yı Âdem
Yâ Rab be-şevk-i kalb-i hurrem
Yâ Rab be-âh u zâr-ı Ya‘kûb
Yâ Rab be-dil-figâr-ı Ya‘kûb
66. Yâ Rab be-meh-cemâl-i Yûsuf
Yâ Rab be-rûy-ı al-i Yûsuf
Yâ Rab be-iftikâr-ı ‘Îsî
Yâ Rab be-du‘â-künî-i Mûsî
Yâ Rab be-havf-keşî-i Yahyâ
Yâ Rab be-kabûlî-i temennâ
69. Yâ Rab be-hakk-ı sabr-ı Eyyûb
Yâ Rab be-kârâ-yı mahbûb

- Yâ Rab be-sadâ-yı hûb-ı Dâvûd
Yâ Rab be-âh-ı serv-i pür-dûd
Yâ Rab be-şevket-i Süleyman
Yâ Rab be-tab‘-ı hoş-nihâdan
72. Yâ Rab be-vasl u hecr-i ‘uşşâk
Yâ Rab be-tulû‘-ı fecr-i âfâk
Yâ Rab be-hakk-ı çeşm-i pür-nem
Yâ Rab be-hakk-ı ism-i a‘zam
Yâ Rab be-hakk-ı ‘arş-ı a‘lâ
Yâ Rab be-hak-ı cemî‘ eşyâ
75. Yâ Rab be-lutfhâ-yı mebzûl
Yâ Rab be-sâlihân-ı makbûl
Yâ Rab be-hakk-ı çarh-ı heftüm
Yâ Rab be-mihr ü mâh u encüm
Yâ Rab be-mukarribân-ı dergâh
Yâ Rab be-hakk-ı bende vü şâh
78. Yâ Rab be-hakk-ı sıdk-ı Sıddîk
Yâ Rab be-hakk-ı ehl-i tahkîk
Yâ Rab be-hakk-ı ‘adl-i Fârûk
Yâ Rab be-hak-ı cemî‘ mahlûk
Yâ Rab be-hakk-ı hilm-i ‘Osman
Yâ Rab be-hakk-ı nûr-ı îman
81. Yâ Rab be-‘ilm-i Murtazâyî
Yâ Rab be-lutf-ı Mustafâyî
Yâ Rab be-kurreteyn-i İslâm
Ya‘nî Haseneyn-i sâhib-ikrâm
Yâ Rab be-hakk-ı âl ü ashâb
Yâ Rab be-hakk-ı cümle ahibbâb
84. VAHYÎ-i garîb-i dil-fîğâra
Bâzû-yı derûnı dâğdâra
Lutf u kerem ile rahmet eyle
Âteşlere yakma şefkat eyle
‘Afv eyle günâh-ı bî-şumârın
Nâr itme mekânın anda yarın
87. Lutf eyler-iseñ şehâ revâdur
Vassâf-ı resûl-i müctebâdur

- Na't itmede mâhir olmadıysa
Vasf itmege kâdir olmadıysa
Hâk-i reh-i ehl-i midhat oldu
Lutf eyle sezâ-yı şefkat oldu
90. Sen vasf idicek o zât-ı pâki
Olur mı edâ sıfât-ı pâki
Peygam-ber-i sâhib-i şefâ'at
Hâdimleri şâh-ı mülk-i cennet
Gördükde 'ulüvv-i şânun aslâ
Eglenmedi gitdi tâk-ı Kısra
93. Seyr itdi çü nâr-ı lutfun ey meh
Hurşîd-i nehâr-ı lutfun ey meh
Seyr eyleyicek ziyâ-yı hüsnün
Hurşîd-i cihan-nümâ-yı hüsnün
Hûy-kerde olup hacâletinden
Bî-behre olup harâretinden
96. Mahv oldu bil âteş-i Mecûsan
Erbâbı olursa n'ola tersan
Gark-ı 'arak-ı hacâlet oldu
Mahv-i keder-i hasâret oldu
Feyzünle nihâl-i huşk hurmâ
Bir lahzada oldu mîve-bahşâ
99. Engüştün idince mâha îmâ
Oldı iki pâre bî-muhâbâ
Sen şâh-ı güzîni midhat ey can
Ben bendeğe ola mı ke-mâ-kân
Lîkin hevesüm recâ-yı lutfun
Endîşe-i ilticâ-yı lutfun
102. 'İsyânuma bakma şefkat eyle
Lutf u kerem ü mürüvvet eyle
Sen şâh-ı cihâna kim sezâdur
İhsân ile lutf ile 'atâdur
Her lahzada her nefesde şâhâ
Envâ'-ı salât olup müheyyâ
105. Pür-nûr ola revân-ı pâkûn
Hem rûh-ı şerîf-i tâbnâkûn

3.

Der-Na‘t-i Şerîf-i Nebî ‘Aleyhi ‘s-Selâm

Mef‘ûlû Mefâ‘ilü Mefâ‘ilü Fe‘ûlün

Hezec - - . / . - - . / . - - . / . - -

Ey şem‘-i şeb-ârâ-yı gam olan dil-i şeydâ
Tâ key heves-i vuslat-ı dildâr-ı temennâ

Gül-çîn-i gülistân-ı talebkârî-i şâdî
‘Âlemde meger hâr u has-ı ye’s ide peydâ

3. Bâğ-ı emel-i kâma nice pâde olur dil
Kim ejder-i hırmân ider etrâfını me’vâ

Gülzâr-ı hevesnâkî-i ‘işretde olanlar
Sad hâr ile tahsîl idemez bir gül-i ra’nâ

Dil meclis-i maksûda duhûl eylemez oldu
Pîrâmenini leşger-i ahzân ideli câ

6. Bu keş-me-keş-i dehre nigâh eylemem ammâ
La‘lîn leb endîşemi şevk eylese gûyâ

Hâmem olıcak zîb-dih-i safha-i i‘câz
Bir noktada biñ sihr-i helâli ider imlâ

Hâmem olıcak vesme-keş-i şûh-ı sahâyif
Ebrû-yı sûtûr oldu cebîninde hüveydâ

9. Tab‘umdur o deryâ-yı güher-pâş-ı ma‘ânî
Kim katre degüldür aña nisbet yedi deryâ

Fikrümdür o zîbende gülistân-ı ma‘ârif
Her berg-i güli dikkat-i endîşeme imzâ

Bir dil-ber-i ferhunde-likâ oldu kelâmum
Mânendini seyr eylemedi dîde-i dünyâ

12. Bâd-ı revîş-i kilik-i güher-rîz-i hayâlüm
Şem‘-i hüner-i Hâfız-ı şûhı ider itfâ

Dest-âver-i gencîne-i idrâküm olaydı
Tâlib neye tâlib olur idi dahı âyâ

Bir nüktemi fehm eylese feyzinden olurdu
Fevvâre-i hikmet kalem-i ‘Urfî-i dânâ

15. Çün meclis-i i‘câza çerâğ oldu hayâlüm
Pervâne-sıfat cem‘ olur etrâfına ma’nâ

Dest-i sipeh-i fikr-i fûsun-sâzda hâmem
Bir nîze-i ‘işret-güsîl-i sîne-i a‘dâ

- Olsa nigeht-endâz leb-i şî'r-i melîhüm
Memsûh ola peyker-i keyfiyyet-i sahbâ
18. Sahn-ı emelüm oldu o gülzâr-ı ma'ânî
Kim sihr-i helâl oldu aña bûlbûl-i gûyâ
Çok görme bu da'vâ-yı bülendi baña hâsid
Zâhîrde saña çok görünür gerçi bu ammâ
Her vech-ile fahr eyler-isem baña sezâdur
İtdi heves-i na't-i nebî kalbümü me'vâ
21. Saykal-keş olup pertev-i endîşe-i vasfı
İtdi dil-i pür-jengümi mir'ât-ı mücellâ
Şâhenşeh-i evreng-i risâlet ki anıdır
Tâc-ı şeref ü hulle-i makbûlî-i Mevlâ
Ol fâris-i sahrâ-yı tedellâya sezâdur
Ger eşheb-i ta'zîmine mih olsa Süreyyâ
24. Sen hân-kah-ı vasl-ı Hudâ şeyhi olınca
Sûfî-i 'asâdârı olur hazret-i Mûsâ
Mevvâc olalı tarf-ı 'ademden yem-i hilkat
Zâtı gibi bir dürr-i yetîm olmadı peydâ
Gerd-i reh-i güm-geşte-i sultân-ı hayâlün
Bir kuhl-i cilâ-sâz-ı dil ü çeşm-i müdâvâ
27. Kalbünde heveskârî-i mi'râc idüp idrâk
'Azm eyledi tebşîr için eflâke Mesîhâ
Bir nîm-nigâh-ı gazab itseñ dü-cihâna
Nâ-bûd ola nokta-i mîm-i 'ademâsâ
Cûş itse eger cûy-ı nevâlün meh ü mihri
'Uşşâka iderdi iki nîlûfer-i bûyâ
30. Lutf u keremün gülşeni vâsi' şu kadar kim
Bir gonçesine jâle yetişmez yedi deryâ
Bir zerre-i mihr-i ruh-ı pür-nûruñ görse
Yûsuf ola âşûfte vü şeydâ çü Züleyhâ
Menşûr-ı belîgi be-hat-ı kâzî-i kudret
Hakkâ ki budur mühr-i nübüvvet ile mûmzâ
33. Peygam-ber-i mahbûb-ı Hudâ hazret-i Ahmed
Zâtı ile fahr-âver olur cümle eşyâ
Eflâk-i mahabbetde cemâlün meh-i enver
Gülzâr-ı tecellâda 'izârıñ gül-i ra'nâ

- Ger fûshat-i mülk-i şeref ü şânuñı görse
İkbâl-i Süleymân ola âşüfte vü rüsvâ
36. Yok şefkat ü ihsânuna çün hadd ü nihâyet
Sultân-ı kerîmâ şeh-i halk-ı dü-cihânâ
VAHYÎ-i belâ-dîde-i mihnet-keş-i 'ışkuñ
Bir nîm-nigâh ile dilin eyle tesellâ
Bir bende-i efkende-i pür-cürm ü günâhem
Yok fikr-i salâh u gam-ı endîşe-i takvâ
39. Ne bâ'is-i gufrân olacak bir 'amelüm var
Ne Hakka sezâ zühd ü 'ibâdât dirîgâ
Sad âh bu cürm ü güneñüm defter olunca
Endîşe-i lutfuñla olunmaz ise imlâ
Hamd aña ki erbâb-ı temennâya salâdur
Ümmîd-i şefâ'at gibi bir h'ân-ı ser-â-pâ
42. Envâ'-ı sa'âdât ile zât-ı şerîfün
Her lahza ser-efrâz ide hazret-i Mevlâ
Her demde salât ile tahiyyât-ı firâvan
Îsâr ola revzaña sultân-ı kerîmâ

4.

Na't-i Şerîf-i Seyyidü 'l-Kevneyn

Fe 'ilâtün Mefâ 'ilün Fe 'ilün

Hafîf . . - - / . . - - / . . -

- 'Işk ile dil ki bahr-i hikmet olur
Katresi kulzüm-i hakîkat olur
'Işk ile 'âşnâ olan hâtır
Şu'lezâr-ı zekâ-yı vahdet olur
3. 'Işk ile kalbüm ideli mu'tâd
Suhanum neşve-bahş-ı hâlet olur
Yârün evsâfın eylesem tahrîr
Gıpta-fermây-ı hûr-ı cennet olur
Vasf-ı kâmetde yazdığım elifün
Fikri şûr-efken-i kıyâmet olur
6. Femi medhinde mîm resm itsem
Gonçe-i gülşen-i fesâhat olur
Kâküli midhatinde yazsam lâm
Şeb-i yeldâ-yı fasl-ı nekhet olur

- Çeşmin endîşe eylesem kalemüm
Âhû-yı kûhsâr-ı midhat olur
9. Yâd idersem gül-i ruhın nazmum
Lâne-i bûlbûl-i letâfet olur
- Nutkî vasfında nokta vaz' itsem
Kand-i mest-i mey-i halâvet olur
- Lebin aңdukça hokka-i sürhum
Hum-ı sahbâ-yı bâğ-ı lezzet olur
12. Kılca medh eylesem miyânın eger
Mû-şikâfâne cây-ı dikkat olur
- Benem ol şâ'ir-i bihişt-i hayâl
Ki sözüm Kevser-i belâgat olur
- Vasf-ı tab'um idince hâme beyan
Serv-i bostân istikâmet olur
15. Nazm-ı 'Urfîye eylesem taklîd
Rûhı medhûş-ı câm-ı nahvet olur
- Sehvümi Sâ'ibün isâbetine
İtse tercîh dil isâbet olur
- Fikr-i tab'um Selîmüm itse selîm
Suhanı çâre-sâz-ı 'illet olur
18. O ma'ânî ki nutkum ide beyan
Cümle i'câzdan kinâyet olur
- Gamze fehm itse hiddet-i tab'um
Çâk-ber-çâk tîğ-ı gayret olur
- Bâde seyr itse neş'e-i suhanum
Mest-i ser-şâre-nûş-ı haclet olur
21. İntizâm-ı kelâmum eylese gûş
Gonçe harc-ı gül-âb-ı hasret olur
- Ne kadar da'vî-yi kemâl itsem
Aña bu şî'r-i tâze huccet olur
- Ol ki zehr-âbe-nûş-ı fûrkat olur
Müjde olsun ki mest-i vuslat olur
24. Hancer-i 'ışkuñ açdığı zahmum
Kâse-i şerbet-i şehâdet olur
- Pây-ı rahş-ı gamuñda hâk olsam
Dile ser-mâye-i meserret olur

- Nâz ile bâğda kıyâm itseñ
Serv vakf-ı nigâh-ı nefret olur
27. Görse reftârıñı tezerv-i cinan
Zîver-i sîh-i nâr-ı ‘uzlet olur
Sîneñi görse h^vâbda mir’ât
Tâ ebed jengdâr-ı hayret olur
Gülse açılsa yâr gülşende
Gonçe şeb-nem-i hûr-hacâlet olur
30. Câna minnet yolında can virmek
N’eyleyem kûy-ı yâre siklet olur
Böyle kalursa VAHYÎyâ tab‘uñ
Kulzüm-i lû’lû-yi melâhat olur
Habbe-zâ tab‘-ı nükte-perver kim
Aña hüsn-i edâ tabî‘at olur
33. Habbe-zâ tab‘-ı pâk kim i‘câz
Anı fikr itse mest-i rağbet olur
Habbe-zâ tab‘-ı lâzımu ’t-tekrîm
Ki aña vasf-ı dost ‘âdet olur
N’ola medh olsa ol ki hemvâre
Kârı kirdârı na‘t-i hazret olur
36. Hazret-i Mustafâ habîb-i Hudâ
Mefhar-i şer‘-i dîn ü millet olur
N’ola fahr itse ol vücûd-ıla hem
İki ‘âlemde halka rahmet olur
Zerre-i mihr-i cûdı fikr olsa
Buhl gencîne-bahş-ı himmet olur
39. Katre-i bahr-i lutfi zikr olsa
Kef-i imsâk bahr-i ni‘met olur
Vasf-ı hilmi olınsa dehre ‘iyan
Ol kadar kâ’inâta vüs‘at olur
Ki olup mûra râm bebr ü peleng
Meges ‘ankâyı sayda ruhsat olur
42. Vaz‘-ı hışmı kılınsa dehre beyan
Ol kadar halk ğark-ı heybet olur
Ki hayâl itse merdüm-i çeşmin
Şîr tebhâledâr-ı haşyet olur

- Dergehinden elem güzâr itse
Mâye-i zevk ü istirâhat olur
45. Olsa manzûr-ı lutfi rûy-ı ecel
Çâre-i ‘illet-i selâmet olur
Gerd-i nâ-çîz-i kûçe-i fazlı
Hikmete kuhl-i çeşm-i ‘ibret olur
Ser-i kûyında rû-be-hâk olmak
Meh degül âftâba rif‘at olur
48. Olsa pâ-mâl iltifâtı şeref
Nâ’il-i pâye-i fazîlet olur
Varsa bezm-i kemâline dâniş
Yeri saff-ı ni‘âl-i-hidmet olur
Rûtbe-i fazlın ağılasa ‘irfan
Ârzûmend-i ders-i fitnat olur
51. Şeref-i zâtı tâ o mertebe kim
Mefhar-i mansıb-ı risâlet olur
Kûy-ı ta‘zîmine iden rû-mâl
Mihr-i rahşân-ı evc-i ‘izzet olur
İtse Rûhu ’l-emîne nîm-nigâh
Haşre dek zîr-i bâr-ı minnet olur
54. Pây-bûsıyla kâm-yâb olsa
‘Arş ser-mest-i câm-ı devlet olur
Dâmenin dutsa sıdk-ıla ‘isyan
Reşk-sâz-ı derûn-ı tâ‘at olur
Kemterîn intisâb-ı dergâhı
Hak budur mâye-i sa‘âdet olur
57. Yâd idersem kemîne cür‘etini
Dâğ-sûz-ı dil-i şecâ‘at olur
Fikr-i gerd-i sipâhı ahibâba
Rûz-ı heycâda cünd-i nusret olur
Bîm-i tîriyle katre-i bâran
Düşmene bâ‘is-i hasâret olur
60. Fikr-i tîğıyla şu‘le-i hurşîd
Âteş-i hirmen-i cesâret olur
İtse endîşe hamlesin Rüstem
Tevbekâr-ı ümîd-i sıhhat olur

- Pertev-i nevk-i nîzesi hakkâ
Düşmene sâkî-i hezîmet olur
63. Hışm ile baksa bir şehenşâha
Devleti lutf-cû-yı nekbet olur
H^vâbda bir gedâya kılsa nazar
Pâdşâh-ı serîr-i şevket olur
Tarafından o mihr-i ihsânun
Aña kim zerrece himâyet olur
66. Dâmeni melce’-i sa‘âdet olup
Dergehi menba‘-ı kerâmet olur
Ol vücûd-ı şerîf-i bî-hemtâ
Lutf u ihsândan ‘ibâret olur
Meclisi kân-ı gevher-i in‘âm
Kefi bahr-i dür-i sehâvet olur
69. Âstânında ferş iden rûyın
H^vâbgeh-i sâz-ı ‘arş-ı râhat olur
O habîb-i Hudâ-yı zî ’l-minenün
Nice vafında yâr ‘ismet olur
Ki hayâl itse meclisin ‘ismet
Cür‘a-cûyâ-yı câm-ı ‘iffet olur
72. Serverâ şâh-ı kudsiyan-sipehâ
Hidmetün mâye-i hidâyet olur
Rûz derbânun olsa kapuñda
Kevkeb-i bahtı mihr-i tal‘at olur
Karakullukçı olsa kûyuña şeb
Bir dil-ârâ-yı mâh-sûret olur
75. Zîver-i sadr-ı bezm-i ‘irfânâ
Vasfuña kimde istitâ‘at olur
Her ser-i mûy biñ zebân olsa
Sanma evsâfuña nihâyet olur
Seni medh eyleyen Hudâ olıcak
Ben de vasfa nice liyâkat olur
78. Ben neyem kim bu kâra cür’et idem
Ben kimem ben de bu mahâret olur
Degülem ben bu devlete lâyıık
Bilmesem haddümi cehâlet olur

- Lîk maksûdum intisâbuñdur
Sanma kim iddi‘â-yı kudret olur
81. Umarum ‘afv olup kusûr u kûsûr
Cân u dil mazhar-i ‘inâyet olur
Ne kadar pür-kusûr olursa da çün
Câna perverde-i sadâkat olur
Bu cihetden ümîdüm oldur kim
Sebeb-i ‘afv u lutf u şefkat olur
84. Müstemendem mahall-i merhametem
Revişüm bâ‘is-i melâmet olur
Hayf sad hayf bu dil-i güstâh
Nice bir mübtelâ-yı töhmet olur
Unıdup meclis-i elesti dirîğ
Dâmen-âlûde-i kabâhat olur
87. Böyle kalursa korkaram dil-i zâr
Gark-ı şûr-âbe-i şenâ‘at olur
Ne ider meyl zühd ü takvâya
Ne heves-perver-i ‘ibâdet olur
El-amân ey şeh-i ‘atâ-pîşe
Çünkü kârûñ kula ‘inâyet olur
90. Ol zaman kim zülâl-i ihsânun
Câme-şûy-ı günâh-ı ümmet olur
Beni bir katresiyle pâk eyle
Saña şâyeste bu mürüvvet olur
Kehf-i erbâb-ı hayretâ şâhâ
Saña ol gün ki ‘arz-ı hâcet olur
93. Lutfuñ gark olup ‘avâm u havâs
Ümmete himmet ü i‘ânet olur
Hazretün den recâsı VAHYİNÜN
Katre-i şerbet-i şefâ‘at olur
Bu du‘âda budur ümîdüm kim
Şübhesiz mazhar-i icâbet olur
96. Ki Hudâdan bu midhate tevîk
Dikkat olsa aña beşâret olur
İmdi şimden-girü du‘â idelüm
Ki du‘â hatm-i nazma zînet olur

Tâ ki dillerde ‘ışk idüp cilve
Ehl-i dil hem-dem-i mahabbet olur

99. Ravza-i pâküñe salât ü selâm
Evvelin tuhfe-i ziyâret olur
Eylesün Hak şefâ‘atün efzûn
O kadar kim ne had ne gâyet olur

5.

**Der-Na‘t-i Şerîf ki Müsem mâ Be-İştiyâk-nâme Gofte ve Nüviste Der-Mısr-ı
Mahrûse**

Mefâ ‘ilün Mefâ ‘ilün Mefâ ‘ilün Mefâ ‘ilün
Hezec . - - - / . - - - / . - - - / . - - -

- Göñül fikr-i cemâl-i yâr ile gülzâr-ı hasretdür
Şiküfte güller anda ârzû-yı zevk-i vuslatdur
Hayâl-i kâkül-i müşgîn-i cânan kalb-i ‘âşıkda
Derûn-ı sâğar-ı Kevserde ‘anber-bûy-ı cennetdür
3. Ruh-ı ümmîdi eşk-i âteşînüm zerd-fâm eyler
Gül-i bâğ-ı heves nîlûfer-i cûy-ı harâretdür
Zer ü sîm-i sivâ olsun gıdâ-yı bûte-i ifnâ
Metâ‘-ı vuslatuñ ser-mâyesi nakd-i mahabbetdür
Giribân-ı şikîbi çâk çâk olsa ba‘îd olmaz
Anuñ kim cilvegâhı hârzâr-ı derd-i fûrkatdür
6. Dehân-ı hande-rîzûñ hasretiyle eşk-pâş olsam
Anuñ her katresi bir kulzüm-i lü’lü-yi hikmetdür
İrüşsün dûd-ı âhum kâmetuñ fikriyle eflâke
Bülend olsun ko tab‘um gibi serv-i bâğ-ı himmetdür
Kebâb itsem sezâdur mihr ü mâhı sîh-ı âhumla
Cebîn ü ‘ârızuñ hecriyle dil tennûr-ı mihnetdür
9. N’ola tennûr-ı mihnet olsa dil künc-i melâletde
Ki nâr-ı intizâr ile hemîşe germ-ülfetdür
Dime tâ key bu şekve âteşistân itdün âfâkı
Degüldür şekve bu hâl-i dil-i zârum hikâyetdür
Nice olsun bu gamdan şekve kim mahsûd-ı şâdîdür
Nice olsun bu mihnetden şikâyet ‘ayn-ı râhatdur
12. Bu derdün nice biñ dermânı gâltan hâk-i pâyında
Bu hecre nice vuslat zîb-bahş-ı saff-ı hidmetdür
İder bu intizâra nice zevk-i vaslı pây-endâz
O ‘ârif kim derûnî âşnâ-yı resm ü ‘âdetdür

- Bu fûrkat süllem-i kâh-ı sarây-ı kâmrânîdür
Bu fûrkat makdem-i şâh-ı visâle hoş beşâretdür
15. Bu deşt-i mihnetün her sengi yâkût-ı safâ-yı dil
Bu bâğ-ı hasretün her hârı gülzâr-ı meserretdür
Bu hasret hasret-i rû-mâl-i dergâh-ı mu‘allâdur
Bu hasret hasret-i dîdâr-ı şâh-ı dîn ü devletdür
Bu hasret iştiyâk-ı kûy-ı mahbûb-ı İlâhîdür
Bu hasret ârzû-yı revza-i sâhib-sa‘âdetdür
18. O ra‘nâ revza kim gülzâr-ı cennet dâgdârıdur
O kabr-i pâke kim hâki ‘abîr-i ceyb-i rağbetdür
Sezâ pervâne-i kandîli Cibrîl-i emîn olsa
Ki pertevgâh-ı şem‘-i bezm-i üns-â üns-i vahdetdür
Gubârın bilse ‘arş iksîr-i rif‘at kendüye şâyan
Şeref-bahşı anuñ îcâd-ı ferş ü ‘arşa ‘illetdür
21. N’ola Rıdvân aña gîsû-yı havrâdan hasîr itse
O türbe bûsegâh-ı kudsiyan burc-ı icâbetdür
Kemîne intisâbı gurreyi bedr-i münîr eyler
O hâkûñ zerre-i nâ-çîzi mihr-i evc-i rif‘atdür
O cây-ı akdesün mümkün mi evsâfın beyân itmek
Ki halvet-hâne-i sultân-ı iklîm-i risâletdür
24. Cenâb-ı hazret-i Ahmed resûl-i efdal ü emced
Medâr-ı devlet-i sermed şeh-i milk-i siyâdetdür
Habîb-i ekrem-i hazret edîb-i mekteb-i hikmet
Tabîb-i ‘illet-i kürbet devâ-yı derd-i zilletdür
Îmâm-ı mescid-i kümmel hitâm-ı zümre-i mürsel
Kıvâm-ı âhir ü evvel nizâm-ı şer‘ ü milletdür
27. Melâz-ı merhamet-cûyân amân-ı el-aman-gûyan
‘Atâ-cûy-ı hatâ-hûyan şefî‘-i cürm-i ümmetdür
Halîl-i hazret-i Mevlâ delîl-i cennet-i Me’vâ
Kefîl-i rahmet-i ‘uzmâ meh-i burc-ı hidâyetdür
Şehenşâh-ı mûkerrem dâd-h‘âh-ı ‘âlem ü âdem
Penâh-ı hurrem ü pür-gam hatâ-pûş-ı ra‘iyyetdür
30. Emîr-i ma‘delet-perver nasîr-i merhamet-güster
Zahîr-i ehl-i mahşer zîver-i sadr-ı şefâ‘atdür
Hudâ zât-ı şerîfin bâğ-ı ezhâr-ı kemâl itdi
Gül ü nergis o bâğa gûş-ı hikmet çeşm-i ‘ibretdür

- Cebîn-i tâbnâki matla‘-ı envâr-ı Subhânî
‘Îzâr-ı pâki mihr-i ‘âlem-ârâ-yı sabâhatdür
33. Münevver ruhları sad-berg-i al-i revza-i ‘irfan
Mu‘anber turesi şeb-bûy-ı gülzâr-ı kerâmetdür
O ebrû vü müje tîr ü kemân-ı menzil-i kavseyn
O dîde vâdî-i *mâ zâğ*da âhû-yı behcetdür
O pîşânî meh-i zulmet-zidây-ı *Leyle-i İsrâ*
O ‘ârız şem‘-i mihr-engîz-i halvetgâh-ı kurbetdür
36. Dehân-ı nüktedânı rûh-bahş-ı kâlib-ı tahkîk
Zebân-ı hoş-beyânı revnak-efzâ-yı fesâhatdür
Cemâli âftâb-ı âsmân-ı ‘ışk-ı Rabbânî
Kadi serv-i bülend-i mergzâr-ı istikâmetdür
Fesâhatle o ‘âlî-câhı vasfa var mı hâcet kim
Anuñ ednâ kelâmı zîver-i ‘arş-ı belâgatdür
39. Gubârın görmedi sahrâ-neverdân-ı şeref anuñ
O yekke-tâz-ı tenhâ-gerd-i deşt-i kâbiliyyetdür
O sultânı ‘s-selâtinüñ ne mümkün rütbesin idrâk
Ki aña hutbe *Kur‘an* sikke hod mühr-i nübüvvetdür
O Mahmûdü ‘l-hisâlün her nefesde gerçi kim şânı
Fütüvvetdür mürüvvetdür sehâvetdür semâhatdür
42. Velîkin rûz-ı mahşerde ‘usâta itdigi lutfuñ
Temâşâsından erbâb-ı mekârim mest-i hayretdür
Güvâh-ı huccet-i iclâli *erselnâk* ü *a‘taynâk*
Nişân-ı emr-i istiklâli mühr-i hâtemiyyetdür
Dutan dâmânını hâr olsa olur gonçe-i ra‘nâ
Süren yüz pâyna seng olsa la‘l-i tâc-ı ‘izzetdür
45. ‘Ulûm-ı evvelîn ü âhirîni zâtı câmi‘dür
Derûn-ı ma‘rifet-meşhûnı ‘ummân-ı fazîletdür
Penâh-ı ‘âcizânâ tekyegâh-ı müstemendânâ
Senün şân-ı şerîfüñ bî-kese lutf u himâyetdür
Gedâyân oldı mağbût-ı şehân dergâh-ı lutfunda
Garîbân âstânunda hased-fermây-ı servetdür
48. Gubâr-ı dergehün VAHYÎ-i zâra bir nigâh eyle
Talebkâr-ı nigâh-ı şefkatündür nice müddetdür
Yeter pâ-mâl-i ceys-i intizâr oldı şehâ lutf it
Harîm-i kûyuña eyle delâlet vakt-i ruhsatdur

- Türâb-ı pâyuña yüz sürmege Hakdan niyâz eyler
Aña devlet sa'âdet revza-i pâkûñ ziyâretdür
51. Ne rütbe dñn ise destûr-ı pâ-bûsunla rif'at vir
Eger hâk ise de hâk-i reh-i ehl-i hakîkatdür
Derûnın rûşen eyle lem'a-i mihr-i cemâlünle
Gam-ı hicrân-ile tenhâ-nişîn-i künc-i zulmetdür
Garîbüñ dil-figâruñ derdnâkûñ sîne-çâkûñdür
Ne rütbe lutf iderseñ aña sultânum isâbetdür
54. Nisâb-ı zevk-i vasla dest-res bulsa ba'id olmaz
O kim na't-i şerîfün aña mahsûl-i tabî'atdur
Velîkin şânına şâyân-ı vasfa kimde var kudret
O sultânuñ ki gerd-i râhı kuhl-i çeşm-i midhatdür
O şâh-ı taht-ı *levlâkûñ* Hudâ vassâfidur çün-kim
Aña şâyeste vasfı iddi'â 'ayn-ı kabâhatdür
57. Medîh-i fahr-i mevcûdâta kudret kanda ben kanda
'Ayârın bilmemek erbâb-ı isti'dâda töhmetdür
Murâdum âstân-ı Sidre-şân-ı 'arş-'unvâna
Zarâfetle bu yüzden çihre-sâyî-i zarâ'atdür
Bu takrîb ile itdüm 'arz-ı hâl ol server-i dîne
Vesîle lutf u ihsân-ı kerîmâne cesâretdür
60. Fakîrâne bu na't-i pâk-ile dergâha yüz tutdum
Ki anuñ berg-i sebzi tuhfe-i ashâb-ı şevketdür
Kusûrum dâmen-i 'afv ile mestûr olsa dñr olmaz
O dergâh-ı mu'allâ menba'-ı 'afv u mürüvvetdür
Recâm oldur ki hakkumda diye rûz-ı kıyâmetde
Benüm bu na't-h^vânumdur sezâvâr-ı himâyetdür
63. Melâz-ı mücrimânâ merhem-i zahm-ı dil ü cânâ
Bu güstâhuñ egerçi kârı 'isyân u şenâ'atdür
Velî budur ümîdi sâgar-ı lutf u nevâlün den
İki 'âlemde mest-i bâde-i emn ü selâmetdür
Kapuñda ümmetün den benden ednâ bende yok ammâ
Bu 'izzet 'izzet-i dâreyne miftâh-ı kifâyetdür
66. Bu mahrûru 'l-fu'âdı Kevser-i lutfuñla siyr-âb it
O gün kim tef ü tâbı dñr ez-vasf-ı 'ibâretdür
Fakîrem bî-kesem bî-çâreyem muhtâc-ı ihsânam
Benüm gibi garîbe merhamet hakkâ mürüvvetdür

- Beni dünyâ vü ‘ukbâda nevâlünle ser-efrâz it
Senün şânun ‘atâ vü lutf u ihsân u sehâvetdür
69. Salât-ile selâmun vaktidür na’t irdi pââyâna
Kelâm-ı pâke hüsn-i hâtime zîrâ tahiyyetdür
- Göñül tâ gâh hasret gâh vuslatla olup me’lûf
Gam u şâdı anuñla hem-dem ü hem-bezm-i sohbetdür
- Hudâ her demde itsün ol salâtı revzaña îsâr
Ki mikdârın anuñ fehm eylemek mahsûs-ı hazretdür

6.

**Na‘t-i Şerîf-i Sultân-ı Enbiyâ ve Burhân-ı Asfiyâ ‘Aleyhi ve ‘Alâ Âlihi ve
Ashâbihi Mine ‘s-Salâti Ezkâhâ**

Mefâ ‘ilün Mefâ ‘ilün Mefâ ‘ilün Mefâ ‘ilün
Hezec . - - - / . - - - / . - - - / . - - -

- Dil-i âşüfte kim dâ’im hayâl-i rûy-ı yâr eyler
Ne fikr-i vasl u ne endîşe-i bûs u kinâr eyler
- Sadâkatle vücûdın hâk-i pây-ı yâr iden merdün
Derûnından nice fikr-i dem-i vuslat güzâr eyler
3. Nukûş-ı gayriden sâf olmayınca safha-i hâtır
Nice âdem cihanda da‘vî-yi ‘ışk-ı nigâr eyler
- Hazer sad el-hazer ‘ışk-ı mecâz-âlûddan ey dil
Safâ-yı bezm-i ‘ayşî rehn-i derd-i intizâr eyler
- Cüvânun gamze-i hun-rîzi müjgân-ı dil-âvîzi
Seni zahm-âşnâ-yı tîr ü tîğ-ı âbdâr eyler
6. İderse bir nefes memnûn-ı vuslat ‘âşık-ı zârın
Teb-i hicrân ile sad sâle cismin reşk-i nâr eyler
- Çeker câm-ı elemle ‘âkıbet zehr-âb-ı hûn-ı dil
O kim dildâr ile zevk-i şarâb-ı hoş-güvâr eyler
- Hased ol merd-i sâ’ib-re’ye kim âb-ı nedâmetle
İdüp pâkîze levh-i kalbi istiğfârı kâr eyler
9. Eger mâ’il olursan mâ’il-i erbâb-ı ‘irfân ol
Ki ‘irfân âdemi her vech-ile nüzhet-şi‘âr eyler
- Ne nüzhet belki feyz-i hazret-i Feyyâz olup yârî
Benüm gibi seni bir şâ’ir-i mihr-iştihâr eyler
- Benem ol şâ’ir-i sâhir-edâ kim zînet-i nazmum
Zarîfân-ı zamânun çeşm-i hûşın hîredâr eyler
12. Eger şeh-bâz-ı tab‘um ‘âleme açsa per-i i‘câz
Hezâran Sâ’ib ü ‘Urfî vü Hassânı şikâr eyler

- O pâk-endîşeyem kim sihr ü i'câz-ı nikât-ı hûb
Telâkî-i dil-i şûhumla her-bâr iftihâr eyler
‘Îzâr-ı dil-rubâ vâsfında tahrîr itdigüm ebyât
Cihânı vakt-i deyde gülşen-i fasl-ı bahâr eyler
15. Eger meyl eylesem vâsf-ı leb ü dendân-ı dildâra
Dem-i midhatde hâmem lü'lü' ü gevher-nisâr eyler
Ne hâcet iftihâra rütbe-i nazmı bilen ‘ârif
Bu şî'r-i tâzemi gûş eyleyüp fehm-i ‘iyâr eyler
Koyup ‘uşşâkı ol meh bezm-i âgyâra firâr eyler
O güldür kim miyân-ı hârda cây-ı karâr eyler
18. İdüp pür-zahm gamze sîne-i pür-dâğum ol hûnî
Dil-i cevri-âşnâyı gülşen iken lâlezâr eyler
Dil-i fûrkat-keşîde rûz u şeb fikr-i ruh-ı yâri
Gehî meh-tâb gâhî âftâb-ı şu'ledâr eyler
Nice sünbûlsitânı vakf-ı nisyân eylemez ol kim
Ruh-ı gül-fâmıñ üzre seyr-i zülf-i müşg-bâr eyler
21. Musahhardur saña mülk-i suhan-gûyî bu gün VAHYÎ
Kelâmıñ fehm iden ahsente-gûyân i'tibâr eyler
Sen ol mazmûn-güster sihr-perver nûkte-pîrâsuñ
Ki tab'ıñ her edâyı bir nigâr-ı gül-'izâr eyler
Bu fahr ü bu temedduh gerçi nâ-şâyestedür ammâ
Ne çâre hâme-i mu'ciz-beyan bî-ihitiyâr eyler
24. N'ola vâsf olsa ol pâkîze-gû şâ'ir ki hemvâre
Kelâmın harc-ı evsâf-ı resûl ü çâr-yâr eyler
Cenâb-ı hazret-i Ahmed resûl-i efdal ü emced
Ki zâtın zâtına Mevlâ iki 'âlemde yâr eyler
Sen ol Peyğam-ber-i i'câz-perversin ki bir demde
Dıraht-ı mürdeyi feyz-i nigâhuñ mîvedâr eyler
27. Sen ol mühr-i nübüvvet-sikke sultân-ı mu'azzamsuñ
Ki Mevlâ kudsiyânı saña ceys-i bî-şumâr eyler
Nigâh-ı şefkatüñ bir bende-i nâ-çîze düş olsa
Hudâvend-i zaman şâh-ı cihan sadr-ı kibâr eyler
Eger mihr-i zamîrüñ pertev-endâz-ı cihân olsa
‘Amâ teşhîs-i ma'kûlâta kesb-i iktidâr eyler
30. Hücûm itse eger nezzâre-i kahruñ 'adû üzre
Vücûd-ı kînedârın âteş-i dûzah şerâr eyler

- Sen ol yekke-süvâr-ı ‘arsa-i pehn-i şecâ‘atsün
Nigâhuñ kabz-ı rûh-ı Rüstem ü İsfendyâr eyler
O şûh-ı meh-cebîn ü mihr-‘ârızsın ki mihr ü meh
Saña dil-dâdedür hemvâre bûs-ı reh-güzâr eyler
33. Kerem-tab‘â şefâ‘at-h^vâh-ı rûz-ı mahşerâ şâhâ
Ser-â-ser halk-ı ‘âlem saña ‘arz-ı iftikâr eyler
Bu VAHYÎ bendenî şeb‘ân-ı-h^vân-ı iltifât eyle
Nice demdür ki dergâhuñda ‘arz-ı hâl-i zâr eyler
Salât-ı bî-kıyâs olsun revân-ı pâküñe her dem
Gönülde tâ ki fikr-i vuslatuñ geşt ü güzâr eyler

7.

În Na‘t-i Şerîf Der-‘akab-ı Sıhhat ez Teb Gofte Şüd

Mefâ‘ilün Fe‘ilâtün Mefâ‘ilün Fe‘ilün

Müctes . . . / . . . - / . . . - / . . . -

- Sözüm ki âb-ı hayât-ı dehân-ı ‘âlemdür
Edâ-yı nâzüki kût-ı revân-ı ‘âlemdür
Sözüm ki sâgar-ı sahbâ-yı nüktedânîdür
Kemîne cür‘ası rıtl-ı girân-ı ‘âlemdür
3. Sözüm ki gülşen-i her dem bahâr-ı hikmetdür
Bahâ-yı berg-i güli gülsitân-ı ‘âlemdür
Sözüm ki kulzüm-i i‘câz-ı mevc-i dikkatdür
Nikât-ı dürr-i füsün rîsmân-ı ‘âlemdür
Sözüm ki câm-ı rahîk-i cenân-ı ma‘nîdür
Hayât-bahş-ı suhan-perverân-ı ‘âlemdür
6. Sözüm ki nâdire-sencân-ı dehre her beyti
Birer kasîde-i hayret-feşân-ı ‘âlemdür
Sözüm ki lehce-i tanzîr-i nâ-pezîrâna
Güzîde nüsha-i ‘akdü ’l-lisân-ı ‘âlemdür
Sözüm ki cevhere-i efser-i fesâhatdür
Nisâb-ı hayret-i bâzârgân-ı ‘âlemdür
9. Sözüm ki hûr-ı bihişt-i füsûn-sâzîdür
Nezâresi sebeb-i iftinân-ı ‘âlemdür
Sözüm ki mahzen-i sîm ü zer-i ma‘ârifdür
Nühüfte nüktesi genc-i nihân-ı ‘âlemdür
Şeh-i füsün-sipeh-i tahtgâh-ı ma‘nâyam
Letâ’if-i suhanum hüsn ü ân-ı ‘âlemdür

12. Benümle da‘vî-yi hüsn-i edâya cür’et iden
Hemîşe bî-siper-i mülzemân-ı ‘âlemdür
Benümle fenn-i suhanda nizâ‘ı hussâduñ
Mesâf-ı gürbe vü şîr-i jeyân-ı ‘âlemdür
Benümle ma‘reke-i nazma ‘azm iden gâfil
Gıdâ-yı ejder-i tîğ u sinân-ı ‘âlemdür
15. Suhanverân-ı zamâna salâ gelen gelsün
Dem-i mübâhase vü imtihan-ı ‘âlemdür
Bu nev-zemînüme tanzîre eylesün akdâm
O kim yegâne-rev-i şâ‘irân-ı ‘âlemdür
Göñül ki ‘ışkuñ aña hânumân-ı ‘âlemdür
Ümîd-i vasluñ ile kâmrân-ı ‘âlemdür
18. Ruhun tulû‘ını mağribde gösterür hurşîd
Hatunsa fitne-i âhir zamân-ı ‘âlemdür
Kadun kıyâmet ü endâmun âfet ü revişün
Hased-dih-i dil-i serv-i çemân-ı ‘âlemdür
Kelâm yok ki femündür delîl-i cevher-i ferd
Lebün hakîm-i şifâ-sâz-ı cân-ı ‘âlemdür
21. ‘Îzâr-ı alünî yâd eyleyen gurâb olsa
Yegâne bülbül-i sad dâstân-ı ‘âlemdür
Hayâl-i la‘lün ile câm-ı hûn-dil çekenün
Sirişki reşk-i mey-i ergavân-ı ‘âlemdür
Bu şî‘r-i bî-bedeli zîb-i gûş-ı tahsîn it
Ki nazm-ı VAHYÎ-i mu‘ciz-beyân-ı ‘âlemdür
24. ‘Îyâr-ı fehm-i suhan derk ider mahâretümi
Bilür nikâtum o kim hurdedân-ı ‘âlemdür
Kelâm-ı pâk-i belâgat-şî‘ârurun vasfı
Hemîşe zîver-i levh-i zebân-ı ‘âlemdür
Gelürse hâtıra tâ key bu fahr-i dîr-â-dîr
Ki nâ-pesend-i dil-i ‘ârifân-ı ‘âlemdür
27. Yeter ki hıttâ-i âdâbdan güzâr itdün
Bu iddi‘âya düşenler mihân-ı ‘âlemdür
Ko fahri mihr-i cihan-tâb iseñ de zerre görin
Ki meskenet sebeb-i ‘izz ü şân-ı ‘âlemdür
Bu hod-fürûşlğun yok mı hadd ü pâyanı
Bilen bilür suhanun hırz-ı cân-ı ‘âlemdür

30. Budur cevâb ki ser-mest-i bâde-i şevkem
Ki dil hemîşe kesel şâdmân-ı ‘âlemdür
Ne şevk şevk-i ‘adîmü ’l-‘adîl-i bezm-i visâl
Ki fikri hayret-i pîr ü cüvân-ı ‘âlemdür
Ne şevk şevk-i hayât-âver-i tahayyül-i dost
Ne şevk şevk-i beşâset-resân-ı ‘âlemdür
33. Ne şevk şevk-i suhan-güsterî-i na‘t-i nebî
Ki vasfî mâye-i feyz-i cinân-ı ‘âlemdür
Cenâb-ı fahr-i rusûl reh-nümâ-yı hayr-i sübûl
Güzîde-i cüz’ ü kül râzdân-ı ‘âlemdür
Tabîb-i derd-i güneş nûr-bahş-ı rûy-ı siyeh
Şeh-i sürûş-ı sipeh hükmrân-ı ‘âlemdür
36. Kelîm-i Tûr-ı tecellâ ‘alîm-i sırr-ı likâ
Hakîm-i mîr ü gedâ dil-sitân-ı ‘âlemdür
Îmâm-ı kible-i din muktedâ-yı ehl-i yakîn
Zeber-nişân-ı bihin dûdmân-ı ‘âlemdür
Güzîn-i zümre-i kümmel mu‘în-i dîn ü düvel
Mühîn-i Lât u Hübel nush-h^vân-ı ‘âlemdür
39. Meh-i sipîhr-i kerem âftâb-ı evc-i himem
Nesîm-i lutfî dem-â-dem vezân-ı ‘âlemdür
Refîk-i nâle-keşan dest-gîr-i mazlûman
Şefîk-i haste-dilan mihrbân-ı ‘âlemdür
Güvâh-ı zî ’l-‘azamet şâh-ı ıstîfâ-yı devlet
Penâh-ı ümmet ü millet amân-ı ‘âlemdür
42. Hizâne-bahş-ı sehâ zîb-i rahş-ı mihr ü vefâ
Şeh-i şehân-ı ‘atâ râygân-ı ‘âlemdür
Resûl-i ins ü perî rûh-ı cism-i nâmverî
Kemîne bendeleri husrevân-ı ‘âlemdür
Nebîyy-i ümmî-i a‘lem Muhammed-i ‘arabî
Ki hâk-i pâyı ‘abîr-i şehân-ı ‘âlemdür
45. ‘Ulüvv-i câhına nisbetle pest ‘arş-ı berin
Celâline göre devlet hevân-ı ‘âlemdür
Ne gördi ‘ilm ü ‘amelde nazîrini dünyâ
Ne bir müşâbihi hâtır-nişân-ı ‘âlemdür
Çü bildi devlet-i pâ-bûsını tevâzû‘ ile
Zemîn gayret-i heft-âsmân-ı ‘âlemdür

48. Verâ-yı Sidreyedür evvelîn pervâzı
Huçeste murğ-ı berîn âşyân-ı ‘âlemdür
Fazîlet aña izâfetle cerr-i fazl eyler
Ki irtifâ‘ı anuñ nasb-ı şân-ı ‘âlemdür
Cenâbı feyz-resân-ı dil-i havâs u ‘avâm
Rikâbı mültesem-i ins ü cân-ı ‘âlemdür
51. ‘Îzâr u kâkûlinüñ remzi ve ’*d-Duhâ* ve ’*l-Leyl*
Cemâli meş‘al-i rûz u şebân-ı ‘âlemdür
Çerâğ-ı hüsnine pervâne mihr ü mâh u nücûm
Esîr-i ‘ışk-ı mihân ü kihân-ı ‘âlemdür
Zülâl-i lutfî tarâvet-dih-i riyâz-ı ümîd
Nigâh-ı merhameti bâğbân-ı ‘âlemdür
54. Mahabbeti dili gülzâr-ı nev-bahâr eyler
Ki dâğ-ı ‘ışk-ı gül-i bî-hazân-ı ‘âlemdür
‘Aceb mi zîver-i mihrâb-ı ıstıfâ olsa
İmâm-ı cümle-i peygâm-berân-ı ‘âlemdür
Habîb-i mümteni‘ü ’l-misl vâcibü ’t-tekrîm
Medâr-ı hilkat-i imkâniyân-ı ‘âlemdür
57. Anuñla buldı zamân ü mekân nizâm-ı vücûd
Ki zâtı bedraka-i kârvân-ı ‘âlemdür
Hayâlî çeşme-i mâ‘ü ’l-hayât-ı haste-dilan
Nevâlî sofra-i bî-imtinân-ı ‘âlemdür
Yegâne saf-şiken-i rezmgâh-ı gayretdür
Aña kıyâs ile Rüstem cebân-ı ‘âlemdür
60. Kemîne cür’etin itse mülâhaza bir zen
Miyân-ı ma‘reke de Kahramân-ı ‘âlemdür
Peyâm-ı ma‘deletin zîb-i gûş-ı hûş idene
‘Îyâr-ı mîr ü gedâ hem-‘inân-ı ‘âlemdür
Revâ-yı sikke-i *levlâk* ü tâc-ı *erselnâk*
Sezâ-yı hutbe-i *Kur’ân* u hân-ı ‘âlemdür
63. Penâh-ı mihr ü mehâ şâh-ı ‘arş-ı tahtgehâ
Senüñle dâd u dihiş tev’emân-ı ‘âlemdür
Bülend-kevkebe sultânsın ki cünd-i semâ
Rikâbuña sipeh-i bî-kerân-ı ‘âlemdür
Zalâm-ı cehlden itdün cihânı sen tahlîs
Ruhıñ sirâc-dih-i hânedân-ı ‘âlemdür

66. Ne gûne vasf ideyüm rif'atün ki Cebra'îl
‘Uluvv-i şânuğa tahsîn-h^vân-ı ‘âlemdür
Nice beyân ideyüm midhatün ki meddâhuğ
Vücûd-bahş-ı zemîn ü zamân-ı ‘âlemdür
‘Arûs-ı vasfuğa olmaz sezâ-yı pâ-y-endâz
Bihin kumâş ki zîb-i dükân-ı ‘âlemdür
69. O vasf-ı pâk ki şâyeste-i kemâlün ola
Muhayyir-i dil-i rûhâniyân-ı ‘âlemdür
Kimem ki na‘tüñi îrâda ben cesâret idem
Bu kâr mu‘ciz-i sihr-âverân-ı ‘âlemdür
Budur ğaraz ki bu takrîb ile olam mensûb
O âstâne ki kehfü ’l-amân-ı ‘âlemdür
72. Kemîne hâk-i reh-i nâzımân-ı midhatünem
Bu pâye reşk-dih-i serverân-ı ‘âlemdür
Cenâb-ı pâküñe şâyân-ı vasfa yok miknet
Bu ‘özü-i müşterek-i vâsıfân-ı ‘âlemdür
Ne değlü kâsır isem na‘t-gûyuğam sad hamd
Ki hakkuma dinilür na‘t-h^vân-ı ‘âlemdür
75. Hezâr şerm ile bir na‘t-i pâk nazm itdüm
Beyânı hak bu ki ni‘me ’l-beyân-ı ‘âlemdür
Kusûr-ı sehvi olursa karîn-i ‘afvuğ eger
Sanî‘-i bî-bedel-i câvidân-ı ‘âlemdür
Bulursa nîm-nigâh-ı kabûlün ile şeref
Senâsı lâzıme-i kudsiyân-ı ‘âlemdür
78. Recâm odur ola manzûr nazra-i lutfuğ
Ki ümmete keremün dâstân-ı ‘âlemdür
Bakılsa gerçi ki mahz-ı kusûrdur suhanum
Velî kelâm-ı hulûs iktirân-ı ‘âlemdür
Hele ‘alâ kad[i]ri ’t-tâka dūr-nisâr itdüm
O hâk-i pâya ki tâc-ı keyân-ı ‘âlemdür
81. Mahallidür idelüm ‘arz-ı hâl o sultâna
Ki lutfı tekyegeh-i sâ’ilân-ı ‘âlemdür
Meded-resân-ı ğarîkân-ı bahr-i ‘isyânâ
Ümîd-i merhametün mû-keşân-ı ‘âlemdür
Harîm-i kûyuğun ednâ türâbı VAHYÎ-i zâr
Dirîğ hem-reviş-i güm-rehân-ı ‘âlemdür

84. Zebûn-ı gavta-i şûr-âbe-i şenâ'atdûr
Hemîşe pâ-be-gil-i hâkdân-ı 'âlemdür
Derûnı kârgah-i çâr-sûy-ı güstâhî
Hayâli h^vâce-i her dem ziyân-ı 'âlemdür
Süvâr-ı esp-i hevâ yekke-tâz-ı rüsvâyî
Sezâ-yı zemm-i cihan müstehân-ı 'âlemdür
87. Hizebr rûhını mûr-ı za'ife dönderdi
O nefis-i şûm ki pîl-i demân-ı 'âlemdür
Beyân olınsa eger kubh u hüsn kirdârı
Misâl-i kâf ile berk-i cihân-ı 'âlemdür
Nukûd-ı 'ömrin idüp sarf kâle-i 'isyan
Füsûs şimdi ser-i müflisân-ı 'âlemdür
90. Tezekkürî dili sûzân-ı nâr-ı haclet ider
Ki sû'-i hâl-ile nukl-i meyân-ı 'âlemdür
Bu hâl ile yine ümmîdvâr-ı lutfundur
Ki ilticâgeh-i bî-çâregân-ı 'âlemdür
Garîbüne nazar it el-amân sultânım
Fakîr ü bî-kes ü bî-nâm u şân-ı 'âlemdür
93. Olursa böyle fezâhatle rû-be-râh bekâ
Mahall-i girye vü âh u figân-ı 'âlemdür
Velî ümîdüm odur mazhar-i şefâ'at ola
Zebânı na'tüne çün tercemân-ı 'âlemdür
Bulursa zerre kadar intisâb dergehüne
Vesîle-i kerem-i müste'ân-ı 'âlemdür
96. Şefî'-i rûz-ı kıyâmâ medâr-ı her keremâ
Egerçi cürm-i 'azîmüm vezân-ı 'âlemdür
Velî o nâr-ı nedâmetle olmuşam sûzan
Ki her şerâresi dûzah-feşân-ı 'âlemdür
Bu haclet ile eger kad hamîde âh itsem
Göñül nişâne-i tîr ü kemân-ı 'âlemdür
99. Ne kim hilâf-ı rızâ itdi tevbe sad tevbe
Ki fîkr-i sıdkı beşâret-resân-ı 'âlemdür
Şefâ'atünle beni müstahakk-ı gufrân it
Hirâs-ı hışm ile dil nîm-cân-ı 'âlemdür
Hayât-ı dil başa ancak ümîd-i lutfundur
Ki rûh-ı cism-i recâ mürdegân-ı 'âlemdür

102. Yeter yeter hazer it olmadan suhan-güstâh
Bu na't-i pâk şeh-i hâverân-ı 'âlemdür
Türâb-ı pâyına 'arz-ı merâma harf yeter
'Atâsı vakf-ı hatâ-pîşegân-ı 'âlemdür
Zamân-ı hatm-i suhandur du'âya âgâz it
Şu vech-ile ki kabûli 'iyân-ı 'âlemdür
105. Sözümdê midhat-i ruhsâr u kâkülün tâ kim
Şikûfte gülşen-i sünbûlsitân-ı 'âlemdür
Saña o rûtbeyi virsün Hudâ ki 'arş-ı berin
Aña pesîn kadem nerdbân-ı 'âlemdür
Şefâ'atün ide Mevlâ o mertebe efzun
Ki 'öşri zâmin-i 'isyâniyân-ı 'âlemdür

8.

Der-Na't-i Şerîf-i Mefhar-i Mevcûdât 'Aleyhi Efdali 't-Tahiyyât

Mef'ûlû Fâ 'ilâtü Mefâ 'ilü Fâ 'ilün

Muzâri' - - . / - . - . / . - - . / - . -

- Bir dil ki 'ışk-ı pâk ile halvet-güzîndür
Hem-bezmi kudsiyân ile Rûhu 'l-emîndür
Bir dil ki nâr-ı 'ışk ola anda şerâre-pâş
Tûr-ı Kelîm sırr-ı kelâm-ı mübîndür
3. Bir dil ki mihr-i 'ışk aña pertev-feşân ola
Sadr-ı pesîni küngüre-i çârumîndür
Bir dil ki mest-i 'ışk ola sahbâ-yı feyz ile
Leb-rîz-sâz-ı ke's-i zamân u zemîndür
Bir dil ki rûyını kadem-i 'ışka ferş ide
Evvel makâmı pâye-i 'arş-ı berîndür
6. Bir dil ki sıdk ile reh-i 'ışka gubâr ola
Kuhlü 'l-cilâ-yı bâsıra-i hûr-ı 'îndür
Bir dil ki Çâr-bâğ-ı 'anâsırda 'ışk ile
Hem-bezm ü hem-mu'âşeret ü hem-nişîndür
Gûyâ fezâ-yı mecma'-ı bahreynde Kelîm
Tevfîk-i zî 'l-Celâl ile Hızra karîndür
9. Envâr-ı 'ışkdan o ki bî-behredür füsûs
Mihr-i münîr olursa da zulmet-rehîndür
Asl-ı usûl cümle zuhûrât-ı 'ışkdan
Bîh-i nihâl-i kevn ü mekân u mekîndür

- Dîbâce-i kitâb-ı ‘atâyâ-yı zî ‘l-minen
Ser-defter-i celâ’il-i feyz-i metîndür
12. Dükkân-ı pür-menâfi‘-i bey‘ u şîrâ-yı hayr
Ser-mâye-i ticâret-i dünyâ vü dîndür
Nâlân ider ‘anâdili handân ider güli
Fehm eyleyen sanâyi‘ini hurde-bîndür
Âsârın it müşâhede eşyâda cehli ko
Zann itme şekk ü vehm bu ‘ilm-i yakîndür
15. Pervâne vü çerâğı bir âteşle yandurur
Zâhirde biri hurrem ü biri hazîndür
Bir câmdan çeker ikisi bâde-i fenâ
Biri niyâzda birisi nâzenîndür
Zerrât-ı mihr-i ‘ışkdur envâ‘-ı mümkünât
Fehm idene bu sırrı hezâr âferîndür
18. ‘Işk iledür kıyâm-ı semâ vü ku‘ûd-ı arz
Bâlâ vü pestde eseri müstebîndür
‘Işk iledür temeyyüzi hâsuñ ‘avâmdan
Genc-i nukûd-ı ‘ışk dil-i kümmelîndür
‘Uşşâkı feyz-i ‘ışk Kelîm ü Halîl ider
Nâm-ı habîb anuñla Muhammed Emîndür
21. Ma‘şûk idindi zâtını ‘uşşâkdan Hudâ
Rif‘at ‘uluvv-i şânuña nisbet pesîndür
Şâh-ı rusûl güzîde-i gül hâdî-i sübûl
Sultân-ı ‘âşıkîn ü ser-i ‘ârifîndür
Mağbût-ı evvelîn ü şeref-bahş-ı âhirin
Mi‘mâr-ı dîn ü hâtime-i mürselîndür
24. Kân-ı himem şefî‘-i ümem menba‘-ı kerem
H‘ânından evliyâ-yı ni‘am rîze-çîndür
Sadr-ı kibâr müftehir-i ‘izz ü i‘tibâr
Hilm ü vakâr zâtına vâsf-ı bihîndür
Mümtâz-ı asfiyâ vü ser-efrâz-ı etkiyâ
Nûr-ı hüda ziyâ-yı dil-i ‘âlemîndür
27. Mihr-i kemâli râh-ber-i âhirîn iken
Bedr-i cemâli bedraka-i evvelîndür
Zât-ı şerîfî ‘illet-i kevn ü mekân olup
Ser-levha-i zuhûr o nûr-ı cebîndür

- Pervâne şem‘-i rûyına kerrûbiyân-ı kurb
Bûlbûl gül-i ‘izârına peyk-i emîndür
30. Rûz u şeb iki hâdim olup bezm-i feyzine
Mîhr ü meh iki micmere-i ‘anberîndür
Devlet-sarây-ı rif‘atin idrâk iden bilür
Kim ‘arş aña muhtasarı şeh-nişîndür
Sandûka-i cevâhir-i esrârdur femi
Nutk-ı şerîfi gayret-i dürr-i semîndür
33. Hükm-ile ‘âmil olana dârü ’l-emân olur
Her bir hadîsi ‘ârife hısn-ı hasîndür
Mahsûd-ı şâh-ı taht-nişîn-i zamândur
Kûyında bir ğarîb ki zîr-i zemîndür
Bir âftâbdur ki ‘adîmü ’z-zevâldür
Bir bedrdür ki naks u külefdan emîndür
36. Bir necmdür ki reh-ber-i râhî-i şer‘dür
Bir şem‘dür ki revnak-ı mihrâb-ı dîndür
Bir gonçedür ki zînet-i destâr ider şeref
Bir dürdür ol ki zîver-i tâc-ı yemîndür
Bir revzadur ki ‘ışk-ı Hudâdur şikûfesi
Bir devhadur ki feyz aña *mâ^{‘in} ma^{‘im}*dür
39. Bir servdür ki sâyegehi deşt-i haşrdur
Bir nahldür ki mîvesi sıdk u yakîndür
Ser-mâye sûk-ı midhatine i‘tirâf-ı ‘acz
Rişte le’âl-i vâsfına şevk ü hanîndür
‘Acz ü kusûr sed olamaz râh-ı na‘tine
‘Afv u kerem recâsı çü ni‘me ’l-mu‘îndür
42. Memdûh-ı ‘âlemâ şeh-i ‘âlî-menâkıbâ
Çün medh iden cenâbuñı medh-âfirîndür
Na‘t-i şerîfüñe dilümi gülşen itdigüm
‘Arz-ı rızâ-yı ruhsat-ı âh u enîndür
Kûyuñda çün hezâr ide bast-ı âh u zâr
Hengâm-ı ‘arz-ı hâl dil-i âteşîndür
45. Teşmîr-ı sâk ider beni tafzîha nefsi-i şûm
Cünd-i hevâ helâküm içün der-kemîndür
Cân el-aman ser-i şefekat-cû meded talep
Dâmânuña teşebbüs ider nevhagîndür

- Şâh-ı serîr-i ma‘deletâ kân-ı himmetâ
Lutf u kerem çü lâzime-i kâmilîndür
48. Mahsûl-i ‘ömri gârete kasd eyledi ‘adû
Bezl-i himâyet eyleyecek vakt ü hîndür
VAHYÎ-i zâr u bî-kese lutf u himâyet it
Hem haste hem şikeste vü hem dil-hazîndür
Rû-mâl-i hâk-i pâyuñ ile perverîş bulan
Dîrîne ‘abd-i bî-hüner-i kemterîndür
51. Dâreynde penâh idecek bir giyâhı yok
Ancak ümîd-i lutfuñ ile kâm-bîndür
Na‘l-i semend-i ‘afvuña yüz tutsa vechi var
Kûyuñ türâbına bu mülâyim zemîndür
Atma yabana hâr ise de dâmenüñ tutar
Gülzâr-ı ‘afv tekyegeh-i mücrimîndür
54. Şâhum vesîle ‘afvuña cürm ü kusûrîdur
Zevk-i kerîme ‘afv u kerem şekkerîndür
Al sâye-i himâyetüne rûz-ı bâz-hâst
Erbâb-ı cürm o sâyede râhat-güzîndür
Nîm iltifâtüñ aña nisâb-ı felâh olur
Lutf eyle gerçi lâyıkk-ı çîn-i cebîndür
57. Siyr eyle ol garîbi na‘îm-i şefâ‘ate
Çün ehl olan şefâ‘atüne müznibîndür
Na‘t irdi çünki gâyete başla tahîyyete
Engüş-t-i hatm-i nazma tahîyyet nigîndür
‘Işk ile tâ ki kevn ü mekân feyz-yâb olup
Hubb u vidâd ‘âşıkâ hablü ’l-metîndür
60. İkrâm ile salât u selâm ola revzaña
Ol rûtbe kim veleh-fiken-i hâsibîndür

9.

Der-Na‘t-i Şerîf-i Nâzenin Hilâl Ebrû-yı Hurrem-Sezâ-yı Me‘âb

Fe‘ilâtün Mefâ‘ilün Fe‘ilün

Hafîf . . . / . . . / . . .

‘Işk kim genc-i câvidânîdür
‘Âşık-ı zâra rûh-ı sânîdür
‘Andelîb-i riyâz-ı vahdetdûr
Kalb-i ‘uşşâk âşyânîdür

3. Serv-i bâğ-ı sivâ ‘adüvvidür
Verd-i gülzâr-ı kâmrânîdür
Dûdman-sûz-ı ‘akl u sabr u karâr
Hâne-pîrâ-yı râzdânîdür
Bahr-i tûfan-hurûş-ı âteş-i mevc
Kevser-i revza-i cinânîdür
6. Bir cüvân-ı sürûş-hasletdür
‘Arş-ı kalbüm anuñ mekânıdur
‘İşkdur şâ‘ir-i bedî‘-i beyan
Lübb-i ‘uşşâk tercemânıdur
Dil ki her dem nedîmdür ‘ışka
Hem-dem-i şûh u hem-zebânıdur
9. Dâ‘imâ feyz-yâb olup andan
Kârı Hallâkî-i ma‘ânîdür
Bâğ-ı ezhâr-ı nüzhet ü ‘irfan
Gülşen-i verd-i nüktedânîdür
Lutf-ı dil kâbil-i beyân degül
Dûr-ı ez-vasf-ı vâsıfânîdür
12. Böyledür böyle n’eyleyem ammâ
Derd-i hicrân dûdmânıdur
Mübtelâ-yı gam u firâk u elem
Beste-i kâkûl-i bütânîdür
Âh u efgân idüp hezârâsâ
Bu gâzel zîver-i lisânîdür
15. Dil gül-i ‘ışk-ı gülsitânîdür
Lîk vakf-ı dem-i hazânîdür
‘Ârız-ı dil-rubâda hat sanma
Zülf-i ham-der-hamuñ beyânıdur
Cebhesi üzre ebruvân degül
Rüstem-i fitnenüñ kemânıdur
18. Mû degül taraf-ı câm-ı la‘linde
Cem-i hoş-bezm-i dâstânîdür
Vakf-ı dâğ-ı derûn iden mâhı
Dil-berüñ hâl-i dil-sitânıdur
Halka temsîl olınsa vasf-ı sırât
Ol mehüñ gamze vü miyânıdur

21. VAHYÎ-i zâr esîr-i hasretdür
Rahm idersen şehâ zamânıdur
İtmese nazma iştiğâl gönül
Hem-demi âh ile figânıdur
Cevr-i tâli‘ hücûm-ı fûrkat-i yâr
Dile bahşâyış-i cihânîdür
24. Böyle işkeste dillüğümle yine
Suhanum Kevser-i cinânîdür
Nüket-i nazm-ı pâküm ehl-i dile
‘Âlem-i gayb armağanıdur
Vasf-ı ebrûda yazdığım ebyât
Kûh-ı ifsâh-ı bî-terânîdür
27. Medh-i zülfinde itdigüm efkâr
Reşk-i tasvîr-i kilik-i Mânîdür
Midhat-i ‘ârız eylesem suhanum
Hasret-i mihr-i âsmânîdür
Nükte-sencîde hâtırum gûyâ
Gamze-i şûh-ı dil-berânîdür
30. Nutkumı bezl-i hâs u ‘âm itmey
Bilürüm gevher-i yegânîdür
Ağa şâ‘ir dimem ki efkârı
Rûz u şeb midhat-i edânîdür
Nazmına hayf o nâzımın ki dili
Hırs u cerr ü su’âl kânıdur
33. Harf yazmam kasem bi-istignâ
Vasfına ol ki lutf-ı şânîdür
Nice şâyân-ı vasf olur bir hir
Tutalum ehl-i câh-ı ânîdür
Vasf-ı şâyeste-i e‘âlîdür
Sanma ‘unvân-ı câhilânîdür
36. Suhanum kadri andan a‘lâdur
Ki dîne midhat-i fülânîdür
Vasf idersem tabî‘atım iderem
Kim şeh-i mülk-i hurdedânîdür
Evc-i sihr-i helâl şeh-bâzı
Bâğ-ı i‘câz bâğbânıdur

39. Fehm olunmaz nikâtum ol şûhun
Ya miyânı yahud dehânıdur
Sözüm âb-ı hayâtdur kalemüm
Kevser-i feyz-i nâdirânîdür
Gonçe-i nükte-bûydu tab‘um
Sihr-i‘câz-ı bûlbûlânîdür
42. Ten-i hussâda hâme-i zerkâr
Tab‘umuñ tîğ-ı zer-nişânıdur
Sürh-rîz olsa vasf-ı la‘linde
Deşne-i tîz-i hun-feşânîdür
Şâhid-i fikrûme hat u ruh-ı yâr
Câme-i sebz ü ergavânîdür
45. Da‘vî-yi sihr tab‘-ı müsbetdür
Nazm u nesrüm çü şâhidânıdur
Gazelüm vasf-ı la‘l u ‘ârızda
Sâğar-ı âb-ı zindegânîdür
Safha-i nazm-ı pâküm üzre sûtür
‘Arş-ı i‘câz nerdbânıdur
48. Sürhda hâmem âteş üzre ‘abîr
Hatt-ı müşğîn anuñ duhânıdur
Bu temedduh bu fahr-i dûr-â-dûr
Sanma merdûd-ı ‘ârifânîdür
Medh olınsa n’ola o kim kârı
Na‘t-i şâh-ı cihâniyânîdür
51. Fahr-i ‘âlem nebiyy-i ekrem kim
Îzid-i pâk vasf-h‘ânıdur
Ahmed-i müctebâ ki her demde
Lutfi mebzûl-i ins ü cânîdür
Zâtı mahbûb-ı zî ‘l-minen suhanı
Gevher-i gûş-ı Ümmühânîdür
54. Cismi gülzâr-ı feyz-i Hak kalbi
Lutf u ihsân bostânıdur
Hâk-i pâyı ‘abîr-i dergâhî
Tûtiyâ kuhl-i Isfahânîdür
Dergehinde olan hazef-pâre
Zîver-i efser-i şehânîdür

57. Habbe-zâ dil-rubâ ki 'ışk-keşi
Şâhid-i bezm-i *len terânî*dür
Habbe-zâ hâne-zâr-ı 'ışk-ı hudâ
Ki melek reşk-i reh-revânîdür
Şâh-ı zemzem-suhan ki dergâhı
Ka'be-i rûh-ı kudsiyânîdür
60. Lutf-tab'â 'adîm-mânendâ
Midhatûñ baña hırz-ı cânîdür
Hokka-i dürr-i vasf olan diller
Haşre dek vakf-ı şâdmânîdür
Vâsıfâna cenâb-ı 'izzetden
Vasfı rütbe-i müjdegânîdür
63. Şems-i millet Muhammed-i 'arabî
Ki zekâ hasret-i mekânîdür
Şeh-i kudsî-sipâh kim Cibrîl
Bende-i hâs-ı âstânîdür
Deheni dürc-i dürr-i 'ışk sözi
Gevher-i feyz-i rîsmânîdür
66. 'Arş-tahtâ sürûş-huddâmâ
Dü-cihan vasfuññ beyânıdur
Ben kimem kim sezâ-yı vasfuñ olam
Lîk kasdum niyâz-h^vânîdür
VAHYÎ-i bî-şumâr-ı 'isyânam
Hevesüm lutf-ı râygânîdür
69. Bende-i kemterîn-i dergâham
Minnetüm nazra-i nihânîdür
Ser-te-ser mû-be-mû günâh oldum
Lutf vakti şefâ'at ânıdur
Ey resûl-i Hudâ be-hakk-ı Hudâ
Merhamet kıl kerem zamânıdur
72. Nefs-i bed-kîşe bendeyüz şâhâ
Lutf u cûd u 'atâ evânıdur
Dest-gîr ol şefâ'at eyle bize
Kerem it kim kerîm-şânîdür
Gerçi pür-cürm ü pür-günâham lîk
Şefkatûñ müjde-i 'iyânîdür

75. Müjde ey dil o şâh-ı feyz-sipâh
Dil-i her dem harâbbânîdür
Hamd sad hamd ki o zât-ı şerîf
Ümmetinüñ nigâhbânıdur
Tîr-i derd ü belâya destümde
Siperüm vasf u na‘t-h^vânîdür
78. Ne kadar pür-kusûr isem de hele
Suhanum vasfuñuñ beyânıdur
Dil-i zârıñ recâsı himmetüñüñ
Katre-i bahr-i bî-kerânıdur
Vaktidür idelüm du‘âya şürû‘
Ki du‘â kâr-ı ‘âcizânîdür
81. Biñ salât ü selâm-ı bî-mânend
Ki hîred mest-i ‘izz ü şânıdur
Ola her dem nisâr revzaña tâ
‘Âşıkâ ‘ışk rûh-ı sânîdür

10.

Der-Na‘t-i Resûl-i Emced Hazret-i Muhammed Salla ‘İllâhu ‘Aleyhi ve Sellem

Fe ‘ilâtün Mefâ ‘ilün Fe ‘ilün

Hafîf . . - - / . . - - / . . -

- Bir müsellim cüvândur hâmem
Şeh-i hayl-i bütândur hâmem
Bir siyeh-çerde tıfl-ı nâzükdür
Feyz-bahşâ-yı ândur hâmem
3. Dem-be-dem eşk-i hat revân eyler
Dîde-i ‘âşıkândur hâmem
Müşg-rîz-i sûtûr-ı ma‘nîdür
Gûyiyâ rîgdândur hâmem
Verd-i mazmûnı tâzedür her-bâr
Gülşen-i bî-hazândur hâmem
6. Eyleyüp cümleden ümîdin kat‘
Ser-i âzâdegândur hâmem
Şâh-bâz-ı ma‘ânî-i hikeme
Bir güzel âşyândur hâmem
Şâhid-i şûh-tab‘-ı efkâra
Leb-i gevher-feşândur hâmem

9. Menzil-i leşger-i ma‘ânîdür
Bir müferrih mekândur hâmem
Sadef-i dilde perveriş bulmuş
Dürere rîsmândur hâmem
Şâh-ı hûbân-ı lafz u ma‘nîdür
Server-i mehveşândur hâmem
12. Cânib-i zî ‘l-minenden ehl-i dile
Bî-gümân armağandır hâmem
Sîne-i kînedâr-ı a‘dâya
Nîze-i can-sitândur hâmem
Çekmede tîğın ser-i hasma
Rüstem-i bî-amândur hâmem
15. Rûh-ı elfâza nükte-perverdûr
Cism-i ma‘nâya cândur hâmem
Oldı sehv ü hatâsı sihr-i helâl
Şöyle mu‘ciz-beyândur hâmem
Tab‘a hayl-i hatâ yakîn olmaz
Elde hatt-ı emândur hâmem
18. Çeşm-i şeh-beyt-i şi‘r-i ‘Urfîye
Sürme-i Isfahândur hâmem
Bâğ-ı vâsfinda ideli reftâr
Bir tezerv-i cinândur hâmem
İdeli bûy-ı na‘tini izhâr
Micmer-i kudsiyândur hâmem
21. Ahmed-i mürselün ki medhinde
Reşk-i kerrûbiyândur hâmem
Şem‘-i na‘t-i nebiyy-i muhtereme
Gûyiyâ şem‘dândur hâmem
Evc-i vâsf-ı resûl-i ekremde
Mîhr ile tev’emândur hâmem
24. Âstân-ı sarây-ı na‘tinde
Ahkar-ı hâdimândur hâmem
Anda bârân-ı vâsf olup bâran
Bî-nücûm âsmândur hâmem
Sahn-ı gülzâr-ı na‘t-i pâkinde
Bûlbûl-i pür-fiğândur hâmem

27. Reh-i medhinde rû-be-hâk olalı
Hırz-ı cân-ı cihândur hâmem
Oldı hûy-kerde şermden zîrâ
Kemter-i vâsıfândur hâmem
Şeh-i Cibrîl-hâdimâ kapuğa
‘Abd-i bî-imtinândur hâmem
30. Olup iksîr-gîr-i na‘t-i nebî
Genc-bahş-ı şehândur hâmem
Gül-i vasf oldı anda perverde
Dil-güşâ gülsitândur hâmem
VAHYÎ-i pür-günâh u ‘isyânam
Ra‘yet-i müznibândur hâmem
33. Kıl meded kim sevâd-ı rûyumdan
Gûyiyâ bir nişândur hâmem
Bir fakîrem kapuğa destümde
Kâse-i sâ‘ilândur hâmem
Şâh-ı kerrûbiyân-ı sipâh-kenâ
Midhatünđe devândur hâmem
36. Budur ümmîd ‘afv ola cürmüm
Çün saña vasf-h^vândur hâmem
Dilde endîşe-i gam olmaz çün
Na‘tüñe tercemândur hâmem
Nağme-i medhün ideli izhâr
Nây-ı bezm-i cinândur hâmem
39. Midhatünđe ne dirse gerçekdür
Asdak-ı kâ‘ilândur hâmem
Mâ-hasal mahfil-i ma‘ârifde
Haşre dek na‘t-h^vândur hâmem

11.

Der-Na‘t-i Şerîf-i Habîbü ’r-Rahman ‘Aleyhi Elf Elf Salât fî Külli Ân

Mefâ‘ilün Fe‘ilâtün Mefâ‘ilün Fe‘ilün

Müctes . . . / . . . - / . . . - / . . . -

Kalem ki oldı zülâl-i hayâle fevvâre
Beyân-ı vasf-ı lebün döndi anda gül-nâra
Kalem ki sâgar-ı gerdân-ı vasf-ı la‘lün ola
Şarâb-ı merg içirür iştiâh hammâra

3. Kalem ki hâl-dih-i levh-i midhat ola ider
Füsûn-ı merdüm-i çeşm-i bütânı âvâre
Kalem ki medh-i ruh-ı yâri eyleye tahrîr
Hazân-ı reşk düşer nev-bahâr-ı gülzâra
Kalem ki ola nukat-pâş-ı nazm-ı meşk-i sûtûr
Döner sahîfe ruh-ı hâldâr-ı dildâra
6. Kalem ideydi eger vaz'-ı nokta hurşîde
İderdi 'âlemi hirbâ-sirişt yek-pâre
Kalem ki cilveger-i bâğ-ı vasf-ı vuslat ola
Tezerv-i 'ismet ider tevbe tarh-ı reftâra
Kalem ki gâliye-sâ-yı ruh-ı sahâ'if ola
Hased yazar dil-i meşşâta-i sihirkâra
9. Kalem ne mertebe hod-bîn olursa lâıykdur
Çü vasf-ı ebrû-yı yâr oldı kârı hemvâre
Kalem musâhib-i hem-râz-ı ehl-i 'irfândur
Küşâd-ı 'ukde-i râz eylesün mi âgyâra
Kalem ne mertebe medh olsa hûbdur çün-kim
Nedîmdür şu'arâ-yı füsûn-kirdâra
12. Sezâ-yı midhat olursa n'ola o kim kârı
İ'ânet ola benüm gibi mu'ciz-âsâra
Benem o şâ'ir-i nâdîde-nükte bîkr-edâ
Ki lutf-ı tab'umı yokdur mecâl inkâra
Benem o şâ'ir-i i'câz-ı fikr-i sihr-i hayâl
Ki feyz-i nutkum ider bahş-ı rûh eş'âra
15. Olurdi Sâ'ib isâbet hatâ hemîşe eger
Kemîne nüktemi kâdir olaydı izhâra
Pesîn fikrime bulsaydı dest-res 'Urfî
İderdi 'arfını perrende çarh-ı devvâre
Göreydi dikkatümi Enverî-i nâdiredan
Virürdi eşk-i hased nûr-ı dîdesin nâra
18. Benüm gibi kanı bir şâ'ir-i suhan-pîrâ
Ki mâlik ola dil-i şûh u tab'-ı sehâra
Kemâl-i ma'rifetem fehme ragbet eyler isen
Bu şî'r-i nâdire besdür bu hükmi eş'âra
Gözümde rûyını nakş eyledi o mekkâre
Gül-i şikûfte kodı sanki câm-ı ser-şâre

21. Göñül göñül ko temennâ-yı vaslı bir nazar it
Bu mâh-ı her deme mahsûf baht-ı ğaddâre
Fıgan fıgân o perî-peyker eylemiş ta‘yin
Rakîbî şefkate ‘uşşâk-ı zârı âzâra
Hezâr reşk o cesâret-şi‘âr-ı bû ‘l-hevese
Ki cism-i yâri çeke bâzuvân-ı efkâra
24. Hazer hazer o siyeh-mest-i ‘ışk hışmından
Ne kalb-i zâra bakar ne derûn-ı efkâra
Yeter yeter dili pâ-mâl-i esp-i nâz itdün
Ne var ne var nazar itseñ bu zâr-ı ğam-h‘âra
Zebân-ı VAHYÎ-i mu‘ciz-beyâna sad tahsin
Ki mâlik oldı bunun gibi pâk güftâra
27. Füsûn-ı ‘akluma tilmîz ‘akl-ı Eflâtun
Fünûn-ı tab‘um ider bezl-i ma‘rifet câra
Revâ mıdur bu tabî‘atla eyleyem rağbet
Beyân-ı vâsf-ı bütân u vezîr ü hunkâra
Degül degül kalemüm tâbe-haşr vakf iderem
Beyân-ı na‘t-i şerîf-i nebiyy-i muhtâre
30. Habîb-i hazret-i ‘izzet resûl-i zî ‘l-‘azamet
İmâm-ı ehl-i cemâ‘at şeh-i ‘abâ-hâre
Tabîb-i derd-i güneş çâre-sâz-ı bende vü şeh
‘Îlâkâr-ı dil-i müstemend ü pür-yâre
Vücûd-ı illet-i ğâ‘iyye-i zemîn ü zaman
Zuhûr-ıdur sebep icâd-ı dâr u diyâra
33. Cenâb-ı hazret-i Ahmed şehenşeh-i emced
Ki lutfı dâr-ı emân oldı ehl-i evzâra
İdeydi dûzaha mikdâr-ı zerre feyzi güzer
Cinân olurdu bedel sûz-ı reşk ile nâra
Sadâ-yı ma‘deleti olsa dehre gûş-nişin
Cihânı yek-sere nev-rûz iderdi her-bâra
36. İreydi gûşına h‘âb içre vâsf-ı insâfı
Salâh emrine başlardı nefis-i emmâre
Halâvet-i suhanın fehm ideydi zehr eger
Olurdu ta‘ne-zenân lezzet-i leb-i yâre
İrişse pertev-i ruhsâr-ı enverün mihre
Dönerdi ser-te-ser ‘âlem meh-i ziyâdâra

39. Şeb içre şu‘le-fiken olsa şem‘-i ruhsârûn
Virürdi revnak-ı sad rûze her şeb-i târa
O çeşm-i pür-hikemün mahz-ı lutfidur yohsa
Yeterdi tîğ-ı nigâhuñ helâk-i küffâra
Ser-i rehün-de olaydı eger gubâr-âlûd
Gelürdi bûy-ı bekâ nâf-ı müşg-i Tatara
42. Gubâr-ı reh-güzerün olsa ebr-i nîsânı
Rahîk olurdu düşen katreler fem-i mâra
İdince katre-çekân rûyuñ âftâb-ı hayâ
Nikâb-ı şermi sadeç çekdi dürr-i şehvâra
Çün oldu sencileyin mâhdan cüdâ Ka‘be
‘Aceb mi haşre dek itse libâsını kara
45. Şefî‘-i cürm ü günâhâ şeh-i ‘atâ-h^vâhâ
Nigâh-ı merhamet it VAHYÎ-i günehkâra
Şefâ‘at eyle kerem eyle lutf u ihsân it
Ne deñlü lâyıık ise hışm u ‘unf u âzâra
Du‘â evânıdur irdi kelâm encâma
Du‘â ile olunur intisâb ahrâra
48. Cihanda kilik-i emel zîb-i levh-i hâtır olup
Vücûd-bahş ola tâ kim nukûş-ı efkâra
Hemîşe revza-i pâk-i ‘adîm-mânendün
Ola hizâne salât u selâm ebrâra

12.

**Na‘t-i Şerîf-i Nebiyy-i Muhtâr Salavâtü ‘İlâhi ve Selâmuğu ‘Aleyhi ve ‘Alâ Âlihi
ve Ashâbihi ilâ Yevmi ‘l-Haşri ve ‘l-Karâr**

Mefâ‘ilün Fe‘ilâtün Mefâ‘ilün Fe‘ilün

Müctes . . . / . . . - / . . . - / . . . -

- Fiğan ki gülşen-i âmâl şûrezâr oldu
Nesîmi sarsar-ı ye’s âbı inkisâr oldu
Fiğan ki peyk-i heves reh-neverd-i h^vâhiş iken
Şehîd-i hancer-i hirmân-ı bî-kenâr oldu
3. Fiğan ki sâğar-ı dil pür-şarâb-ı behcet iken
Şikeste kâse-i zehr-âb hârhâr oldu
Fiğan ki cûşiş-i seyl-âb-ı eşk-i hasretten
Esâs-ı bîniş-i ‘işret hebâ-şî‘âr oldu
Fiğan ki şu‘le-i cevâleves gam u endûh
Hemm-âguş oldu bir ef‘î-i pîçdâr oldu

6. Fiğan ki yek-dil olup tâli‘ümle çarh-ı nigun
Bu âsyâb-ı belâda aña medâr oldu
Fiğan ki şâhçe-i bülbül-i visâl-i gönül
Hirâmgâh-ı gurâb-ı firâk-ı yâr oldu
O bâde-nûş-ı firâkam ki reşk-i cür‘am ile
Dehân-ı zehrde âb-ı hayât-ı mâr oldu
9. O şu‘le-pûş melâlüm zebâne-pâş olalı
Şerâr-ı âteş-i dûzahda şermsâr oldu
O bahr-i cûş-ı belâyem kemîne katremden
Cihân garka-i tûfân-ı ıztırâr oldu
Bu gûne cünbiş-i nâder-ber-â-ber-i çarha
Sebeb meger hüner-i Bû ‘Alî ‘iyâr oldu
12. Belî belî ezeli ehl-i dâniş ü hünere
‘Atâ gam u elem ü derd ü âh u zâr oldu
Benem o sihr-nevâ bülbül-i riyâz-ı suhan
Ki her terânesi mestî-dih-i hezâr oldu
Benem o gonçe-i gülzâr-ı nûkte-âb u hevâ
Ki fikr-i bûyî nigunsâr-ı zülf-i yâr oldu
15. Benem o şâ‘ir-i mu‘ciz-dem-i fûsun-lehce
Ki şöhretüm sebep-i terk-i iftihâr oldu
Hüner benümle meger iftihâr ide *min ba‘d*
Ki iftihâr hünerle yanumda ‘âr oldu
Velî bu emrde nâ-hak-şinâs-ı tab‘ olana
Ki çeşm-i dikkati reşk ile hîredâr oldu
18. Mahalli geldi ki bir ‘arz-ı hâl-i dâniş ola
O şî‘r-i nev ki bu *Dîvanda* der-kenâr oldu
Gönül ki âteş-i ‘ışk ile şu‘lezâr oldu
O dûzah oldu ki ‘Adn aña reşkdâr oldu
Helâk-i siklet-i şâdî ola o kim tab‘ı
Gamin koyup o mehûn zevk ümîdvâr oldu
21. Hayâl-i rûy-ı visâl ile dil ki gülşen idi
Hücûm-ı şerha-i fûrkatle lâlezâr oldu
Safâ-yı hâli koyup dil recâ-yı la‘l eyler
Bırakdı neş’e-i afyûnı bâde-h^vâr oldu
Füsûn-tab‘-ı sih[i]r-perverünle ey VAHYÎ
Riyâz-ı şî‘r zemistân iken bahâr oldu

24. Bu kadr-i pâye-bülendün ne sûdı var bilsek
Ne lutfi oldu müşâhid ne i'tibâr oldu
Hemân yok yere tazyî'-i nakd-i 'ömr itdün
Ne câh-ı kâm ele girdi ne iktidâr oldu
Dem oldu kim idesün 'arz-ı hâl o servere kim
Gubâr-ı dergehi rû-mâlgâh-ı 'âr oldu
27. Habîb-i fahr-i dil ü dîn ü milletem ki sürûş
Ser-i tarîka-i iclâline gubâr oldu
Cenâb-ı mefhar-i 'âlem Muhammed-i 'arabî
Kemîne bendesi reşk-âver-i vakâr oldu
O feyz-mâye kerem-kârgâh-ı hoş-güherün
Le'âl-i midhati Cibrîle gûşvâr oldu
30. Yegâne h^vâce-i bâzâr-ı ıstıfâdur ol
Ki rîze seng-rehi dürr-i şâhvâr oldu
Gedâ-yı bî-ser ü sâ mân-ı kûy-ı 'âtıfeti
Şeh-i memâlik-i i'zâz u i'tibâr oldu
O şâh necl-i sehâdur ki tab'-ı Rûhu 'l-kuds
Simât-ı meclis-i feyzinde nân-h^vâr oldu
33. Olursa reşk-dih-i tînete safî şâyan
Nigâh-ı lutfi ki bir hâke sâzkâr oldu
Ne dem ki tîğ-ı kazâ-zâğ-ı merg şa'sa'sı
Hirâm-sâz-ı çimenzâr-ı kârzâr oldu
Atıldı hûn-ı 'adû 'arşa hem-çû fevvâre
Ruh-ı sürûşa idüp katreler bihâr oldu
36. Görüp o şevketi ashâb-ı mahz cür'et olup
Dem-i mesâfda reşk-i sipend-i yâr oldu
Ebû Cehil gibi her kec-nigâh-ı ikbâli
La'în-i sermedî vü h^vâr u sengsâr oldu
Türâb-ı kûyına rû-mâl iden Hız[ı]r-diller
İki cihânda 'azîz ü sepîdkâr oldu
39. Hezâr-ı pür-nağam-ı gülsitân vasfı olan
O deñlü hurrem ü şâdân u kâmkâr oldu
Ki şevk-i kalbine nisbet anuñ şeh-i 'âlem
Garîb-i bî-ser ü sâ mân sûgvâr oldu
Hased hased o gürûh-ı huçeste-menkabete
Ki ol şehenşeh-i kudsî sipâha yâr oldu

42. Cenâb-ı hazret-i Sıddîkdur biri anuñ
Ki o hulâsa-i kûyına hem-civâr oldı
Gehî seferde vü gâhî hazaarda hem-dem olup
Zamân-ı hicret ü fûrkatde yâr-i gâr oldı
Tarîk-i dînde makdûrın eyleyüp mebzûl
O şâh-ı Hâtem-‘atâ mâ-melek nisâr oldı
45. İkinci hazret-i Fârûk kim ser-i dîne
Peyâm-ı ma‘deleti tâc-ı iştihâr oldı
Ne dem ki hışm ile şemşîrin eyledi ‘uryan
Ne dem ki nîzesi a‘dâya ber-güzâr oldı
Cihânı garka-i hûn eyledi o mertebe kim
Sadefde dâne-i dūr-dâne-i enâr oldı
48. Üçünci hazret-i ‘Osmân câmi‘u ’l-*Kur‘an*
Ki bezr-i ‘âtıfete kalbi kiştzâr oldı
O gülsitân-ı edebdür ki gonçe-i şermin
Görüp melâ’ike-i ‘arş şermsâr oldı
İmâm-ı mescid-i ‘irfân olursa lâıkdur
Ki rûy-ı mâh-feri şem‘-i nûr-bâr oldı
51. Bilâ-mu‘âraza dördüncidür ‘Aliyy-i velî
Ki bûs-ı dergehi reşk-i dil-i kibâr oldı
Mesâf-ı rûz-ı gazânun ‘adîm-mânendi
Ki gırre şîr-i ner-i Âfrîdgâr oldı
Fu‘âd-ı bî-gışı dürc-i le‘âl-i feyz-i Hudâ
Derûnı mahzen-i ilhâm-ı Girdgâr oldı
54. Şehenşeh-i dü-cihânâ cihân-ı ‘irfânâ
Kemîne bendelerün şâh-ı tâcdâr oldı
Dirîg gird-i reh-i midhatün olan VAHYİ
Hücûm-ı bâd-ı firâk ile nîmkâr oldı
Meded meded nıgeh-i şefkatünle şâdân it
Yeter yeter dile hırmân-ı gam-güsâr oldı
57. Beni tahammül-i cürm ü güneş za‘îf itdi
Gönülse bâr-ı gam-ı hecr ile nizâr oldı
Nesîm-i meyl-i hevâ ile gülşen-i dilde
Şikûfte gonçe-i perhîz târmâr oldı
Mahall-i merhametem ‘afvun isterem şâhâ
Zamân-ı cûşîş-i eltâf bî-şumâr oldı

60. Ne deŒl mcrim isem hamd sad hamd krum¹
Beyn-ı na't-i resl  ahr-yr oldu
Du'ya bařlayalum sz-ı dille hasret ile
Tamm-ı vakt du'-yı senn kr oldu
Salt ile ola pr-nr revza-i pkn
Cihanda ma'deletn t mihir-'yr oldu
63. Garaz mnsebet-i hk-i py-ı vasfudur
BaŒa cenbuŒa yohsa du' ne kr oldu

13.

lhyyt-ı Na't-i řerf

Mef 'iln Mef 'iln Mef 'iln Mef 'iln

Hezec . - - - / . - - - / . - - - / . - - -

- Gnl kim anda 'ıřku cilvegerdr y Resla 'llh
Hased-fermy-ı 'arř-ı mu'teberdr y Resla 'llh
Yzin ferř-i ser-i kyu iden erbb-ı 'irfna
Gubr-ı dergehn kuhl-i basardur y Resla 'llh
3. O řem'-i bezm-i ns- ns-i 'ıřk-ı pk  haksın kim
Kemne pertevn řems  kamerdr y Resla 'llh
Kadn bir serv-i Firdevs-i tecelldr ki zıllinde
Btn kevn  mekn pr-zb  ferdr y Resla 'llh
Eger sretde hurřd olsa da ma'nde zulmetdr
Senn 'ıřkudan ol kim b-haberdr y Resla 'llh
6. Kapuda halka-i der gibi kaldı eřmi VAHYnn
Garbndr recsı bir nazardur y Resla 'llh

14.

Na't-i řerf

Mef 'iln Mef 'iln Mef 'iln Mef 'iln

Hezec . - - - / . - - - / . - - - / . - - -

- O kim 'ıřkula pr-derd  elemdr y Resla 'llh
'Usta stnı mltesemdr y Resla 'llh
N'ola glzr ry-ı vuslat olsa iltiftula
Gamla nie demdr dde nemdr y Resla 'llh
3. Sen ol sultn-ı *ev edn* serr-i mlk-i vuslatsın
Ki 'arřa tahtu olmak muŒtenemdr y Resla 'llh

¹

Vezin bozuk.

Garaz ‘arz eylemekdür hâlûmi dergâh-ı vâlâña
Ki kaddüm bâr-ı ‘isyân ile hamdur yâ Resûla ‘llâh

Elüm tut baña imdâd eyle ihsân eyle lutf eyle
Çü kârûn müstemendâna keremdür yâ Resûla ‘llâh

6. Gubâr-ı dergehün VAHYÎ-i nâ-çîze şefâ‘at kıl
Giriftâr-ı hevâ ğark-ı töhemdür yâ Resûla ‘llâh

15.

Na‘t-i Şerîf

Mefâ ‘ilün Mefâ ‘ilün Mefâ ‘ilün Mefâ ‘ilün

Hezec . - - - / . - - - / . - - - / . - - -

Ruhun gülzâr-ı Firdevs-i ezeldür yâ Resûla ‘llâh
Kelâmun Kevsere ni‘me ‘l-bedeldür yâ Resûla ‘llâh

Kadün mahsûd-ı Tûbâdur hırâmun ğayret-i Sidre
Gubârûn ‘arşa kuhl olsa mahaldür yâ Resûla ‘llâh

3. Gumûm-ı ma‘siyet medhûş-ı ye’s itmez dil-i zârı
Çü lutfun zîver-i levh-i emeldür yâ Resûla ‘llâh

N’ola tercîh idersem hikmet-i Lokmâna ihsânun
Devâ-yı ‘illet-i sehv ü zeledür yâ Resûla ‘llâh

Ne mümkün hall olunmak ‘ukde-i vasfun murâd üzre
Za‘îfem dest-i endîšem eşeldür yâ Resûla ‘llâh

6. Bu VAHYÎ bendenî kıl neşve-yâb-ı cür‘a-i lutfun
Humâr-âlûd-ı ğamdur pür-keseldür yâ Resûla ‘llâh

16.

Na‘t-i Şerîf

Mefâ ‘ilün Mefâ ‘ilün Mefâ ‘ilün Mefâ ‘ilün

Hezec . - - - / . - - - / . - - - / . - - -

Gönüller ârzûmend-i visâlün yâ Resûla ‘llâh
N’ola ‘uşşâka ‘arz itsen cemâlün yâ Resûla ‘llâh

Helâk eylerdi erbâb-ı hatâyı derd-i ‘uşşâkun
Şifâ-sâz olmasa fikr-i nevâlün yâ Resûlla ‘llâh

3. Sen ol sultân-ı baht-ı taht-nişîn-i ıstıfâsın kim
İder Cibrîli dem-beste kemâlün yâ Resûla ‘llâh

N’ola hemvâre mağşûş nukûş-ı mâ-sivâ olsa
O dil kim olmaya fikri hayâlün yâ Resûla ‘llâh

Yüz urdı dergeh-i vâlâña VAHYÎ-i ‘atâ-cûyun
Yeter devlet olursa pâ-y-mâlün yâ Resûla ‘llâh

17.

Na‘t-i Şerîf

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

Mücrimem ‘afvun ‘atâ kıl yâ Resûla ‘llâh meded
Dermendem bir devâ kıl yâ Resûla ‘llâh meded

Rağbet-i lezzât-ı zellât itdi zulmânî beni
‘İşkuñ-ıla pür-ziyâ kıl yâ Resûla ‘llâh meded

3. Keştî-i dil tâbe-key gird-âb-ı gird-i hecr ola
Vuslatuñla âşnâ kıl yâ Resûla ‘llâh meded

Kalb-i müştâkı koma fûrkatde mahmûruñdur
Mest-i sahbâyı safâ kıl yâ Resûla ‘llâh meded

Rûz-ı mahşerde şefâ‘at-h^vâham ol lutf eyleyüp
‘Afv ü gufrâna sezâ kıl yâ Resûla ‘llâh meded

6. Gülsitân-ı na‘t-i pâkünde bu VAHYÎ bendenî
‘Andelîb-i hoş-nevâ kıl yâ Resûla ‘llâh meded

18.

Na‘t-i Şerîf

Mefâ ‘ilün Mefâ ‘ilün Mefâ ‘ilün Mefâ ‘ilün

Hezec . - - - / . - - - / . - - - / . - - -

Cenâbuñdan talebkâr-ı nevâlem yâ Resûla ‘llâh
Rehâ-h^vâhende-i bend-i celâlem yâ Resûla ‘llâh

Halâs it dest-i ihsânıñla lutf it ben siyeh-rûyı
Garîk-i lücce-i cürm ü vebâlem yâ Resûla ‘llâh

3. Beni şâdân-ı pâ-bûs-ı visâl it mahz-ı lutfuñla
Esîr-i derd-i hecrem pür-melâlem yâ Resûla ‘llâh

Mukîm-i bezm-i ‘iffet câ-nişîn-i künc-i ‘ismet kıl
Meded bâd-ı hevâdan bî-mecâlem yâ Resûla ‘llâh

Nigâh-ı iltifâtuñla n’ola şâyân-ı şevk olsam
Garîbem VAHYÎ-i şefkat-su’âlem yâ Resûla ‘llâh

19.

Na‘t-i Şerîf

Mefâ ‘ilün Mefâ ‘ilün Mefâ ‘ilün Mefâ ‘ilün

Hezec . - - - / . - - - / . - - - / . - - -

Gönül yüz sürmek ister hâk-i pâya yâ Resûla ‘llâh
İre tâ rütbesi fevka ‘l-‘alâya yâ Resûla ‘llâh

- Hayâl-i revza-i pâkûn dili reşk-i cinân itdi
Mahal olsa n'ola zevk ü safâya yâ Resûla 'llâh
3. Sülûkinde şeb-i deycûrı seçmez rûz-ı rûşenden
Uyan 'ışkuñ gibi bir reh-nümâya yâ Resûla 'llâh
- Sirişkin râh-ı 'ışkuñda ğubâra eylesün tebdîl
İdenler ârzû kuhlü 'l-cilâya yâ Resûla 'llâh
- Garîbem derdmendem bî-kesem dergâha yüz tutdum
Meded sad el-meded eyle himâye yâ Resûla 'llâh
6. Kodı ihlâs ile dergâhuña yüz VAHYÎ-i sâ'il
'Atâlar eyle lutf it ol gedâya yâ Resûla 'llâh

20.

Na't-i Şerîf

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

- Dehânuñ râzdân-ı 'ilm ü hikmet yâ Resûla 'llâh
Zebânuñ tercemân-ı sırr-ı vahdet yâ Resûla 'llâh
- Sipâh-ı evvelîn ü âhirînün şâhı zâtundur
Senündür taht-ı devlet tâc-ı 'izzet yâ Resûla 'llâh
3. Recâ-yı ilticâ-yı dergehünle 'azm-i râh itdüm
Meded def' itme lutf eyle icâzet yâ Resûla 'llâh
- N'ola müjgân u çeşm ü rûyumı bu yolda pây itsem
Derûnî eyledüm kasd-ı ziyâret yâ Resûla 'llâh
- 'Aceb mi rûzgâr el virse yüz sürsem o dergâha
Beni hâkister itdi nâr-ı fûrkat yâ Resûla 'llâh
6. Reh-i 'azmi idince pâk çirk-âb-ı 'avâ'ikden
Akıtdum dîdeden çok eşk-i hasret yâ Resûla 'llâh
- Sürüp biñ şerm ile yüz âstâna VAHYÎ-i 'âsî
Cenâbuñdan niyâz eyler şefâ'at yâ Resûla 'llâh

21.

Der-vasf-ı Mâh-ı Ramazân u Kandîl ü Tesbîh ü Temcîdeş

Fe 'ilâtün Fe 'ilâtün Fe 'ilâtün Fe 'ilün

Remel . . - - / . . - - / . . - - / . . -

Hamdû li 'llâh dil-i şeydâ yine şâdân oldu
Ceyş-i nâ-kâmî-i 'uşşâk perîşân oldu

Hamdû li 'llâh yine bezm-i emel-i şâdîde
Şem'-i kâfûrî-i ümmîd fûrûzân oldu

3. *Hamdū li 'llāh* yine def' itmege cū'-ı emeli
H^vân-ı eltâf-ı Hudâ dehre nümâyân oldu
Hamdū li 'llāh ki zuhûr eyleyüp eyyâm-ı neşât
Şeb-i deycûr-güsîl h^vâb ile yeksân oldu
Hamdū li 'llāh açılup yine serâ-perde-i şevk
Nâz-ı sad sâlesine kâm-ı peşîmân oldu
6. Tîre-i ebr-güsîl keşf olup evc-i dilde
Mâh-ı dest-âverî-i zevk nümâyân oldu
Vâsıl-ı bezm-i dil olunca nigâr-ı ümmîd
Baht ile nice zaman dest ü girîbân oldu
Def'-i târ-ı gam idüp zevk-i kudûm-i ramazan
Âsmân-ı dile gûyâ meh-i tâbân oldu
9. Şehri bir gülşen-i zîbendeter itdi fî 'l-hâl
Her menâre sanasın Lâle-i Nu'mân oldu
Giceler zâhir olan şu'le-i kandîl degül
Gülşen-i lutf-ı İlâhîde ırâğân oldu
Feyz-bahş olmada 'uşşâka sadâ-yı temcîd
Her mü'ezzin sanasın bülbül-i nâlân oldu
12. Döşenüp meclis-i gufrâna fütûr-ı rahmet
Rûzedârân gene şevk-ile şeb'ân oldu
Her menâre görünür şûh-ı ser-efrâz gibi
Gûyiyâ sahn-ı cihan vâdî-i Ken'ân oldu
Savt-ı tesbîh ile câmi'ler olup mâl-â-mâl
Sanki bir bülbülü çok hûb gülistân oldu
15. Tâb-ı kandîl degül ân-ı cemâl-i ramazan
Şu'le-güsterlik idüp şem' fûrûzân oldu
Gûşe gûşe okınup şevk ile *Kur'ân*-ı 'azîm
Ser-te-ser rûy-ı zemin şimdi debistân oldu
Meh-i savm ile cihan hâsılı revnakver olup
Vasf-ı VAHYÎ-i suhan-pervere şâyân oldu
18. Benem ol şâ'ir-i bî-bâk ki her mazmûnum
Reşk-i ihvân u hased-kerde-i yârân oldu
Kadrümi nazmumı fehm eyleyen idrâk eyler
Suhanum tılsım-ı gencîne-i 'irfân oldu
Şeh-i endîşe-sipeh tab'-ı bülendümdür kim
'Âleme efser-i i'câz ile sultân oldu

21. Nükteme ben-dahı reşk eylerem insâf idicek
Ki zarâfetle dil-i şûhuma mihmân oldı
Benem ol münşî-i mektûb-ı me'âl-i i'câz
Ki hîred dikkat-i endîşeme hayrân oldı
Ben o pâkîze-edâ nâdire-gûyâyam kim
Feyz-i Hak nâme-i iz'ânuma 'unvân oldı
24. Reşk-i bûs-ı leb-i la'lîn-i nigâr-ı nazmam
Dâğ-sûz-ı dil-i pür-kîn-i hasûdân oldı
Satr-ı eş'âr-ı bülendümde olan her harfüm
Ten-i a'dâya birer hancer-i bürrân oldı

22.

Kasîdeyiçe Der-vasf-ı 'Îd-i Rûze ve Ahvâl-i İstanbûl

Fe 'ilâtün Fe 'ilâtün Fe 'ilâtün Fe 'ilün

Remel . . - - / . . - - / . . - - / . . -

- Bâreka 'llâh zihî 'îd-i şerîfû 'l-eyyâm*
K'oldı mesrûr kudûmiyle dil-i hâs u 'avâm
- Lev haşa 'llâh zihî rûz-ı ferah-zây-ı latîf*
Buldı teşrîfi ile zevk ü safâ kalb-i enâm
3. Oldılar şevk-ile şeb'ân-ı na'îm-i Mevlâ
İştihâ-yâb-ı meh-i savm olan erbâb-ı sıyâm
Rûzedârân-ı firâk eylesün iftâr-ı visâl
Güzerân itdi meh-i rûze irişdi bayrâm
Yevm-i 'îd oldı hevâ mu'tedil 'âlem pür-şevk
İtse hûbân-ı Sitanbûl n'ola nâz ile hırâm
6. Geçit idüp kand ile kannâdlar etrâfı dilâ
Fıkr-i bûs-ı leb-i dildâra iderler ikdâm
Câme-i şa'sa'a-perdâz-ı sepîd ile nigâr
Âb-ı mevvâcda gûyâ ki mukaşşer bâdâm
Sayd-ı murğ-ı dil içün eylemiş ol meh hakkâ
Hâlini dâne vü gîsû-yı girih-gîrini dâm
9. Kendi hûb u revîşi hûb u libâsı mergûb
Cünbiş-i gamzesi ârâm-rubâ-yı suvvâm
Bu letâfetle aña cân u ser olmazdı bahâ
Olmasa gülşen-i vasluñ güli hicrân-ı zükâm
'İddür 'âşıkâ kand-i lebünj ihsân eyle
Ey şehenşâh-ı zarâfet-sipeh ü 'ışk-gulâm

12. Merhabâ ol meh-i tannâz-ı vefâ-kirdâra
Dest-bûsıyla dil-i pür-ğama bahş eyledi kâm
Mest-i câm-ı mey-i zevk oldı gönül ma‘zûruz
Eylesek hâl-i dil-i zârı o şûha i‘lâm
Vakt-i izhâr-ı vefâ mevsim-i dil-cûyîdür
‘Âşık-ı zârı n’ola eylese şâyân-ı selâm
15. Pür-safâ oldı cihan ‘işret ü zevk oldı ‘iyan
VAHYİ-i hûb-beyân eyledi inşâ-yı kelâm
Benem ol şâ‘ir-i hoş-tab‘ ki hüsn-i sebküm
Oldı gâretger-i memdûhî-i nazm-ı nazzâm
Nağme-senc olsa eger nazmum ile mutrib-i şûh
Raks ide şevk-ile her mürde-i efsürde-‘izâm
18. Tab‘-ı pâkümdür o ‘allâme-i nâdire-edâ
Olsa tilmîz sezâdur aña tab‘-ı Hayyâm
Reşk-sâz-ı dil-i erbâb-ı ma‘ârifdür hep
Ol suhan kim dil-i şûrîdeme oldı ilhâm
Bu kadar itmez idüm hâmeyi güstâh-makâl
Lîk mestî-i safâ itdi bu kâra ikdâm

23.

Kasîdeyiçe Berây-ı ‘Îd-i Rûze ve Evsâf-ı Hûbân u Üftâdegân

Fe ‘ilâtün Fe ‘ilâtün Fe ‘ilâtün Fe ‘ilün

Remel . . . - / . . . - / . . . - / . . . -

- Hamdû li ‘llâh* irişüp ‘îd-i şerîfû ‘l-ezman
‘Âlemi eyledi şeb‘ân-ı na‘îm-i Rahman
Âyet-i ‘îd idüp nesh-i vücûb-ı imsâk
Emr-i fitr itdi Hudâvend-i kadîmü ‘l-ihsan
3. Cem‘ olup hûr-likâyân u perî-ruhsâran
İtdiler şehrümüzi hak bu ki mânend-i cinan
Bir yaña haste-dilan bir yaña agyâr u bütan
Seyr-i ezdâd murâd eyleyen olsun nigeran
Şevk hem sünnet ü hem ‘âdet ü hem hurmetdür
N’ola olursa bu eyyâmda diller şâdan
6. Merhabâ şevk-i şeref-yâbî-i pâ-bûs-ı nigâr
Habbe-zâ mevsim-i dil-cûyî-i hûbân-ı zaman
Rûze-ber-rûze iken ‘âşık-ı fûrkat-zedeye
‘Îd-ber-‘îd olur olursa vefâ-yı cânan

- O kazâ-ğamze eger eyler ise ‘arz-ı cemâl
‘Îd-i savma vire mahsûdî-i ‘îd-i kurban
9. Câme-i sürh ile seyr eyleyen ol âfeti dir
Menzil itmiş şafakı mâh-ı münîr ü rahşan
Hûblar her biri bir gülşen-i zîbâ olmuş
Çeşmi nergis kadi serv ü ruhı verd-i handan
VAHYÎyâ muhtasar eyle suhan-ı dil-keşüñi
Şimdicek mâ’il-i tafsîl degüldür yâran

24.

Kasîdeyiçe Der-vasf-ı ‘Îd-i Şerîf-i Latîf

Fe ‘ilâtün Fe ‘ilâtün Fe ‘ilâtün Fe ‘ilün

Remel . . - - / . . - - / . . - - / . . -

- ‘Îd geldi yine ‘ayş ü demi te’kîd itdi
Câme-i şevki ser-â-ser dile tecdîd itdi
Zeyn idüp yâri nec[i]m-nakş libâs-ı zer-beft
Revnak-ı ‘îd o meh-pâreyi hurşîd itdi
3. ‘Îd geldi diyü rahm eyleyüp ol nâdiredan
Hışm-ı dîrînesini lutf-ıla terdîd itdi
Şeh-levendâne o âfet kec idüp destârın
Dilleri vakf-ı dem-i hasret-i câvîd itdi
Vasf-ı câm-ı lebi çeşm-i siyeh-i ser-mesti
Ser-te-ser ‘âlemi ‘işretgeh-i Cemşîd itdi
6. Ma‘nî-i va‘d-i visâlin nigehe-i nükte-bedî‘
Gâyet âlûde-beyân eyledi ta‘kîd itdi
Zînet-i ‘îd ile seyr eyleñ o şûhı hakkâ
Deşne-i tâbiş-i ruhsârını tecdîd itdi
Ârzû-yı dile dildâr muvâfık görinür
Korkaram bu revîşi cevrine temhîd itdi
9. Dil fenâ-pûş-ı temennâ-yı visâl olmuş idi
Dest-i hışm ile velî gamzesi tecrîd itdi
Cezm idüp yâr sükûn u hareketde kereme
Lutf iderdi varup ağıyâr anı teşdîd itdi
Kâkül-i ham-be-hamın gör o meh-i tannâzuñ
Ki o dâma nice ‘ankâları tasfîd itdi
12. Şevk-bahş oldu o mikdâr bütân-ı ‘âlem
Felegûñ mâhını hurşîdini Nâhîd itdi

- Bir firîbende hırâm eyledi kim ‘uşşâkı
Yek-sere mest-i mey-i sâgar-ı ümmîd itdi
Sonra bir hışm-ı nigâh ile bütün dünyâyı
Küşte-i hancer-i ye’s eyledi nevmîd itdi
15. Yalnız şifte dillerde degül behcet-i ‘îd
Şevk-i didâruñ ile ‘îd dahı ‘îd itdi
Lutf-ı çeşmün bize ıtlâk-ı visâl itmiş idi
Yârî-i baht ile gamzen anı takyîd itdi
‘Ârızunda hat-ı müşgîn degüldür şeh-i an
Mansıb-ı hüsnî saña hatt-ıla te’yîd itdi
18. Reşk ol hâtıra kim vâsf-ı hat-ı sebzünde
Böyle bir nazm-ı fûsun-lehceyi tesvîd itdi
VAHYîyâ tab‘-ı fûsun-sâzuña ahsent ahsent
Seni Feyyâz-ı ezel nazmda tefrîd itdi

25.

Kasîdeyiçe Der-vasf-ı ‘Îd-i Adhâ ve Ahvâl-i Hûbâneş

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

- Künc-i ‘îdi dehre Hak çün-kim nümâyân eyledi
Tılsım-ı hecr ü esâs-ı cevri vîrân eyledi
Bâgbân-ı hancer-i lutf-ı dil-ârâ sînemi
Verd-i zahm ile pür idüp bir gülistân eyledi
3. Oldı nakd-i eşk-i ‘âşık çün havâyicden füzun
Cân-ı bî-dil kıymet-i kurbânı erzân eyledi
Rüstem-i şâdî olunca pâ-dih-i sahrâ-yı dil
Ceyş-i ahzânı sadâsıyla gürîzân eyledi
Kalbi dîde bir nigâh-ı lutf-ıla şâd eylesün
Niçe dem etfâl-i eşke şîvenistân eyledi
6. Fikr-i zülf-i şâhid-i lutfun gönülde ey perî
Leşger-i hicrânı ser-tâ-ser perîşân eyledi
Kârgâh-ı ‘îd-i vasluñda şehâ kand-i nebât
Tıfl-ı cân-ı ‘âşıkı bî-sabr u sâ mân eyledi
Ka‘be-i dil cây-ı ‘uşşâk-ı safâ oldı bugün
Sa‘y ile kebş-i gamı ‘uşşâk kurbân eyledi
9. Lâlezâr-ı şevki şem‘-i zevk ile pür-nûr idüp
Bâğ-ı tende şâh-ı dil meyl-i ırâğân eyledi

Sûret-i endîşe-i dildâr bir mahbûb olup
Hüsni gâze çeşmi şîve rûyını ân eyledi
Çarh sâkîyi kudûm-i 'îd-i 'uşşâk 'ışkına
Sâgar-ı 'işret be-kef meclisde gerdân eyledi

12. Dil leb-i fîkr ile rûy-ı şâhid-i maksûdını
Bûs idince zevk-i vuslat anı şâdân eyledi
Hâsılı nahl-i safâ vü zevke sahn-ı sînemüz
VAHYÎyâ lutf-ı Hudâ bu demde bostân eyledi

26.

Kasîde ez-Berây-ı 'Îd-i Adhiye ve Evsâf-ı Hûbân-ı Şehr-i İstanbul

Müstef'ilün Müstef'ilün Müstef'ilün Müstef'ilün

Recez - - . - / - - . - / - - . - / - - . -

Mevlâya sad hamd ü senâ kim oldu 'âlem pür-safâ
Nâ-bûddur cevri ü cefâ erzândur mihr ü vefâ

Geldi irişdi rûz-ı 'îd zevk ü safâ oldu cedîd
Endîşe-i gam nâ-bedîd diller talebkâr-ı 'atâ

3. Seyr itmede dildârlar dildâr-ı şîrinkârlar
Âşûfte vü nâ-çârlar olmakda dîdâr-âşnâ
Dil âh u feryâd itmede sâ mânı ber-bâd itmede
Ol şûh bî-dâd itmede 'uşşâk-ı zâra dâ'imâ

Çekdüm niçe dem hasretün şimdi sezâdur şefkatün
Destûr-ı bûs-ı tal'atun ihsân-ı 'îd eyle başa

6. Ol dil-ber-i hûrî-meniş 'ışkumla buldı perveriş
Zahm-ı dile itse küşiş olmaz ba'îd u nâ-sezâ

Dildâr kurbân eyledi reşk-i dil ü cân eyledi
'Uşşâkı bî-cân eyledi ol çeşmi kassâb-ı kazâ

Ey 'işvesi hicran-güsîl v'ey reşk-i hûbân-ı Çigil
Senden niyâz eyler bu dil bir nazra-i şefkat-nümâ

9. Lutf eyle cânâ vaktidür ihsân u 'atâ vaktidür
Vasl-ı dil-ârâ vaktidür ma'dûmdur hecr u belâ

Vasluñ muhâl itmek neden her demde al itmek neden
Vakf-ı celâl itmek neden 'uşşâk-ı nâ-şâdî şehâ

Giy câme-i zerkârıñı seyr idelüm refâtârıñı
Çöz zülf-i 'anber-bârıñı olsun perîşan-dem sabâ

12. Şehre salın nâz iderek eltâfa âgâz iderek
Gamzeñ rah[i]m-sâz iderek 'arz eyleyüp hüsn ü bahâ

- Cânâ lebün yâd eyledüm âlâmı ber-bâd eyledüm
 Bir şi'r inşâd eyledüm kâbil mi gör tanzîr aña
 Ey çeşmi bâzâr-ı vefâ ey rûyî gülzâr-ı recâ
 Ey serv-i bostân-ı hayâ dil saña oldu mübtelâ
15. Ol 'ârız-ı hurrem nedür ol dırdeki 'âlem nedür
 Ol verd ü ol şeb-nem nedür ey meh-likâ vü dil-rubâ
 Ol dide-i bâdâmı gör ol zülf-i 'anber-fâmı gör
 Ey murğ-ı dil ol dâmı gör kim saydudur 'ankâ hü mâ
 Tahsînler ruhsârûña hem turre-i tarrârûña
 Hem zülf-i 'anber-bârûña ey şâhid-i rengîn-edâ
18. Hüsn ile ey reşk-i felek oldu hased-bürdün melek
 Lâyık seni vasf eylemek bu VAHYÎ-i sihr-âzmâ
 Bu hüsn ile etrâfı sen geşt eylesen dirdi gören
 Ma'yûb olur ger mihirden eylerse meh kesb-i ziyâ
 Ol çeşm ü ebrû var iken zülf-i semen-bû var iken
 Ol var iken bu var iken hurşîde meyl itmek hatâ
21. Kûyunda ey 'âlî-cenâb geh mâh gâhî âftâb
 Rû-mâl-i bâlîn-i türâb eyler niçün virdün rızâ
 Dil âha âgâz eylesün dâ'im o şeh nâz eylesün
 Derdin devâ-sâz eylesün 'uşşâk-ı zâr-ı bî-nevâ
 Tahsîn-tab'-ı pâküme hem verziş-i idrâküme
 Hem hâtır-ı bî-bâküme nazm itdi dürr-i bî-bahâ
24. Bu kalb-i pür-efkâr ile âmed-şüd-i züvvâr ile
 Hem siklet-i agyâr ile buldı kasîdem intihâ
 Ma'zûrdur sehv ü hâlel var ise 'afv olsun 'ilel
 Oldı bu nazm-ı bî-bedel bir vakt-i teng içre edâ

27.

Kasîde-i 'Îd ü Bahâriyye Der-Zeyleş Sitâyîş-i İmâm-ı Sultânî Sâlih Efendi

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

- Hoşâ vakt-i safâ vü mevsim-i gül-geşt-i sahrâdur
 K'o hem eyyâm-ı 'îd ü hem bahâr-ı 'âlem-ârâdur
 Na'im-i zevk ile her hâne mânend-i sarây-ı sûr
 Şemîm-i şevk ile her bir mesîre cennetâsâdur
3. Bisât-ı lezzet ü hâlet döşendi şehr ü sahrâya
 Derunda ni'met ü bîrûnda 'işret müheyyâdur

- ‘Aceb mi Yûsuf-ı sâniler olsa şâhid-i bâzâr
Cihan zînetde şimdi hâne-i hâs-ı Züleyhâdur
- Açıldı gonçe-femler lâle-hadler seyr-i gülzâra
Salındı serv-kadler semt-i enhâra temâşâdur
6. İdüp sükker-fürûşan bûs-ı la‘l-i dil-beri işrâb
Murâdı bâğbânun ‘arz-ı gülden rûyın îmâdur
- Olup mağlûb ruhsâr u lebi yârün gül ü sükker
Eritdi kandi gayret gülde hod haclet hüveydâdur
- Tamâm oldı dey ü rûza salâdur ‘îd ü nev-rûza
Mahal yok âh-ı dil-sûza dem-i vasl-ı dil-ârâdur
9. Saçıldı bâğda güller açıldı tâze sünbüller
İçildi la‘lden müller zamân-ı hâlet-efzâdur
- Salındı seyre ol âfet çalındı sâza germiyyet
Alındı va‘de-i vuslat gönüller pür-tesellâdur
- Kimi geşt ü güzâr eyler kimi seyr-i bahâr eyler
Kimi bûs u kinâr eyler bahâr u ‘îd hem-pâdur
12. Safâlar ihtilât-efzâ hevâlar inbisât-efzâ
Dil-ârâlar neşât-efzâ kederden dil mu‘arrâdur
- Gönülde gitdi jeng-i gam pür oldı şevk-ile ‘âlem
‘Aceb mi tarh-ı şî‘r itsem zamân-ı şî‘r ü inşâdur
- Dil-i şûrîde bir bâğa hezâr-ı nâle-peymâdur
Ki her hârında dikkat olsa biñ gülşen hüveydâdur
15. Tabîb-i ‘akl tedbîr idemez derd-i dil-i zâra
Devâ ancak marîz-i fûrkate terk-i müdâvâdur
- Sözüm yok hâline ruhsârına ebrûsına yârün
Hilâl ü âftâb-ı ‘âlem-ârâ vü Süreyyâdur
- Nice mest olmasun âşüfte-diller bezm-i vuslatda
O çeşm-i pür-humârın her nigâhı câm-ı sahbâdur
18. Vefâ ümmîd iden dildârdan mahrûm-ı ye’s olsun
Benüm kasdum firîb-i gamze-i ümmîd-fermâdur
- O şûhuñ nâzişinde muhtefî bûs u kinâr ey dil
Sarılşan feth olur bir yüzden ol müşkil mu‘ammâdur
- Bakan bu nazm-ı sâfa nîk ü bed kendin görür VAHYİ
Egerçi sâdedür ammâ ki mir’ât-ı mücellâdur
21. Ben ol mu‘ciz-edâ nâdîde-lehce nûkte-pîrâyem
Ki şâhenşâh-ı tab‘um hükmrân-ı mülk-i ma‘nâdur

- Ben ol yekke-süvâr-ı ‘arsa-i nazmam ki meydânum
Hemîşe hasmdan hâlî vü gavgâdan müberrâdur
Murâd itsem miyân-ı yârdan bârîk olur fikrüm
Velî bu sâde nazmun tarhı şevk-engîz ü ra‘nâdur
24. Ne hâsıl tumtırâk-ı lafz-ıla ta‘kîd-i ma‘nâdur
Beyânüm sâdedür nazm-ı bedî‘um hûb u zîbâdur
Tekellûf ber-taraf bu nazm-ı dil-cûdan ğaraz ancak
Neşât izhârıdur ‘arz-ı mahâret başka da‘vâdur
İdüp feyz-i bahâr u ‘îd-i şevk-i tab‘umı tecdîd
Enîsüm bîkr-i ma‘nâdur celîsüm nazm-ı ğarrâdur
27. Husûsâ midhati fikriyle bir zât-ı kerîmün dil
Mücellâdur musaffâdur muhallâdur mutarrâdur
İmâm-ı şehryârî hazret-i Sâlih Efendi kim
Sadâsı zîver-i mihrâbgâh-ı ‘arş-ı a‘lâdur
Safâ-yı lehce-i nâdîdesi hakkâ hayât-efzâ
Sadâ-yı hûb u bî-mânendi mahz-ı feyz-i Mevlâdur
30. Ne işitdi nazîrin gûş-ı ‘âlem olalı sâmi‘
Ne gördi mislini bu çeşm-i dünyâ tâ ki bînâdur
Hezârân-ı bahâra lehcesi şevk-âver-i hayret
Sufûf-ı ehl-i ‘îde hutbesi sükkerden a‘lâdur
Nevâsı kalb-i ‘uşşâk-ı Hudâya mâye-i teşvîk
Sadâsı mahfil-i evc-i ‘alâya feyz-bahşâdur
33. Ku‘ayt-ı pençgâh-ı Ahmedî dirsem o nutka râst
Sabâ vasf itse anı sünbüle gül mest-i asfâdur
Nihâvend ü sıfâhân u ‘acem medhiyle mâlîdür
Hicâz ile ‘ırâk ol rütbe dinse belki ahrâdur
Mahâfilde makâm-ı na‘t-i pâki çârgâh oldı
Ki hüsn-i hulk u halk u savt u nutk-ıla muhallâdur
36. Riyâz-ı bezminün her rûz u nev-rûzı letâfet-bahş
Şeb ü rûzı misâl-i Kadr u ‘îd-i dehr-pîrâdur
Muhayyerdür anuñ vafında ebnâ-yı zamân ey dil
Ne hâcet vasfa kim vassâf aña ser-cümle dünyâdur
‘Atâda tab‘ı ğâret-sâz-ı mülk-i şöhet-i Hâtem
Sehâda himmeti zîr-efken-i emvâc-ı deryâdur
39. Melek-haslet sitûde-menkabet bahr-i dür-i himmet
Melâz-ı merhamet kehf-i ‘inâyet kân-ı i‘tâdur

- Fezâ'ilde fevâzılda nazîrin görmedi 'âlem
Ma'ârifde letâyifde misâlin fikr-i bî-câdur
- Letâfetde zarâfetde fesâhatde belâgatde
Aña taklîd kasd itmek heman bîhûde sevdâdur
42. Kemâl ü 'ilm ü fazl u ma'rifet eczâ-yı bezmidür
Makâm-ı bendegîde şî'r ü inşâ dahı pür-lâdur
- Bu haslet kimde var insâf idüğ kim zerreveş dâniş
Yanında âftâb-ı 'âlem-ârâdan da a'lâdur
- Kerîmâ kâm-bahş-ı hâtırâ mihr-i felek-kadrâ
'Ulûvv-i şânuña nisbet bu vaz'um gerçi ednâdur
45. Velîkin dîde-i lutfuñla manzûr olsa bir kerre
Mu'allâdan mu'allâdur müzekkâdan müzekkâdur
- Suhan pâyâna irdi VAHYÎ âgâz-ı du'â eyle
Du'â-yı hayr ile hatm-i suhan ahrâ vü evlâdur
- Ko itnâb-ı mümelli çün ğaraz bu nazm-ı zîbâdan
Heman tebrîk-i 'îd u nev-bahârıñ resmin icrâdur
48. Olup tâ nev-bahâr u 'îdi her bir sâlda mevcûd
Biri 'ibret-nümâdur birisi endûh-fersâdur
- Hudâ tab'-ı şerîfin mest-i sahbâ-yı neşât itsün
Disünler şevk-i bezmi dâğ-sûz-ı kalb-i a'dâdur
- Ola her rûzı 'id ü her zamânı nev-bahâr anuñ
Felekde mihr ü mâhuñ gerdişi tâ emr-i Mevlâdur

28.

Kasîdeyiçe Berây-ı Evsâf-ı Bahâr u Letâfet-i Ezhâr

Mef'ûlû Fâ 'ilâtü Mefâ 'ilü Fâ 'ilün

Muzâri' - - . / - . - . / . - - . / - . -

- Çâk-i sürâdik-i dey idüp hancer-i bahâr
'Ankâ-yı gülşen açdı yine şeh-per-i bahâr
- Zer câm verd-i zerde dür-i jâle vaz' idüp
Tezyîn ider zarâfet ile zerger-i bahâr
3. Zerrîn bâğ üsküf-i zerrîn ile olur
Derbân-ı çûb-ı deste-be-dest-i der-i bahâr
- Hıfz itmege sihâm-ı şitâdan vücûdını
Berg-i çenârı itdi siper server-i bahâr
- Düzd-i harîf-i berg-rubâyı şikâr için
Gönderdi bâğa şâh-ı çimen leşger-i bahâr

6. Nâ-bûd olunca efser-i gül fehm-i düzd için
Yakdı behûr-i Meryemi da‘vetger-i bahâr
Mazmûnı gül hatı çimen elfâzı yâsemen
Tarh-ı kasîde itdi suhan-perver-i bahâr
Tertîb-i sûr idüp kamu ezhârı gülşenün
Varmış ‘arûs bâğa bu şeb duhter-i bahâr
9. Bâğ-ı benefşe germde hem-çün siyâh-gûş
Mîş-i deyi yemiş gibi şîr-i ner-i bahâr
Dâğ-ı derûn-ı ‘âşık-ı şûrîde zann olur
Her nev-küşâde gonçe-i verd-i ter-i bahâr
Âb u hevâ-yı hâk-i gülistânı seyr idün
Sûzân-ı nâr-ı ‘ışka sala Kevser-i bahâr
12. Gülşende lâle sanma gülün armağanıdır
Kâğıd içinde şerbet-i nîlûfer-i bahâr
Ezhâr-ı bâğ mest-i sabâ oldı ser-te-ser
Her nergis-i küşâde olup sâgar-ı bahâr
Etrâf-ı meşhed-i dili devr itmede müdâm
Zencîr-i bâd ile gül olup micmer-i bahâr
15. VAHYÎ-yi bî-karârı perîşan-dil eyledi
Evsâf-ı kâkül-i siyeh-i dil-ber-i bahâr

29.

Kasîdeyiçe Sünbül ü Gül Redîf Der-vasf-ı Cânân

Fe‘ilâtün Fe‘ilâtün Fe‘ilâtün Fe‘ilün

Remel . . . - / . . . - / . . . - / . . . -

- Gülşene zîb-dih oldukda dilâ sünbül ü gül
Oldı ezhâra ‘aceb ‘işve-nümâ sünbül ü gül
Devr idüp câm-ı sabûhî ile sâkî-i ziyâ
Oldı medhûş-ı mey-i zevk ü safâ sünbül ü gül
3. Zülf ü ruhsârûña ‘âşık iki âvârençdür
Ey şeh-i tahtgeh-i hüsn ü bahâ sünbül ü gül
‘Âşık-ı zâra gülistân-ı gam-ı hecründe
Rîşe-i zahm-ıla dâğ oldı şehâ sünbül ü gül
Ser-i zülf ü leb-i pür-handenî seyr eyleyenün
Çeşmine hâr u has olursa sezâ sünbül ü gül
6. Zâhidâ bîhüde ta‘n eyleme ihsân eyle
Baña gîsû vü ruh-ı yâr saña sünbül ü gül

Gülşen-i feyz benem âb-ı revân endîşem
Nazm u nesrümde olan pâk-edâ sünbül ü gül

Levh-i şî'rümdeki her hatt-ı siyâh u sürhum
Ravza-i ma'rifete olsa revâ sünbül ü gül

9. Şâhid-i fikrüm eger pâ-dih-i gülzâr olsa
Bûs-ı dâmânını eylerdi recâ sünbül ü gül

Vasf-ı ruhsâr u hatun ideli VAHYÎ mu'tâd
Pür eder gülşen-i tab'ın sanemâ sünbül ü gül

30.

Kasîdeyiçe Der-vasf-ı Kâğıd-hâne

Fâ'ilâtün Fâ'ilâtün Fâ'ilâtün Fâ'ilün

Remel - . - - / - . - - / - . - - / - . -

Sahn-ı Kâğıd-hânedür ehl-i dile cây-ı karâr
Kim komaz nezzâresi âyîne-i dilde gubâr

Bir zemîn-i pâki var neşr olsa tohm-ı hâr eger
Hüsn-i te'sîri ider gülzâr-ı ra'nâ âşkâr

3. Bir nesîm-i sâfı var kim dûzaha itse güzer
Cennetâsâ i'tidâl-ile bulurdı iştihâr

Katre-i cûyı eger olsa çekîde Kevsere
Cûş idüp şevkinden eylerdi cihânı hissedâr

Habbe-zâ cevlangah-i hûbân-ı pâk-iz'ân-ı Rûm
Kim sabâ-yı zevki eyler zülf-i hecri târmâr

6. Serv-kâmetler temâşâgâhıdur olmaz ba'îd
Reh-güzârında kıyâm itse niçe bâlâ çenâr

Yâ kenâr-ı cûyda ol kasr-ı rûh-efzâ nedür
Bir cüvân-ı al-pûş-i meh-cebîn ü gül-'izâr

Seyr iden Yûsuf-likâ gül-pîrehen dil-berlerin
Nice kîtûn-ı Züleyhâyı satup itmez nisâr

9. Sad hased ol mihr-i baht-âşüfteye kim mâhını
Eyleyüp der-hâle-i âğuş ide zevk-i kenâr

Kasr-ı ra'nâ sâye-i râhat-nümâ âb u hevâ
Kûh u sahrâ dil-berân-ı pür-vefâ vakt-i bahâr

Eyleyüp tahrîk tab'-ı pâk-i i'câz-âfirin
N'ola tarh itsem bu gûne nazm-ı sâf u âbdâr

12. Nazm-ı pâkûn VAHYÎyâ bir âb-ı efsun-mevcdür
Sâye-i vasf-ı kad-i cânândan eyler güzâr

Zabta nutk ile ne hâsıl fahr-i dūr-â-dûrdan
Sen o şâ'irsın ki fahr eyler senünle rûzgâr

31.

Kasîdeyiçe i Nev-rûziyye

Fâ'ilâtün Fâ'ilâtün Fâ'ilâtün Fâ'ilün

Remel - . - - / - . - - / - . - - / - . -

- 'Azm-i bâğ it ey hezâr-ı hoş-nevâ nev-rûzdur
Güller açıldı gidüp fasl-ı şitâ nev-rûzdur
Şâh-ı gül bezm-i şikûfe tarh idüp gülzârda
Sâgar-ı nergisle devr itsün sabâ nev-rûzdur
3. Fikr-i rûy-ı yâr ile seyr-i gülistân eylesün
'Âşık-ı gamnâk-i hicrân-âşnâ nev-rûzdur
Müjde kim 'unvân-ı tûmâr-ı 'izâr-ı yârda
Hatt-ı nev-hîzi yazar sâl-i vefâ nev-rûzdur
Çün temâşâ eyledük ol meh-cebîn ü gül-ruhı
Ey dil-i şeydâ bu gün yâ 'îd yâ nev-rûzdur
6. Gice nev-rûz-ı 'Acemdür savt-ı bülbül bâğda
Geh nevâ olur seherde geh sabâ nev-rûzdur
Ferş-i bezm-i gülşen-i 'ışk eyleyüp seccâdeni
'İşret it ey zâhid-i sâhib-riyâ nev-rûzdur
Niçe demlerdür zemistân-âşnâ-yı hecr iken
Bir bahâr-ı vasl seyr itdür şehâ nev-rûzdur
9. Her dıraht evrâk u ezhârı idüp hâke nisâr
Oldı kemhâ-yı gülistân-ı fezâ nev-rûzdur
Zülf sünbül çeşm nergis hat benefşe rûy gül
Vakt-i hüsn-i yâr şimdi gûyiyâ nev-rûzdur
Âh bülbül zahm gönçe şerha lâle eşk cûy
Gülsitân-ı cism-i 'âşık dâ'imâ nev-rûzdur
12. Gül-'izârum seyre çık lutf eyle ben gamnâküne
'Azm-i bâğ itdi bu gün şâh ü gedâ nev-rûzdur
Fikr-i vasf-ı gülsitân-ı tal'at-ı dildâr ile
Hurrem olsun tab'-ı pâkûñ VAHYİYâ nev-rûzdur

32.

Kasîdeyiçe-i Şitâiyye

Mefâ'ilün Fe'ilâtün Mefâ'ilün Fe'ilün

Müctes . . . / . . . - / . . . - / . . . -

- Hoşâ ki kuvvet-i feyz-i nesîm-i sermâyî
Ridâ-yı zâhide dönderdi bezm-i dünyâyı
- Hoşâ ki sâkî-i ser-şâre-bahş-ı ebr-i şitâ
Fezâyı eyledi mest-i şarâb-ı tenhâyî
3. Hoşâ ki itdi berîd-i sebûk-rev-i sarsar
Peyâm-ı berf ile leb-rîz deşt ü sahrâyı
Sipâh-ı dey o kadar oldu gâret-efken-i sayf
Ki tîğ-ı reşk ile çâk itdi h^vân-ı yağmâyı
Çimende cûylar itdükde 'azm-i istikbâl
Reh-i şitâya döşendi harîr-i deryâyî
6. Fezânun oldu çü kemhâ-yı sebzi fersûde
Şeh-i şitâ aña biçdi sepîd dîbâyı
Dağıldı meclis-i gülşen bozuldu 'ayş-ı çimen
Kaçırdı derd ü mihen 'andelîb-i şeydâyı
Kanı o şevk ü tarab yâ kanı o şûr u şağab
Unutdı Rûm u 'Arab lezzet-i temâşâyı
9. Nühüfte zevk ü safâ huft ehl-i mihr ü vefâ
Bu demde mîr ü gedâ itdi meclis-ârâyı
Kanı o nâziş-i gül yâ nevâziş-i bülbül
Ne hâle geldi gönül gör o bezm-i zîbâyı
Kanı nesîm-i seher yâ şemîm-i gülden eser
Hafâda gonçe-i ter geçdi şahs-ı 'ankâyı
12. Hemîşe cilveger-i tarf-ı bâğ iken âyâ
Benefşe şimdi neden oldu böyle hercâyî
Bozuldu sürhî-i gül sebzî-i çimen şimdi
Ne yüzden eyleye 'uşşâk def'-i sevdâyı
O rütbe lüccever itdi zemîni bârân kim
Garîk-i eşk-i hased kıldı mevc-i deryâyı
15. Zihî şitâ ne şitâ reşk-i dûzah-ı serdî
Sezâdur eylese efsürde nağme-i nâyı
Miyân-ı 'âşık u cânân olurdu mülzem eger
Anunla eylese serdîde bahs ü da'vâyı

- O deñlü tûde-i berf oldı ser-firâz u bülend
Çıkılsa seyr ide âdem semâ-yı dünyâyı
18. Didüm gönül nedür erbâb-ı ‘ışka tesliyetün
Ki oldı sahn-ı gülistân vakf-ı rüsvâyî
Didi ki gülşen-i bezm-i nigâr sağ olsun
Ki itdi mest-i mey-i gıpta bezm-i me’vâyı
Bu gülşenün ki güli ‘ârız-ı dil-ârâdur
Hezâr tut aña ‘uşşâk-ı nâle-peymâyı
21. Bu meclisün ki meyi la‘l-i nâb-ı dil-berdür
Getürme hâtıra bir dahı câm-ı sahbâyı
Hırâm-ı şîveger-i kadd-i dil-rubâ var iken
Neden mülâhaza şimşâd u serv-i bâlâyı
İder mi seyr-i gülistân-ı bezm-i dil mahrem
İden der-âğuş-ı nezzâre ol hod-ârâyı
24. Gül ü benefşe vü nergisle gülşen ister isen
‘İzâr u kâkül ü çeşm ile gör o sîmâyı
Şehâ letâfet-i verd-i sefîdi eyle hacı
Hemân bezmde gel aç sîne-i semen-sâyı

33.

**Der-Menkabet-i Mevlânâ Fâzıl ‘Abdu ‘l-Halîm Efendi el-Kırîmî Rahmetu ‘İlâhi
Ta‘âlâ**

Mefâ‘ilün Fe‘ilâtün Mefâ‘ilün Fe‘ilün
Müctes . . . - / . . . - / . . . - / . . . -

- Hayâl-i yâr ki hırz-ı dil-i figârumdur
Hemîşe gûşe-i fûrkatde gam-güsârumdur
Ümîd-i bûs-ı lebün sâgar-ı tahayyülde
Mey-i neşât-dih-i kalb-i jengdârumdur
3. Firâk-ı yâr ile sînemde şerha vü dâgum
Nigâr-ı serv-kad ü yâr-i gül-‘izârumdur
Dem-â-dem encümen-ârâ-yı ‘âlem-i ye’sem
Sirâc-ı şu‘le-fiken âh-ı pür-şerârumdur
Cemâl-i yâr ki bir gülsitân-ı hurremdür
Hezâr-ı zârı dil-i şûh-ı bî-karârumdur
6. N’ola zücâc-ı cefâsı olursa işkeste
Hemin nişâne-i peykân inkisârumdur
Hemîşe geşt iderem şâh-bâz-ı hasret ile
Hümây-ı fikr-i visâl-âşnâ şikârumdur

- Benem o ‘âşık-ı mu‘tâd-ı hecr-i mâder-zâd
Ki ‘ömr-i Nûh gürîzân-ı intizârumdur
9. Zah[ı]mlar ile tenüm bir hadîka-i garrâ
Ki çeşmesârı anuñ çeşm-i eşk-bârumdur
Hat-ı nev-âmede sanma ‘izâr-ı dil-berde
Nişân-ı tılsım-ı bâzû-yı dâğdârumdur
‘Îzâr u kâkûl ü hatt ile tal‘at-ı cânan
Gül ü benefşe vü şeb-bûy ile bahârumdur
12. Bu za‘f-ı gamla olur bûs-ı hâk-i pâý elbet
Çü taraf-ı kûçe-i dildâr reh-güzârumdur
Cihanda dûrî-i vuslatdan eylemem şekvâ
Çü şeng-i fikr-i dil-ârâm der-kenârumdur
Bu nüh kıbâb-ı müh[ü]r-şemse zarf-ı ebrîde
Defâtir-i gam u âlâm-ı bî-şumârumdur
15. O h^vâce-i Hotan-i fikr-i zülf-i dildârum
Ki nâf-ı müşg benüm kemterîn-i yârümdür
Vefâ-‘adû olalı gamze-i siyeh-mestün
Sarây-ı hecrde ye’s-i visâl-i yârümdür
Duhân-ı âh ki bir tîr-i seng-dûzumdur
Kemânı vü hedefi bu ten-i nizârumdur
18. Belâ vü mihnet ü gam çünkü yârdan geldi
Yanumda her biri bir yâr-i şîvekârumdur
Dem-i visâlde nezzâre-i lebünle şehâ
Nigâh-ı câm be-kef rind-i bâde-h^vârumdur
Benem o şâ‘ir-i pâkîze-dil ki her suhanum
Birer şehenşeh-i pür-cûd-ı dür-nisârumdur
21. Benem o şâ‘ir-i sahbâ nikât-ı câm-ı suhan
Ki tab‘-ı gamze-i ser-mest neşvedârumdur
Benem o şâ‘ir-i nâzûk-hayâl-i tîz-tab‘
Ki fikrüm eylemesem çün zurât ‘ârumdur
Ne deñlü eyler isem fahr-i dür dür sezâ
Ki vâsf-ı pâk-i edîb-i zamân kârumdur
24. Cenâb-ı hazret-i ‘Abdu ’l-Halîm Efendi kim
Visâl-i dergeh-i vâlâsı iftihârumdur
Sa‘id-belâgat Aristo-hikem ‘Alî-cevdet
Ebû Hanîfe-meniş Şâfî‘î-vakârumdur

- Zahîr-kuvvet ü ‘Allâme-fikr ü Fahr-nazar
Ebû ‘l-Hasan-şiyem ü Hâfız-iktidârumdur
27. ‘Îsâm-dikkat ü Câmî-edâ [vü] Kutb-himmet
Gazâlî-menkabet ü Seyyid-iştihârumdur
- Geleydi ‘âleme ‘asruñda Bû ‘Alî Sînâ
Dir idi bûs-ı yed-i fazluñ i ‘tibârumdur
- Mu‘allim-i hüner-âmûz-ı fazl-şâkirdâ
Beyân-ı hâl-i kemâ-hî benüm ne kârumdur
30. Garaz budur ki beni neşve-yâb-ı fazluñ ide
Bu nazm-ı pâk ki sahbâ-yı hoş-güvârumdur
- Ne deñlü eyler isem cedd ü sa‘yi tafsîle
Yine beyâna gelen biñde bir ya yarumdur
- Dırâz olur kem ü keyf-i kıyâs-ı vasf velî
Yine nefîcesi bu şekl-i ihtisârumdur
33. Dem oldu kim ola âgâze-i du‘â VAHYİ
O zât içün ki benüm ebr-i feyz-bârumdur
- Zücâce-i dili olsun gubâr-ı gâmdan sâf
Cihanda tâ ki felek ‘aks-i kalb-i zârumdur

34.

Kasîde Der-vasf-ı Sadr-a‘zam ‘Alî Paşa ve Dâmâd-ı Sultân Ahmed-i Sâlis

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

- Müjde ey dil kesb-i feyz idüp gülistân-ı kerem
Tâzelendi ser-te-ser ezhâr-ı bostân-ı kerem
- Tâ‘ib oldu hisset-i dîrîneye ‘asr-ı la‘îm
İtdi mihman-hâne-i dünyâyı pür h‘ân-ı kerem
3. Meşk-i lutf-âlûd debîr-i çarhdan şimdi cihan
Oldı ebnâ-yı zaman zîb-i debistân-ı kerem
- Ravza-i ümmîd olursa sebz ü hurrem vaktidür
‘Âleme oldu tarâvet-bahş-ı bârân-ı kerem
- Şevkden çâk-i girîbân itseler şâyestedür
Eyleyenler ârzû-yı bûs-ı dâmân-ı kerem
6. Görmez iken cür‘a-i derd yine bezm-i dehrde
Çekmede rıtl-ı girân ümmîdvârân-ı kerem
- Nakd-i lutf ol rütbe mebzûl oldu hâs u ‘âma kim
Oldı reşk-i âğniyâ deryûzekârân-ı kerem

- Böyle mevsimde ba‘îd olmaz gönül ‘arz-ı merâm
Bir kerîme kim odur mümtâz-ı ihvân-ı kerem
9. Âsaf-ı devran vezîr-i a‘zam-ı şâh-ı zaman
Ya‘nî dâmâd-ı ‘atâ-mu‘tâd sultân-ı kerem
Hâmî-i devlet ‘Alî Paşa-yı ‘âlî-menkabet
Dâver-i Hâtem-tabî‘at rûh-ı ebdân-ı kerem
Nâfîzü ’l-ahkâm-ı ‘âlem ‘âkidü ’s-sulh-ı ümem
Sâhib-i seyf ü kalem bahşende-i kân-ı kerem
12. ‘Ârif-i pâkîze-meşreb vâkıf-ı fenn-i edeb
Mazhar-i eltâf-ı Rab mi‘mâr-ı erkân-ı kerem
Mesned-i a‘yân-ı kümmel kehf-i erbâb-ı düvel
Dâmenin tutsa mahal bâlâ-nişînân-ı kerem
Melce’-i erbâb-ı dâniş menba‘-ı dâd ü dihiş
Dâver-i Hâtem-meniş gavvâs-ı ‘ummân-ı kerem
15. Mâh-ı evc-i ma‘delet şâh-ı cihân-ı mekrûmet
Yekke-tâz-ı deşt-i himmet merd-i meydân-ı kerem
Kâm-fermây-ı garîban şevk-bahş-ı gam-keşan
Dürc-i la‘inde nihan dârû-yı Lokmân-ı kerem
Dergehi cây-ı penâh-ı ârzûmendân-ı cûd
Âstânı bûsegâh-ı behre-cûyân-ı kerem
18. Eylemiş nâm-ı şerîfîn nâzım-ı takdîr anuñ
Matla‘-ı garrâ-yı bî-hemtâ-yı dîvân-ı kerem
Âsmân-ı lutfdur gûyâ devât-ı dil-keşi
Hâme-i mu‘ciz-beyânı ebr-i nîsân-ı kerem
Bezm-i hâsı gülşen-i bî-hâr-ı lutf u merhamet
Nutk-ı pâki çeşmesâr-ı âb-ı hayvân-ı kerem
21. Rezmgâh-ı heybetinde na‘rasın gûş eylese
Tâ ebed medhûş ola Sâm u Nerîmân-ı kerem
Bezmgâh-ı şefkatinde cür‘asın nûş eylese
Tâbe-mahşer olmaya huşyâr mestân-ı kerem
Şevk-tab‘-ı fâtırâ ümmîd-bahş-ı hâtırâ
Zû ’l-minen itdi makâmıñ sadr-eyvân-ı kerem
24. Hisse-yâb-ı zerre-i dâniş olan erbâb-ı dil
Sofra-i lutfundan oldı cümle şeb‘ân-ı kerem
VAHYÎ-i hurşîd-tab‘uñ olması şâyeste mi
Necm-i bahtum gibi vakf-ı ebr-i hîrmân-ı kerem

- Himmetüñ gülzârınuñ bir gonçesi besdür baña
İtmege zülf-i ümîdüm sünbülistân-ı kerem
27. Bûy-ı vâsfun 'anberâsâ neşr iderdüm 'âleme
Feyz-i lutfuñla olaydum ben de şâyân-ı kerem
Bendedür ammâ tekâsül itmedüm 'arz-ı niyâz
Dergeh-i vâlâña kim dil ola şâdân-ı kerem
Bülbülâsâ gülşen-i kûyuñda efgân itmedüm
Olmadum pervâne-i şem'-i şebistân-ı kerem
30. 'Arz-ı hâlüm der-kenâr itdüm mahallidür buyur
Lutf-ıla tevcîh-i zihn it eyle fermân-ı kerem
Cür'et-i tasdî' de ma'zûr tut dâ'îñi kim
Ravza-i tab'uñdan aldum bûy-ı imkân-ı kerem
İtme itnâba heves maksûd hâsıldur göñül
Katresin imsâk itmez bahr-i cûşân-ı kerem
33. İrdi söz pââyâna âgâz-ı du'â hengâmıdur
Ol vücûda kim odur hurşîd-i rahşân-ı kerem
Tâ ki olup melce'-i ehl-i recâ bezm-i kirâm
Gürsine çeşmân ide tasdî'-i merdân-ı kerem
Hak ta'âlâ zâtını âfâtdan mahfûz idüp
Eylesün hemvâre zîb-i sadr-ı dîvân-ı kerem

35.

**Der-Sitâyiş-i Şeyhü 'l-İslâm Müftî'ü 'l-Enâm Mahmûd Efendi Rahmetu 'llâhi
Ta'âlâ**

*Mef'ûlû Fâ'ilâtü Mefâ'ilü Fâ'ilün
Muzâri' - - . / - . - . / . - - . / - . -*

- Demdür ki dost mazhar-i feyz-i cemâldür
Düşmen garîk-i lücce-i kahr-ı celâldür
Demdür ki sâgar-ı sitemin çarh idüp şikest
Leb-rîz-sâz-ı kâse-i lutf u nevâldür
3. Demdür ki sûk-ı 'ilme gelüp nevbet-i revâc
Mergûb-ı nâs şimdi metâ'-ı kemâldür
Gülzâr-ı dehre gelse tarâvet 'aceb degül
Feyz-âşnâ-yı nâmiye-i i'tidâldür
Bir 'ukde kalmadı ki felek hallin itmege
Ey baht-ı pîç pîç dem-i inhilâldür
6. Olsun şikûfte gonçe-i dil bâd-ı şevk ile
Dehrüñ bu âb u tâbı 'adîmü 'l-misâldür

- Bir kalb işitmedük ki ola mübtelâ-yı gam
Bir tab‘ görmedük ki esîr-i kelâldür
- Dirseñ bu şevk-i tâze neden geldi ‘âleme
Hall it bu müşkili ki mahall-i su’âldür
9. Budur cevâb eyledi ihsân zû ’l-minen
Bir ni‘meti ki şükrini itmek muhâldür
- Rabt itdi hall ü ‘akdini ‘asruñ o zâta kim
Kân-ı salâh u ma‘delet ü hüsn-i hâldür
- Nasb itdi ya‘nî mesned-i fetvâya yümn-ile
Bir şahsı kim edîb-i hamîdü ’l-fa‘âldür
12. Mahmûd Efendi ‘izz ile müftî ’l-enâm olup
Nâsa peyâmı mâye-i tefrîh-i bâldür
- Tefrîh-i bâl iderse peyâmı ‘aceb degül
Mahsûl sad du‘â vü hezâr ibtihâldür
- Olsa du‘âsı vird-i zebân-ı cihan revâ
Kim mahz-ı nef‘ u lutf u ‘atâ vü nevâldür
15. Hayrû ’l-halef güzîn-i selef mefhar-i kirâm
Tahrîr-i bî-‘adîl bedî‘u ’l-hisâldür
- Gülzâr-ı ‘ilm ü fazlına bir gonçedür fuhûl
Hâtem riyâz-ı cûdına kûteh nihâldür
- Hilm ü edebde cümleye ruchânı bî-nizâ‘
‘İffetde hod yegâneligi bî-cidâldür
18. İtse sükût gonçe-i bâğ-ı hayâ olur
Gelse edâya bülbül-i şîrin-makâldür
- ‘Ankâ-yı Kâf-ı zühd ü vera‘ tab‘-ı pâkidür
Aña kemâl-i ‘ilm ü ‘amel perr ü bâldür
- Mûr-ı za‘îfî hilmi Süleymân-ı vakt ider
Çîn-i cebîni zehre-güdâz-ı cibâldür
21. Kimdür o kim anuñla ide da‘vî-yi kemâl
Hurşîd olursa mazhar-i naks-ı zevâldür
- Fikri yanında ebr-i siyehdür şu‘â-i meh
Envâr-ı mihr-i re’yine nisbet zılâldür
- Sultân-ı mülk-i ma‘deletâ fazl-perverâ
Nazmum egerçi gayret-i sihr-i helâldür
24. Medhünde lîk her ne kadar dikkat eylesem
Biñde birin edâda kusûr ihtimâldür

- Tab‘um mahall-i noktaya biñ nükte derc ider
Vasfuñ beyânına gelicek deng ü lâldür
- Fikr-i kemâlün ‘ârife intâc-ı ‘acz ider
Melzûmdan bu lâzıma bir intikâldür
27. Vasf-ı şerîfüñe bulamaz kimse iktidâr
Maksûd hâk-i pâyuña bir ‘arz-ı hâldür
- Dânişverân-ı ‘asruñ olur sadr menzili
VAHYİ-i zâr zâver-i saff-ı ni‘âldür
- Akrânı bezm-i şevkde ser-şâre-nûş anuñ
Mahsûl-i tab‘ı rıtl-ı girân-ı melâldür
30. Yekke-süvâr-ı ma‘reke-i nazm u nesr iken
Tenhâ-nişîn-i zâviye-i ihtilâldür
- Baht-ı siyâhı gör ki meh-i burc-ı ma‘rifet
Ebr-i hafâda kaldı nice mâh u sâldür
- Har-mühre sandı sayreff-i rûzgâr hayf
Ol gevher-i kelâmı ki reşk-i le‘âldür
33. ‘Asruñ bu vaz‘-ı nâ-hoş u nâder-ber-â-beri
Erbâb-ı fazl u dânişe bir kıl ü kâldür
- Nâ-dân elinde kâse-i fağfûr-ı ‘ârifün
Câm-ı mey-i ümîdi şikeste sifâldür
- Erbâb-ı cehl tâc-ı ser-i iltifât olup
Ashâb-ı ‘ilm ü fazl u hüner pây-mâldür
36. Bu fikr egerçi bâd-zen-i ye’s ile dile
Tehyîc-sâz-ı nâ’ire-i infi‘âldür
- Olmam bu infi‘âlden ammâ ziyân-keş
Dükkân-ı dilde nakd-i rızâ re’s-i mâldür
- ‘Asrında bâ-husûs o kerem-pîşenün derun
Ümmîd ile hazîne-i âb-ı zülâldür
39. Mir’ât-ı kalbi sâf idelüm jeng-i şekveden
Manzûr-ı çeşm-i rağbet ola ihtimâldür
- Ser-levha-i ma‘ârif olan ehl-i dânişe
Endîşe-i li-küllî makâm-ı makâldür
- Şimdi mihakk-ı sîm ü zer-i ‘ilm ü ma‘rifet
Ol zât-ı pür-fezâ’il-i ferhunde-fâldür
42. ‘Arz-ı sebîke-i hüner it bil ‘iyârıñı
Sâhib-‘iyâr-ı vakt dakîkü ’l-hayâldür

- Zabt it ‘inân-ı nutkı cesâret yeter yeter
Tafsîl-i hâl-i tarz-ı melâl iştîmâldür
- Remz-i ümîd besdür o zât-ı kerîme kim
İmsâk-i nakd-i lutf yanında vebâldür
45. İhlâs ile du‘â idelüm ol vücûd için
Zîrâ du‘â kasîdede hayrû ’l-me’âldür
- ‘Âlemde tâ ki hüzn ü sürûr ile kabz u bast
Bir muktezâ-yı hükm-i celâl ü cemâldür
- Sadr-ı sa‘âdet üzre murabba‘-nişîn olup
Şânında diyeler ruh-ı ikbâle hâldür
48. Kalb-i şerîfî mazhar ola ol safâya kim
Reşk-efken-i derûn-ı safâ-yı visâldür
- Evlâd-ı pâk-nijâd-ı melâ’ik-nihâdî kim
Evc-i kemâle her biri hâlâ hilâldür
- Bedr idüp anları da sa‘âdetle zû ’l-minen
Îsâl ide o sadra ki burc-ı kemâldür

36.

Sitâyiş

Müstef‘ilün Müstef‘ilün Müstef‘ilün Müstef‘ilün

Recez - - . - / - - . - / - - . - / - - . -

- Gel ey safâ-endîş olan Sâ‘atçı Paşa Köşğine
Memnûn-ı zevk ü ‘îş olan Sâ‘atçı Paşa Köşğine
- Bir semti bâğ u gülsitan bir semti bahr-i bî-keran
Zevk isteyen olsun revan Sâ‘atçı Paşa Köşğine
3. Olup vezân anda sabâ bülbüller eylerken nevâ
‘Uşşâk meyl itse revâ Sâ‘atçı Paşa Köşğine
- Resmi latîf ü bî-bedel nakş u nigârı pek güzel
Mânendi yok dirsem mahal Sâ‘atçı Paşa Köşğine
- ‘Azm eylesün gül-çîd olan zevk ü safâ ümmîd olan
Yârân-ı İznîkmîd olan Sâ‘atçı Paşa Köşğine
6. Al revzeninden bûy-ı zevk câmindan iç sahbâ-yı şevk
Ahbâbı eyle anda ‘avk Sâ‘atçı Paşa Köşğine
- Çarh ursa rakkâs-ı hayâl her rûz ü şeb devran-misâl
El-hak bedel bulmak muhâl Sâ‘atçı Paşa Köşğine
- Zevk ü safâya dâ’imâ zarf eylemiş anı Hudâ
Miftâh-ı dil dirseñ sezâ Sâ‘atçı Paşa Köşğine

9. Zevke bu yoldan ol revan budur giriş ğayri güman
Ekdârı def'e gel heman Sâ'atçı Paşa Köşkine
Tulumbasından içse âb bulur meh ü mihr âb u tâb
Burc-ı safâ dinse savâb Sâ'atçı Paşa Köşkine
Yâr ile eyle ülfeti elden çıkarma fursatı
Kur bezm-i 'ayş ü 'işreti Sâ'atçı Paşa Köşkine
12. Vasfında 'âcizdür kalem medhinde kâsırdur rakam
Bâğ-ı İrem olmaz harem Sâ'atçı Paşa Köşkine
Her semti bir cây-ı safâ her gûşesi hayret-fezâ
Gitsen 'aceb mi VAHYîyâ Sâ'atçı Paşa Köşkine

37.

Kasîdeyiçe-i Du'â-nâme

Fâ'ilâtün Fâ'ilâtün Fâ'ilâtün Fâ'ilün

Remel - . - - / - . - - / - . - - / - . -

- Ey Kerîm-i bî-misâl ü ey Rahîm-i zî 'n-nevâl
Yüz tutup dergâhuña eyler 'ibâduñ 'arz-ı hâl
Lutf u ihsânun recâsıyla derildük kapuña
Şâhid-i ümmîd ide me'mûldur 'arz-ı cemâl
3. Bende-i efkendeyüz 'isyândan şermendeyüz
Bakmayup cürm ü kusûra eyle fazluñ ber-kemâl
Bî-kes ü bî-çâreyüz sensin bize ancak mu'în
Gayriden imdâda yok mikdâr-ı zerre ihtimâl
Kuvvet ü kudret senüñdür heybet ü nusret senüñ
Cünd-i İslâma mu'în ol düşmen olsun pâ-y-mâl
6. Kesret-i 'isyâna bakma nâliş-i sıbyâna bak
Müstecâb eyle du'âmuz ey Kerîm-i bî-zevâl
Mücrimüz âlûde-i çirk-âb-ı 'isyânuz velî
Eyledük âb-ı nedâmetle hezârân iğtisâl
Fahr-i 'âlem hurmetine cünd-i dîne vir nizâm
Düşmeni kıl mübtelâ-yı ihtilâl ü i'tilâl
9. 'İzzet-i nasr-ı 'azîz ü devlet-i feth-i mübin
Lutf u ihsânunla olsun mü'minîne hasb-i hâl
Yâ İlâhî devlet-i Sultân-ı Ahmed Hânda
Târmâr u hâksâr olsun 'adüvvi bed-fa'âl
Tîğın Hân Ahmedün âvîze-i 'arş eyleyüp
Hûnını câsârun eyle zâğ-ı şemşîr-i celâl

12. Bahr ü berde ‘asker-i İslâmı mansûr eyleyüp
Düşmenün her fırkasın eyle za‘îf ü bî-mecâl
Ehl-i küfr olup ğıdâ-yı ejder-i rumh-ı ğuzât
Cünd-i dînün konmaya dâmânına gerd-i melâl
‘Avn u imdâduñla Sultân Ahmedî kıl kâm-yâb
Zîr-i na‘l-i rahş-ı iclâlinde mahv olsun krâl
15. ‘Asker-i İslâma eyle Hızr-ı tevfikün refik
Ola makhûr u müdemmer dâ’imâ ehl-i dalâl

38.

Mesnevî-i Mahabbet-nâme

Fe ‘ilâtün Mefâ ‘ilün Fe ‘ilün

Hafîf . . - - / . . - - / . . -

- Sâhib-i lutf u cûd u tab‘-ı bülend
Big Efendi o zât-ı bî-mânend
Hazretinün huzûr-ı ‘izzetine
Nâdî-i pâk-i ‘arş-ı rif‘atine
3. Nice biñ iştiyâk u hasret ile
Nice biñ ihtirâk ü fûrkat ile
İderüz ol du‘âları ihdâ
Ki kabûlin müyesser ide Hudâ
Bu du‘â ol du‘âdur ey dil-i zâr
Ki komaz dil secenceline ğubâr
6. Bu du‘âdur medâr-ı hubb u vidâd
Bu du‘âdur ‘iyâr-ı sıdk u sedâd
Bu du‘âdur du‘â-yı pür-ihlâs
Buña dil-bestedür ‘avâm u havâs
O du‘âdan kim olmaya memnûn
Ki riyâdan ola berî vü masûn
9. Ba‘dehu ihtirâm u ‘izzet ile
Dahı ta‘zîm-i bî-nihâyet ile
Hâtır-ı pâkini su‘âl iderüz
Tab‘-ı derrâkini su‘âl iderüz
Eylesün hazret-i Hudâ dâ’im
Sadr-ı devletde zâtını kâ’im
12. Gam u ekdârdan masûn olsun
İki ‘âlemde istegin bulsun

- Devlet ü 'izzet ü sa'âdet ile
Kuvvet ü sıhhat ü selâmet-ile
Gözedüp hükm-i şer' ü fetvâyı
Eyleyüp pîşe zühd ü takvâyı
15. Ala 'ömr-i tavîlden vâye
Eyleye hüsn-i hâli ser-mâye
İsr-i zâkir be-muktezâ-yı vefâ
Cilve idüp nesîm-i lutf u 'atâ
Mevc-hîz olur ise bahr-i su'âl
Dinilürse bu mahlasa nice hâl
18. *Minnetâ 'llâh zî 'n-nevâle henûz*
Sâkinüz gûşe-i bekâda bu rûz
Kârumuz cümleye du'âdur hep
Hâzır u gâ'ibe senâdur hep
Bâ-husûs ol vücûd-ı bih-bûda
Zât-ı mes'ûd u Hâtemi cûda
21. Bezl-i makdûr idüp zamân-ı safâ
İderüz bî-riyâ du'â vü senâ
Hazret-i zî 'l-celâli ve 'l-ikrâm
Feyz idüp cümleye safâyı tamâm
'An-karîbi 'z-zaman bilâ-te'hîr
Sohbet ü ülfet eyleye takdîr
24. Ve 's-selâm oldu bunda hatm-i kelâm
Bâkî olsun safâ gönülde müdâm
Hâlisu 'l-kalb bî-riyâ dâ'î
Şeyh Seyyid Muhammed-i VAHYÎ

39.

Bahr-i Tavîl Der-Beyân-ı Evsâf-ı Ser-â-pây-ı A'zâ-yı Cânân

Birinci dize, ölçüsü: 50 Fe 'ilâtün

Gel e ey 'âşık-ı şûrîde-i âvâre gönül deşne-i hun-h^vâr-ı gam-ı yâr ile pür-yâre gönül
tîg-ı kazâ-şa'sa'a-i fûrkat-i dildâr ile sad pâre gönül sâye-i pür-dâhiye-i tâli'-i
vârûnede hemvâre zah[1]m-hürde vü bî-çâre gönül ol gül-i bî-hâr-ı gülistân-ı vefânun
yine evsâfına dâmen-be-meyân ol leb-i mey-gûnını yâd eyleyüp ol neşve-i can-bahş
ile ser-cümle zebân ol meh-i ruhsârını fikr eyleyüp ol şevk ile ser-levha-i i'câza
rakam-pâş-ı beyân ol bu sebebdan salup âvâze ekâlîm-i ma'ânîye pesendîde-i ebnâ-yı
zamân ol gözün aç sa'y-i belîg it ki budur midhat-i cânân

İkinci dize, ölçüsü: 50 *Fe‘ilâtün*

Çeşm-i insâf ile bak ol kad-i bâlâ niçedür kâkül-i pür-çîn-i dil-ârâ niçedür cebhe-i pür-nûr-ı mehâsâ niçedür ebrû-yı müşğîn-i semen-sâ niçedür ol müje-i saf-şiken-i sabr u şikîbâ niçedür çeşm-i fûsun-perver-i şehlâ niçedür gamze-i i‘câz-nümâ nâdire-pîrâ niçedür ‘ârız-ı dil-cûy-ı mutarrâ niçedür la‘l-i suhan-gûy-ı musaffâ niçedür yâ dehen-i teng-i şeker-hâ niçedür yâ dem-i can-bahş-ı hased-sâz-ı Mesîhâ niçedür gerden-i sîmîn-i ferah-zâ niçedür var mıdur ol şâh-ı vefâ-pîşe-i pür-ân-ı suhandâna bu evsâf ile hûbân-ı zamân içre nazîr eyle gel im‘ân ile iz‘ân

Üçüncü dize, ölçüsü: 50 *Fe‘ilâtün*

Evvelâ başdan o bahtum gibi pür-pîç olan turre-i tarrârına söz ne leb-i la‘lîn-i şeker-bârına söz ne dem-i vuslatda olan lezzet-i güftârına söz ne o tezerv-i çimenistân-ı cinan reşk idecek şîve-i refâtârına söz ne dil-i nezzâreyi ser-mest-i fûsûn eyleyen ol gamze-i mekkârına söz ne nigh-i hûş-rubâ ile heveskârların zîb-i şifâ-hâne-i ümmîd iden ol dîde-i bîmârına söz ne niçe biñ lutf deger vaz‘ ile âzârına söz ne o hayâlinden ecel havf idecek hancer-i gaddârına söz ne ne kadar vâsıf-ı senâ olsa sezâvârdur ol dil-ber-i mümtâz-ı ser-efrâz u vefâ-sâz

Dördüncü dize, ölçüsü: 50 *Fe‘ilâtün*

Çeşm ü ebrû da güzel la‘l-i suhan-gû da güzel kâmet-i dil-cû da güzel zülf-i semen-bû da güzel sîne-i bî-mû da güzel hâl-i fûsun-perver-i Hindû da güzel hat çü şeb-bû da güzel ‘işve-i şûriş-fiken-i fitne-i câdû da güzel rû da güzel hû da güzel mâh-likâ pâk-edâ kân-ı vefâ pâdşeh-i hüsn ü bahâ nükte-küşâ fitne-nümâ nâdire-fermâ suhan-ârâ ki gören tal‘at-ı hurşîd-i ziyâsın diye hakkâ bu letâfet bu tarâvet bu pesendîde kıyâfet bu melek reşk idecek hey’et ü sûret bu felek hasret-i nezzâre-i ruhsârı olan mihr-i vefâ pertev-i nâdire kesâfetle budur şâh-ı cüvânân

Beşinci dize, ölçüsü: 50 *Fe‘ilâtün*

İmdi bu hüsn ü letâfetle ki sen şâh-ı cihansuñ bu zarâfetle ki ser-defter-i hûbân-ı zamansuñ bu hakîkat bu mürüvvetle ki her vech-ile şâhenshah-i mülk-i dil ü cansuñ saña şâyeste budur kim olasın ehl-i dil ü tab‘ ile hem-dem zurefâ bezmine mahrem şu‘arâ meclisine meyl ile dil-hurrem ü bî-gam dil-i mecrûh-ı belâ-dîde-i âşüfteye merhem idesin encümen-i ma‘rifete hasr-ı nazar tâ ola erbâb-ı hüner rûz u şeb ol cebhe-i pür-nûr ile ruhsâre-i hayret-fiken-i hûr ile mahsûd-ı meh ü mihr-i münevver ki cemâlünle kemâlün ola rif‘atde ber-â-ber ideler ehl-i zemin şânuña tahsin

Altıncı dize, ölçüsü: 50 *Fe‘ilâtün*

Sendedür şâh-levendâne revîş hûb gülüş serv-i hırâman gibi nâzende revîş şem‘-i fûrûzan gibi mevzûn oturuş hem meh-i tâban gibi nâzûk yürüyüş mülk-i dil ü cânı harâb eylemeye âb-ı revan gibi akış pertev-i hüsnünle dil-i ‘âşıkı hâkister idince yakış âhû-yı Hotan gibi bakış âh ki âşüftelerün hâli tebâh oldu felekler hedef-i nâvek-i âh oldu cihan gavta-hor-ı dûd-ı siyâh oldu amân ey şeh-i tannâz saña ‘arz-ı recâ mevsimidür [lutf u ‘atâ mevsimidür mihr ü vefâ mevsimidür zevk ü safâ mevsimidür]¹ bende-i dîrîne ki bir nîm-nigâh ile gel ey fitne-i devran

Yedinci dize, ölçüsü: 50 Fe‘ilâtün

Benem ol tâze-edâ şâ‘ir-i i‘câz-nümâ gamze-i mestün gibi şûr-efken-i dünyâ ki ruhuñ vasf idicek ‘âlemi gülzâr iderem gülleri bülbül gibi şeb-tâbe-seher zâr iderem nâle-i ‘uşşâk-ıla bu halk-ı cihânı değil e bahtımı bîdâr iderem zülfüñi yâd eyleyicek sünbüli mahbûs-ı çeh-i ‘âr iderem dîdeni medh itsem eger şerm-ile nergisleri bîmâr iderem [‘ârız-ı rengîn ile la‘l-i leb-i şîrînüñi anşam kalemüm reşk-i nihâl-i gül ü gül-nâr iderem]² nükte-i mu‘ciz-eser-i hâl-i fûsun-perverüñi zıkr idicek ruk‘a-i nazmumda olan noktaları merdüm-i çeşm-i dil-i sehhâr iderem ben

Sekizinci dize, ölçüsü: 50 Fe‘ilâtün

Dehen-i teng-i şeker-handenî fikr eyleyerek lehce-i nâdîdem ile fenn-i fesâhatde ser-â-ser dil ü tab‘ ehlini dil-teng iderem hep şu‘arâ haylinüñ eş‘âruma reşk itdürerek bâr-ı hasedle güzelüm³ kadlerini ceng iderem hep fûsahâ zümresin ey yekke-süvâr-ı çimenistân-ı vefâ gamzenî endîşede fitrâk-i semend-i dil-i çâlâkûme âveng iderem hep suhanum rütbesini anlamayup kadrümi fehm eylemeyüp fazluma teslîm-nümâ olmayan evvel hasedün her birinüñ sende olan hilm ü hayâ medhini ibrâz idicek şerm ile rûyın değil e çeşmini gül-reng iderem hep bunı bil ey meh-i tâban

Dokuzuncu dize, ölçüsü: 50 Fe‘ilâtün

Hamdü li ‘llâh benem ol VAHYÎ-i pâkîze-nazar şâ‘ir-i ferhunde-eser mâdih-i gîsû-yı mu‘anber ruh-ı enver ki sarîr-i kalemüm salmada nüh tâka bu âvâzeyi kim bendedür esrâr-ı fesâhat dahı âsâr-ı belâgat ki olur nükte-şinâsâna sözüm ke’s-i zarâfet gâzelüm sâgar-ı sahbâ-yı letâfet baña feyz oldı Hudâdan hele eş‘âr-ı fûsun-lehce-i pür-dikkat ü ser-tâbe-kadem hâlet ü yek-pâre melâhat baña lutf oldı bu nâ-güfte vü neşnîde suhan kim leb-i endîşeyi tâ mahşer ider vakf-ı halâvet ruh-ı nezzâre bulur nazmum ile pâye-i rif‘at ü şeref nûkhet ü behcet idinür mâye-i devlet

Onuncu dize, ölçüsü: 50 Fe‘ilâtün

Diñle ey hâsid-i pes-pâye-i bî-mâye sözüm kim garazum hazret-i Mevlâya bu takrîb ile de ‘arz-ı senâdur ki bu evsâf-ı pesendîde baña dâd-ı hudâdur bunı zann itme ki câhillere izhâr-ı fazîlet baña bir kesb-i safâdur hele sad hamd ki her safhada şeng-i kalemüm ‘işve-nümâdur o şehün vâsfına her vech-ile dikkatler idüp gûş-ı cihan diñlememiş güftelerün nüktelerün cem‘ine tertîbine himmetler idüp nazmuma biñ dürlü mezâmîn ile zînetler idüp şî‘r-i dil-âvîzümi tahrîrde geh sihr ü geh efsûn u geh i‘câz ile izhâr-ı mahâretler idüp nâmumı itdüm hele üstâd-ı suhandan

40.

Bahr-i Tavîl-i Dîger

Birinci dize, ölçüsü: 35 Fe‘ilâtün

Âh kim bir ruh-ı hûbı meh-i garrâ deheni gonçe-i ra‘nâ lebi sahbâ-yı musaffâ müjesi leşger-i ber-pâ kaşı mihrâb-ı mu‘allâ teni mir‘ât-ı mücellâ suhanı Kevser-i asfâ kadi Tûbâ revîşi reşk-dih-i cünbiş-i serv-i çimen-ârâ bu dil-i zârımı⁴ bir nîm-nigâh ile

kılıp vâlih ü şeydâ beni bir ‘işve⁵ ile eyledi âşüfte vü rüsvâ hele şâdam aña k’ol şâhid-i tannâz degül dil-ber-i mümtâz-ı cefâ-sâz

İkinci dize, ölçüsü: 24 *Fe ‘ilâtün*

Hak bu kim dil-ber-i ra’nâ dir iseñ ancak olur tal‘at-ı zîbâ dir iseñ ancak olur dîde-i şeh-lâ dir iseñ ancak olur gamze-i i‘câz-nümâ kâmet-i bâlâ dir iseñ ancak olur la‘l-i musaffâ dir iseñ ancak olur hâsılı bu bezm-i fenâda aña mânend ü nazîr olmadı bir gamzesi şeh-bâz

Üçüncü dize, ölçüsü: 33 *Fe ‘ilâtün*

Nedür ol rûy-ı münevver nedür ol cebhe-i enver nedür ol zülfi mu‘anber nedür ol la‘l-i hased-sâz-ı dil-i sâgar-ı Kevser nedür ol cünbiş-i şeng-i müje-i tesliyet-âver nedür ol çeşm-i fûsun-perver ü ol gamze-i şeh-bâz-ı dil-âver ki bu evsâf-ı pesendîde ile halk-ı cihân ol sanemüñ bende-i bî-minneti[dür] küşte-i tîğ-ı heves-i vuslatıdur hasret-i nîm-i nîgeh-i şefkatıdur bî-ser ü sâman

Dördüncü dize, ölçüsü: 31 *Fe ‘ilâtün*

Dil-berâ nâz ile reftârıña kurbân olayum lutf-ıla güftârıña kurbân olayum deşne-i zerkârıña kurbân olayum hışm-ıla âzârıña kurbân olayum gamze-i hun-h^vârıña kurbân olayum nergis-i bîmârıña kurbân olayum turre-i tarrârıña kurbân olayum la‘l-i şeker-bârıña kurbân olayum bir nîgeh-i merhamet-âlûd ile şâd eyle dil-i zârımı ey dil-ber-i tannâz

Beşinci dize, ölçüsü: 22 *Fe ‘ilâtün*

Ser-te-ser ‘âlemi hüsn ile o şûh ârelemişdür müjesi tîri dil-i zârını âşüftelerüñ yârelemişdür heves-i vasl ile tîğ-ı elem-i fûrkati⁶ âvârelerüñ sînesini pârelemişdür heves-i zînet-i gîsû ile⁷ meh-tâb-ı ruhı safhasını [karalamışdur]⁸

Altıncı dize, ölçüsü: 22 *Fe ‘ilâtün*

Hele bir sencileyin ‘âşıkâ şefkatli mahabbetli meveddetli zarâfetli letâfetli şehensâh-ı hüs[ü]n-‘asker ü serdâr-ı fûsûn⁹ -leşgeri seyr eylemedi dîde-i dünyâ imdi bu hüsn ü letâfetle budur şânıña şâyân [u] vassâf u senâ-h^vân ayâ dil-ber-i mümtâz

Yedinci dize, ölçüsü: 35 *Fe ‘ilâtün*

Bir güzelsin ki senüñ vasfıñı tasvîre sezâvâr degül Hâfız u Tâlib kalem-i ‘Urfî vü Sâ’ib emel-i Sâhib ü Tâ’ib dahı tahrîrine kâtib olamaz hâzır u gâ’ib sanem-i hûb-likâ pâk-edâ kân-ı vefâ ma‘den-i ‘irfân u hayâ ‘âşıkına rahm idici râh-ı vefâyâ gidici ‘işve-i pey-der-pey ile bende-i efkendesini mest-i harâb eyleyici çeşm-i dili fikr-i visâl ile pür-âb eyleyici şâh-ı vefâdâr

Sekizinci dize, ölçüsü: 35 *Fe ‘ilâtün*

N’ola ol şâh-ı cefâ-pîşeyi vasf eyler isem subh u mesâ sayf u şitâ aña benüm¹⁰ gibi vas[ı]f-h^vân u suhandan gerekdür k’ide evsâfını tahrîr ü beyân eyleye pâkîze-edâ ile kemâlâtını izhâr u ‘iyân olmaya sebkinde fûtûr eylemeye sehv ü kusûr ‘ârif ü nâzûk-

dil ola ‘âlim ola kâmil ola tâ ki biraz vasf ola ol şâh-ı levendan fezâ-yı dil ü can fehmi
ide hûbân-ı zaman kim nedür ol serv-i ser-efrâz

Dokuzuncu dize, ölçüsü: 26 *Fe‘ilâtün*

Benem ol şâ‘ir-i pâkîze-edâ mâdih-i ruhsâr-ı dil-ârâ ki felek mislini seyr
eylememişdür suhanum gibi suhan gûş-ı cihan dinlememişdür gazelüm gibi gazel hiç
şu‘arâ söylememişdür o mezâmîn ki perverde sarây-ı dil-i pâkümdür anuñ hüsni ü
cemâlin dahı bir kimse temâşâ-yı ‘iyân eylememişdür

Onuncu dize, ölçüsü: 28 *Fe‘ilâtün*

Lev haşa ‘llâh benem VAHYÎ-i hoş-tab‘ u suhandân benem milket-i ‘irfânda hâkân
benem reşk-i dil-i halk-ı cihan şâ‘ir-i mahsûd-ı nûkât-ı dil-i pür-kîne-i ebnâ-yı
zaman¹¹ kim göricek lehce-i nâdîdemi ihvân-ı safâ didi ki hakkâ bu nezâket bu
zarâfet bu letâfet bu fesâhat bu belâgatle budur ‘asrumuza mu‘cize-perdâz

İBTİDÂ-YI GAZELİYYÂT

Harfû 'l-Elif

1.

Mefâ'ilün Fe'ilâtün Mefâ'ilün Fe'ilün
Müctes . . . / . . . - / . . . - / . . . -

Niyâz-ı 'âşık-ı güm-geşte-dil esîr-i belâ
Safâ-yı hâtır-ı pâkündür ey melek-sîmâ
Gam-âşnâ olan 'uşşâka hışm idüp itme
Nigâh-ı lutfunı bî-gâne-âşnâ cânâ

3. Letâfet-i ruhuña vâkıf olsa şerminden
Küşâde olmaya gülşende gönçe-i ra'nâ
Olinca bâz-ı dilüm kâkülünle per-beste
Kebûter-i gamı bî-bâl ider şehâ peydâ
O gülsitân-ı hayâ olmuş âyîne-düşmen
Ki 'aks-i dîdesi de itmeye nezâre aña
Bu şi'r-i tâzede tarh-ı tekellûf it VAHYÎ
Ki sâf olup ola âyîne-i cihân-nümâ

2.

Fâ'ilâtün Fâ'ilâtün Fâ'ilâtün Fâ'ilün
Remel - . . . - / - . . . - / - . . . - / - . . . -

Murg-ı ümmîde kafesdür fikr-i zülf-i dil-rubâ
Şest-i mâhî-i hevesdür fikr-i zülf-i dil-rubâ
N'ola ta'tîr-i meşâm itse çü 'ûd-ı ahkerin
Sûz-ı dille hem-nefesdür fikr-i zülf-i dil-rubâ

3. Seyr-i sünbülzârı vakf-ı çeşm-i nisyân eyledüm
Bu dil-i şeydâya besdür fikr-i zülf-i dil-rubâ
Bezm-i hicrânı perîşân itmek ister var-ısa
Kûçe-i dilde 'asesdür fikr-i zülf-i dil-rubâ
N'eyleyem gül-hangeh-i fûrkatde 'ûd u 'anberi
Baña ancak mültemesdür fikr-i zülf-i dil-rubâ
6. Meyl-i vaslında hayâl-i gamzeden vehm eyleme
Çün saña feryâd-resdür fikr-i zülf-i dil-rubâ
Kalbe gelse inçledür âhum cihânı VAHYÎyâ
Kârvân-ı pür-ceresdür fikr-i zülf-i dil-rubâ

3.

Mef'ûlû Fâ'ilâtü Mefâ'ilü Fâ'ilün

Muzâri' - - . / - . - . / . - - . / - . -

Olmaz gönül o zülf-i dil-ârâmdan cüdâ
Bir turfe murğdur olamaz dâmdan cüdâ

Dûrî-i la'l-i yâr ile dil künc-i 'ışkda
Bir bâde-h^vârdur mey-i gül-fâmdan cüdâ

3. Fıkr-i visâl cilvegeh-i ye'sdür diyü
Ey hâtır olma kûçe-i akdâmdan cüdâ
Ser-tâbe-pây âteş olursa 'aceb midür
'Âşık ki ola yâr-i gül-endâmdan cüdâ
Vasf-ı leb-i bütânı ben almam dehânuma
Ol bâde medh olur mı k'ola câmdan cüdâ

6. İtme amân çeşümü gird-âb-ı eşk-i hecr
Ey mevc-i hüsnî mestî-i ârâmdan cüdâ
İzhâr-ı mihr idüp dimiş ol yâr-i pür-vefâ
Oldum dirîğ VAHYÎ-i nâ-kâmdan cüdâ

4.

Mefâ'ilün Fe'ilâtün Mefâ'ilün Fe'ilün

Müctes . - . - / . . - - / . - . - / . . -

Derûn-ı 'âşık-ı sâdıkda âh nâ-peydâ
Ki nâr-ı sâfda dûd-ı siyâh nâ-peydâ
Müşâhid-i nigeş-i mest-i dil-berüz her dem
Dem-i fırâkda ammâ nigâh nâ-peydâ

3. Şeb-i humâr-ı hec[i]rde muhâl vasl-ı visâl
Hız[ı]r nühüfte vü çeşm hufte râh nâ-peydâ
Vefâ-sipâhî-i şâh-ı tahayyülün zâhir
Ne hâldür bu zuhûr-ı sipâh nâ-peydâ
Tarîk-i 'ışkda pervâne-i nizârı görün
Harîk-i vuslat olur âh u vâh nâ-peydâ
6. Hücûm-ı gamze-i cânân katl-i 'âm ideyor
Yine fütâdeleri intibâh nâ-peydâ
Sağa nedür bilemem bâ'is-i cefâ VAHYÎ
Ümîd-i vuslat u cürm ü günâh nâ-peydâ

5.

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

Ruhuñda bûs-ı ağıâr ile çün-kim tâb olur peydâ
Derûn-ı 'âşıkanda bir yem-i hûn-âb olur peydâ

Gelürse hâtır-ı nâ-şâduma fıkır-i leb-i la'lün
Sadefde gûyiyâ bir gevher-i nâ-yâb olur peydâ

3. Ruhun nezzâresinde girye itsem fart-ı hasretten
Şehâ her katre-i eşkümde bir meh-tâb olur peydâ
'Aceb mi çeşm-i lutf-ı dil-rubâ olursa vakf-ı h^vâb
Benüm te'sîr-i bahtumdan seherde h^vâb olur peydâ
Görince 'ârız-ı hûy-kerde-i dildârı ey VAHYÎ
Gönülde geh 'arak gâhî şarâb-ı nâb olur peydâ

6.

Mef'ûlü Mefâ 'ilü Mefâ 'ilü Fe 'ûlün

Hezec - - . / . - - . / . - - . / . - -

Ey tal'atı âyîne-i dildâr-ı tesellâ
V'ey reng-i lebi gâze-i ruhsâr-ı tesellâ
Fıkır-i nigeş-i şefkat-i mahbûb-ı hayâlün
Oldı sebeb-i germî-i bâzâr-ı tesellâ

3. Ol mâh-likâ 'âşık-ı gam-dîdesin eyler
Bir gamze ile vâkıf-ı esrâr-ı tesellâ
Endîşe-i bûs-ı leb-i handenle gönülde
Cânâ açılur gonçe-i gülzâr-ı tesellâ
VAHYÎ dil-i şûrîde-i mihnet-keşe müjde
İtdi o perî lutf-ıla izhâr-ı tesellâ

7.

Mef'ûlü Fâ 'ilâtü Mefâ 'ilü Fâ 'ilün

Muzâri' - - . / - - . / . - - . / - - .

Ey çeşm-i lutf-ı gamzesi nâ-mahrem-âşnâ
V'ey pertev-i cemâli gibi 'âlem-âşnâ
Mahbûb-ı merg-i şâdî-i ümmîd-i vuslatun
Cânâ der-âğuş eyleyemez her gam-âşnâ

3. Te'sîr-i sûzişümle çü hûy-kerde-rûy ola
Verd-i 'izâr-ı pâkin ider şeb-nem-âşnâ
Etfâl-i eşk-i hecr ile şîvengeh-i çeşm
Sad âh u vâh tâ key ola mâtem-âşnâ

Ey meh bihişt-i tal‘at-ı gül-reng-i ‘ışkuşa
Şeh-bâz-ı nâz-ı gamzeñi kıl âdem-âşnâ

6. Bârân-ı lutf-ı şâhid-i şûh-ı hayâl-i yâr
Gül-deste-i tasavvurum itdi nem-âşnâ
VAHYÎ gönül şarâb-ı gam-ı ‘ışk mestidür
Olmaz bu bezmgâhda câm-ı Cem-âşnâ

8.

*Mef‘ûlü Fâ‘ilâtü Mefâ‘ilü Fâ‘ilün
Muzâri‘ - - - / - - - / - - - / - - -*

Murg-ı tahayyülüm olıcak şeh-per-âşnâ
Gîsûsı oldu dâm-ı fûsun-perver-âşnâ

Cân-ı za‘îfi tuhfe kabûl it disem olur
Dest-i tegâfûl-i nigeñün hancer-âşnâ

3. Nûş-ı hayâl-i la‘lün ile neşve-yâb olup
Bâzû-yı şevkini dil ider ahker-âşnâ
Bezm-i gamuñda hecr ile çok ülfet eyledük
Sâkî-i çeşm-i hasret olup sâgar-âşnâ
Dendân u la‘li vasfın idüp hâme VAHYÎyâ
Oldı ‘arûs-ı şî‘r-i terüm zîver-âşnâ

Harfû ‘l-Bâ’

9.

*Mefâ‘ilün Fe‘ilâtün Mefâ‘ilün Fe‘ilün
Müctes . - - - / - - - - / - - - - / - - -*

Göreydi h^vâbda câm-ı leb-i nigârı şarâb
İderdi bezm-i Cemi hasret-i humârı şarâb

İşitse vasfını ol dîde-i siyeh-mestün
Olurdi ‘âşık-ı bî-sabr u bî-karârı şarâb

3. Takaddüm itdi aña bûs-ı la‘l-i dil-berde
‘Aceb mi sâgara eylerse inkisârı şarâb
O şûhı gül gül ider ehl-i ‘ışkı bülbül ider
Esîr-i kâkûl ider bu dil-i figârı şarâb
Enîs-i VAHYÎ-i gam-h^vâr fikr-i la‘lündür
Şu rinde döndi o kim ola gam-güsârı şarâb

10.

Mef'ûlû Fâ'ilâtü Mefâ'ilü Fâ'ilün
Muzâri' - - . / - . - . / . - - . / - . -

Eylerse hüsn-i rûyuñı meh-tâb iktisâb
Mihr-i münîr mehdên ide tâb iktisâb
Olmazdı çeşm-i neş'esi eşk-i humâr-ı ye's
Evsâf-ı la'lûñ itse mey-i nâb iktisâb

3. Fehm-i ma'ânî-i hikeme sarf-ı himmet it
Tâ ders-i 'ışkdan ola âdâb iktisâb
Mir'ât-ı dîde 'aks-i hayâlinden ola dûr
Nâz-ı bütânı itse eger h^vâb iktisâb
Bâzâr-ı nazma nice gelür VAHYÎ itmeyen
Yâd-ı lebiyle gevher-i kem-yâb iktisâb

11.

Mefâ'ilün Mefâ'ilün Mefâ'ilün Mefâ'ilün
Hezec . - - - / . - - - / . - - - / . - - -

Şebangeh çünkü bezm-i 'âlemi tenvîr ider meh-tâb
Dil-i 'uşşâkı fîkr-i rûy-ı yâre siyr ider meh-tâb
Nişân-ı şeh-per-i Cibrîl sanmañ perr-i vefkdür kim
Nigâr-ı nûr-ı şemsi kendüye teshîr ider meh-tâb

3. Görince turre-i tarrâr-ı yâri hâle göstermiş
Meger ol âftâba peykerin tanzîr ider meh-tâb
Şeb-i pür-ebrde bang-ı ra'[a]d sanmañ idüp şükûh
Felekde âh u vâh u nâle-i şeb-gîr ider meh-tâb
Meger şeyh-i nücûm olup idinmiş hucre-i hâle
Girüp tenhâda h^vâb-ı ahteran ta'bîr ider meh-tâb
6. Ruh-ı al-i nigârıñ vâsf-ı pâkin kilik-i reşk ile
Hemîşe safha-i şeft-âlûya tahrîr ider meh-tâb
Felekde rû-nümûd oldukda VAHYÎ kalb-i 'uşşâka
O şûhuñ hasret-i ruhsârını tasvîr ider meh-tâb

12.

Mef'ûlû Fâ'ilâtü Mefâ'ilü Fâ'ilün
Muzâri' - - . / - . - . / . - - . / - . -

Yâd-ı lebûñle zevk-i şarâb eyledük bu şeb
Bir demde cânı mest-i harâb eyledük bu şeb
Âh-ı bülendi mutrib-i hoş-lehce eyleyüp
Bu sîne-i nizârı rebâb eyledük bu şeb

3. Bezm-i mey-i hayâl-i visâlünde ey perî
Nâr-ı hevesle cânı kebâb eyledük bu şeb
Yârâna vasf idüp ‘arak u zülf-i dil-beri
İzhâr-ı resm-i ‘ûd u gül-âb eyledük bu şeb
Setr itdi dîdeden lebin ol dil-rubâ dirîğ
Çeşm ile la‘lini şeker-âb eyledük bu şeb
6. Ümmîd-i pâ-y-bûs-ı nigâr ile tâ seher
Kûyında cism-i zârı türâb eyledük bu şeb
VAHYÎ o şûha hâl-i dil-i zârı ‘arz idüp
Çeşm-i recâ-yı vaslı pür-âb eyledük bu şeb

13.

Mef‘ûlû Mefâ‘ilû Mefâ‘ilû Fe‘ûlûn
Hezec - - . / . - - . / . - - . / . - -

- Ruh turreye turre ruh-ı zîbâya münâsib
Gül sünbûle sünbül gül-i ra‘nâya münâsib
Bir serv-i bülend-i çimenistân-ı vefâsuñ
Kâmet saña sen kâmet-i bâlâya münâsib
3. Ruhsârıñı zülfünle görenler didi hakkâ
Meh hâleye hâle meh-i garrâya münâsib
Dil rûyuña meyl itdi didüm didi o fettan
Bülbül güle gül bülbül-i şeydâya münâsib
Vasf-ı lebi gitmezse dehânumdan ‘aceb mi
Sâgar meye mey sâgar-ı sahbâya münâsib
6. Gör lutfın o şûhuñ dimiş âşüftelerüm de
VAHYÎ baña ben VAHYÎ-i gûyâya münâsib

14.

Mefâ‘ilûn Mefâ‘ilûn Mefâ‘ilûn Mefâ‘ilûn
Hezec . - - - / . - - - / . - - - / . - - -

- Cüvânan bezl-i nakd-i cevri ile meşhûrlardur hep
Velî deryûzekârân-ı cefâ ma‘zûrlardur hep
Gönül delk-i ümîdi rehn-i sahbâyı ferâğ eyle
Kadeh-nûşân-ı bezm-i ârzû mahmûrlardur hep
3. O gonçe biñ niyâz ile tebessüm-rîz-i nâz olmaz
Belî nev-devletân-ı hüsn ü an mağrûrlardur hep
‘Îzârıñ ‘akl alır zülfün ider insânı der-zencîr
Saña meyl itmede erbâb-ı dil mecbûrlardur hep

Hirâs-endâz olur çîn-i cebînün gerçi ağyâra
Suhan-fehmân-ı nâz ol vaz‘dan mesrûrlardur hep

6. Cehâlet-pîşegan ser-şâre-nûş-ı meclis-i vuslat
Humâr-ı hecr ile ehl-i hüner rencûrlardur hep
Zülâl-i nazm-ı pâkûn eyle cârî bâğ-ı i‘câza
Ki VAHYÎ sâha-gerdân-ı suhan mahrûrlardur hep

Harfû ‘t-Tâ’

15.

Fe ‘ülün Mefâ ‘ilün Fe ‘ülün Mefâ ‘ilün
Tavîl . - - / . - - - / . - - / . - - -

Görince ruh-ı pâkin gönül eyledi rağbet
Kim oldur gül-i bâğ-ı dil-i ‘âşık-ı vuslat
İdersün fidâ-yı can visâle irem dirsen
Safâ kesb ider mi hîç şu kim çekmeye mihnet

3. Sürûra ‘ilâc olmazsa bu dehr-i fânîde
Gel ey gam senünle idelüm bir zamân ülfet
Esüp rûzgâr-ı iştiyâkı derûnumda
Varur kûy-ı dildâra ten-i zâr bî-zahmet
Şehâ VAHYÎ-i âvâre hâlin su‘âl eyle
Şeb-i gamda derd-i hecrün ile ider sohbet

16.

Mefâ ‘ilün Fe ‘ilâtün Mefâ ‘ilün Fe ‘ilün
Müctes . - - - / . - - - / . - - - / . - - -

Bulursa ‘aks-i ruh-ı yâr ile cilâ mir’ât
Olur hased-fiken-i mihr-i pür-ziyâ mir’ât
‘Aceb mi eylese sad pâre inkisârım anı
O mâhı eyledi hod-bîn ü hod-nümâ mir’ât

3. O hûr-tal‘atun olsa ‘izârına me’vâ
Olurdu gülşen-i cennetle hem-bahâ mir’ât
Olursa Mânî vü Bih-zâda ta‘ne-zen lâyık
Çıkardı nakşunı bir lahzada şehâ mir’ât
Ümîd-i vasla ider tevbe-i Nasûh ‘uşşâk
Alınca destine ol şûh-ı pür-cefâ mir’ât
6. İderdi şâne gibi şerhazâr sînesini
Olaydı nefha-i zülfünle âşnâ mir’ât
O şâh-ı hüsne felek var-ısa gedâ geçinür
Ki mihr ü mehle sunar rûz u şeb anâ mir’ât

Verâ-yı zarfına vasf-ı ‘izâruñ itsem nakş
‘Ukûsı göstere ma‘kûs dâ’imâ mir’ât

9. Hayâli cilvegeh itmez dili şeb-i gamda
Ki baht hufte vü ma‘kûs hâliyâ mir’ât

Şikeste olsa da sûret-pezîrdür hâli
Ki çekdi sîneye cânânı ibtidâ mir’ât

Tabî‘at olsa kedernâk sînesin yâd it
Küsûfda tutulur mihre VAHYÎyâ mir’ât

17.

Mefâ ‘ilün Mefâ ‘ilün Mefâ ‘ilün Mefâ ‘ilün

Hezec . - - - / . - - - / . - - - / . - - -

Harâb-ender-harâb itdi dil-i zârum gam-ı fûrkat
Meded ey fikr-i vuslat gel yetiş ol hem-dem-i fûrkat

İder talan her dem zevk ü şevk ü sabr u ârâmı
Mahabbet nâr-ı mihnet derd-i hasret mâtem-i fûrkat

3. Hele yârî-i baht-ı dûn ile çarh-ı nigûn itdi
Dil-i pür-ıztırâbum rûz u şeb vakf-ı dem-i fûrkat

Şikâyet sad şikâyet ta‘ne-i ağıyardan cânâ
Gül-i fikr-i visâlün eyledi pür-şeb-nem-i fûrkat

Tecellîgâh-ı rûy-ı vuslat ol ey dîde-i tâlî‘
Yeter olduñ bu hasretgâhda cây-ı yem-i fûrkat

6. Nisâr-ı nakd-i eşk eyler dem-â-dem çeşm-i hun-rîzüm
Sehâlar itse lâyıkdur ki oldı Hâtem-i fûrkat

Belâ vü derd ü mihnet ceşş-i bî-pâyândur VAHYÎ
Dil-i şûrîde zîrâ oldı şâh-ı ‘âlem-i fûrkat

18.

Mef‘ûlü Mefâ ‘ilü Mefâ ‘ilü Fe‘ûlün

Hezec - - . / . - - . / . - - . / . - -

La‘lün var iken gönçe-i handâna ne minnet
Zülfün var iken sünbül-i reyhâna ne minnet

Can viren alur kâle-i vaslum dimiş ol şûh
Şimden-girü yâ vuslat-ı cânâna ne minnet

3. Bîhûde hezâr-ı dili gel eyleme nâlan
Kûyunda senün nâle vü efgâna ne minnet

İnsâf eger ‘âlemi ihlâk ise kasduñ
Gamzeñ yetişür hancer-i bürrâna ne minnet

Lutf eyle didüm yâre didi lutf u keremle
VAHYÎ olıcak lutf-ı firâvâna ne minnet

19.

Mef'ûlû Fâ 'ilâtû Mefâ 'ilû Fâ 'ilün
Muzâri' - - . / - . - . / . - - . / - . -

Sahrâ-yı kâma irmedi hîç şâh-râh-ı baht
Evc-i safâda olmadı gerdân mâh-ı baht

Meyl-i der-i nigâr ideli halka-i çeş[i]m
Vakf-ı der-i sarây-ı cefâdur nigâh-ı baht

3. Hayfâ ki bezm-i 'âlem-i pür-pîç ü tâbda
Bir gâze-sây bulmadı rûy-ı siyâh-ı baht

Bu dehr-i bâz-gûnede geşt ü güzâr idüp
Menzilgeh itdi deşt-i belâyı sipâh-ı baht

VAHYÎ ümîd-i bâğ-ı visâl ideli göñül
Perverde-i zemîn-i elemdür giyâh-ı baht

20.

Fâ 'ilâtün Fâ 'ilâtün Fâ 'ilâtün Fâ 'ilün
Remel - . - - / - . - - / - . - - / - . -

Olalı tab'-ı cüvânan lutf-düşmen cev-r-dost
Oldı nâ-çâr ehl-i 'irfan lutf-düşmen cev-r-dost

Çeşm-i şûh-ı 'işve-perver cev-r-düşmen lutf-dost
Gamze-i hun-h^vâr-ı fettan lutf-düşmen cev-r-dost

3. Kâr-ı çarh-ı dîn 'aks-i rağbet-i 'uşşâkdur
Oldı anuñ'çün dil ü can lutf-düşmen cev-r-dost

Sen de ey tâli' felek-tâbi' misin ol meh gibi
Kim olursuñ fitne-cûyan lutf-düşmen cev-r-dost

Ey şeh-i ümmîd-keş tebdîl-i hûy itme aman
Oldı VAHYÎ-i suhandan lutf-düşmen cev-r-dost

Harfû 's-Sâ'

21.

Fa 'lün Fe 'ûlün Fa 'lün Fe 'ûlün
Mütekârib - - / . - - / - - / . - -

Ağyâra lutf keyf oldı bâ'is
Hakkâ ki oldur ümmü 'l-habâ'is

Ednâ vefâda biñ fikr ider yâr
Olmaz cefâda bir lahza mâkis

3. ‘Uşşâk-ı nâ-şâd ‘ukbâya gitse
Mâl-i belâya kim ola vâris
Fenn-i füsûnuñ müşkillerinde
Çeşmünle olmaz bir kimse bâhis
Kânûn-ı lutfun icrâ iderken
Şimdi dirîgâ cevır oldı hâdis
6. Oldukda pâ-dih kûy-ı nigâra
Geldi rakîban çün kelb-i lâhis
‘İlm-i visâlün bir fasldur lîk
Hecründe gâyet çokdur mebâhis
Zülf eylemekde ‘aklun perîşan
Bu fîtneden yâr olmaz mı hânîs
9. Cânân u ‘âşık beyninde hergiz
Olmasa VAHYÎ ağıâr-ı sâlis

22.

Mefâ‘ilün Fe‘ilâtün Mefâ‘ilün Fe‘ilâtün
Müctes . . . / . . . / . . . / . . .

- Dilün ki ‘ışkdur ol şûha irtibâtına bâ‘is
Anun da olsa n’ola dille ihtilâtına bâ‘is
Dem-i visâlde bûs-ı leb ü ‘izâra salâdur
Ki bezmün oldı nuk[u]l revnak-ı simâtına bâ‘is
3. Göñül nesîm-i niyâz ile açdı gonçe-i vaslun
‘Aceb mi gül gibi olursa inbisâtına bâ‘is
Hemîşe seyl-sıfat bî-karâr iken dil-i şeydâ
Nedür o zülf-i perîşanda inzibâtına bâ‘is
Şarâb-ı la‘li olur bezm-i vuslatında o mâhun
Olursa VAHYÎ-i gam-h^vârınun neşâtına bâ‘is

Harfû ‘l-Cîm

23.

Mef‘ûlû Fâ‘ilâtü Mefâ‘ilü Fâ‘ilün
Muzâri‘ . . . / . . . / . . . / . . .

- Bezm-i firâka fikr-i ruhun eyleyüp sirâc
Yârân-ı ye’s-i vuslat ile itdün imtizâc
Erbâb-ı hüsn ser-te-ser ey şûh-ı meh-cebin
Virse şeh-i cemâlüne şâyestedür harâc
3. Dil-berle yek-dil olmağı ben eylemem ümîd
İtmez münâsebet sanemâ seng-ile zücâc

Meyl eyledükçe cevre o meh-pâre bulmada
Bâzâr-ı ‘ışk içre metâ‘-ı belâ revâc
Derd-i dil-i figâra iderse cihânda
Yârûñ tabîb-i lutfi ider VAHYÎyâ ‘ilâc

24.

Mefâ‘ilün Fe‘ilâtün Mefâ‘ilün Fe‘ilün
Müctes . - . - / . - . - / . - . - / . - . -

- Sevâd-ı hâl-i ruhuñ kâr-ı gâze-sâya ‘ilâc
Cevâhir-i suhanuñ ‘illet-i devâya ‘ilâc
Gönül ki mest-i şarâb-ı vefâ-nigâhuñ ola
Ümîd ider mi gam-ı ‘ışkdan rehâya ‘ilâc
3. Beyân-ı nokta-i mevhûmesinde kilik-i hayâl
Ne resm ider ise yok tengini edâya ‘ilâc
Olaydı pîle-i hun-pâş-ı zahm-ı dil der-hem
Olurdu mîl-i ser-i hancerin recâya ‘ilâc
Miyân-ı şâhid-i şûh-ı hayâl-i dildârı
Der-âğuş itmek olur derd-i ibtilâyâ ‘ilâc
6. Bulınca bûs-ı ‘izâr-ı tebessüm ile şeref
Dehân-ı tûl-i emel istemez cefâyâ ‘ilâc
Revâ mı VAHYÎ-i dil-haste bî-nasîb olmak
Nihân iken leb-i la‘lünde bî-nihâyâ ‘ilâc

25.

Fâ‘ilâtün Fâ‘ilâtün Fâ‘ilâtün Fâ‘ilün
Remel - . - . - / - . - . - / - . - . - / - . -

- Bâde-i la‘lin gören sahbâyâ çekmez ihtiyâc
Seyr iden rûyın meh-i garrâyâ çekmez ihtiyâc
Tekye-i gamda küleh-pûş u mürîd-i ‘ışk olan
Tâc-ı şâh u devlet-i Dârâyâ çekmez ihtiyâc
3. ‘Âşık-ı pür-dâğ-ı feryâd-âşnâ-yı sîne-kûb
Nağme-i tanbûr u def ü nâyâ çekmez ihtiyâc
Gülşen-i ‘âlemde me’nûs-ı ruh-ı cânân olan
Bûlbûlâsâ gonçe-i zîbâyâ çekmez ihtiyâc
Âşnâ-yı ye’s-i vasl u kânî‘-i seyr-i cemâl
Hem-çü VAHYÎ dil-ber-i ra’nâyâ çekmez ihtiyâc

Harfû 'l-Hâ'

26.

Fe'îlâtün Mefâ'ilün Fe'îlün
Hafîf . . - / . - - / . . -

- Ey lebi sâgar-ı müdâm-ı ferah
Tal'atı 'illet-i nizâm-ı ferah
Haşre dek olmasun mı mest-i neşât
Dehenünden alan peyâm-ı ferah
3. Sûret-i meyde sanma ola habâb
Şâh-ı neşve kurar hiyâm-ı ferah
Ola revnak-şikest-i sâgar-ı Cem
La'lûji ol ki ide câm-ı ferah
Çekmeden âğuş-ı visâle seni
VAHYî-i zâr alur mı kâm-ı ferah

27.

Fe'ûlün Fe'ûlün Fe'ûlün Fe'ûl
Mütekârib . - - / . - - / . - - / . -

- Göñül çekme gel intizâr-ı ferah
Açılmaz nikâb-ı 'izâr-ı ferah
Temennâger-i vuslat-ı yâr olup
Olur diller ümmîdvâr-ı ferah
3. Nukûd-ı dür-i eşk harç olmadın
Der-âgûş olmaz nigâr-ı ferah
Zemistân-ı hicran güzâr eyleyüp
İrişmez mi âyâ bahâr-ı ferah
Revân eyle cûy-ı sirişkin revan
Bulur revnakın lâlezâr-ı ferah
6. Şeb-i gamda fîkr-i ruh-ı yâr ile
Gelür VAHYîyâ bir nehâr-ı ferah

28.

Fe'îlâtün Fe'îlâtün Fe'îlâtün Fe'îlün
Remel . . - - / . . - - / . . - - / . . -

Düş olup dest-i 'atâ-pîşe-i cânâne kadeh
Dâ'imâ feyz-dih olur dil-i yârâna kadeh
Korkaram bî-edebâne heves-i bûse ider
Nûş idüp la'l-i lebünden iki peymâne kadeh

3. Dîdesi ‘aks-dih olmuş dem-i nûşîde meger
Bezm-i dildârda gördüm katı mestâne kadeh
Sûret-i meyde habâb itme kıyâs ey meh-rû
Egdi destârını keyf ile levendâne kadeh
Bezm-i hûbânda gerdân olıcak bâde ile
‘Aksler ile olur sanki sanem-hâne kadeh
6. Sâkî-i gül-ruh ayağ üstine kalkar çün-kim
Mey der-âgûş gele meclis-i rindâne kadeh
VAHYÎyâ va‘d-i hevâdârî-i hecr itmiş idi
Bezm-i vuslatda velî durmadı peymâne kadeh

Harfû ‘l-Hâ’

29.

Mefâ ‘ilün Mefâ ‘ilün Mefâ ‘ilün Mefâ ‘ilün
Hezec . - - - / . - - - / . - - - / . - - -

- Lebûn nezzâresinden ey perî insân olur güstâh
Ki bezm-i Cemde olsa şübhesiz mestân olur güstâh
Temâşâ-yı ‘izâr-ı yâr için nâlem ba‘îd olmaz
Olinca mevsim-i gül bülbül-i hoş-h^vân olur güstâh
3. Şehâ gîsû-yı lutfun her gedâya sâyebân itme
Vefâ itdükçe hûbân-ı zaman yârân olur güstâh
Ruhun fikriyle âhum kurs-ı mâhı dâgdâr eyler
Ki sûz-ı ‘ışk ile mâtem-keş-i hicrân olur güstâh
Bu şi‘r-i tâze VAHYÎ Yûsuf-ı Mısır-ı melâhatdür
Buña reşk itmede endîşe-i ihvân olur güstâh

30.

Fâ ‘ilâtün Fâ ‘ilâtün Fâ ‘ilâtün Fâ ‘ilün
Remel - . - - / - . - - / - . - - / - . - -

- ‘Ârız-ı yâr al olunca la‘l-i nâb olmaz mı sürh
Rûy-ı sâkî sürh olup câm-ı şarâb olmaz mı sürh
Şâhid-i deşneñ görince hûn-ı dil bârân olur
Ey perî-rû dîde-i zahm-ı pür-âb olmaz mı sürh
3. Sürhî-i dâğ-ı dilüm seyr eyleyüp ‘ayb eyleme
Reng-i rûy-ı dîde-i mest-i harâb olmaz mı sürh
Humret-i ruhsâruma hışm-ı dil-ârâdur sebab
Çihre-i mahcûb-dil vakt-i ‘itâb olmaz mı sürh
Reşk-i rûy-ı dil-rubâ imiş aña bâ‘is meger
VAHYÎyâ gâhî felekte âftâb olmaz mı sürh

Harfî 'd-Dâl

31.

Mefâ 'ilün Fe 'ülün Mefâ 'ilün Fe 'ülün
Hezec . - - - / . - - / . - - - / . - -

Olupdur zevk ü şâdî gam-ı hecrünle ber-bâd
Nigâh-ı merhametle yeniden eyle âbâd

Ruh-ı hâl-âverünge olinca tâb-kerde
O gîsû-yı mu'anber ider biñ fitne îcâd

3. Hezâran murğ-ı dildür şikârı her nazarda
Gören dir çeşm-i yâri zihî sayyâd-ı üstâd
Gül-i ra'nâ şeb ü rûz senün hem-sohbetünken
Katı dîvânelikdür hezârâ itme feryâd
Belâ-yı derd-i 'ışkuñ safâ 'add eylemez mi
Ümîd-i vuslatuñla dil-i VAHYî-i nâ-şâd

32.

Mefâ 'ilün Mefâ 'ilün Mefâ 'ilün Mefâ 'ilün
Hezec . - - - / . - - - / . - - - / . - - -

Dil-i şûrîde kim oldı firâkuñla belâ-mu'tâd
Ne mümkün cem'-i azdâd eyleyüp olmak safâ-mu'tâd

Gül-i fikr-i ruhuñ şevkiyle bâğ-ı gamda 'âşıklar
İder âh u fiğan çün 'andelîbân-ı nevâ-mu'tâd

3. Çıkarduk dilden ümmîd-i visâlün bârî lutf eyle
Nigâr-ı çeşmüñi eyle nigâh-ı âşnâ-mu'tâd
Bu deñlü nâz u istignâ ile ey şûh-ı cevri-ülfet
Nice şeng-i hayâl-i vuslatuñ oldı vefâ-mu'tâd
Dehân-ı hande-rîz ü gamzesin vasf iderek VAHYî
Olupdur hâme-i mu'ciz-beyânun nüktehâ-mu'tâd

33.

Mefâ 'ilün Fe 'ilâtün Mefâ 'ilün Fe 'ilün
Müctes . - - - / . - - - / . - - - / . - - -

Ne nâz-ı gâm u ne cevri-i nigârdan feryâd
Hücûm-ı 'ışk-ı sihirkâr-ı yârdan feryâd

Hatuñ ziyân-dih-i kâle-i cemâl olalı
Hezâr-ı zâr-ı dil eyler bahârdan feryâd

3. Çü tab'-ı râhatiyan düşmen-i fiğan olayım
İdersem ol nigeñ-i merg-bârdan feryâd

Cefâ-yı fikr-i visâl itdi pür-melâl dili
Bırakdı cümleyi eyler bu kârdan feryâd
Derûn-ı VAHYÎ-i âvâreveş harâb olsun
İden cüdâyî-i bûs u kinârdan feryâd

34.

Fâ 'ilâtün Fâ 'ilâtün Fâ 'ilâtün Fâ 'ilün
Remel - . - - / - . - - / - . - - / - . -

- Virdi neş'e 'işvesiyle 'âleme dildâr-ı 'îd
İtdi fermân-ı neşât 'âşıklara hunkâr-ı 'îd
Âh-ı 'âşık 'andelîbi 'ârız-ı dil-ber gülî
Bir dil-efzâ gülsitân-ı hûbdur gülzâr-ı 'îd
3. Nakd-i câna satdı bir şeft-âlûyî mahbûblar
Pür-revâc oldu o mikdâr ey göñül bâzâr-ı 'îd
Fikr-i la'l-i yâr ile 'uşşâk sükker-h^vâr olur
Anuñ içün geşt ider kannâd-ı şîrinkâr-ı 'îd
Rûze-i fûrkat güzâr itdi gelüp 'îd-i visâl
'Âşıkâ iftâr-ı vuslat zâhide iftâr-ı 'îd
6. Reşk-i nev-rûz-ı 'Acem mahsûd-ı Âzerbaycan
Ol kadar mergûbdur eyyâm-ı pür-envâr-ı 'îd
Âftâbı sayd ider reftâr iderse nâz ile
Ol mehi tezyîn idince câme-i zerkâr-ı 'îd
Gamze-i fettânuñı mîl-âşnâ-yı rahm kıl
Dil-berâ düşvâr olur 'âşıklara âzâr-ı 'îd
9. Sâdedür bu nazm-ı pâkîze tekellûf ber-taraf
Şevk-bahş olmak gerekdür VAHYÎyâ güftâr-ı 'îd

35.

Mef'ûlü Fâ 'ilâtü Mefâ 'ilü Fâ 'ilün
Muzâri ' - - . / - . - . / - . - . / - . -

- İtdi nezâresi dil-i zârum şehîd-i 'îd
Ber-dûş olunca yâre kabâ-yı sefid-i 'îd
Çekdi yed-i 'atâ ile İskender-i vefâ
Ye'cûc-ı derd-i fûrkate sedd-i sedîd-i 'îd
3. Bir hüsn-i tâze revnak-ı nev buldı hak bu kim
Tezyîn idince yâri libâs-ı cedîd-i 'îd
Çün mevsim-i kemâl cemâl-i nigârdur
Şâyestedür olursa bu eyyâm 'îd-i 'îd

İzhâr-ı lutf u rahmdadur hep bütân-ı dehr
Mahsûsdur saña bu ‘itâb-ı şedîd-i ‘îd

6. ‘Âşıkdan itme bûs-ı leb ü ‘ârızun dirîğ
Lutf eyle olma şâh-ı ‘atâ nâ-bedîd-i ‘îd
VAHYÎ-i zâra ruk‘a-i va‘d-i visâl ile
Geldi hezâr müjdeler itdi berîd-i ‘îd

36.

Mefâ ‘ilün Fe ‘ilâtün Mefâ ‘ilün Fe ‘ilün
Müctes . . . - / . . . - / . . . - / . . . -

Gel ey hayâl-i ser-i zülfi şeh-per-i ümmîd
Tasavvur-ı kad-i dil-cûyî ‘ar‘ar-ı ümmîd
Hücûm-ı derd ü ğam-ı fûrkatun görüp cânâ
Kabâ-yı ye’s be-dûş oldu dil-ber-i ümmîd

3. Meh-i visâl görünmezse evc-i hâtırda
Hele zuhûr ideyor gâhî ahter-i ümmîd
Şarâb-ı bûs-ı lebünle pür itmek olmadı hayf
Elûmde böyle tehî kaldı sâgar-ı ümmîd
Derûn-ı VAHYÎ-i bî-çâreyi ider sad çâk
Hemîşe tîğ-ı tegâfülle hancer-i ümmîd

37.

Mefâ ‘ilün Mefâ ‘ilün Mefâ ‘ilün Mefâ ‘ilün
Hezec . . . - / . . . - / . . . - / . . . -

Meh-i rûyun olaydı şu‘leger mânende-i hurşîd
İderdi nûr-ı dehri ser-te-ser mânende-i hurşîd
Hirâs-ı şâm-ı hüsn-âşâm-ı hattun eyledi tab‘um
Şafak-bârende-i hûn-ı ciger mânende-i hurşîd

3. N’ola sadr-âşnâ-yı âsmân-ı iltifât olsa
O kim rû-mâl-i kûy-ı yâr ider mânende-i hurşîd
Hayâl-i mâh-ı ruhsârınla âh-ı pür-şerâr itsem
Şebi rûz eyleyeydi her şerer mânende-i hurşîd
N’ola âşüfteler efgân iderse ‘andelîbâsâ
O gül-rû ‘azm-i bâğ itdi seher mânende-i hurşîd
6. Sipihr-i sînemi vakf eyler idüm ahter-i dâğa
O mâhı sîneye çeksem eger mânende-i hurşîd
Bu şî‘r-i tâze vasf-ı rûy-ı yâr olmağla ey VAHYÎ
Cihânı eyledi pür-zîb ü fer mânende-i hurşîd

38.

Mef'ûlü Mefâ'ilün Mef'ûlü Mefâ'ilün

Hezec - - . / . - - - / - - . / . - - -

Bir nîm-nigâh itse ol çeşm-i nevâl-âlûd
Eyler dil-i 'uşşâkı ümmîd-i visâl-âlûd

Bir âh ile mahv eyler 'âlemleri ser-tâ-pâ
Ol dil ki ola dâ'im hecrünle melâl-âlûd

3. Ol la'l-i leb-i rengîn itse suhanın şîrin
Bir kand-i mükerrerdür gûyâ ki zülâl-âlûd

Biñ dâne vü dâm eyler murğ-ı dili râm eyler
Oldukda şikenc-ârâ ol turre-i hâl-âlûd

Dendânuñı vasf ile VAHYÎ olalı mümtâz
Eş'âr-ı dil-âvîzi olmakda le'âl-âlûd

Harfû 'z-Zâl

39.

Mefâ'ilün Fe'ilâtün Mefâ'ilün Fe'ilün

Müctes . . . - / . . - - / . . - - / . . -

Yazıldı ol meh-i bî-mihre subh-dem kâgaz
Debîr-i 'ışk kalem âh-ı derd ü gam kâgaz

Hemîşe Mânî-i dil verd-i al nakş eyler
Ümîd-i bûs u hayâl-i vefâ kalem kâgaz

3. Beyân-ı âteş-i gam nâ-nüvişte kalmaz idi
Olaydı berg-i gül-i gülşen-i sitem kâgaz

O bezm-i hâsa güzâr itse kâsıd-ı nâme
Sütûrı müşg olur âhû-yı harem kâgaz

Hirâs-ı hecr ile ta'vîz tıfl-ı cân eyler
Yazarsa 'âşika dildâr-ı gonçe-fem kâgaz

6. Kebûterün olamaz sûz-ı 'ışka tâbı meger
O şûha seyl-i sirişkümle gönderem kâgaz

Bulursa VAHYÎ hased-dest-bûsı rütbesini
Basınca meclisine dil-berün kadem kâgaz

40.

Fe'ilâtün Fe'ilâtün Fe'ilâtün Fe'ilün

Remel . . . - / . . - - / . . - - / . . -

Tarafundan ki gele 'âşika pinhan kâgaz
Niçe olmaz sanemâ hırz-ı dil ü can kâgaz

Kilk-i fûrkatle gamuñ na‘tini tahrîr itdüm
Eyleyüp âh-ı şerernâki zer-efşan kâgaz

3. Def idüp dîv rakîbi o mehe yol bulamam
Olsa destümde eger mühr-i Süleyman kâgaz

Sa‘dî-i ‘akl-ı pesin nüktemi tahrîr idemez
Ser-te-ser olsa da evrâk-ı Gülistan kâgaz

VAHYÎyâ gülşen-i ikbâline olsa pâ-dih
Şevk-i vuslatla olur bülbül-i nâlan kâgaz

41.

Müfte ‘ilün Mefâ ‘ilün Müfte ‘ilün Mefâ ‘ilün

Recez - . . - / . . - / - . . - / . . -

Oldı leb-i tahayyüle bûs-ı ruh-ı vefâ lezîz
Geldi meşâm-ı hâtıra bûy-ı gül-i safâ lezîz

Lutf-ı nigâh-ı şâhid-i dîde-i meh-likâ latîf
Şîve-i sad cefâ-keş-i gamze-i dil-rubâ lezîz

3. Ol şeh-i nâz-pîşe-i ‘işve-sipâh gûşına
Mutrib-i âhumuñ gelür nağmesi dâ’imâ lezîz

Dest-i emel irişmedin nahl-i gül-i visâlûne
Rahne-i hâr-ı hecrûne diyemezüz şehâ lezîz

Zevk ü safâsı ‘âlemüñ tecrîbe olsa ser-te-ser
Ru’yet-i rûy-ı yârdan olmaya VAHYÎyâ lezîz

Harfû ‘r-Râ’

42.

În Der-Tarîk-i Hac Gofte-est

Mef‘ûlü Fâ ‘ilâtü Mefâ ‘ilü Fâ ‘ilün

Muzâri ‘ - - . / - . . . / . . . / - . -

Âb-ı magâre sâye salup hayme-i nigâr
Feyz-i ruhiyla oldı bir içüm su cûybâr

Gösterdi ‘aks-i zülf ü ruhı sünbül ü gülî
Vakt-i şitâda eyledi dünyâyı nev-bahâr

3. Zeyn itdi sebz-fâm çet[i]rler bu sâhayı
Cûyuñ kenârı hûb olur oldukda sebzêâr

Âsâr-ı iltifât-ı Kelîm ü Şu‘aybdur
Buldı bu sâha kesret-i ni‘metle iştiâr

Engûr-ı tâze oldı tenâvül rutab degül
Huccâca lutfın eyledi Feyyâz âşkâr

6. Gûş eyledükde ‘İLMî-i şûhuñ kelâmını
Oldı zebanda cârî bu ebyât-ı âbdâr
‘Afv eylesün kusûrını yârân VAHYîyâ
Oldı bu nazm-ı tâze bedîhî zeban-güzâr

43.

Mefâ ‘ilün Fe ‘ilâtün Mefâ ‘ilün Fe ‘ilün
Müctes . . . - / . . . - / . . . - / . . . -

- Hezâr-ı gülşen-i ‘ışkam hemîşe zâram zâr
Ne zâr zahm-hor-ı nevk nevk-i hâram hâr
Dil oldı vakf-ı temennâ-yı hâk-râhî-i dost
Hıyef dahı ben esîr-i kemend-i ‘âram ‘âr
3. O şûh bir nigeñ-i şefkat itdi fehm itdüm
Ki defter-i dil-i pâkinde ben de varam var
‘Aceb mi haşrda da mest-i câm-ı vasl olsam
Şehîd-i gamze-i hemvâre-mest-i yâram yâr
Ümîd-i bûs-ı ruh-ı dil-ber ile VAHYîveş
Hezâr-ı gülşen-i ‘ışkam hemîşe zâram zâr

44.

Mefâ ‘ilün Fe ‘ilâtün Mefâ ‘ilün Fe ‘ilün
Müctes . . . - / . . . - / . . . - / . . . -

- Şu turre kim ruh-ı hâl-âver-i nigâra çıkar
O mârdur süzilüp nahl-i mîvedâra çıkar
Olup şikûfe-i zahm-ı gamıyla pür sînem
Bir ergavân-ı ter ü tâzedür bahâra çıkar
3. Nigâh-ı ‘ışk-meniş-i bâz-ı gamze der-bâzû
Fezâ-yı ‘ışkda murğ-ı dili şikâra çıkar
Hemîşe keştî-i dil bahr-i gamda geşt itmez
Hevâ-yı vuslat-ı yâr ile bir kenâra çıkar
Nazar kılınsa zarâfetle şi‘r-i VAHYîye
Netîce-i suhanı vâsf-ı hüsn-i yâre çıkar

45.

Fâ ‘ilâtün Fâ ‘ilâtün Fâ ‘ilâtün Fâ ‘ilün
Remel - . . - / - . . - / - . . - / - . . -

Sâde-levhân ol hat-ı nev kim ‘izâra yazdılar
Nazm-ı târîh-i Hüseyini sanki nâra yazdılar
Tarf-ı la‘l-i dil-rubâda hatt-ı müşgin sanmañuz
Vâsf-ı Cemdür kim şarâb-ı hoş-güvâra yazdılar

3. Cünbiş-i gîsûsı îhâm itdi fikr-i vaslın âh
Âyet-i mihr ü vefâyı püşt-i mâra yazdılar
Nâ-ümîdî-i visâl-i dil-beri üftâdegan
Âteş-i seyyâl-i eşk-i intizâra yazdılar
VAHYÎyâ insâf idüp bu şi'rünî erbâb-ı dil
Safha-i berrâk-ı çeşm-i i'tibâra yazdılar

46.

Mefâ 'ilün Mefâ 'ilün Mefâ 'ilün Mefâ 'ilün
Hezec . - - - / . - - - / . - - - / . - - -

- Gönülde bûs-ı rûy-ı yâr ile 'ışk u cünûn artar
Ne hâletdür devâ itdükçe bu derd-i derûn artar
O meh-rû nâz ile oldukda şem'-i bezm-i mey-nûşan
Ruh u la'linde âb u tâb çeşminde füsûn artar
3. Hurûş-ı eşk-ile noksan-pezîr olur kıyâs itme
Hemîşe âteş-i 'ışk-ı dil-i zâr u zebûn artar
Hayâl-i la'li 'ışk-efzâ olur dilde karâr itse
Hum içre dursa çün keyf-i şarâb-ı la'l-gûn artar
Eger meşrûta-dih 'add olsa VAHYÎ ser-te-ser 'âlem
Yine erbâb-ı 'ışka zulm-i baht-ı vâj-gûn artar

47.

Mefâ 'ilün Mefâ 'ilün Mefâ 'ilün Mefâ 'ilün
Hezec . - - - / . - - - / . - - - / . - - -

- Ne dem cevri ü cefâ-yı dil-rubâ-yı şîvekâr artar
Kudûm-i şeng-i va'd-i vasla dilde intizâr artar
Hat-ı mevhûm bâzâr-ı leb-i la'lûn kesâd itmez
Bahâr irse harîdâr-ı şarâb-ı hoş-güvâr artar
3. Fetîl-i zahm cism-i şerhadârumda münâsibdür
Çırâgân itseler elbette zevk-i lâlezâr artar
Ne gam kâlâ-yı vasl-ı dil-rubâ efzun-bahâ olsa
Dem-â-dem çünki nakd-i genc-i çeşm-i eşk-bâr artar
Göreliden VAHYÎyâ ruhsâr-ı gîsû-perver-i yâri
Figân u âh u vâh u nâlemüz leyl ü nehâr artar

48.

Mef'ûlû Fâ 'ilâtü Mefâ 'ilü Fâ 'ilün
Muzâri' - - . / - - . / . - - . / - - .

Dil oldı mest-i bâde-i pür-cûş-ı lutf-ı yâr
Hayrân-ı nâz-ı gamze vü medhûş-ı lutf-ı yâr

- Câm-ı şarâb-ı nâb görinsün mi çeşmine
Ol ‘âşıkun ki ola kadeh-nûş-ı lutf-ı yâr
3. H^vâb-ı safâdan açmaya tâ haşr çeşmini
Râhatgeh ola aña ki âgûş-ı lutf-ı yâr
- Ser-beste kalmaz idi gönül müşkilât-ı ‘ışk
Hışm u ‘itâb olmasa rû-pûş-ı lutf-ı yâr
- VAHYÎ kelâmun olsa n’ola sâgar-ı neşât
Dil oldı mest-i bâde-i pür-cûş-ı lutf-ı yâr

49.

Fâ ‘ilâtün Fâ ‘ilâtün Fâ ‘ilâtün Fâ ‘ilün
Remel - . - - / - . - - / - . - - / - . -

- Gerçi eyler bülbüli derd ile nâlân intizâr
İtdürür âhir güle çâk-i girîbân intizâr
- İştîyâk-ı nâz ile ‘uşşâk olur âşüfte-hâl
Çekse ‘âşıkdan niyâza n’ola cânân intizâr
3. Sîneye gel zîver-i âguş ol ey rûh-ı revan
Hâleye teklîf ider mi mâh-ı tâbân intizâr
- Olmasa dâ‘î bihişt-i vuslata gamzen eger
Dûzah olurdu baña hecrünle her ân intizâr
- Cân u dil hasret-keş-i bûs-ı leb-i dildârdur
Câm-ı sahbâya çeker elbette rindân intizâr
6. Oldı sâkî-i şarâb-ı ye’s bezm-i h^vâhişe
Mest-i nâzum haşre dek bulmaz mı pâyân intizâr
- VAHYÎ-i âvâreñi kıl nâ‘il-i zevk-i visâl
Câna te’sîr eyledi ey şâh-ı hûbân intizâr

50.

Mef‘ûlü Fâ ‘ilâtü Mefâ ‘ilü Fâ ‘ilün
Muzâri ‘ - - . / - . - . / - . - . / - . -

- Çeşmün ki mest ü âfet-i devrân olup gider
Esrâr-ı ‘ışk dehre nümâyân olup gider
- Bir nazra-i vefâ-menişünle ‘imâret it
Dil şehri seyl-i eşk-ile vîrân olup gider
3. Var-ısa ‘azm-i bâğ ider ol şeh-levend-i nâz
‘Uşşâk-ı zâr hâk-ile yeksân olup gider
- Olsun yine şehâdete âmâde bî-dilan
Ol tıfl-ı pâk dil-ber-i fettân olup gider

VAHYÎ-i zâr fikr-i ruh-ı al-i yâr ile
Bâğ-ı suhanda bülbül-i nâlân olup gider

51.

Mef'ûlû Fâ 'ilâtü Mefâ 'ilü Fâ 'ilün
Muzâri' - - . / - . - . / . - - . / - . -

- Cânan şu dem ki 'âşika bir tâze nâz ider
Miskîn o şevk-ile nice mümtâza nâz ider
Andan ta'allüm eyler iken nâz u şîveyi
Bir vakt olur ki gamze-i gammâza nâz ider
3. Nâz eyleyeydi ol yüzi gülden niyâz-ı nâz
Nâz ile dirdi dil-ber olan nâza nâz ider
Sînemde zahm-ı tîğ-ı cefân ey tabîb-i can
Bih-bûd-ı lutf u merhem-i i'zâza nâz ider
Savt-ı hazîn-i âhum irişdi çü gûşuğa
Olsa 'aceb mi nağme-i şeh-nâza nâz ider
6. VAHYÎ gam-ı firâk ile germ-ülfet olalı
Va'd-i visâl-i hecr-i ber-endâza nâz ider
Sûretde sehldür bu gâzel lîk her tab'
Mazmûn-ı dil-pesendini ibrâza nâz ider

52.

Fâ 'ilâtün Fâ 'ilâtün Fâ 'ilâtün Fâ 'ilün
Remel - . - - / - . - - / - . - - / - . -

- Bezm-i gamda baht ile dil hep belâ söyleşdiler
Fenn-i derd-i 'ışkî iki mübtelâ söyleşdiler
Zahm-ı hûn-âlûdelerle çeşm-i eşk-efşânlar
Meclis-i fûrkatde vâfir mâ-cerâ söyleşdiler
3. Gird-i ferş-i dilde cem' olup etibbâ-yı hayâl
Hastegî-i derd-i hicrâna devâ söyleşdiler
Tîre olmuş çeşm-i lutf-ı yâr gerd-i hışm ile
Cem' olup 'uşşâk aña kuhl-i cilâ söyleşdiler
Gamze vü çeşmin suhan-perdâz gördüm var-ısa
Güftehâ-yı VAHYÎ-i şîrîn-edâ söyleşdiler

53.

Mef'ûlû Fâ 'ilâtü Mefâ 'ilü Fâ 'ilün
Muzâri' - - . / - . - . / . - - . / - . -

Sürhî-i bûse kim ruh-ı hûbâna dizdiler
Gûyâ kenâr-ı Kevsere peymâne dizdiler

Bârân idince tîrini müjganların şehâ
San'atla cümlesin hedef-i cânâ dizdiler

3. 'Uşşâk fikr-i zülfün idüp dâm-ı murg-ı sabr
Cânâ hayâl-i hâlün aña dâne dizdiler

Gamzeñ yanında dîdelerün seyr iden didi
Cây-ı 'itâba bir iki mestâne dizdiler

VAHYÎ ümîd-i vuslatı terk it ki hûblar
Yâkût-ı va'di rişte-i nisyâna dizdiler

54.

Mefâ'ilün Fe'ilâtün Mefâ'ilün Fe'ilâtün

Müctes . . . / . . . - / . . . - / . . . -

Nigâh ider mi güle 'ârız-ı nigârı görenler
Bakar mı sünbüle şeb-bûy-ı zülf-i yâri görenler

Görince hattını bûs eylerüz 'izâr-ı latîfin
Tahammül eyleyemez 'işrete bahârı görenler

3. Nice nezâre ider gayrı dil-rubâyâ cihanda
O şâhid-i semen-endâm u gül-'izârı görenler

Fiğân-ı bülbül-i gülzâra gûşdâr olur mı
Bez[i]mde sûziş-i pervâne-i nizârı görenler

İder mi bir dahı VAHYÎ şarâb-ı bî-ğışa rağbet
Cihanda keyf-i mey-i vasl-ı hoş-güvârı görenler

55.

Fâ'ilâtün Fâ'ilâtün Fâ'ilâtün Fâ'ilün

Remel . . . / . . . - / . . . - / . . . -

Eyleyüp ruhsâre-i dil-berde yer zerrînler
Oldı reşk-endâz-ı kalb-i verd-i ter zerrînler

Şermsâr-ı 'ârız-ı gül-reng-i dil-berdür meger
Anuñ-içün gülsitanda baş eger zerrînler

3. Bâd-ı nerm ile hırâm-ı nâzûk eyler sanma kim
Şevk ile evrâd okur vakt-i seher zerrînler

Seyr idüp la'lin kadeh sanmañ miyân-ı bergde
Hasretünle nûş ider hûn-ı ciger zerrînler

Bûs-ı dâmânun recâsıyla olurdı hâk-i pâ
VAHYÎyâ bu nazmunı fehm itse ger zerrînler

56.

Fe‘ilâtün Fe‘ilâtün Fe‘ilâtün Fe‘ilün
Remel . . . - / . . . - / . . . - / . . . -

Tal‘at-ı dil-bere gülzâr-ı temennâ dirler
 Dîde-i mestine mir‘ât-ı tesellâ dirler
 Mürde-diller dem-i ihyâ-kün-i dildârı görüp
 Derd-i ‘ışk ehline gel işte Mesîhâ dirler

3. Zâhidâ ‘ışkda ta‘n itme baña kim o mehe
 Şâhid-i hûb-likâ şûh-ı dil-ârâ dirler
 Nigeh-i merhamet it nâz u tegâfûl tâ key
 Olma mağrûr kemâle buña dünyâ dirler
 Gûş-ı insâf ile gûş eyleyen erbâb-ı suhan
 VAHYÎyâ nazmuña gencîne-i ma‘nâ dirler

57.

Mefâ‘ilün Mefâ‘ilün Mefâ‘ilün Mefâ‘ilün
Hezec . . . - / . . . - / . . . - / . . . -

Görüp çeşmün hurûş itsem şehâ mestânedür dirler
 Ruhun yâd eyleyüp âh eylesem dîvânedür dirler
 Leb ü dendânı fikriyle o şûhun girye-pâş olsam
 Görenler katre-i gevher yahud dîr-dânedür dirler

3. Gönül âh-ı bülendün çarhı ber-bâd itse de hûban
 Ne lutf-ı himmet eylerler ne bu ğavġâ nedür dirler
 O hâl-i ‘anberîni seyr idenler çîn-i zülfünde
 Şikâr için dil-i ‘uşşâkı dâm u dânedür dirler
 Niçe demdür ki VAHYÎ âşnâ-yı bezm-i vuslatdur
 Velî aġyâr-ı bed-kirdâr anı bî-gânedür dirler

58.

Mef‘ûlû Mefâ‘ilü Mefâ‘ilü Fe‘ûlün
Hezec - - . / . - - . / . - - . / . - -

‘İşkun ki tef ü tâbına âzer hased eyler
 Me’nûsı olan kalbe semender hased eyler
 Bir âfet-i cerrâh firâkıyla figâram
 Kim merhem-i bih-bûdına nişter hased eyler

3. Sîneñ olalı zîver-i mecmû‘a-i hâtır
 Endîşeme mir‘ât-ı Sikender hased eyler
 Bûs itmede ruhsârıñı gûstâhem o mikdâr
 Kim cür‘etüme zülf-i mu‘anber hased eyler

- Gamzeñ idicek murğ-ı dilün saydına rağbet
Pervâzına şeh-bâz-ı sebük-per hased eyler
6. Dil yârî-i hicrân ile buldı o huzûr
Kim pister ü bâlînine hancer hased eyler
Bir mertebedür hasret ile sûz-ı niyâzum
Te'sîrine tâ gamze-i dil-ber hased eyler
Bir lezzet-i güftâr var ol gönçe-dehende
Tu'm-ı suhan-ı telhine sükker hased eyler
9. VAHYÎ gibi bir nâdire-perdâz-ı zamânem
Eş'âruma her şûh-ı suhanver hased eyler

59.

Müzeyyel Bâ-Sitâyîş-i 'Îd

Fe 'ilâtün Fe 'ilâtün Fe 'ilâtün Fe 'ilün

Remel . . - - / . . - - / . . - - / . . -

- Geldi ol gün ki dem-i 'ayşına can reşk eyler
Belki âsâyîş-i gülzâr-ı cinan reşk eyler
Halka bir 'îd-i safâ rûz u şeb oldu ihsan
Ki pesin 'işretine pîr ü cüvan reşk eyler
3. Merhabâ 'îd-i neşât-âver-i gam-fersâ kim
Gamına lezzet-i dîdâr-ı bütan reşk eyler
Habbe-zâ 'îd-i ferah-perver-i hâtır-pîrâ
Hüzn-i şîvengehine sûr-ı zaman reşk eyler
Seyr idüp şîve-i refâtârın o sîm-endâmın
Serv ü şimşâd degül âb-ı revan reşk eyler
6. Hat u zülfiyle ruh u cebhesine cânânın
Meh ü hurşîd-i felek rûz u şeban reşk eyler
VAHYÎ bu şî'r-i ter-i nâdire-ta'bîri görüp
Ancak erbâb-ı suhan sanma cihan reşk eyler

60.

Mefâ 'ilün Mefâ 'ilün Mefâ 'ilün Mefâ 'ilün

Hezec . . . - - / . . . - - / . . . - - / . . . - -

- Şeker-hand-i nigâra lû'lü-yi meknûn reşk eyler
O la'l-i can-fezâyâ bâde-i gül-gûn reşk eyler
Gül-i ruhsâr-ı dil-ber hasretinde çeşm-i tûfan-pâş
O kanzîl meste döndi kim dil-i pür-hûn reşk eyler
3. Göñül çâk olur ise tîğ-ı hışm-ı çeşm-i mestün
Yine her çâkine biñ hâtır-ı memnûn reşk eyler

Nice minnet-hor-ı meşşâta olsun ol perî-rû kim
Cemâl-i pâkine mecmû‘a-i efsûn reşk eyler
Kelâmuñ nâsih-i eş‘âr-ı hoş-gûyândur VAHYÎ
Edâ-yı sâdeñe sad nûkte vü mazmûn reşk eyler

61.

Mefâ ‘ilün Mefâ ‘ilün Mefâ ‘ilün Mefâ ‘ilün
Hezec . - - - / . - - - / . - - - / . - - -

Göñül kim pîçiş-i zülf-i nigâra iltifât eyler
Çü tıfl-ı nâ-resîde nakş-ı mâra iltifât eyler
Dirîğ itmez vefâsın bu dil-i âvâreden gamzen
Ki elbet çeşm-i sayyâdı şikâra iltifât eyler

3. Temâşâ-yı kad-i dil-cûy-ı cânân eyleyen âdem
Nice gülşendeki serv ü çenâra iltifât eyler
Yeter ey bülbül-i zâr-ı dil-i şeydâ figân itdün
O gül-ruhsâr sanma âh u zâra iltifât eyler
Recâ-yı câm-ı la‘lin terk idüp meclisde cânânun
Niçe VAHYÎ şarâb-ı hoş-güvâra iltifât eyler

62.

Müfte ‘ilün Mefâ ‘ilün Müfte ‘ilün Mefâ ‘ilün
Recez - . . - / . . . - / . . . - / . . . -

Gûşe-i hatt-ı tâze kim zülf-i siyâha yüz sürer
Sanki sehâb-pâredür hâle-i mâha yüz sürer
Reşk o ‘ışk-bâza kim dîde-i dür-nisâr ile
Pây-ı visâl-i dil-ber-i ‘işve-nigâha yüz sürer

3. Lezzet-i bûse-h^vâhî-i keş-i ümîd-i yâr ile
Rûz u şebân mihr ü meh dâmen-i râha yüz sürer
Âh o vakt olur mı kim rahm idüp ol vefâ-meniş
Çihre-i zerd-i ‘âşık-ı ‘ışk-nigâha yüz sürer
Nâtika-ı suhanveran böyle zemîn-i tengde
Dergeh-i tab‘-ı VAHYÎ-i nâdire-h^vâha yüz sürer

63.

Mefâ ‘ilün Fe ‘ilâtün Mefâ ‘ilün Fe ‘ilün
Müctes . . - / . . . - / . . . - / . . . -

O dil ki bûs-ı ruh-ı al ü la‘l-i nâb ister
O mestdür ki şarâb üstine şarâb ister
Recâ-yı vasl ile olma sakın nigeğ-güstâh
O şûh çeşm-i temennâ-yı vakf-ı h^vâb ister

3. Cihanda nûş-ı mey-i vuslat-ı nigâra dilâ
Emel piyâle vü laht-ı ciger kebâb ister
Garîb cilvesi var rûy-ı yârda anuñ
Meger ki gamze-i bed-mestden ‘itâb ister
Dehân-ı dil-bere şâyeste nazm-ı VAHYÎdür
O pâk-rû sadefe lü’lü-yi hoş-âb ister

64.

Fe ‘ülün Fe ‘ülün Fe ‘ülün Fe ‘ülün
Mütekârib . - - / . - - / . - - / . - -

- Göñül şem‘-i bezm-i nigâr olmak ister
Bu ten kûy-ı yâre gubâr olmak ister
Meger kasdı yârûñ helâk eylemekdür
Vefâ gösterür der-kenâr olmak ister
3. Göñül bûs-ı ruhsâr-ı dil-berde sabr it
O gül hâsıl olmaz bahâr olmak ister
Açılmaz bu dil yâre-i zahm gibi
Arada mey-i hoş-güvâr olmak ister
Güzel semtdür VAHYÎ bu nev-zemînün
Buña hak budur i‘tibâr olmak ister

65.

Mefâ ‘ilün Fe ‘ilâtün Mefâ ‘ilün Fe ‘ilün
Müctes . - - / . - - / . - - / . - -

- Göñül ne keyf ne sahbâ-yı hoş-güvâr ister
Nezâre-bâzî-i la‘l-i şeker-şi‘âr ister
Safâ-yı hâk-rehî-i nigâra nâ’il olan
Ne ‘izzet ü ne vakâr u ne i‘tibâr ister
3. Metâ‘-ı vuslatı erzan-bahâ kıyâs itmen
Dil-i figâr ile bu çeşm-i dür-nisâr ister
Hatı irişmedin olmaz ‘atâ-yı bûs-ı ‘izâr
Belî safâ-yı güle mevsim-i bahâr ister
Firâk-ı yâr ile peygûledâr-ı hasretdür
Bu demde VAHYÎ-i nâ-kâm gam-güsâr ister

66.

Mef‘ülü Mefâ ‘ilün Mef‘ülü Mefâ ‘ilün
Hezec . - - / . - - / . - - / . - -

Endîşe-i fûrkatde dimem ki keder göster
Tîğ-ı gamına ey dil sâ mânı siper göster

Tîr-i müjesi yârûñ dir hancer-i hun-h^vâra
Meydân-ı mahabbetde çık sen de hüner göster

3. Mecnû'a-i 'ışkuñda gördük varak-ı hecrûñ
Lutf eyleyüp 'uşşâka evrâk-ı dîger göster

Tûtî-i ferih ey dil dem-beste-i mihnetdür
Fıkr-i leb-i dil-berle geh aña şeker göster

Bezm-i dil-i nâ-şâda teşrîf murâd itmiş
Sâkî gam-ı cânâna ta'zîm ile yer göster

6. Nakş eyler ise şeng-i tîr-i müjesin Mânî
Hûn-ı dil-i zârumla rûyında fûger göster
Yok yerlere ey VAHYÎ tafsîl-i kelâm itme
Evsâf-ı dehânında bir dürc-i güher göster

67.

Fe 'ilâtün Mefâ 'ilün Fe 'ilün
Hafîf . . - / . . - / . . -

Bu ne hâl ü ne zülf-i zîbâdur
Bu ne çîne ne dâm-ı belâdur

Bu ne ruhsâr-ı bî-nikâb olur
Bu ne gencîne-i hüveydâdur

3. Bu ne la'lin leb ü ne mâye-i şevk
Bu ne câm-ı mey-i musaffâdur

Bu ne dil-cûy-ı 'ârız-ı rengin
Bu ne hoş-bûy-ı verd-i ra'nâdur

Bu ne nâzûk hicâb-ı sürhî-dih
Bu ne meşşâta-i fûger-sâdur

6. Bu ne hüsn-i safâ-füzûd olur
Bu ne sultân-ı lutf-fermâdur
Bu ne fıkr-i visâldür ey dil
Bu ne feth olmaduk mu'ammâdur

Bu ne kâkül ne kâmet-i dil-keş
Bu ne sünbül ne serv-i a'lâdur

9. Bu ne nev-güfte şî'r olur VAHYÎ
Bu ne mu'ciz-tırâz-ı ma'nâdur

68.

Mefâ'ilün Fe'ilâtün Mefâ'ilün Fe'ilün

Müctes . . . - / . . . - / . . . - / . . . -

Hayâl-i tal'atı kim bu dil-i harâbdadur
O âftâb-ı cihan-tâbdur ki âbdadur

Tebessüm-i ruh-ı hûy-kerdesin temâşâ kıl
Şu tâze güldür o kim şîşe-i gül-âbdadur

3. Meger ki baht-ı siyeh meyl-i zülf-i yâr itdi
Anuñ'çün ol dahı her lahza pîç ü tâbdadur

Kerem ger[i]m-nigeh-i mest-i nâz-ı yârdadur
Ne câmda vü ne sâkî vü ne şarâbdadur

'Aceb mi sâf-keîâm olsa VAHYî-i gûyâ
Hemîşe fikr-i ruh-ı al ü la'l-i nâbdadur

69.

Fâ'ilâtün Fâ'ilâtün Fâ'ilâtün Fâ'ilün

Remel - . . - / . . - / . . - / . . -

Düşde görmek yâri çün-kim devlet-i nâ-yâbdur
Dîde-i 'uşşâk me'yûs-ı hayâl-i h'âbdur

Zâhidâ meyl-i dil-ârâda bize ta'n itme kim
Gamzesi 'ismet-rubâ-yı kalb-i şeyh ü şâbdur

3. Gülşen-i çeşmümde cânâ her fetîl-i zahm-ı 'ışk
Havz-ı gamda gûyiyâ fevvâre-i hûn-âbdur

Rûyuña nezzâre itsem la'lüñi bûs eylesem
'İşretüm reşk-efken-i sad 'işret-i meh-tâbdur

VAHYîyâ ser-sübha-i lü'lüyi nazm-ı pâk kıl
Vasf-ı la'l-i yâri zîrâ gevher-i hoş-âbdur

70.

Fâ'ilâtün Fâ'ilâtün Fâ'ilâtün Fâ'ilün

Remel - . . - / . . - / . . - / . . -

Zülf-i dil-ber silk-i dürr-i şevk-i gam-fersûddur
La'li dürc-i gevher-i mânend-i nâ-mevcûddur

Cüst-cû itmekdedür iklîm-i ye'si kalb-i zâr
Var-ısa ümmîd-i zevk-i vuslatuñ nâ-bûddur

3. Ey tabîb-i dil devâ-perdâz-ı derd-i fûrkat ol
Yohsa zahm-ı tîğ-ı çeşmüñ kâbil-i bih-bûddur

Gamze vaz'-ı renciş-âmîzin nümâyân ideli
Bezm-i derd ü gamdan ümmîd-i vefâ merdûddur

VAHYÎyâ vasf-ı ruh-ı hûy-kerdesin resm ideli
Kilk-i dūr-efşân-ı endîşen gül-âb-âlûddur

71.

Fe ‘ilâtün Mefâ ‘ilün Fe ‘ilün
Hafif . . - - / . - - / . . -

Gül midür tal‘atında rûy midür
Zülfi sünbül midür ya mûy midür
Fark ider mi şehâ olan nâzır
Sahn-ı gülşen midür ya kûy midür

3. Fikr-i zülfünde bâ‘is-i mestî
Fart-ı hasret midür ya bûy midür
Gamzenün itdiği cefâlar hep
Çeşm-i ta‘lîmi mi ya hûy midür
Dikkat ister ki fehm ola VAHYÎ
Gül midür tal‘atında rûy midür

72.

Mefâ ‘ilün Fe ‘ilâtün Mefâ ‘ilün Fe ‘ilün
Müctes . . - - / . . - - / . . - - / . . -

Dil-i şikeste-i ‘uşşâk nâza ‘âşıkdur
O dil-nevâzumuz ammâ niyâza ‘âşıkdur
Gönül nigâh-ı gazabnâk-i yâre meyl itmiş
Bu ne kebûter olur şâh-bâza ‘âşıkdur

3. ‘Îzâr-ı şâhid-i bâzâr ‘âşık-ı gâze
O fitne-‘ârıza ammâ ki gâze ‘âşıkdur
Çü mihr ü mehle felek tâze dâğlar yakmış
Meger ki mihr-i ruh-ı yâre tâze ‘âşıkdur
Zemîn-i tâze vü nazm-ı latîf ü şi‘r-i belîğ
Zebân-ı VAHYÎ-i mu‘ciz-tırâza ‘âşıkdur

73.

Mefâ ‘ilün Mefâ ‘ilün Mefâ ‘ilün Mefâ ‘ilün
Hezec . . - - / . - - - / . - - - / . - - -

Mey-i la‘l-i visâl-i dil-beri nûş itdigüm yokdur
Velî hâtırdan ümmîdin ferâmûş itdigüm yokdur
Gönül me’nûs-ı vasl-ı dil-rubâ her lahza ammâ ben
Miyân-ı şâhid-i va‘din der-âgûş itdigüm yokdur

3. Ne dest-i sâkî-i gül-ruh ne la‘l-i yâr bûs itdüm
Şarâbâsâ anuñ çün bezmde cûş itdigüm yokdur

Olaldan sâkin-i mey-hâne-i endîşe-i vuslat
Riyâ-yı zâhid-i seccâde ber-dûş itdigüm yokdur
Sunarken câm-ı pür-sahbâ-yı 'ışk-ı yâri her demde
Yine VAHYÎ dil-i şeydâyı medhûş itdigüm yokdur

74.

Mef'ûlû Mefâ'ilün Fe'ûlün
Hezec - - . / . - - / . - -

Gamzeñ gibi bî-amân yokdur
Hüsnüñ gibi mihrbân yokdur
Murğ-ı dile gülşen-i hevesde
Zülfüñ gibi âşyân yokdur

3. Sahrâ-yı tahayyül-i ferahda
Rûyuñ gibi gülsitân yokdur
Seyyâh-ı mahabbete cihanda
Hecrûñ gibi mîzbân yokdur
Sen nokta-dehen nigârı vasfa
VAHYÎ gibi nüktedân yokdur

75.

**Müzeyyel Bâ-Sitâyiş-i Hazret-i Şeyh Nazmî Efendi Kaddese Sırrahu ve
Rahimehu 'llâh**

Mefâ'ilün Mefâ'ilün Mefâ'ilün Mefâ'ilün
Hezec . - - - / . - - - / . - - - / . - - -

Hayâl-i la'l-i vasluñ kim şarâb-ı sâgar-ı candur
Aña sâkî nigâh-ı lutf-ı fikr-i çeşm-i cânandur
Reg-i ümmîd nişter-hürde-i fassâd-ı ye's oldı
N'ola hun-pâş-ı hicrân olsa hükm-i nabz-ı hırmandur

3. Şu'â'-i mihr ü mâhı şem'-i huddâm eylemez ol kim
Sipîhr-i hâtırında hasret-i rûyuñ dırahşandur
Leb-i nazra-i dü-nîm erre-i çîn-i cebîn olsun
Ki dil hayrân o gül-çîn-i 'izâr-ı vasl-ı hûbandur
N'ola ser-şâre-nûş-ı ârzû-yı vasl-ı yâr olsam
Tabîb-i lutfi merhem-sâz-ı zahm-ı bîm-i hicrandur
6. Fem-i nezzâre siyr-âb-ı temâşâ-yı cemâl olmaz
Ziyâ-yı rûy-ı vuslat hîredâr-ı çeşm-i im'andur
Ruh-ı endîşe vakf-ı nâhun-ı gayretdür andan kim
Miyân-ı fikri zîb-i âğuş-ı âgyâr-ı nâ-dandur

O bezm-i 'işve kim sâkîsi çeşmün câmı gamzençdür
Kemîne şevki merg-i şâdî-i baht-ı garîbandur

9. 'Aceb mi nazm-ı üstâda olursam pey-rev ey VAHYİ
Kelâmum gevher-i mu'ciz-bahâ-yı sûk-ı 'îrfandur

Cenâb-ı kutb-ı 'âlem hazret-i NAZMÎ EFENDİ kim
Fezâ-yı rahş-ı vasfı mâ-verâ-yı 'arş-ı imkândur

O hurşîd-i fezâ'il-pertev-i evc-i kemâlâtun
Gubâr-ı dergehi kuhlü 'l-cilâ-yı mihr-i rahşandur

12. O 'ankâ-yı kerâmet-bâl-i kûh-ı fazl u takvâ kim
Nisâb-ı 'akl şânın der-girih çâk-i girîbandur

Hudâ kalb-i şerîfin mehbit-ı envâr-ı feyz itmiş
Anuñ'çün nutk-ı pâki reşk-sâz-ı âb-ı hayvandur

Vücûdıyla İlâhî kalb-i dehri şâd-kâm eyle
Dil-i 'uşşâkda tâ kim hayâl-i vasl pinhandur

76.

Mef'ûlû Fâ'ilâtü Mefâ'ilü Fâ'ilün

Muzâri' - - . / - . . . / . - . . / - . -

Hakkâ ki gülsitân-ı letâfet hisârdur
Ârâmgâh-ı ehl-i zarâfet hisârdur

Kevser-lebân [u] hûr-'izârânını görüp
Âdem sanur ki revza-i cennet hisârdur

3. Dil-haste-i belâ-keşe vir ey tabîb can
Gül-nâr-ı bûs-ı la'lüne ruhsat hisârdur

'Uşşâkveş nevâlar idüp n'ola 'andelîb
Gösterse her makâmda san'at hisârdur

Mağlûb-ı 'ışka ceyş-i elemnden halâs için
Cây-ı gürîz ü şehir-i selâmet hisârdur

6. Gördükde sâgar-ı leb-i hûbânın ağıladum
Nâdî-i zevk ü menzil-i 'işret hisârdur

VAHYİ koyup safâ-yı temâşâyı eyleme
İnşâ vü şî'r-i tâzeyeye râğbet hisârdur

77.

Mef'ûlû Fâ'ilâtü Mefâ'ilü Fâ'ilün

Muzâri' - - . / - . . . / . - . . / - . -

Vir cânı 'ışk-ı dil-bere dil-dâdelik budur
Düş sâye gibi pâyına üftâdelik budur

Cismün zebân-ı ‘arz-ı niyâzıyla ser-te-ser
Teşrîf-i şeng ü nâzına âmâdelik budur

3. Gâhî nigâh-ı hışm-ı nigârı tahayyül it
Kayd-ı ümîd-i vasldan âzâdelik budur

Her zahm-ı sîne bir gül-i sad-berg iken o şûh
Cevr ile imtihân ideyor sâdelik budur

VAHYÎ şehîd-i hancer-i hun-h^vâr-ı ye’s olup
Vir cânı ‘ışk-ı dil-bere dil-dâdelik budur

78.

Fe ‘ilâtün Mefâ ‘ilün Fe ‘ilün
Hafîf . . - - / . . - - / . . -

Dil ki hatt-ı nigâr ile açılır
Bülbülâsâ bahâr ile açılır

Tab‘-ı zahm-ı derûnı ‘uşşâkuñ
Deşne-i rîş-bâr ile açılır

3. Dîde-i mest-i h^vâb-ı baht-ı siyâh
Nigeh-i lutf-ı yâr ile açılır

Açılursa bu pîç ü tâbı dilün
Yine ol gül-‘izâr ile açılır

VAHYÎ bûs-ı lebiyle def‘-i gam it
Dil mey-i hoş-güvâr ile açılır

79.

Mef‘ûlü Fâ ‘ilâtü Mefâ ‘ilü Fâ ‘ilün
Muzâri‘ - - . / - . . . / . . . / - . -

Hâlün şikenc-i turrede çün-kim bedîd olur
Sayyâd-ı âhuvân-ı Hotan dâm-çîd olur

Gûşuñ gül-i sefid femün gonçedür didüm
Havfum budur ki bâ‘is-i güft ü şenîd olur

3. Yârî-i sûz-ı fûrkat ile eylesem niyâz
Her harfî kufl-ı vasla hezâran kilîd olur

Vakf-ı humâr-ı ye’s iken erbâb-ı dil yine
Âdem görince gamzeñi mest-i ümîd olur

Gûş eyleyüp bu nazm-ı belâgat-nizâmını
Bildüm zebân-ı tâzede VAHYÎ ferîd olur

80.

Mef'ûlû Fâ'ilâtü Mefâ'ilü Fâ'ilün

Muzâri' - - - / - - - / - - - / - - -

Zülfün nikâb olunca 'izârun şerîf olur
Bir mihrdür küsûf ile dahı latîf olur

Nazm eylesem gönülde hayâl-i murâdumı
Ye's-i tasavvur-ı dem-i vuslat redîf olur

3. Mahsûd-ı za'f-ı hâme vü mağbût-ı nâl olur
Ebrûların hayâl ile ol kim nahîf olur

Mir'ât-ı kalbe düşse eger sûret-i vefâ
Endîşe-i cemâl cefâda za'îf olur

VAHYİ bu tab'-ı pâk ile 'âlemde var mıdur
Meydân-ı nazm-ı tâzede saña harîf olur

81.

Fâ'ilâtün Fâ'ilâtün Fâ'ilâtün Fâ'ilün

Remel - - - / - - - / - - - / - - -

Ol ki âhı bülbül-i gûyâ ile yek-reng olur
'Ârız-ı yâri gül-i zîbâ ile yek-reng olur

Mâh câma nûr-bahş-ı pertev olsa bezmde
Ruhları mihr-i cihân-ârâ ile yek-reng olur

3. Künc-i mihnetde humâr-ı hecr ile kan ağlayup
Dîdesi 'âşıkların sahbâ ile yek-reng olur

Çün letâfetden nigâhum gösterür anda nişan
Tal'at-ı cânan meh-i garrâ ile yek-reng olur

Böyle kalursa eger cevır ü cefâ-yı dil-rubâ
Dûd-ı âhumdan cihan deryâ ile yek-reng olur

6. Sîne-i 'uşşâka gülzâr-ı belâ dirsem n'ola
Tâze zahmı gönçe-i ra'nâ ile yek-reng olur

Leblerün vasf eylese VAHYİ-i dil-teşneş şehâ
Nazm-ı pâki râh-ı rûh-efzâ ile yek-reng olur

82.

Mefâ'ilün Fe'ilâtün Mefâ'ilün Fe'ilün

Müctes - - - / - - - / - - - / - - -

Şu dem ki kâkülünün şâne pîç ü tâbın alur
Hezâr 'âşıkun âh-ı dil-i harâbın alur

Gönül hayâl-i hayâ mânî'-i visâl olmaz
Şarâb-ı vuslat-ı yâr âdemün hicâbın alur

3. Nigeh ki vehm-i hat-ı nev-demîdenji ide dūr
Cemâl-i şâhid-i maksûdumuñ nikâbın alur
Dem-i nezârede çeşmümde eşk zann itme
Nezâket ile gül-i rûyuñuñ gül-âbın alur
Nikât-ı gamze-i dildârı fehme tâlib olan
Zebân-ı VAHYÎ-i âvâreden cevâbın alur

83.

Fâ‘ilâtün Fâ‘ilâtün Fâ‘ilâtün Fâ‘ilün
Remel - . - - / - . - - / - . - - / - . -

- Cism-i pür-zahmın o kim gülzâra benzetdüm sanur
Dûzahı me’vâ-yı pür-ezhâra benzetdüm sanur
Gülşeni fahr ile geşt eyler tezerv-i hoş-hırâm
Var-ısa refâtârını dildâra benzetdüm sanur
3. Gonçe-i bîdârî-i bahtum ‘aceb nâ-bûddur
Kendini gûyâ dehân-ı yâre benzetdüm sanur
Hayf gülzâr-ı fenâda zâğ-ı zîşt-endâmlar
Nâlesin savt-ı hezâr-ı zâra benzetdüm sanur
Gurre gördüm mâh-ı tâbânı bu şeb VAHYÎ meger
Hâlesin ol zülf-i ‘anber-bâra benzetdüm sanur

84.

Fâ‘ilâtün Fâ‘ilâtün Fâ‘ilâtün Fâ‘ilün
Remel - . - - / - . - - / - . - - / - . -

- Zîr-i gîsûda ruhın dil-ber nihân itmekdedür
Bu ne mehdür dâ’imâ hasfın ‘iyân itmekdedür
Ol perî idüp kabâsın gâh sürh u gâh sebz
Nahl-i kaddın reşk-i serv ü ergâvân itmekdedür
3. Tîğ-ı hışm-ı deşne-i hun-h^vâr-ı gamzeyle müdâm
Yâr ‘uşşâk-ı figârın imtihân itmekdedür
Hasret-i verd-i ruhuñla gülşen-i ümmîdde
‘Andelîb-i dil hemîn âh u figân itmekdedür
Haste-i derd-i ümîd-i vasl olup VAHYÎ-i zâr
Nazm u nesr ile saña hâlin beyân itmekdedür

85.

Fe‘ilâtün Fe‘ilâtün Fe‘ilâtün Fe‘ilün
Remel . . - - / . . - - / . . - - / . . -

- ‘Azm-i seyr itse o meh ‘âşık-ı zârı biledür
Kankı gülşende ise gonçe hezârı biledür

Bûs-ı ruhsârına der-pey emel-i siklet-i hat
Neş'e-i bâde ile renc-i humârı biledür

3. Zahm-ı cismüm var iken n'eyleyeyüm gülzârı
'Âşık-ı bû 'l-hevesün bâğ u bahârı biledür

Reşk ol 'âşık [u] ma'sûk-ı dimâğa kim anuñ
Dâ'imâ bezm-i hayâlinde nigârı biledür

VAHYÎ murg-ı dilümüz zülfine bend olmışdur
Kanda 'azm itse o şeh-bâz şikârı biledür

86.

Müzeyyel Bâ-Sitâyiş-i Müftî Mahmûd Efendi-zâde 'Abdu 'r-rahîm Efendi

Mef'ûlû Fâ 'ilâtü Mefâ 'ilü Fâ 'ilün

Muzâri' - - . / - . - . / . - - . / - . -

Dil mülki yâre 'arz olınan mâlikânedür
Evvel mezâdı bir nigeş-i mahremânedür

Encüm-şumâr-ı hecr isen it girye tâ seher
Ol mâhı mihrbân iden âh-ı şebânedür

3. Müjgân u ebruvânı hayâlinde sînemüz
Tîr ü kemân-ı fitneye dâ'im nişânedür

Ruhsâr-ı hâldârda ol zülf-i pîç pîç
Murg-ı dilün şikârı içün dâm u dânedür

Biñ 'aklı bir şikende esîr-i 'ikâl iden
Kâkûl ki aña rişte-i enzâr şânedür

6. Ol mertebe revâcda bâzâr-ı lutf-ı yâr
Her harf-i va'd-i vuslatı bir nakd-i cânadur

Olsa bu nev-zemîni müsellemler yerindedür
Gâhî zebân-ı tâzede VAHYÎ yegânedür

Dime nazîre olmadı asl ile hem-'inan
Ol 'âlimâne ise bu da şâ'irânedür

9. Erbâb-ı nazma 'arz-ı mahâret degül garaz
Mahdûm-ı hoş-hisâle ri'âye bahânedür

Necl-i sa'îd-i hazret-i müftî 'l-enâm kim
Zât-ı şerîfî mefhar-i devr ü zamânedür

Her gonçe-i kemâlini Hak gülsitân ide
Evzâ'-ı dil-pesendi anuñ kâmilânedür

87.

Mefâ'ilün Fe'ilâtün Mefâ'ilün Fe'ilün

Müctes . . . - / . . . - / . . . - / . . . -

O şûh-ı 'işve-nümâ i'tinâya sâlihdür
 Tamâm-ı medhe sezâ i'tinâya sâlihdür
 Kadûñ müşâhedesi lutf u kahrda hoşdur
 Ki serv-i sayf u şitâ i'tinâya sâlihdür

3. Marîz-i 'ışkuña la'lûñ sunınca biñ nâz it
 Tabîbüm öyle devâ i'tinâya sâlihdür

Yeter yeter güzelüm bezl-i nakd-i cevri itdûñ
 Bu yolda cevri ü cefâ i'tinâya sâlihdür
 'Aceb mi da'vî-i i'câz idersem ey VAHYÎ
 Bu şî'r-i tâze-edâ i'tinâya sâlihdür

88.

Mefâ'ilün Mefâ'ilün Mefâ'ilün Mefâ'ilün

Hezec . . . - / . . . - / . . . - / . . . -

O servûñ sâye-i lutfında dil bir âb-ı sâfidür
 Ki çeşm-i tab'-ı Kevser tîre olsa fikri şâfidür
 Yeter râz-ı nihânuñ bezl-i âgyâr itdûñ ey bülbül
 Bu vaz'-ı nâ-pesendûñ da'vî-i 'ışka münâfidür

3. Ko zevk-i bâde seyr-i gülşen olsun kârı âgyârûñ
 Baña bûs-ı lebi nezzâre-i ruhsârı kâfidür

Dururken câm-ı vuslat nûş-ı Kevser fikri ider zâhid
 Bu meşreb meşreb-i erbâb-ı 'irfânûñ hilâfidür
 Ne gam VAHYÎ-i zârın vakf-ı âzâr itse ol meh-rû
 Ki bir kerre nigâh-ı şefkat itse biñ telâfidür

89.

Fâ'ilâtün Fâ'ilâtün Fâ'ilâtün Fâ'ilün

Remel - . . - / - . . - / - . . - / - . . -

Şâh-ı hûbân-ı cihan la'l ü feminden bellidür
 Kim Süleymânı zamânûñ hâteminden bellidür
 Kıştâr-ı cismi bârân-âşnâ-yı eşk kıl
 'Âşık-ı gam-dîde çeşm-i pür-neminden bellidür

3. Hâk-i pâyı sâkî-i mey-hâne-i 'ışk olsa da
 Zâhid-i hod-bîn rûy-ı der-heminden bellidür

Hüsn-i 'ışk-efzâ-yı rûyûñ leblerûñden fehm olur
 Neş'e-bahşî-i bez[i]m câm-ı Ceminden bellidür

Tarz-ı müjgânından anlansun hücûm-ı gamzesi
Ceng-cû kâfir hisâr-ı muhkeminden bellidür

6. Gonçenün hâlin cefâ-yı hârdan idrâk kıl
Ey hezâr-ı zâr hem-dem hem-deminden bellidür
VAHYÎyâ nakd-i sirişk-efşân-ı rûy-ı hasret ol
H^vâce-i bâzâr-ı mihnet dirheminden bellidür

90.

Fâ 'ilâtün Fâ 'ilâtün Fâ 'ilâtün Fâ 'ilün
Remel - . - - / - . - - / - . - - / - . -

- Sûzişümle sûziş-i pervâne cânâ bir midür
Tal'atunla pertev-i şem'-i şeb-ârâ bir midür
Bûs-ı la'l-i al ü hâl olmaz ber-â-ber zevkde
Neş'e-i hab ile keyf-i câm-ı sahbâ bir midür
3. Derd-i 'ışka cevrdan gayri 'ilâc olmaz mı yâ
Ol tabîb-i tâze-verzişde müdâvâ bir midür
Nâle-i 'uşşâka benzer mi nevâ-yı 'andelîb
Hiç tahrîk-i gül ü rûy-ı dil-ârâ bir midür
Gâh pür-kînî gehî nâ-âşnâyî geh cefâ
Gamze-i bed-mestden cânâna şekvâ bir midür
6. 'Âşıkân 'arz-ı niyâz u meh-cebînan nâzda
Dehr-i dun bâzîçegâhında temâşâ bir midür
Her nighde biñ vefâ izhâr ider 'uşşâkına
VAHYÎyâ ol şûh-meşrebde tesellâ bir midür

91.

Gazel-i Nazîre-i Nazmî Efendi
Mef'ûlû Fâ 'ilâtü Mefâ 'ilü Fâ 'ilün
Muzâri' - - . / - . - . / - . - . / - . -

- Geldi bahâr seyr-i çimenzâr vaktidür
Geşt ü güzâr-ı 'âşık-ı bî-kâr vaktidür
'Uşşâkuñ oldu nâle-i nev-rûzı sûznâk
Bülbül sabâ-nevâyî-i gülzâr vaktidür
3. Hicrân ümîd-i vuslatı can-ber-leb eyledi
Cânâ tamâm-ı ruhsat-ı dîdâr vaktidür
Dil seyr-i bâğa cûyveş olsa n'ola revan
Kim pây-bûs-ı sâye-i dildâr vaktidür
VAHYÎ hayâl-i vasf-ı leb ü rûy-ı yâr ile
Seyr-i Hisâra çık gül ü gül-nâr vaktidür

92.

Mef'ûlü Mefâ'ilü Mefâ'ilü Fe'ûlün

Hezec - - . / . - - . / . - - . / . - -

Dildâr-ı sihir-kâra ruh-ı sâde gerekdür
Hem la'l-i şeker-hand-i meyâsâ da gerekdür

Hem gonçe-i hun-rîz-i siyeh-mest-i tegâfûl
Hem turre-i müşgîn-i semen-sâ da gerekdür

3. Hışm itme dil-i zâr-ı belâ-dîdeye çün kim
Sen dil-ber-i fettâna bir üftâde gerekdür

Ey sâkî-i endîşe getür sâğar-ı la'lin
Bezm-i gam-ı hicrâna dahı bâde gerekdür

VAHYÎ dil-i zâr itdi çü da'vâ-yı mahabbet
Bir şâhid-i gül-pîrehen âmâde gerekdür

93.

Müzeyyel Bâ-Sitâyîş-i Es'ad-zâde Kâşif Efendi Rahmetu 'llâhi Ta'âlâ

Mefâ'ilün Mefâ'ilün Mefâ'ilün Mefâ'ilün

Hezec . - - - / . - - - / . - - - / . - - -

O kim fikr-i ruhuñla derd-ber-ser dâğ-ber-dildür
Aña reşk ile gerdûn-ı sitemger dâğ-ber-dildür

'Îzârûñ mihre teşbîh eylemiş güstâh teşbîhât
Anuñ' çün çarh-ı çârum tâbe-mahşer dâğ-ber-dildür

3. N'ola neşkûftegân-ı gülşen-i hüsn olsa âşüfteñ
Lebûñ şevkiyle ey gül gonçe-i ter dâğ-ber-dildür

Olaldan zîver-i rû hâl-i müşgin-mû o fettâna
Hasedden micmer-i pür-dûd-ı 'anber dâğ-ber-dildür

Bu nazm-ı pâk bir mecmû'a-i efsûndur VAHYÎ
Ki her bir noktasından çeşm-i dil-ber dâğ-ber-dildür

6. 'Aceb mi KÂŞİF-i hoş-gûya tanzîr eylesem k'anuñ
Kemîne nüktesinden her suhanver dâğ-ber-dildür

Yegâne fâzıl-ı 'âlem ki tab'-ı pür-ziyâsından
Degül mâh-ı münevver mihr-i enver dâğ-ber-dildür

Gül-i kadrin Hudâ hem-şâh-ı hurşîd eylesün tâ kim
O gülzâr-ı kemâle kîneverler dâğ-ber-dildür

94.

Mefâ 'ilün Fe 'ilâtün Mefâ 'ilün Fe 'ilâtün

Müctes . . . - / . . . - / . . . - / . . . -

O şûh 'âşık-ı gam-h^vârına cefâda degüldür
Niçün yine dil-i şûrîdemüz safâda degüldür
Ne fehm ider gam-ı 'uşşâk-ı zârı zâhid-i hod-bin
Fezâ-yı fûrkat-i dildâra pâ-nihâde degüldür

3. Vefâ recâ diyü çekme amân bend-i cefâya
Sakın sakın göñül endîşe-i vefâda degüldür
Hayâl-i bûs-ı lebûndür miyân-ı bezm-i hevesde
Neşât-güster-i erbâb-ı 'ışk bâde degüldür
Kelâm-ı VAHYÎ-i hoş-gûya gayri görme mu'âdil
Ki gevher ile hazef-pâre bir bahâda degüldür

95.

Mefâ 'ilün Mefâ 'ilün Mefâ 'ilün Mefâ 'ilün

Hezec . . . - / . . . - / . . . - / . . . -

Kimünle âşnâsın mahrem-i 'ayş ü demün kimdür
Kime nezzâre-pâş-ı 'işvesin dil-hurremün kimdür
Kimün âğuşın itdün reşk-sâz-ı hâle ey meh-rû
Benüm gibi bu şeb encüm-şumâr-ı makdemün kimdür

3. Kimün bezmin gülistân-ı visâl itdün cemâlünle
Zarâfetle yine gül-çîn-i ruhsâr u femün kimdür
Tabîbüm zahmdâr-ı nişter-i hecrün bütün 'âlem
'Aceb şâyeste-i vaslun sezâ-yı merhemün kimdür
Cihan hayrân-ı ruhsâr u cebînün mihr ü mâhâsâ
Perîşan-hâl-i fikr-i kâkül-i ham-der-hamuñ kimdür
6. Kim oldu hânuman-sûz-ı tahammül nâr-ı 'ışkuñla
Ser-â-ser çâk-i tîğ-ı sükkerin-zâğ-ı gamuñ kimdür
N'ola şâyân-ı tahsîn olsa eş'âr-ı dil-âvîzi
Suhanverlikde misli VAHYÎ-i mu'ciz-demün kimdür

96.

Mefâ 'ilün Fe 'ilâtün Mefâ 'ilün Fe 'ilün

Müctes . . . - / . . . - / . . . - / . . . -

O şûh kim nigeş-i lutfi nâz-düşmendür
Zebân-ı 'âşık-ı zârı niyâz-düşmendür
Göñül ki 'işret-i fikr-i leb-i nigârdadur
Kemâl-i şevk ile âh-ı dırâz-düşmendür

3. Şarâb-ı ye's ile mest-i harâb olan 'âşık
Recâ-yı vuslat u ifşâ-yı râz-düşmendür
Dem-i visâlde ta'n-ı rakîb-i dîv degül
Nigâh-ı merhamet-i dil-nevâz düşmendür
Edîb-i hân-kah-ı 'ışk-ı pâk olan VAHYÎ
Fîgân-ı nâle vü sûz u güdâz-düşmendür

97.

Mefâ 'ilün Mefâ 'ilün Mefâ 'ilün Mefâ 'ilün
Hezec . - - - / . - - - / . - - - / . - - -

- Sipâh-ı fitne sahrâ-yı hevesde zülf-i çînüdü
Velî gâretger-i sabr ol hat-ı ser der-kemînüdü
Gül-i gülzâr-ı h^vâhiş fikr-i ruhsâr-ı latîfüdü
Hilâl-i evc-i hasret ebrû-yı hâtır-nişînüdü
3. Niçün ey gamze-i hod-re'y çeşm-i yâre râm oldu
Meger semt-i füsûn-ı dil-rubâyîde mu'înüdü
Göñül şâhenşeh-i iklîm-i hırmân-ı visâl oldu
Bu himmet başa hep bu baht-ı vârun-ı pesînüdü
Revâ makbûl-i erbâb-ı tabî'at olsa ey VAHYÎ
Bu şî'r-i tâze hakkâ kâr-ı tab'-ı nâzenînüdü

98.

Mefâ 'ilün Fe 'ilâtün Mefâ 'ilün Fe 'ilün
Müctes . - - - / . - - - / . - - - / . - - -

- Derun ki âteş-i derd ü gamuñla micmerdür
Hayâl-i kâkûl-i hoş-bûyuñ anda 'anberdür
Fetîl ü penbe kıyâs itme zahm-ı sînemde
Hümây-ı cânuma pervâze bir niçe perdür
3. Şeb-i firâkda târîk-i ye's yok zîrâ
Göñülde fikr-i ruhuñ bir meh-i münevverdür
Femüñle rûyuñı endîşe eyleyenler dir
Bu dahı gonçe-i neşkûfte bu gül-i terdür
'Aceb mi olsa safâ-bahş nutkuñ ey VAHYÎ
Ki vâsf-ı yâr ile âlûde vü muhammerdür

99.

Fe 'ilâtün Mefâ 'ilün Fe 'ilün
Hafîf . - - - / . - - - / . - - -

Dil-i 'âşık niyâz-perverdür
Dil-rubâ ise nâz-perverdür

Murg-ı dil saydın ideli mu'tâd
Gamze-i şâh bâz-perverdûr

3. Hasret-i kâmetünle her lahza
'Âşık âh-ı dırâz-perverdûr
Oldı pervâne şem'-i rûyuña dil
Şimdi sûz u güdâz-perverdûr
VAHYÎ-i zâr vasf-ı hüsnüñ için
Tab'-ı mu'ciz-tırâz-perverdûr

100.

Mefâ'ilün Mefâ'ilün Mefâ'ilün Mefâ'ilün
Hezec . - - - / . - - - / . - - - / . - - -

- Dem-i şâdî zamân-ı vasl-ı dil-berden 'ibâretdür
Safâ-yı câm-ı Cem bûs-ı leb-i terden 'ibâretdür
Ne yüzden âşnâ-yı bezm-i vuslat meyl-i bâğ itsün
Gül ü sünbül ruh u zülf-i mu'anberden 'ibâretdür
3. Ba'id olmaz ecel havf itse gördükde miyânında
Kazâ-yı nâ-gehânî çün o hancerden 'ibâretdür
'Aceb mi küşte-i tığ-ı nigâhuñ mest-i şevk olsa
Cihanda merg-i şâdî böyle şeylerden 'ibâretdür
Hele ser-çeşme-i feyz-i belâgat şimdi 'âlemde
Zebân-ı VAHYÎ-i i'câz-perverden 'ibâretdür

101.

Mef'ûlü Fâ'ilâtü Mefâ'ilü Fâ'ilün
Muzâri' - - . / - - . / - - . / - - .

- Âmed-şüd-i sipâh-ı gamuñ dil vefâ bilür
Bir hastedür tabîbi ne itse devâ bilür
Yok 'arz-ı hâle ey dil-i şûrîde ihtiyâc
Elbet şehîd-i 'ışkını ol pür-cefâ bilür
3. Kûy-ı belâ-nişîn olan 'uşşâk-ı dil-figâr
Efkâr-ı vaslı çeşm-i dile tûtiyâ bilür
Mecrûh-ı deşne-i sitem-i gamzeñ ey perî
Ne hastegî bilür ne ümîd-i şifâ bilür
Dime gönül visâl-i dil-ârâ muhâldür
Anı hezâr söz ile 'arz-ı recâ bilür
6. Sahbâ-yı fikr-i bûs-ı lebün mestidür gönül
Cânâ belâ vü mihneti zevk ü safâ bilür

Fenn-i suhanda kâmil olur sanma herkesi
Etvâr-ı nazmı VAHYÎ-i mu‘ciz-edâ bilür

102.

Mef‘ûlû Fâ‘ilâtü Mefâ‘ilü Fâ‘ilün
Muzâri‘ - - . / - . . . / . - . . / - . -

Zevk-i visâli fûrkat-i yâri bilen bilür
Keyf-i şarâbı renc-i humârı bilen bilür
Mestî-i bî-humâr nedür bezm-i ‘ışkda
Sahbâ-yı bûs-ı la‘l-i nigârı bilen bilür

3. Rahm-âşnâyî-i nigh-i nâz-perveri
Bezm-i visâl-i dil-bere varıbilin bilür
Bizden belâ-yı hecri su‘âl eylemeñ anı
Zevk ü safâyı bûs u kinârı bilen bilür
Tîğ-ı nigâh-ı nâzına ‘âlem şehîddür
VAHYÎ o şûh-ı fitne-‘izârı bilen bilür

103.

Müfte‘ilün Fâ‘ilün Müfte‘ilün Fâ‘ilün
Münserih - . . - / - . - / - . . - / - . -

Tâbiş-i sahbâ ile al ruhun güllenür
Her ‘arakı rûyunun câm-ı dile mülleenür
Der-hem olaldan beri zülfün-ile tâze hat
Bâgda sünbüllerün niçesi kâküllenür

3. Şol kadar âlûdedür hûn ile tîr-i müjeñ
Dîde-i ‘âşık-küşün al karanfüllenür
Bâde-i vâsf-ı lebün câm-ı dehânumdadur
Sîne surâhî durur âh da kulkullenür
‘Âşık-ı şûrîdenün cân u dili VAHYÎyâ
Sûzda pervânedür nâlede bûlbüllenür

104.

Mef‘ûlû Fâ‘ilâtü Mefâ‘ilü Fâ‘ilün
Muzâri‘ - - . / - . . . / . - . . / - . -

Sâfî ‘arak ki ‘ârız-ı cânâne gösterür
Câm-ı la‘[a]lde lü‘lû-yi şâhâne gösterür
Mir‘ât-ı hüsn-i tal‘at-ı dil-ber garîbdür
Vakt-i nighde ‘âkili dîvâne gösterür

3. Ruhsâr-ı yâr gâh hat u gâh zülf ile
Eşkâl-i hâleyi meh-i tâbâne gösterür

- Hâl-i siyeh degül pes-i gîsûda câ-nîşin
Murğ-ı dilûñ şîkârı içün dâne gösterür
Remz itdi bûs-ı la‘lini şefkat-nigâh-ı dost
Bir meste döndi kim reh-i mey-hâne gösterür
6. Cevr-i nigâr olursa eger böyle bî-şumâr
Eşküm kemâl-i cûşîşi ‘ummâne gösterür
Ta‘vîz-i ‘ışk bâzû-yı dilde ne hâldür
Çeşm-i nigâra ‘âşıkı bî-gâne gösterür
Gir râh-ı ‘ışka şâl-ı tevekkül be-dûş olup
Gör ey dil-i sitem-zede Mevlâ ne gösterür
9. VAHYÎ bu tab‘-ı pâk kalursa bu şevk-ile
Eş‘âr-ı tâze-tarzını yârâna gösterür

105.

Fâ‘ilâtün Fâ‘ilâtün Fâ‘ilâtün Fâ‘ilün
Remel - . - - / - . - - / - . - - / - . -

- Hatt-ı rûyın görse şerminden ruhı nem gösterür
Gûyiyâ âyîne jeng ü verd şeb-nem gösterür
Hayf mir‘ât-ı temennâ-yı dil-i âşüftegan
Peyker-i şeng-i safâyı dahı mâtem gösterür
3. Ol tabîb-i ‘ışkdan dürc-i devâ itsem su‘âl
Nâz u şîveyle tebessüm eyleyüp fem gösterür
Câm-ı la‘l-i dil-rubâ tâ ol kadar berrâkdur
Kim hayâl-i sûret-i sad sâle-i Cem gösterür
VAHYÎyâ sahn-ı dilüm bir gül-bün-i hicrân iken
Sûretâ bir menzil-i hoş-cây u hurrem gösterür

106.

Fe‘ilâtün Fe‘ilâtün Fe‘ilâtün Fe‘ilün
Remel . . - - / . . - - / . . - - / . . -

- Nâme kim dil-ber-i pür-kîn selâmın getürür
‘Andelîbe gül-i rengîn selâmın getürür
Rîşe-i rîşümi tahrîk idicek bâd-ı firâk
Her biri deşne-i müşgîn selâmın getürür
3. Fikr-i zülfündür o seyyâh-ı cihan-peymâ kim
Tâ Hatâ vü Hotan ü Çîn selâmın getürür
Yeter olduñ yeter ey bâz-ı kebûter-düşmen
Sanma kim ‘âşık-ı miskîn selâmın getürür

VAHYÎ-i sâf-dilün her suhanı vâsfunda
Ehl-i 'ışka leb-i la'îl selâmın getürür

Harfü 'z-Zâ

107.

Mefâ'ilün Fe'ilâtün Mefâ'ilün Fe'ilün
Müctes . . . / . . . - / . . . - / . . . -

- Cefâ-yı yâr dile lutf olur cefâ olmaz
Belâsı fûrkat olur fûrkati belâ olmaz
- Cihanda âyîne-i kalb-i münkir-i 'ışkuñ
Cilâsı kasvet olur kasveti cilâ olmaz
3. Görince verd-i ruh-ı pâkini hezâr-ı dilün
Sadâsı lûknet olur lûkneti sadâ olmaz
- Ne hâldür bu ticâret-girân-ı şâdînün
Gınâsı nekbet olur nekbeti gınâ olmaz
- Ne cây-ı 'işret olur bu ki gülşen-i 'ışkuñ
Safâsı mihnet olur mihneti safâ olmaz
6. Ne vâdî-i gam olur kim zamân-ı hicrânun
Ziyâsı zulmet olur zulmeti ziyâ olmaz
- Nişeste der-reh-i kûy-ı nigâr-ı 'uşşâkuñ
Cüdâsı hasret olur hasreti cüdâ olmaz
- Güzârgâh-ı dil-ârâda hâk olan cismün
Hebâsı zahmet olur zahmeti hebâ olmaz
9. Bu bâz-gûne-reviş dehr-i pür-cefâda dilün
Safâsı hayret olur hayreti safâ olmaz
- 'Îzâr-ı mehveşünji kâkülünle zeyn itsen
Dücâsı nekhet olur nekheti dücâ olmaz
- Şüd âmedin dir isem bezm-i yâre âgyârun
Edâsı siklet olur sikleti edâ olmaz
12. Ne gûne 'arz ide hâlin nigâra 'âşık kim
Recâsı vuslat olur vuslatı recâ olmaz
- Cemâl-i pâküñe düşse hatâ ile zülfün
Hatâsı zînet olur zîneti hatâ olmaz
- Bu şî'r-i tâzede mahbûb-ı nazmumun VAHYÎ
Bahâsı hil'at olur hil'ati bahâ olmaz

108.

Fe‘ilâtün Fe‘ilâtün Fe‘ilâtün Fe‘ilün
Remel . . . - / . . . - / . . . - / . . . -

Gamze-i yâr ki bir vech-ile ta‘bîr olmaz
Dîde-i mestinün evsâfî da tahrîr olmaz

Niçe dil-beste ider ‘âşıkı dirdüm ammâ
N’eyleyem böyle zebân ile o takrîr olmaz

3. ‘Âşıkâ nîm-nigehle nazar itmez ol şûh
Bu ne şeh-bâz olur mâ’il-i nahçîr olmaz

Şehr-i şâdî n’ola itse giderek mahv-i vücûd
Hem harâb olmada hem bir dahî ta‘mîr olmaz

Dimiş erbâb-ı suhan gûş idicek bu ğazelüm
VAHYÎ-i nükteverün nazmına tanzîr olmaz

109.

Gazel-i Müzeyyel

Mefâ‘ilün Mefâ‘ilün Mefâ‘ilün Mefâ‘ilün
Hezec . . . - / . . . - / . . . - / . . . -

Letâfetde ‘izâruñ verd-i ra‘nâyı salındurmaz
O yüzden dil hezâr-ı nâle-peymâyı salındurmaz

Firâkuñla sirişküm oldı bir ‘ummân-ı tûfan-pâş
Ki kemter katresi cûşışde deryâyı salındurmaz

3. Ser-i bî-devlet-i ‘uşşâkı itmez zîver-i fitrâk
O nahvet-pîşe kim Cemşîd ü Dârâyı salındurmaz

Niçün bîhûde çeksün rûzgâruñ mihnetin ol kim
Yanınca serv-kâmet bir dil-ârâyı salındurmaz

Kelâm-ı dür-şi‘âruñ şeng-i istihsândur VAHYÎ
Velî ehl-i hased ol dürr-i yektâyı salındurmaz

6. O şâh-bâz-ı hümâ-pervâzdur ğamzeñ ki bâl açsa
Ne şâhîn evc-i istignâda ‘ankâyı salındurmaz

Bu reftâr-ı dil-âvîz ile ol kebg-i fezâ-yı hüsn
Tezerv-i hoş-hırâm-ı hâlet-efzâyı salındurmaz

Eger tûtî vü tâvus olsañ ey dil iltifât umma
Seni söyletmez ol dildâr-ı hercâyı salındurmaz

110.

Mef'ûlû Fâ'ilâtü Mefâ'ilü Fâ'ilün

Muzâri' - - . / - . - . / . - - . / - . -

Ey rûy-ı ali şu'legeh-i âftâb-ı nâz
V'ey târ-ı zülf-i pîç-be-pîçi sehâb-ı nâz
Rûyuñda hatt-ı nev-res-i müşgin degüldür ol
Tahrîr olundı berg-i gül üzre kitâb-ı nâz

3. Ey meh verâ-yı ebrde gösterme vaz'-ı nâz
Ol mihr-i hüsn itmez olur irtikâb-ı nâz
Te'sîr-i baht-ı 'âşık-ı şûrîdedür meger
Hemvâre ülfet eyledi çeşmünle h'âb-ı nâz
Bir vaz'-ı nâzenîn ile ol şûh eyledi
VAHYÎ-i zârı mest-i harâb-ı şarâb-ı nâz

111.

Fe'ûlün Fe'ûlün Fe'ûlün Fe'ûl

Mütekârib . - - / . - - / . - - / . -

O şûh 'âşık-ı dil-figâr istemez
Hüs[ü]n şâh-bâzı şikâr istemez
Hezâr-ı dilüm zârdur dâ'imâ
Gülistân u vakt-i bahâr istemez

3. Hayâl-i cefâ-yı dil-ârâ yeter
Göñül zevk-i bûs u kinâr istemez
Ümîd-i visâlünle mestüz şehâ
Bize bâde-i hoş-güvâr istemez
Ruhı turesüz olsa da hûbdur
Ferah gencine VAHYÎ mâr istemez

112.

Mefâ'ilün Fe'ilâtün Mefâ'ilün Fe'ilâtün

Müctes . - - / . - - / . - - / . - -

Cihanda vuslat-ı dildâr intizârına degmez
Devâ-yı zevk ü safâ derd-i âh u zârına degmez
Yeter hezâr gül ü gülsitân vasfi ferâğ it
Ne deñlü hûb ise de dil-berün 'izârına degmez

3. Şarâb-ı la'lüne dil bezl-i nakd-i cân itsün²
Ki keyf-i bâde anuñ mestî-i humârına degmez

²

Vezin bozuk.

Hemân bîhüde feryâd ider hezâr-ı gülîstan
Fîgân u zâr gülün gûş-ı i'tizârına degmez
Ümîd-i zevk-i visâli çü VAHYÎ eyle ferâmûş
Cihanda vuslat-ı dildâr intizârına degmez

113.

Mefâ'ilün Fe'ilâtün Mefâ'ilün Fe'ilâtün
Müctes . . . / . . . - / . . . - / . . . -

- Dili esîr idüp ol şûh-ı dil-nevâz görünmez
Yatur kebûter-i dil per-şikeste bâz görünmez
Görince hâl-i dil-i zârı lîkin 'arz iderdüm
Felekde ol meh-i tâbân-ı evc-i nâz görünmez
3. Hezâr rîş-i derûnumda perveriş bulamazdı
Ger olmayaydı o dildâr-ı çâre-sâz görünmez
İderse nîm-nigâh ol perî görür anı herkes
Fîgan ki bu çekilen âh-ı can-güdâz görünmez
Şu dem ki hecrde geçdi hezâr sâl oldı VAHYÎ
Vas[1]lda rûz-ı füzûn u şeb-i dırâz görünmez

114.

Mef'ûlü Fâ'ilâtün Mef'ûlü Fâ'ilâtün
Muzâri' - - . / - . - - / - - . / - . - -

- Nîş-ı cefâyı ol kim 'ayş-ı safâya virmez
Sultân-ı mülk-i gâmdur derdi devâya virmez
Hışmında ol perînün biñ lutf muhtefîdür
Cevrin anuñ'çün 'âşık mihr ü vefâya virmez
3. Pâ-mâl-i 'ışk olan dil devlet bilür belâyı
Sevdâ-yı zülf-i yâri zıll-i hümâyâ virmez
Ey nûr-ı cân-ı vuslat can nakdin eyle ihzâr
Cânan mmetâ'-ı vaslın erzan-bahâyâ virmez
Mısr-ı dilin çü VAHYÎ hâs itdi 'ışk-ı yâre
Mahsûd-ı Yûsuf olsa bir dil-rubâyâ virmez

115.

Mef'ûlü Mefâ'ilü Mefâ'ilü Fe'ülün
Hezec - - . / . - - . / . - - . / . - -

Esrâr-ı bûtan siklet-i hem-râz götürmez
Kânun heves-i nağme-i ibrâz götürmez
Baña gam-ı zülfünde şerîk olmasun ağıâr
Bârîk resendür iki can-bâz götürmez

3. Tenhâ-rev-i sûk-ı heves ol terk-i devân it
Dükkânçe-i vuslat gönül enbâz götürmez
Bir lahzada pâ-mâl-i tesellâ ider ammâ
Nev-gül-bün-i va'di gül-i incâz götürmez
Ey şûh-ı cefâ-cû nice bir hat be-dehânî
Bir va'de-i vuslat bu kadar nâz götürmez
6. Geh remz-i vefâ gâh tegâfûl yeter oldu
Bu hâtırayı havsala-i âz götürmez
Vasf-ı dehenüm ağzına almaz dimiş ol mâh
Yok yok bunu VAHYÎ-i suhan-sâz götürmez

116.

Mefâ 'ilün Mefâ 'ilün Mefâ 'ilün Mefâ 'ilün
Hezec . - - - / . - - - / . - - - / . - - -

- Egerçi zevk-i bezm-i vuslat-ı dildârdan dûruz
Velî şâduz aña kim siklet-i ağıyardan dûruz
Dil-i şeydâ n'ola efgân iderse 'andelîbâsâ
Mukîm-i gülşen-i hecrüz o gül-ruhsârdan dûruz
3. Nice gûyâ ola tûtî-i dil şevkiyle 'âlemde
Kim ol âyîne-ruhsâr u şeker-güftârdan dûruz
Vefâ-yı yârdan evvelde dîr idi dil-i şeydâ
Velî şimdi tesellâ-yâbî-i âzârdan dûruz
Dimiş izhâr-ı mihr idüp o meh-rû bezm-i hâsında
Dirîgâ sohbet-i VAHYÎ-i şîrinkârdan dûruz

117.

Mef'ûlü Fâ 'ilâtü Mefâ 'ilü Fâ 'ilün
Muzâri ' - - . / - - . / . - - . / - - .

- Meyl-i ruhunda ta'ne-i ağıyâra bakmazuz
Gül-çin ruhına dîdelerüz hâra bakmazuz
Her lahza kûy-ı yârda geşt ü güzâr idüp
Tîg-ı 'itâba nâvek-i âzâra bakmazuz
3. Cevr ü cefânı gamzeye isnâd eylerüz
Âsîb-i remz-i turre-i tarrâra bakmazuz
Bûs-ı ruhında siklet-i gîsûsı gam degül
Ümmîd-i genc ile elem-i mâra bakmazuz
VAHYÎ cemâl-i Yûsuf aña jeng olursa da
Mir'ât-ı hüsn-i şâhid-i bâzâra bakmazuz

118.

Mef'ûlû Fâ'ilâtü Mefâ'ilü Fâ'ilün
Muzâri' - - - / - - - / - - - / - - -

Cây-ı bütân-ı zühre-cebîn oldı bezmümüz
Revnak-şikest-i çarh-ı berîn oldı bezmümüz

La'lin sadefden oldı cüvânân rû-nümâ
Engüşterî-i şevke nigîn oldı bezmümüz

3. 'Uşşâk kâr idinse nevâ-yı niyâzı râst
Gülzâr-ı hande-i nemekîn oldı bezmümüz

Mânî de olsa sûret-i dîvâr olur gören
Reşk-i nigâr-hâne-i Çîn oldı bezmümüz

El-hak bu şi'r-i nâdire-tarz ile VAHYîyâ
Şâyân-ı vasf-ı tâze zemîn oldı bezmümüz

119.

Fâ'ilâtün Fâ'ilâtün Fâ'ilâtün Fâ'ilün
Remel - - - / - - - / - - - / - - -

Ruhlarındur bâğ-ı dildârîde verd-i ter henûz
La'l-i nâbuğdur cinân-ı hüsnde Kevser henûz

Şu'le-yâb eyle sirâc-ı kalbi şem'-i vasl ile
Cism-i sûzân olmadın hecrünle hâkister henûz

3. Murğ-ı cânı sayd idüp mecrûh kılmaz gamzesi
Âşyan-perverdûr ol şeh-bâz-ı nev-şeh-per henûz

Hışm-ı pey-der-pey 'itâb-ı nev-be-nev ma'zûrdur
Nâ-şinâs-ı resm-i dil-cûyîdür ol dil-ber henûz

Dil şehîd-i tîğ-ı tîz-i 'ışk-ı mâder-zâd iken
Nâvek-i hışm ile ol meh imtihân eyler henûz

6. Olmuş iken ser-te-ser 'âlem şehîd-i gamzesi
Dahî dûr olmaz miyân-ı yârdan hancer henûz

Vasf-ı la'l-i yârda bu nazm-ı rengîni dilâ
İtdi âlû 'l-âl VAHYî-i suhan-perver henûz

120.

Mefâ'ilün Fe'ilâtün Mefâ'ilün Fe'ilün
Müctes . - - - / . - - - / . - - - / . - - -

Ne dem ki fikr-i 'izâr u lebünle âh iderüz
O âh ile ruh-ı mihr ü mehi siyâh iderüz

Huzûr-ı kâzî-i hüsnünde eşk ile âhı
Sübût-ı da'vî-i 'ışka iki güvâh iderüz

3. Ümîd-i vuslat-ı pâ-bûs-ı yâr ile şeb u rûz
Bu cismi gülşen-i kûyuñda hâk-râh iderüz
N'ola açılmasa bir lahza dîde-i ümmîd
Kim aña vuslat-ı dildârı h^vâbgâh iderüz
Cihanda vasl-ı dil-ârâ muhâl iken VAHYÎ
Niçün bu fikr ile hâl-i dili tebâh iderüz

121.

Fe'îlâtün Fe'îlâtün Fe'îlâtün Fe'îlün
Remel . . . - / . . . - / . . . - / . . . -

- Bâde-i vasl ile çün-kim dili medhûş iderüz
Elem-i fûrkat-i dildârı ferâmûş iderüz
Terk-i afyûn-ı gam-ı fûrkat-i mu'tâde içün
Yâd-ı la'lûñle dili rind-i kadeh-nûş iderüz
3. Hele tenhâ degülüz şimdi firâş-ı gamda
Fikr-i vasl u dem-i dîdâr der-âguş iderüz
Sûret-i bâde habâb-âver olur zann itme
'Arak-ı sâkî-i ra'nâ ile pür-cûş iderüz
Dîdeden eylemezüz dûr hayâl-i ruhuñı
Câm-ı hûn-âbe gül-i tâzeyi ser-pûş iderüz
6. Gülşen-i kûyuña vardukda görürseñ rûyuñ
Âh u efgân ile bûlbûlleri medhûş iderüz
Reh-i midhatde biz ol şâh-süvâra VAHYÎ
Kâsıd-ı şî'r-i teri gâşiye ber-dûş iderüz

122.

Mef'ûlü Fâ'îlâtü Mefâ'îlü Fâ'îlün
Muzâri' - - . / - - . / - - . / - - .

- Endîşe-i ruhuñla dili hurrem eylerüz
Çeşm-i ümîd-i vuslatuñı pür-nem eylerüz
Gülzâr-ı fikr-i vasl-ı dil-ârâda dâ'imâ
Ye'si gül-i murâdumuza şeb-nem eylerüz
3. Laht-ı cigerle hûn-ı dil âmâde olmağın
Cânâ nedîm-i gamla 'aceb 'âlem eylerüz
Bend-i recâ-yı zevk ü safâdan halâs olup
Zahm-ı derûna derd ü gamı merhem eylerüz
Evsâf-ı la'l-i bî-gîş-ı cânânı VAHYÎyâ
Engüş-i şî'r-i tâzemüze hâtem eylerüz

Harfû 's-Sîn

123.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

Dilde zahm-ı nâvek-i müjgân-ı dil-ber bî-kıyâs
Gül-han-ı mihnetdür olur anda ahker bî-kıyâs

Fıkr-i rûyuñla 'aceb mi cismi pür-dâğ eylesem
Gülşen-i ğamdur n'ola olsa gül-i ter bî-kıyâs

3. Hüsnuñ olmaz kesret-i hûbân ile noksan-pezîr
Mâha virsün mi ziyân olmağla ahter bî-kıyâs

Eşkümü Nîl eyledi ol Yûsuf-ı Mısr-ı cemâl
N'ola virse sükker-i la'lin mükerrer bî-kıyâs

VAHYîyâ bu nev-zemîne var mı bir tanzîr iden
Söyledürsün şâ'ir-i i'câz-perver bî-kıyâs

124.

Müfte 'ilün Fâ 'ilün Müfte 'ilün Fâ 'ilün

Münserih - . . - / - . - / - . . - / - . -

Vasl-ı dil-ârâya hîç bulamadı dest-res
Nice zamandır dil-i zâra odur mültemes

Dîde-i tûl-i emel düş olıcak zülfüne
Çekdi sipâh-ı müjeñ bende-misâl 'ases

3. Âhı derâ eyledüm leşger-i 'uşşâka kim
Güm-rehe düşvâr olur kâfile-i bî-ceres

Nahl-i kadûñde mekân eyler idi dâ'imâ
Murğ-ı dile olmasa cism-i nizârum kafes

Lezzet-i nezzâresi saña yeter VAHYîyâ
Vuslat-ı dildârdan deşne-i ümmîdi kes

125.

Müfte 'ilün Fâ 'ilün Müfte 'ilün Fâ 'ilün

Münserih - . . - / - . - / - . . - / - . -

Ey dil-i âşüfte-i vuslat-ı cânan heves
İtmez o gülşende bil hande-i gül mültemes

Cânı humâr-ı ğam-ı fûrkat iderdi harâb
Neş'e-i yâd-ı lebûñ olmasa feryâd-res

3. Gül-han iderdi gül-i gülşeni sûz-ı dili
Olsa eger 'andelîb âhum ile hem-nefes

İtme gam-ı zülfde dille rakîbi şerîk
Bülbül ile eyleme zâgı şehâ hem-kafes
Tab‘uňa VAHYÎ senünğ gayride olmaz nazîr
Nice mukâbil olur âteş ile hâr u hes

Harfû ’ş-Şîn

126.

Fe‘ilâtü Fâ‘ilâtün Fe‘ilâtü Fâ‘ilâtün

Remel . . . / - . . . / . . . / - . . .

- Olur ‘âşık-ı hazînünğ nefes-i kebûdı âteş
Nice âteş olmaz ey dil ki bütün vücûdı âteş
O ki sâha-i hevesde düşe çâh-ı iftirâka
Giyer ol kabâ-yı derdi k’ola târ u pûdı âteş
3. Göñül oldı bâğ-ı ‘ışkuñ rehi eşk ü reh-beri âh
Bu ne gülsitân-ı gâmdur reh ü reh-nümûdı âteş
Dağıdan nukûd-ı eşki ala kâle-i visâlünğ
Bu ne sûk-ı bû ’l-‘acebdür zarar âb u sûdı âteş
Dile fikr-i vasl u hicrân olur iki nâr-ı sûzan
N’ola bu cihân VAHYÎ ki nebûd u bûdı âteş

127.

Mef‘ûlü Fâ‘ilâtü Mefâ‘ilü Fâ‘ilün

Muzâri‘ - - . / - . . . / . . . / - . .

- Nakd-i niyâz kîse-i ibrâza sığmamış
Âh-ı dırâz dâ’ire-i râza sığmamış
Lutf-âşnâ göñül olamaz sayd-ı çeşm-i gayr
Perverde murg pençe-i şeh-bâza sığmamış
3. Çok kûşış eylemiş aña erbâb-ı dil velî
Vasfuñ zebân-ı nâdire-perdâza sığmamış
Zülf ü dehânı vâsfına cem‘ itdigüm nikât
Levh-i füsûna safha-i i‘câza sığmamış
VAHYÎ-i zâra şöyle vefâ itmiş ol perî
Kim fikr-i zevki havsala-i âza sığmamış

128.

Mef‘ûlü Fâ‘ilâtü Mefâ‘ilü Fâ‘ilün

Muzâri‘ - - . / - . . . / . . . / - . .

Mislün çü dil-berîde aranmış bulunmamış
Gamzeñ dil-âverîde aranmış bulunmamış

- Hûrî mi yâ melek mi bilinmez o meh velî
İnsân ile perîde aranmış bulunmamış
3. Ol necm-i fitne şu'le-i evc-i cemâl-i yâr
Mirrîh ü Müşterîde aranmış bulunmamış
La'l-i lebûn safâsı heman câm-ı Cem degül
Tâ ke's-i Kevserîde aranmış bulunmamış
Ey mâh mihr ü ahter-i dümdâr vasluğun
Ma'nâsı Ahterîde aranmış bulunmamış
6. Ol şûh gibi bir büt-i sad büt-güsîl dilâ
Çak deyr-i Âzerîde aranmış bulunmamış
Şeft-âlû-yı ruh u lebi bîmâr-ı hecr için
Bâğ-ı keremverîde aranmış bulunmamış
Bûy-ı hayâl-i zülf-i dil-âvîz-i dil-rubâ
Vâdî-i 'anberîde aranmış bulunmamış
9. VAHYÎ bu gûne tâze edâ şi'r-i nev-zemîn
Sûk-ı suhanverîde aranmış bulunmamış

129.

Mef'ûlû Mefâ'ilû Mefâ'ilû Fe'ûlûn
Hezec - - . / . - - . / . - - . / . - -

- Ol zülf-i müca'ad ki ruh-ı yâre sarılmış
Bir rişte-i zerdür gül-i bî-hâra sarılmış
Gördükde mezâd olduğunu sûk-ı hevesde
Kâlâ-yı gama bu dil-i bî-çâre sarılmış
3. Medhûş-ı mey-i vuslat olur tâbe-kıyâmet
Ol 'âşık-ı gam-dîde ki dildâra sarılmış
Var-ısa hayâl-i hatunı h'âbda gördi
Kim hâle-i meh bedr-i ziyâdâra sarılmış
Pîş-i nîgehünge görinen kec-mûje gûyâ
Gezdür ki ser-i nâvek-i âzâra sarılmış
6. Şeh-per-zen ider zülfîni gördüm çü kebûter
Bildüm reme-i 'ışkına âvâre sarılmış
Çün midhat-i gamzeñde ola güfte-i VAHYÎ
Dür sübha olur deşne-i hunkâra sarılmış

130.

Mef'ûlû Fâ'ilâtü Mefâ'ilü Fâ'ilün

Muzâri' - - . / - . - . / . - - . / - . -

- Zülf-i siyeh ki rûyına ol gönçe-fem komış
Gûyâ sahîfe-i güle müşgin rakam komış
Bahş eyleyen cihâna dem-i 'ayş ü 'işreti
'Uşşâk-ı zâra hisse-i derd ü elem komış
3. Dilden ümîd-i zevk-i visâlin tebâh iden
Hayfâ yerine fûrkat ü hicrân u gâam komış
'Âşık sirişk ü şerha vü dâğın sipâh idüp
Dûd-ı şerâre-perver-i âhı 'alem komış
Âdem cinân-ı bezmüni terk eylesün mi kim
Anda rakîb-i dîv-i safâ-keş kadem komış
6. 'İşveyle kendüyi dile nakş eylemiş nigâr
Hîleyle Ka'be içre o kâfir sanem komış
Nev-tarz u nev-edâ vü nev-îcâd u nev-zuhûr
Eş'ârı dehre VAHYÎ-i nâzûk-şiyem komış

131.

Mefâ'ilün Mefâ'ilün Mefâ'ilün Mefâ'ilün

Hezec . - - - / . - - - / . - - - / . - - -

- Fezâ-yı cevre ol şâh-ı cefâ-mu'tâd ayak basmış
Anuñ'çün kalbe ceys-i âh-ı âteş-zâd ayak basmış
Ya fikr-i vasla yâ endîşe-i dîdâradur kasdı
Yine sicn-i dile gâam gibi bir cellâd ayak basmış
3. Senüñ refâtârına taklîde cânâ bulmamış çâre
Egerçi gülşene çok serv ile şimşâd ayak basmış
Çü gâze rû-nümûd olmuş ruhında sürhî-i bûse
Hıyefler mülk-i hüsn-i rûy-ı yâre yâd ayak basmış
Senüñ gibi sebûk-cevlân zâhir olmamış VAHYÎ
Rikâb-ı rahş-ı vasf-ı yâre çok üstâd ayak basmış

132.

Mef'ûlû Mefâ'ilü Mefâ'ilü Fe'ûlün

Hezec - - . / . - - . / . - - . / . - -

'İşretle safâ ol meh-i garrâya virilmiş
Mihnetle cefâ bu dil-i şeydâya virilmiş
Ey 'âşık-ı bî-çâre nedür âh u figânun
Dil-ber saña gül bülbül-i gûyâya virilmiş

3. Bûs itse lebûn mest kala tâbe-kıyâmet
Ol neş'e-i can-bahş ki sahbâya virilmiş
Sînemde duran dâg degül surre-i zerdür
Dükkân-ı ğam-ı 'ıškuña ser-mâye virilmiş
Reşk ile ider sünbülü ser-geşte vü hayran
Ol bûy ki bu zülf-i semen-sâya virilmiş
6. Bîhûde hırâm eyleme ey serv ki 'işve
Reftâr-ı dil-âvîz-i dil-ârâya virilmiş
Destinde gören zülfîn o sâhir-nigehün dir
Ef'î-i 'asâdur yed-i beyzâya virilmiş
Eş'âr-ı pesendîde vü mazmûn-ı güzîde
Bu VAHYÎ-i şûh-ı suhan-ârâya virilmiş

133.

Mefâ'ilün Fe'ilâtün Mefâ'ilün Fe'ilün
Müctes . . . / . . . - / . . . - / . . .

- O meh ki zülfini pür-pîç ü tâb göstermiş
Fünûn-ı fitnede muğlak kitâb göstermiş
Bu hâmyâze-keş-i hecre 'arz idüp la'lin
Esîr-i bend-i humâra şarâb göstermiş
3. Görince rûyuñı hurşîde eyleyüp tercîh
Felekde mâh-ı münîr inkılâb göstermiş
'Îzârın 'âşîka kâkülsüz eylemiş izhâr
O şûh zerresine âftâb göstermiş
O şûh-çihre-i mahbûb-ı vasla ey VAHYÎ
Belâ-yı fûrkatini ber-nikâb göstermiş

134.

Nazîre-i 'Abdî Efendi

Mefâ'ilün Mefâ'ilün Mefâ'ilün Mefâ'ilün
Hezec . . . - / . . . - / . . . - / . . .

- O fettan hâlini zülf-i girih-gîr içre göstermiş
Ne câdûdur ki şahs-ı sihri zencîr içre göstermiş
Gazâl-ı çeşm-i meste gamzesin râm eyleyüp cânan
Ne hâletdür ki şîri hükm-i nahçîr içre göstermiş
3. O hûnî va'd-i vaslın gamzesinden eyleyüp iş'âr
Cemâl-i h'âhişi mir'ât-ı şemşîr içre göstermiş
Dehânından haber yok nüsha-i hüsninde 'uşşâka
Meger bir noktadur kim vefk-i teshîr içre göstermiş

- Hayâli mest-i ye's-i vasl ider 'uşşâk-ı nâ-şâdı
O sahbâ-yı vefâ kim câm-ı te'hîr içre göstermiş
6. Miyânında meger ümmîd-i vaslın eyleye hâme
O Bih-zâd-ı emel kim yâri tasvîr içre göstermiş
- Libâs-ı 'îd ile zeyn itse sebk-i nazmını VAHYÎ
Sezâdur anı çün 'ABDÎye tanzîr içre göstermiş

135.

Mefâ 'ilün Mefâ 'ilün Mefâ 'ilün Mefâ 'ilün
Hezec . - - - / . - - - / . - - - / . - - -

- O meh kim çihre-i hûy-kerdesin evreng göstermiş
Mey-i gül-fâm ile ruhsârını yek-reng göstermiş
- Hat-ı müşgîn-i rûy-ı dil-rubâ zann eyleme üstâd
Siyeh tasvîr ile âyîne-i bî-reng göstermiş
3. Gürîzân olmasun mı leşger-i ümmîd-i eltâfuñ
Ki tîğ-ı tîz-i hışmın gamze-i dil-teng göstermiş
- Görüp müjgân u ebrû sanmañuz Mânî-i hüsn-i yâr
Şeh-i âna direngî-i dil içün ceng göstermiş
- Leb-i la'lîni dendân-ı ümîde niçe sayd olsun
Ser-i efkâr-ı vasla derd-i hecrin seng göstermiş
6. 'Îzârın nekheth-efzâ eyleyüp meşşâta-i bâde
Cemâl-i tâbdârıñ nüsha-i Erjeng göstermiş
- Dür-i elfâz ile tezyîn idüp VAHYÎ-i âvâre
Bu şi'r-i pâkini bir dil-rubâ-yı şeng göstermiş

136.

Mefâ 'ilün Mefâ 'ilün Mefâ 'ilün Mefâ 'ilün
Hezec . - - - / . - - - / . - - - / . - - -

- O mest-i 'ışk kim hasretle rûy-ı yâre yüz sürmiş
Hezâr-ı zârdur gûyâ gül-i bî-hâra yüz sürmiş
- Ümîd-i pâ-y-bûsıyla o serv-i revza-i hüsnüñ
Varup şevk ile cûlar sû-be-sû gülzâra yüz sürmiş
3. Şehâ bûy-ı 'abîri habs-i çâh-ı nefret itmez mi
O kim ruhsârıñ üzre zülf-i müşg-âsâra yüz sürmiş
- N'ola reşk-i hayât-ı Hızr olursa lezzet-i mevtâ
Dem-i âhirde ol kim dergeh-i dildâra yüz sürmiş
- Olupdur dîde-i tâli' kûşâde çeşm-i zahmâsâ
Ki cism-i şerhadâr ol hancer-i zerkâra yüz sürmiş

6. Dil-i güstâh-fıkr endîşe-i bûs-ı dehânunla
O rind-i neş'e-cûdur sâgar-ı ser-şâre yüz sürmüş
Bu şi'r-i pâke tanzîr istedükde VAHYÎ-i gûyâ
Gürûh-ı nûkte-sencan dâmen-i a'zâra yüz sürmüş

137.

*Müfte 'ilün Fâ 'ilün Müfte 'ilün Fâ '
Münserih - . . - / - . - / - . . - / -*

- Zülf-i siyeh kim ruh-ı dil-bere düşmüş
Sünbül-i nev-restedür Kevsere düşmüş
Ey meh-i evc-i derun sanma meh-i nev
Hasretün-ile felek hancere düşmüş
3. Kâkül-i endîşesi kim dile geldi
'Anbere hoş-bûydu micmere düşmüş
Lü'lü-yi şehvâr olur bahr-i la'[a]lde
Çün 'arakun sâkiyâ sâgara düşmüş
Reşk ki vasf-ı leb-i la'l-i dil-ârâ
VAHYÎ-i zâr-ı suhan-pervere düşmüş

Harfû 's-Sâd

138.

*Fâ 'ilâtün Fâ 'ilâtün Fâ 'ilâtün Fâ 'ilün
Remel - . . - / - . . - / - . . - / - . -*

- Fıkr-i rûy-ı yârdan olmaz dil-i şeydâ halâs
Meyl-i vasl-ı şem'den pervâne olmaz tâ halâs
İtmesün 'âşık ümîd-i bezm-i vasl agyârsuz
Hârdan gülşende olmaz bülbül-i gûyâ halâs
3. Oldı der-pey vehm-i hat yârün kemâl-i hüsnine
Bedr olunca hâleden olmaz meh-i garrâ halâs
Zülf-i müşgînünle seyr itse ruh-ı rengînün
Olmaya zencîr-i 'ışkun dan gül-i ra'nâ halâs
'Âlem olmuşken esîr-i kâkülün VAHYÎ gibi
Nice olsun bu dil-i âşüfte vü rüsvâ halâs

139.

*Mef'ûlü Mefâ 'ilü Mefâ 'ilü Fe 'ülün
Hezec - . . / . . . / . . . / . . -*

'İşretle safâ dünyede ol dil-bere mahsûs
Fûrkatle cefâ 'âşık-ı bî-dillere mahsûs

Gîsûsı eger âteş-i ruhsârına düşse
Kimse diyemez bûy-ı latîf ‘anbere mahsûs

3. Rûyında nümâyân olıcak râz-ı derûnum
Bildüm ki degül âyîne İskendere mahsûs
Câmı sakınursam n’ola ağıâr gamından
Bir tuhfedür ol yâr-i bülend-ahtere mahsûs
Fûrkat bize vuslat kimedür didüm o şûha
Güldi didi VAHYÎ-i suhan-pervere mahsûs

Harfû ’z-Zâd

140.

Müstef’ilün Müstef’ilün Müstef’ilün Müstef’ilün
Recez - - . - / - - . - / - - . - / - - . -

Def’-i kederdür bezmde bu devr-i sâğardan ğaraz
Kesb-i safâdur zâhidâ dîdâr-ı dil-berden ğaraz
Tîğ-ı tegâfûl sînemüz sad pâre eylerken yine
Âyâ nedür ey meh-likâ izhâr-ı hancerden ğaraz

3. Gülzâr-ı hüsn-i yârda terk eyleyüp ruhsârını
Bilmem nedür bûlbüllere meyl-i gül-i terden ğaraz
Câmı şikâr itmek-durur tezyîn-i ‘ârızdan murâd
Murğ-ı dili bend itmedür zûlf-i mu‘anberden ğaraz
Nûş-ı mey-i la‘lin recâ itdükde VAHYÎ hışm idüp
Didi ne ola dünyede ümmîd-i Kevserden ğaraz

141.

Mef’ûlû Fâ’ilâtü Mefâ’ilü Fâ’ilün
Muzâri’ - - . / - - . / . - - . / - - .

Ey dil niyâz-ı vuslatı cânâna itme ‘arz
Ümmîd-i saltanatdur o sultâna itme ‘arz
Hükmince itmedünse mahallinde der-kenâr
Tuğra-yı hattın ol şeh-i devrâna itme ‘arz

3. ‘Âşık yanında eyleme âh ey rakîb-i zâğ
Tarz-ı fiğânı bûlbül-i nâlâna itme ‘arz
Bâzârı sîm ü zerle olur sûk-ı vuslatun
Bîhûde eşk ü dâğuñı hûbâna itme ‘arz
VAHYÎ-i zâr esîr-i humâr-ı firâk iken
Câm-ı leb-i visâlünjî nâ-dâna itme ‘arz

Harfü 't-Tâ'

142.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

Gerd-i la'linde hat-ı Yâkût anı sanma hat
Dâm-ı 'ankâ-yı nigâh-ı 'âşıkânı sanma hat
'Anber-i gîsûsı düşmiş âteş-i ruhsârına
Tarf-ı rûyından zuhûr iden duhânı sanma hat
3. 'Ârız-ı dildâr bir âyîne-i bî-jengdür
Anda peydâ olan 'aks-i ebruvânı sanma hat
Kâtib-i kudret katı muğlak yazup kâküllerin
Rûy-ı pâkinde beyân itmişdür anı sanma hat
VAHYÎyâ sanma gül-i gülzâr-ı Firdevsi 'izâr
Nev-demîde sünbül-i sahrâ-yı cânı sanma hat

143.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

Feyz-bahş-ı dil hayâl-i rûy-ı dil-berdür fakat
'Âlemi pür-nûr iden mihr-i münevverdür fakat
Sünbül ü şeb-bûy u reyhânı getürdüm hâtıra
Zîb-i gülzâr-ı emel zülf-i mu'anberdür fakat
3. Cân olur yâr ile her lahza hem-âğuş-ı visâl
Mânî'-i vuslat baña cism-i mükedderdür fakat
Deyr-i hüsnüñ çok büt-i 'Îsî-demin gördüm velî
Cilveger hâtırda ol rûh-ı musavverdür fakat
Gerçi çokdur şâ'ir-i hoş-lehce ammâ n'eyleyem
Böyle mu'ciz-gû bu VAHYÎ-i suhanverdür fakat

144.

Mef'ûlü Fâ 'ilâtü Mefâ 'ilü Fâ 'ilün

Muzâri' - - . / - . - . / - . - . / - . -

Ey fikr-i çeşmi bâ'is-i 'ayş ü dem-i neşât
V'ey yâd-ı la'li 'âşika câm-ı Cem-i neşât
Bir dil ki ala kabza-i teshîre dil-beri
Olsa 'aceb mi pâdşehe 'âlem-i neşât
3. Pür-zahm-ı deşne-i keder oldı amân aman
Sar câna ey tabîb-i vefâ merhem-i neşât

Te'sîr-i girye-i seheri feyz-i 'ışk ile
İtmez mi gülşen-i dili pür şeb-nem-i neşât
Bu nazm-ı pâk-i tâze-edâ-yı ferah-fezâ
VAHYÎ-i zârı eyledi dil-hurrem-i neşât

Harfû 'z-Zâ'

145.

Mefâ'ilün Fe'ilâtün Mefâ'ilün Fe'ilün

Müctes . - . - / . . - - / . - . - / . . -

- Dehen ki ola leb-i la'l-i nâbdan mahzûz
Olur mı bir dahı nûş-ı şarâbdan mahzûz
Esîr-i turre-i pür-pîç ü tâb-ı yâr olalı
Kebûter-i dil olur ıztırâbdan mahzûz
3. Revâ mıdur o mehe âşnâyî-i âgyâr
Melek olur mı likâ-yı kilâbdan mahzûz
Görürse h^vâbda çeşm-i küşâde havf eyler
O rütbe dîde-i baht oldı h^vâbdan mahzûz
Verâ-yı ebrde ey mihr ihticâb itme
Sakın sakın k'ola ol meh nikâbdan mahzûz
6. Amân eyleme ey şâh-ı merhamet-pîşe
Meşâm-ı tab'ı bûy-ı 'itâbdan mahzûz
Sirişk 'ışk-ı dile bâ'is-i terakkîdür
Ne hâldür ki ola âteş âbdan mahzûz
Beni rakîb ile hem-meclis-i visâl itme
Mukîm-i cennete olma 'azâbdan mahzûz
9. Olur çü nazm-ı FEHÎM-i suhanver ehl-i hüner
Kelâm-ı VAHYÎ-i hâzır cevâbdan mahzûz

146.

Fâ'ilâtün Fâ'ilâtün Fâ'ilün

Remel - . - - / - . - - / - . -

- Dil ruh-ı dildârdan itmez mi haz
Bülbül-i gülzârdan itmez mi haz
'Aklı olan zahm ile can virse de
Gamze-i hun-h^vârdan itmez mi haz
3. Teşne-i hışmuş iken erbâb-ı 'ışk
Lutf ile güftârdan itmez mi haz
Ol kişi kim sünbüle dil-bestedür
Turre-i tarrârdan itmez mi haz

VAHYÎ-i pervâne-dil ol tîre-baht
Şem‘-i ruh-ı yârdan itmez mi haz

Harfû ‘l-‘Ayn

147.

Fâ‘ilâtün Fâ‘ilâtün Fâ‘ilâtün Fâ‘ilün
Remel - . - - / - . - - / - . - - / - . -

Vâsıl-ı dîdâr-ı yâr olduk cefâya el-vedâ‘
Mevsim-i şâdîdür efkâr-ı belâya el-vedâ‘

Bir ser-âmed gonçe-i bî-hâra dil meyl itdi kim
Diye ruhsârın gören her meh-likâya el-vedâ‘

3. Zâhid-i hod-bîn görse bir nigâh-ı lutfını
Eyleyeydi vâdî-i zühd ü riyâya el-vedâ‘

Neş‘e-yâb-ı bâde-i la‘l-i leb-i dildâr olan
Eyler elbette hicâb ile hayâya el-vedâ‘

Hande-i pür-‘işvesin seyr eyleyen ‘uşşâk ider
VAHYÎyâ üftâdegî-i bî-vefâya el-vedâ‘

148.

Mefâ‘ilün Fe‘ilâtün Mefâ‘ilün Fe‘ilün
Müctes . . . - / . . . - / . . . - / . . . -

Olursa vasluğa ey şûh bîm-i can mâni‘
Şehîd-i hışm ideyüm olsa ger cihan mâni‘

Ol âfetün ser-i tîğıyla eyleyem sad çâk
Olursa vakt-i şehâdetde el-aman mâni‘

3. Duhân-ı nârı gıdâ-yı hümây-ı derd olsun
Hadeng-i cevrine olursa üstuh‘an mâni‘

‘Aceb mi habs-i çeh-i intizâr-ı subh itsem
Ki oldı râhat-ı cânâneye fiğan mâni‘

Şeb-i visâl ki şem‘-i meh-i cemâlündür
Olur mı pîrehan ey şûh-ı dil-sitan mâni‘

6. Göñül dimem seni mecrûh-ı tîr-i âh iderem
Dem-i visâlde gel olma her zaman mâni‘

Bu şeb o mâh ile bir bezm-i hâs tarh itdük
Hazer ki olmaya VAHYÎ-i nüktedan mâni‘

149.

Mefâ'ilün Fe'ilâtün Mefâ'ilün Fe'ilün

Müctes . . . - / . . . - / . . . - / . . . -

İder nighle seni çeşm-i hun-feşan teşyî'
Şafak gibi ki ider mihri bir zaman teşyî'

O bezm-i hâsdan ey dil çıkar mı 'âşık-ı zâr
Kim eyleye anı dil-ber vefâ-künan teşyî'

3. O mihr-i evc-i kerem itdi hânemi teşrîf
'Aceb mi sâyeveş itsem cihan-cihan teşyî'

Helâk olur çıkaran fikr-i vuslatuñ dilden
Olur mı itnese mihmânını bu can teşyî'

N'ola olınsa eyâ şâhid-i tevâzu'-hûy
Bu tab'-ı pâk-ile VAHYÎ-i nüktedan teşyî'

Harfû 'l-Gayn

150.

Fâ'ilâtün Fâ'ilâtün Fâ'ilâtün Fâ'ilün

Remel - . . . - / . . . - / . . . - / . . . -

Gülşen-i meyl-i ruhında bitmedi verd-i ferâğ
Rû-nümûd olmadı hergiz lâle-i zerd-i ferâğ

Şâh-ı fikr-i sûret-i yâre güzergâh olmağın
Dilde bâr-ı iştiyâkı komadı gerd-i ferâğ

3. Niceye dek mübtelâsın diyüben hışm eyleme
Oynanılmaz zâr-ı vuslatsuz şehâ nerd-i ferâğ

Gerçi sabr-ı derd-i hecr-i yâr müşkildür velî
Bir çekilmez derddür 'âşıklara derd-i ferâğ

Her ne rûtbe zûr-gîr olursa VAHYÎ dünyede
Pehlevân-ı 'ışka gâlib gelmeye merd-i ferâğ

151.

Mefâ'ilün Fe'ilâtün Mefâ'ilün Fe'ilün

Müctes . . . - / . . . - / . . . - / . . . -

Ne dil olur heves-i lutf-ı yârdan fâriğ
Ne yâr olur sitem-i bî-şumârdan fâriğ

Gören o kadd-i kıyâmet-nümâyı tâ mahşer
Olur mı hasret ile intizârdan fâriğ

3. Ruh u miyânını yârüñ seversen ol ey dil
Ümîd-bâzî-i bûs u kinârdan fâriğ

Görince ‘âşık o ruhsârı nâledür kârı
Hezâr olur mı gül açılsa zârdan fâriğ
Bu tab‘-ı pâk ile lâyık mı VAHYîyâ olmak
Edâ-yı şî‘r-i belâgat-şî‘ârdan fâriğ

Harfû ‘l-Fâ’

152.

Fâ‘ilâtün Fâ‘ilâtün Fâ‘ilâtün Fâ‘ilün

Remel - . - - / - . - - / - . - - / - . -

- Tîr-i ta‘nına rakîb-i dîvün olmaz ten hedef
Ey şeh-i şûriş-fiken incinme hâtır ber-taraf
Nâ‘il olmaz bûs-ı rûy-ı vasla hergiz itmeyen
Dil-rubâ yolında nakd-i eşk-i hûnînin telef
3. Lü‘lû-yi evsâf-ı cânân anda bulup perveriş
Hâme-i gevher-feşânum oldu mânend-i sade f
Destüğe al gâh geh lutf eyleyüp ey meh-likâ
Zîr-i pâda kalmasun mir‘ât-ı dil hem-çün hazef
VAHYî-i âvâre şâd olsa sezâdur buldı çün
Hâne-i kalbi kudûm-i fikr-i yâr ile şeref

153.

Fe‘ilâtün Fe‘ilâtün Fe‘ilâtün Fe‘ilün

Remel . . - - / . . - - / . . - - / . . -

- Gûyiyâ düşdi ğam-ı ‘ışk-ı cüvânâna sade f
Saldı fûlk-i dil-i ğam-h‘ârını ‘ummâna sade f
‘Ârızun sandı görüp ‘aks-i mehi deryâda
Başladı hasret ile çâk-i girîbâna sade f
3. Fikr-i dendânun ile baĝrını deldi incü
Sîneye çekse n’ola şerha levendâne sade f
Hayretinden ‘arak-ı rûy sanup cânânun
Can gibi raĝbet ider katre-i nîsâna sade f
Vasf-ı dendânını dildârun idelden mu‘tâd
Reşk ider hâtır-ı VAHYî-i suhandâna sade f

Harfû ‘l-Kâf

154.

Müfte‘ilün Müfte‘ilün Müfte‘ilün Müfte‘ilün

Recez - . . - / - . . - / - . . - / - . . -

Nûş-ı mey-i vasl olamaz cân kebâb olmayıcak
Âh u fîğan mutrib olup sîne rebâb olmayıcak

- Bülbül-i şeydâ idemez hâl-i dil-i zârını ‘arz
Gonçe-i nev-reste ferâ-gîr-i nikâb olmayıcak
3. Şevk ile tahrîr idemez râz-ı nihânın dil-i zâr
Bâde-i la‘lûnle şehâ mest-i harâb olmayıcak
- Pâyını bûs itmek o meh-pârenüñ olmadı nasîb
Reh-güzerinde ten-i pür-zahm türâb olmayıcak
- VAHYÎ-i i‘câz-nümâ yazmadı bu şi‘rini tâ
Tâze zemin tâze edâ tâze cevâb olmayıcak

155.

Mef‘ûlû Fâ‘ilâtün Mef‘ûlû Fâ‘ilâtün
Muzâri‘ - - - / - - - / - - - / - - -

- Ey çeşm-i fitne-sâzı kurbângâh-ı ‘âşık
V’ey fikr-i lutf-ı tab‘ı cây-ı penâh-ı ‘âşık
- Hasretle bir nezâre dil-nerm ider cüvânı
Hârâ-güdâzdur bil tîr-i nigâh-ı ‘âşık
3. Ceyş-i zalâm-ı hecr-i dildâr-ı pür-cefâyı
Def‘ itdi şâh-ı âh-ı âteş-sipâh-ı ‘âşık
- Bîdâr olmaz ey dil bezm-i cihanda hergiz
Çeşm-i vefâ-yı dil-ber baht-ı siyâh-ı ‘âşık
- VAHYÎ-i dil-figâra cânâ bu cevır tâ key
Hâtır-güzârüñ olsun te’sîr-i âh-ı ‘âşık

156.

Müfte‘ilün Müfte‘ilün Fâ‘ilün
Serî‘ - - - / - - - / - - -

- Ey deheni gonçe-i gülzâr-ı ‘ışk
Tal‘atı meşşâta-i dildâr-ı ‘ışk
- Oldı hayâl-i ruh-ı tâb-âverüñ
Bâ‘is-i germiyyet-i bâzâr-ı ‘ışk
3. Fikr-i leb-i la‘l-i suhan-perverüñ
Gâze-i revnak-dih-i ruhsâr-ı ‘ışk
- Dil bile olmazdı haberdâr bil
Âh-ı derûn itmese izhâr-ı ‘ışk
- VAHYÎ-i âvâre-dile kıl nazar
Ey deheni gonçe-i gülzâr-ı ‘ışk

157.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

Ey nigâh-ı hışmı 'uşşâk-ı figâra zehr-i 'ışk
V'ey dehân-ı hande-rîzi hurde-i pâ-zehr-i 'ışk

Hâne-i kalbe 'arûs-ı fıkır-i vasluñ gelmedi
Tuhfe-i cân-ı za'îfî almayınca mehr-i 'ışk

3. Hecr-i gamla ey perî-ruhsâr sahn-ı sînade
Eşk-i zahm-ı gamze-i hun-h^vâruñ oldu nehr-i 'ışk

Nazra-i verd-i ruh-ı hûb-ı dil-âvîzün olur
Bâ'is-ma ma'mûrî-i gülzâr-ı bâğ-ı şehr-i 'ışk

Tarz-ı şî'r-i VAHYÎ-i âvâreyi seyr eyleyüp
Didiler hakkâ budur mu'ciz-tırâz-ı dehr-i 'ışk

Harfû 'l-Kef

158.

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

O şûhuñ rûyî zîbâ turre-i tarrârı hem nâzûk
Bahâr-ı hüsndür gülzârı sünbülzârı hem nâzûk

Kad-i mevzûnına serv-i cinan dirsem ba'îd olmaz
Sükûtı hâlet-efzâ şîve-i refâtı hem nâzûk

3. Sükût itdükçe gonçe söyledükçe güldür ol lebler
Sözüm yok gonçesi ra'nâ gül-i bî-hârı hem nâzûk

İder dil-beste serv ü şem' ü mâhı 'işvesi yârün
Otursa dursa gitse hûbdur etvârı hem nâzûk

Lebi mül 'ârızı gül zülfî sünbül hâller fülful
Dil itsün mi tahammül hem güzeldür yâri hem nâzûk

6. Kadi dil-cû teni bî-mû hatı hoş-bû gözi cādû
Gören dir her yeri memdûhdur her kârı hem nâzûk

Bu vâdîde n'ola HÜSNîye olsam pey-rev ey VAHYÎ
Zemîni tâze tarz-ı nazmı hoş güftârı hem nâzûk

159.

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

Lebin zîb-i nigâh-ı hasret it câm-ı Cem istersen
Femin bûs it eger nâdîde 'ayş ü 'âlem istersen

- Mu‘azzez tut gönülde can gibi ‘ışk-ı dil-ârâyı
Enîs ü gayre muhtâc eylemez bir hem-dem istersen
3. Gönül rahm eylemem tâ haşr mecrûh-ı firâk olsa
Ger ol ‘Îsî-demün zahmından özge merhem istersen
- Nedür geşt ü güzârın söyle ey bâd-ı cihan-peymâ
Bulınmaz haşre dek sa‘y olsa kalb-i hurrem istersen
- Dehânın vasfını VAHYÎ-i nâzûk-tab‘a ta‘yîn it
Eger bir şâ‘ir-i hoş-lehce vü mu‘ciz-dem istersen

160.

Fe‘ilâtün Mefâ‘ilün Fe‘ilün
Hafîf . . - - / . . - - / . . -

- Murg-ı ümmîde dâmdur gamzen
Bâde-i lutfâ câmdur gamzen
- Dest-i nahvet-nigâh-ı çeşmünde
Tîğ-ı âteş-niyâmdur gamzen
3. İtdi mihrâb-ı ebruvânı makâm
‘Îşveye san imâmdur gamzen
- Ne kadar pür-füsûn olursa yine
Dîde-i meste râmdur gamzen
- VAHYÎ-i şûha hoş musâhibdür
Ya‘nî mu‘ciz-keîlâmdur gamzen

161.

Mef‘ûlü Fâ‘ilâtü Mefâ‘ilü Fâ‘ilün
Muzâri‘ - - . / - - . / - - . / - -

- Gül-berg-i al-i gülşen-i ‘irfândur ruhu
Mihr-i münîr-i evc-i dil ü cândur ruhu
- ‘Asrunda mâh da‘vî-i hüsn itse lâfdur
Mahsûd-ı hüsn-i mihr-i dırâşândur ruhu
3. Def‘-i humâr-ı hecr içün âşüfte-dillere
Bir bâde câm-ı la‘l-i Bedahşândur ruhu
- Pîrâhen-i tahammüli fersûdedür anu
Kim evc-i çeşmine meh-i tâbândur ruhu
- VAHYÎ gibi görenleri mest-i ümîd ider
Ke’s-i müdâm-ı gamze-i fettândur ruhu

162.

Fe 'ilâtün Mefâ 'ilün Fe 'ilün

Hafîf . . - - / . . - - / . . -

- 'Arak-ı câm-ı ândur 'arakuñ
Neşve-bahş-ı revândur 'arakuñ
Zülf fevvâre havz çâh-ı zekan
Selsebîl-i cinândur 'arakuñ
3. Teşne-leb çeşme-i dehânuñ arar
'Âşık-ı nüktedândur 'arakuñ
Dökilürse 'aceb degül zîrâ
Kevkeb-i 'âşıkândur 'arakuñ
Eşk-i 'uşşâka beñzedürdüm lîk
Gâh u bî-geh nihândur 'arakuñ
6. Tâb-ı meyden gül-i 'izârunda
Şeb-nem [ü] ergavândur 'arakuñ
Hâsılı rûy-ı pâkûñle cânâ
Dür-i zînet-resândur 'arakuñ

163.

Fe 'ilâtün Mefâ 'ilün Fe 'ilün

Hafîf . . - - / . . - - / . . -

- Çün ruhuñda 'iyân olur 'arakuñ
Hayret-endâz-ı cân olur 'arakuñ
Dizilüp silk-i zülf-i müşgîne
Dür-i zînet-resân olur 'arakuñ
3. Baksam ey gülşen-i hayâ yüziñe
Şeb-nem [ü] ergavân olur 'arakuñ
Bûs idüp gül gül eylesem rûyuñ
Başka bir gülsitân olur 'arakuñ
Meyi habs-i sebû-yı hayret ider
Şöyle hâlet-feşân olur 'arakuñ
6. Bezm-i rûyuñda olıcak gerdan
Câm-ı sahbâ-yı ân olur 'arakuñ
VAHYÎ-i zâra feyz-i hüsnûñle
Selsebîl-i cinân olur 'arakuñ

164.

Fe 'ûlün Fe 'ûlün Fe 'ûlün Fe 'ûlün
Mütekârib . - - / . - - / . - - / . - -

- Gül-i al-i bâğ-ı İremdür 'izârûñ
Sirâc-ı şebangâh-ı gamdur 'izârûñ
Alup gâze-i sun'-ı Hak 'andelfîbi
Gülistân-ı hûb u haremdür 'izârûñ
3. Dil-i zârumuz mest nezzâresinden
Mey-i al-i pür-câm-ı Cemdür 'izârûñ
Harâm olsun aña eger mey dir isem
Şehâ Kevser-i muhteremdür 'izârûñ
Dimiş vasf idüp VAHYÎ-i dil-şikeste
Gül-i al-i bâğ-ı İremdür 'izârûñ

165.

Fâ 'ilâtün Fâ 'ilâtün Fâ 'ilâtün Fâ 'ilün
Remel - . - - / - . - - / - . - - / - . -

- Ehl-i 'ışka ol kadar hâlet-nümâdur kâkülün
Kim harîf-i gamze-i sihr-âzmâdur kâkülün
Olmaz iken biñ Hotan pür-çînine kemter-bahâ
Müşge teşbîh eylemek cânâ hatâdur kâkülün
3. Açılınca neşr-i bûy-ı vasl ider 'âşıklara
Sünbül-i rengîn-i Firdevs-i vefâdur kâkülün
Bûy-ı lutfi ceyb-i dilden haşre dek olmaz cüdâ
'Anber-i sûzâna reşk itse revâdur kâkülün
Bestedür her târına biñ dil dil-i VAHYÎ gibi
Böyle sihr-engîz ü efsûn-âşnâdur kâkülün

166.

Müzeyyel Bâ-Sitâyiş-i Hazret-i Şeyh Nazmî Efendi Zen-peder-i Sâhib-Dîvan
Mef'ûlü Fâ 'ilâtü Mefâ 'ilü Fâ 'ilün
Muzâri' - - . / - . - . / - . - . / - . -

- Meftûn-ı vaz'-ı gamze-i fettânuşam senün
Mecnûn-ı bend-i zülf-i perîşânuşam senün
Bir kerre cür'a-nûş-ı mey-i vuslat olmadum
Tâ key humâr-hâne-i hicrânuşam senün
3. Cevrûñle dâğ dâğ dil olsam da gam degül
Minnet-hor-ı nevâl-i firâvânuşam senün

- Bîrûn-perde nâlede ma'zûr tut beni
 Ey bâğ-ı hüsn bülbül-i nâlânûşam senûñ
 Ser-şâre-nûş-ı rağbet-i câm-ı Cem olmadum
 Ser-mest-i fikr-i la'l-i Bedahşânûşam senûñ
6. Pâ-mâl-i gûşe-i nigeñ itmemeñ olsa da
 Pertev-güzîn-i 'ârız-ı rahşânûşam senûñ
 VAHYÎ gibi 'aceb mi olursam nazîre-sâz
 Feyz-âşnâ-yı meclis-i 'irfânûşam senûñ
 NAZMÎ EFENDÎ hazreti kim rütbesin bilen
 Mihr olsa dir ki hâk-ile yeksânûşam senûñ
9. İdrâk iden bülendî-i câh-ı belâğatin
 Şâh olsa dir ki bende-i fermânûşam senûñ
 Hemvâre Hak cenâbuñı dil-hurrem eylesün
 'Âlemde ben de tâ ki senâ-h^vânûşam senûñ

167.

Mef'ûlû Fâ 'ilâtû Mefâ 'ilû Fâ 'ilün
Muzâri' - - . / - . . . / . - . . / - . -

- Eylirse eylesün beni sad pâre hancerün
 Tek hem-dem olmasun ten-i ağıâra hancerün
 Nûş ide ide hûn-ı dil-i zâr-ı 'âşıkı
 Hem-meşreb oldı ğamze-i hun-h^vâra hancerün
3. Kendin 'izâr-ı pâküñe tanzîr ider diyü
 San'atla mâhı eyledi pür-pâre hancerün
 Hakkâ bu tarz ile saña 'âlem giriftedür
 Zîbâ yaraşdı câme-i zerkâra hancerün
 Havzı dil âbı hûn-ı ciger selsebîli ten
 Oldı riyâz-ı vuslata fevvâre hancerün
6. Kurbanuñ olam olma meded âşnâ-firîb
 Bir himmet eyle hışm ile izhâra hancerün
 Âb-ı hayât küşte-i tîğ-ı makâlidür
 Vâsf eyledükde VAHYÎ-i âvâre hancerün

168.

Fâ 'ilâtün Fâ 'ilâtün Fâ 'ilâtün Fâ 'ilün
Remel - . - . / - . - . / - . - . / - . -

Şem'-bâz-ı bezm-i etfâl-i cefâdur hancerün
 Şeh-per-i 'ankâ-yı fermân-ı kazâdur hancerün

- Düzd-i endîşem karîn-i sîm-pehlûn olmadı
Pâsbân-ı kûçe-i merg-i safâdur hancerün
3. Sîneme teşrîf-i ânî idüp ârâm itmedi
Dil-rubâ-yı pür-şitâb âteş-be-pâdur hancerün
- Bû ‘Alînün çeşm-i zahm âmed-şüdin fark eylemez
Ey perî var-ısa sâhib-sîmyâdur hancerün
- Rûzedâr-ı fûrkate VAHYİveş iftâr itdürür
San hilâl-i ‘îd-i evc-i ibtilâdur hancerün

169.

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

- Hasretün derdine ma‘cûn-ı devâdur leblerün
Fûrkatün bîmârına dârü ’ş-şifâdur leblerün
- Söyleseñ güldür sükût itsen kızarmış gönçedür
Ağzıma virseñ şarâb-ı can-fezâdur leblerün
3. La‘lden levni musaffâ kandden tu‘mı lezîz
Var-ısa gül-nâr-ı Firdevs-i vefâdur leblerün
- Haşre dek mest-i harâb-ı feyz-i ‘ışk olur gören
Câm-ı rengîn-i mey-i hüsn ü bahâdur leblerün
- Ağzına alma dime VAHYİ-i zâra dostum
Böyle vâsf-ı pâke şâyeste ‘atâdur leblerün

170.

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

- Himmet-efzâ-yı dil-i vuslat-recâdur gözlerün
Tûtiyâ-yı çeşm-i ümmîd-i vefâdur gözlerün
- Biz ‘atâ-yı nazra-i şefkat-nümûdî görmedük
Lîk zâtında heman ‘ayn-ı ‘atâdur gözlerün
3. ‘Âşıkı tâ subh-ı mahşer mest iderse çok degül
Ol kadar mestî-dih ü hâlet-nümâdur gözlerün
- ‘Ayn-ı ta‘yîb olsa ‘âlem kimse bulmaz ‘ayb anı
N’eyleyem ammâ ki ağyâr-âşnâdur gözlerün
- Sâha-gerd-i fûrkat olsa gam degül VAHYİ-i zâr
‘Âkıbet kûy-ı visâle reh-nümâdur gözlerün

171.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

- Âh-ı cangâhuñdan añlandı gönül fûrkatdesün
Sûzişüñden fehm olundu âteş-i hasretdesün
Rûz u şeb feryâd-pâş olmakdasun ey 'andelîb
Var-ısa sen de benüm gibi gam u mihnetdesün
3. Böyle midür resm-i 'âşık-perverî ey bî-vefâ
Biz gam u fûrkatde sen ağıâr ile ülfetdesün
Gâh la'lin geh ruh-ı zülf-âverin yâd eyleyüp
Ey dil-i âşüfte-meşreb rûz u şeb 'işretdesün
Şem'-i hüsn-i dil-rubâ pîrâmeninden dûrsun
Ey gönül pervâneveş kimlerle germiyyetdesün
6. Perde-bîrun nâle ey bülbül saña bîhûdedür
Dâ'imâ çün-kim gül-i ra'nâ ile sohbetdesün
Görmez olduk meclis-i dildârda hergiz seni
VAHYÎyâ şimdi 'aceb kimlerle ünsiyyetdesün

172.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

- Yolda kaldı dîde-i tûfan-nişan gelmez misün
Gitdi ârâm u şikîb ey bî-aman gelmez misün
Bir sen ü bir dil-rubâ bir 'ışk-ı kâmil bir de bezm
Doğrı söyle zâhidâ bî-imtinan gelmez misün
3. Keştî-i dil oldu gark-âb-ı sirişk-i intizâr
Dahı ey İlyâs-ı bahr ü Hızr-ı kân gelmez misün
Eyledüm cân u dili âmâde pâ-y-endâz için
Gûş ber bang-ı ni'âlem her zaman gelmez misün
Vasf-ı hüsn-i yâr için bezm eylemiş erbâb-ı dil
Sen dahı ey VAHYÎ-i mu'ciz-beyan gelmez misün

173.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

Olalı şeng-i hayâl-i dil sigâl-i fûrkatün
Oldı dildâr-ı ümîdüm tâl ü mâl-i fûrkatün
Zahm-ı hûn-âlûd kim cism-i dil-i zârumdadur
Şîşe-i billûra konmuş sanki kâl-i fûrkatün

3. Hem-çü hışm-ı gamze-tîğ-ı merg zahm-ı ye's olur
Kâr-ı nâ-hemvâr-ı devr-i gûşmâl-i fûrkatûñ
Genc-i nakd-i eşk bir şeft-âlûya olmaz bahâ
Pür-revâc oldukda sûk-ı huşk-sâl-i fûrkatûñ
Bâde-i la'l-i nigâr-ı vasluñ üzre ey perî
Nûş olur mı sâğar-ı ka'bû 'l-gazâl-i fûrkatûñ
6. Dâğ-sûz-ı mihnet olmakda derûna dem-be-dem
Var-ısa oldı felek cânâ hemâl-i fûrkatûñ
Sîne-i VAHYÎ-i gam-hârı figâr itmekdedür
Deşne-i hun-pâş-ı derd-i heft-hâl-i fûrkatûñ

Harfü 'l-Lâm

174.

Fe 'ilâtün Fe 'ilâtün Fe 'ilâtün Fe 'ilün
Remel . . - - / . . - - / . . - - / . . -

- Ey lebi gâze-i nekhet-keş-i ruhsâr-ı emel
Turreşi zîb-dih-i gönçe-i destâr-ı emel
Kâkül-i şâhid-i mihr-i ruhuñ ey mâh görüp
Oldı Mecnûn aña Leylî-i şeb-i târ-ı emel
3. Eşk-i çeşm-i heves-i 'ârız-ı hûy-kerdeñ ile
Jâledâr olmada berg-i gül-i gülzâr-ı emel
Âğuş-ı hasret-i vuslatda uyutmış yâri
Haylî kuvvetde imiş tâlî-i bîdâr-ı emel
Levh-i âmed-şüd-i etfâl-i debistân-ı gama
Meşk-i âzâd yazar hâme-i zerkâr-ı emel
6. Mest-i dîdârı olup râz-ı dilüm fâş itdi
Yâr ile hem-dem olaldan beri dildâr-ı emel
VAHYÎyâ tarz-ı pesendîdeñe tahsîn itmiş
Ol lebi gâze-i nekhet-keş-i ruhsâr-ı emel

175.

Mef'ûlû Fâ 'ilâtü Mefâ 'ilü Fâ 'ilün
Muzâri ' - - . / - - . . / . - - . / - - .

- Ey gamzesi şikeste-kün-i inkisâr-ı dil
V'ey 'işvesi kesel-güsîl-i intizâr-ı dil
Nâ-bûd olur şehâ nefes-i râmiz-i hayât
Fikr-i 'izârûñ olmasa âyînedâr-ı dil
3. Endîşe-i leb-i güher-efşân-ı bî-ğışuñ
Bezm-i hayâl-i vasla mey-i hoş-güvâr-ı dil

Bâd-ı nesîm-i gülşen-i ümmîd-i vuslatuñ
Mestî-dih-i tabî‘at-ı şûh-ı hezâr-ı dil
VAHYÎ olınca şu‘le-fiken mihr-i tal‘atı
Ber-bâd oldu nakd-i şikîb-i nigâr-ı dil

176.

Mef‘ûlû Fâ‘ilâtü Mefâ‘ilü Fâ‘ilün
Muzâri‘ - - . / - . - . / . - - . / - . -

Hattuñ görüp leb-i suhan-ârâya düşdi dil
Geldi bahâr sâgar-ı sahbâya düşdi dil
Zahm-âşnâ kıyâs idüp ol fitne-ğamzeyi
Hayfâ zemîn-i saht-ı temennâya düşdi dil

3. Seyr eyledükde ‘arız-ı dil-cûy-ı yârda
Ol zülf-i pîç-pîç-i semen-sâya düşdi dil
Cism-i nizârı hâk-reh itsem ‘aceb degül
Bir nev-resîde dil-ber-i ra‘nâya düşdi dil
VAHYÎ güher-nisâr-ı nikât ü ma‘ârif ol
Tanzîr-i şî‘r-i TÂ‘îB-i gûyâya düşdi dil

177.

Fâ‘ilâtün Fâ‘ilâtün Fâ‘ilâtün Fâ‘ilün
Remel - . - - / - . - - / - . - - / - . -

Bülbüli nâlân iden rûyuñdur ey meh gül degül
Sad hezâr ‘uşşâk var kûyuñda bir bülbül degül
Rûy-ı pâkünde gören dir kâkül-i müşgînüñi
Şîşe-i billûra ‘anber-bû komış kâkül degül
3. Âteş-i ‘ışkuñla yandurduñ behûr-i Meryemi
Dûdıdur zâhir olan gülzârdan sünbül degül
Revnak-ı hüsnüñ görüp ‘aksüñ sürâhîden şehâ
Âh ider ol nağmedür gûş itdigün kulkul degül
VAHYÎ-i şûrîde sahbâ ile itmez def‘-i gam
Şevk-bahşâ ‘âşîka câm-ı lebüñdür mül degül

Harfü ‘l-Mîm

178.

Mefâ‘ilün Fe‘ilâtün Mefâ‘ilün Fe‘ilâtün
Müctes . . . / . . - - / . . - - / . . - -

Bihîştî dûzah iderdüm dilüñ te‘ellümin anşam
Ya dest-i bahtdan ümmîdümün tazallumın anşam

İşitse harfîni mâhî olur helâk-i hirâsı
Kemîne katre-i bahr-i gamuñ telâtumın anşam

3. Olurdı tâbe-kıyâmet rehîn-i reşk-i fesâhat
Eger o kand-i lebûñ lezzet-i tekellümin anşam
Ser-â-ser eyler idüm ‘âlemi riyâz-ı letâfet
O şûh-ı gönçe-femûñ şîve-i tebessümin anşam
Seni füsün-nağam-ı gülşen-i belâgat iderdüm
O bülbül-i suhanuñ VAHYÎâ terennümin anşam

179.

Mef‘ûlü Fâ‘ilâtü Mefâ‘ilü Fâ‘ilün
Muzâri‘ - - . / - . - . / . - - . / - . -

Vasfında bû-feşân olamaz sünbül-i kalem
Ol hasret ile yûha çıkar gulgul-i kalem

Tâb-âver olmaya o mehûñ bâr-ı vasfına
Vassâfı ger ‘Alî ise de Düldül-i kalem

3. Her bir şikencin eyleye bir nâfe-i Hotan
Neşr itse bûy-ı zülfin eger kâkül-i kalem
Bak fart-ı ‘ışkına ki zebân-ı hezâr ile
Destümde nağme-senc olur bülbül-i kalem
VAHYÎ olursa bûy-nisâr-ı recâ saña
Hâkister ola sûz-ı dilinden gül-i kalem

180.

Mef‘ûlü Mefâ‘ilü Mefâ‘ilü Fe‘ûlün
Hezec - - . / . - - . / . - - . / . - -

Fikr-i ruhuñı câm-ı zer-endûda değışmem
Bûy-ı heves-i kâkülüñi ‘ûda değışmem

Rîş-i ecelüñ sînede ey hancer-i hun-rîz
Zahm-ı müje-i kâbil-i bih-bûda değışmem

3. Âmâde gam-ı fûrkatüñ ey şûh-ı cefâ-cû
Biñ va‘d-i dem-i vuslat-ı nâ-bûda değışmem
Âzâdegî-i cünbişini gamzenüñ ey meh
Zevk-i nigh-i merhamet-âlûda değışmem
Deryûzeger-i vuslata VAHYÎ o perînüñ
Evzâ‘-ı la’îmânesini cûda değışmem

181.

Fâ‘ilâtün Fâ‘ilâtün Fâ‘ilâtün Fâ‘ilün

Remel - . - - / - . - - / - . - - / - . -

Vechi var ruhsâr-ı yâre verd-i handânum disem
Hûbdur ol zülf-i ‘anber-bâra reyhânnum disem

Feyz-i nutkumdan bulurdı sûret-i dîvâr rûh
Sîneye çekdükde ol ‘Îsî-demi cânnum disem

3. Vaz‘-ı hışmı vakf-ı ye’s-i ebr ider mihr-i dili
Bir gice yâre açılısam mâh-ı tâbânnum disem

Âh ol vakt olsa kim idüp der-âğuş-ı nigâh
Sevdigüm şîrin-zebânnum pâk-iz‘ânnum disem

Niçe müddetdür o şûha bendeyem VAHYÎ gibi
Fursat olsa bârî bir kez âh sultânnum disem

182.

Mef‘ûlü Mefâ‘ilü Mefâ‘ilü Fe‘ûlün

Hezec - - . / . - - . / . - - . / . - -

Medhûş oluram la‘l-i Bedahşânını görsem
Can bezl iderem gamze-i fettânını görsem

Pejmurde olur gönçe-i neşkûfte-i hâtır
Gîsû ile destâr-ı perîşânını görsem

3. Bezl eyler idüm yolına ser-mâye-i ‘ömri
Bir kerre dahı gûşe-i dâmânını görsem

Cânı iderem müjde-i teşrîf-i şehâdet
Destinde eger hancer-i bürrânını görsem

Huffâş-sıfat düşmen-i hurşîd olurdum
Kâküller ile ‘ârız-ı rahşânını görsem

6. Oldum hedef-i ta‘ne-i agyâr-ı cefâkâr
Bârî o mehûn lutf-ı firâvânını görsem
Cân u dil ile ben dahı kurbânı olurdum
VAHYİNÜN o vasf itdiği cânânını görsem

183.

Fe‘ilâtün Fe‘ilâtün Fe‘ilâtün Fe‘ilün

Remel . . - - / . . - - / . . - - / . . -

Lutfuña cân-ı belâ-dîdeyi nâ’il görsem
Vasluña bu dil-i şûrîdeyi vâsil görsem

Hâlet-i ‘ışkî murâdumca iderdüm tefhîm
Seni kendün gibi bir dil-bere mâ’il görsem

3. Şübhesiz dîde-i idrâkûme ahvel dir idüm
Dil-rubâlarda eger saña mu‘âdil görsem
Bildürürdüm mehe eksüklüğün ey şüh tamâm
Bir gice rûyuñ ile anı mukâbil görsem
VAHYÎyâ yâre sarıl bûsesin al dirdüm eger
Bir dahı bezm-i visâle seni dâhil görsem

184.

Fe‘ilâtün Fe‘ilâtün Fe‘ilâtün Fe‘ilün
Remel . . . - / . . . - / . . . - / . . . -

- Çihre-i ‘âşık u pehlû-yı dil-ârâ zer ü sîm
Hûb olur cem‘ olıcak bir yere cânâ zer ü sîm
Zîb-i destârûñ olaldan beri zerrîn ile sîm
Reşk ider revnakına ey gül-i ra‘nâ zer ü sîm
3. Kâle-i vasluñ içün kârgah-i sînemde
Olmada dâğ u sirişkümle müheyyâ zer ü sîm
Olmaz ihlâs u ‘ubûdiyyet ile vasl-ı bütan
İtsün üftâdeleri var-ısa ihdâ zer ü sîm
Çeşm-i VAHYÎ yolına lü‘lü-yi ter neşr eyler
Yâ dirîğ ola mı ey verd-i mutarrâ zer ü sîm

185.

Fâ‘ilâtün Fâ‘ilâtün Fâ‘ilâtün Fâ‘ilün
Remel - . . - / - . . - / - . . - / - . . -

- Bâğ-ı kûyuñ gibi bir gülzâr-ı hurrem bulmadum
Hâk-i pâyuñ gibi kuhl-i çeşm-i pür-nem bulmadum
Gerçi itdi ‘âlemi ihyâ Mesîhâ-yı lebün
Lîk ben zahm-ı dil-i mecrûha merhem bulmadum
3. Deyr-i hüsnüñ sûret-i dîvâr buldum bütlerin
Bir saña mânend olur rûh-ı mücessem bulmadum
Gülşen-i ‘âlemde ruhsâr-ı ‘arahnâkûñ gibi
Bir gül-i la‘lin dür-i vassâf-ı şeb-nem bulmadum
N’ola açılısam yüzüñ gördükçe cânâ gül gibi
Keşf-i râz-ı ‘ışka senden ğayri mahrem bulmadum
6. Saña teslîm eylesem şâyestedür nakd-i dili
Bir senüñ gibi dil-ârâyı müsellemler bulmadum
Hayf ol âyîne-ruhsâra şeker-güftâr ile
Kendümi tûtî gibi bir lahza hem-dem bulmadum

Bûse-çîn-i rûy u kâkül-perver-i cânân olup
Bu harâb-âbâdda genc-i mutalsam bulmadum

9. Devlet-i 'ışkuñda sultânüm revâ mıdur bu kim
VAHYÎ-i âvâreñi bir lahza bî-ğam bulmadum

186.

Mef'ûlü Mefâ'ilü Mefâ'ilü Fe'ûlün
Hezec - - . / . - - . / . - - . / . - -

Rûyuñ görüp ol çeşm-i vefâdâra kapıldum
Gülzârı gezüp nergis-i bîmâra kapıldum
Âzâde iken kayd-ı hevesden yine sad âh
Ol nazrası şeh-bâz-ı cefâkâra kapıldum

3. Şimden-girü biñ hışm ile âzürde-dil olmam
Ol hande vü ol lutf-ıla güftâra kapıldum
Âzâd iken oldum yine ol ğamzeye bende
Bir şîr-i kazâ-pençe-i hun-h^vâra kapıldum
Hep lutf u 'atâdur dil-i şûrîdeye kârı
VAHYÎ hele bir dil-ber-i ğam-h^vâra kapıldum

187.

Mefâ'ilün Fe'ilâtün Mefâ'ilün Fe'ilün
Müctes . - . - / . - - - / . - - - / . - -

Gam-ı firâk ile zâram nigârum aldurdum
Figâr-ı hâr-ı hezâram bahârum aldurdum
Ümîdvâr-ı vefâyam ki bî-ser ü pâyam
Niyâzmend-i 'atâyam ki varum aldurdum

3. Hemîşe telh-i mezâkam ğarîb ü müştâkam
Esîr-i bend-i firâkam ki yârüm aldurdum
Sitem-hor-ı şeh-i 'ışkam elemgeh-i 'ışkam
O h^vâce-i reh-i 'ışkam ki bârum aldurdum
Çü tab'-ı VAHYÎ-i pür-ğam firâk ile hem-dem
Seher-keş-i şeb-i hecrem nehârum aldurdum

188.

Berây-ı Tanzîr-i Antakî-zâde Feyzî Efendi

Mef'ûlü Mefâ'ilü Mefâ'ilü Fe'ûlün
Hezec - - . / . - - . / . - - . / . - -

Bakdum ruh-ı yâre gül-i bî-hârı unuttum
Gördüm lebini sâğar-ı ser-şârı unuttum

Bir lutf-ıla şîrin-dehen itdi beni cânan
Zehr-âbe-i pey-der-peyi âzârı unuttum

3. Evsâf-ı miyân u lebidür bûs u kinârum
Ben devlet-i tâli‘de o efkârı unuttum
Çün fikr-i ğubâr-ı hatun itdi beni hayran
O hayret ile seyr-i çimenzârı unuttum

FEYZîye didüm nazmuña tanzîr ider olmaz
Gör ğafleti VAHYÎ-i füsunkârı unuttum

189.

Mefâ‘ilün Fe‘ilâtün Mefâ‘ilün Fe‘ilün
Müctes . . . - / . . . - / . . . - / . . . -

O meh-likâya gönül keşf-i râza başlayalum
Recâ-yı vasl ile sûz u güdâza başlayalum

Yeter şarâb-ı hicâb ile mestî-i hasret
O şâh-ı ‘işve-sipâha niyâza başlayalum

3. Neden takayyüd-i nâmûs u ‘âr ‘uşşâka
Hemân şevk ile âh-ı dırâza başlayalum
Çü itdi şûh müjeñ cünbiş-i vefâ-âmîz
Ümîd-i vuslatuña tâze tâze başlayalum
Husûl-i fâ‘ide-i kâm sehldür VAHYÎ
Hele ticâret-i kâlâ-yı nâza başlayalum

190.

Mefâ‘ilün Mefâ‘ilün Mefâ‘ilün Mefâ‘ilün
Hezec . . . - / . . . - / . . . - / . . . -

Eger pertev-nümâ olsa ruhuñ yek-bâr sultânım
Gören kâfirse de ‘ışkuñ ider ikrâr sultânım

Ne hikmetdür bu âb u tâb ile gülzâr-ı hüsnünde
Ruhuñ gibi biter bir verd-i âteş-bâr sultânım

3. Perîşan-hâl olur ‘uşşâk elbette olinca cem‘
‘Îzâr-ı tâbdâr u zülf-i ‘anber-bâr sultânım
Derûnı peşm-i hicrân ile mâl-â-mâl olmışdur
İdüp ümmîd-i vasluñ bâliş-i zerkâr sultânım
Şu deñlü sedd olupdur VAHYÎ-i zâra der-i vasluñ
Ki yokdur ihtimâli ru‘yet-i dîdâr sultânım

191.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

Dilde vasf-ı la'lüñi ol dem ki îrâd eyledüm
Âb-ı hayvân üstine mey-hâne bünyâd eyledüm

Bîsütûn-ı gam gubâr-ı himmetüm olsa n'ola
Her müjem bir tîşe-i küh kâh-ı Ferhâd eyledüm

3. Haşre dek mest-i harâb-ı vuslat olsam çok degül
Yârümün çeşm-i tesellâ gamzesin yâd eyledüm

Telh-kâmî-i mey-i fûrkatden olmam şekve-gû
Devlet-i tâlî' de ben ol kârı mu'tâd eyledüm

Es-salâ tanzîr iden erbâb-ı tab'a VAHYÎyâ
Hoş-edâ bir nev-zemîn-i pâk îcâd eyledüm

192.

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

Hatın yâd eyleyüp bûs-ı ruh-ı zîbâdan el çekdüm
Humârın fikr edince sâgar-ı sahbâdan el çekdüm

Ferâğ itdüm hirâs-ı hecr ile rû-mâl-i rûyından
Zükâmın zıkr idüp şemm-i gül-i ra'nâdan el çekdüm

3. Görüp fersûdegî-i sünbül-i bâğ-ı fenâ-hâki
Gam-ı sevdâgerî-i zülf-i müşgâsâdan el çekdüm

Rikâb-ı zîn-i kâm oldı cüdâ pâ-yı te'emmülden
Ligâm-ı rahş-ı ümmîd-i cihan-peymâdan el çekdüm

Çü bildüm pâydâr olmaz safâ-yı 'âlem-i fânî
Kınâ'-ı çihre-pîrâ-yı zen-i dünyâdan el çekdüm

6. Zelîhâ-yı dil itmez meyl olursa Yûsuf-ı sânî
O rûtbe dâmen-i vasl-ı neşât-efzâdan el çekdüm

Gönülde 'ârız u ebrûsı merkûz olmağın VAHYÎ
Nazar-bâzî-i mihr ü gurre-i garrâdan el çekdüm

193.

Fe 'ilâtün Fe 'ilâtün Fe 'ilâtün Fe 'ilâtün

Remel . . - - / . . - - / . . - - / . . - -

Yine ol mâh-'izârûñ lebini yâda getürdüm
Yine keyf-i mey-i nâbı dil-i nâ-şâda getürdüm

Olamaz saf-şiken-i ceşş-i tegâfûl çü niyâzum
Sipeh-i âh u figânı aña imdâda getürdüm

3. Nigeh-i merhamet-âmîze degül vasla deger çak
Sağa ey mâh-likâ bir dil-i âmâde getürdüm
Benem ol ‘âşık-ı mihnet-keş-i kühsâr-ı mahabbet
Ki müjem mer-tebe-i tîşe-i Ferhâda getürdüm
Suhan-ı VAHYÎ-i hoş-gûyî idüp pâyuğa îsâr
Âb-ı hayvânî şehâ sâye-i şimşâda getürdüm

194.

Fâ ‘ilâtün Fâ ‘ilâtün Fâ ‘ilâtün Fâ ‘ilün
Remel - . - - / - . - - / - . - - / - . -

- ‘Arşa çıkdı hasret-i zülfünle efgânum benüm
Bir su’âl itseñ ne var hâl-i perîşânum benüm
‘Âşıkâne bir nigâhumdan bilür maksûdumı
Sevdigüm nâzûk-hayâlüm pâk-iz’ânum benüm
3. Derd-i ‘ışk ile gül eylerdi fîğan bûlbûl degül
‘Azm-i bâğ itse eger serv-i hirâmânum benüm
Niçe demdür mürde-i hecrem helâk-i hasretem
Sîneme gelse n’ola can gibi cânânum benüm
Bendeñem âvâreñem pür-yâreñem bî-çâreñem
Bir nigâh-ı şefkat it lutf eyle sultânnum benüm
6. Görmeyem ağıâr ile VAHYÎ o gül-pîrâheni
Varmasun dâmânuma çâk-i girîbânnum benüm

195.

Fâ ‘ilâtün Fâ ‘ilâtün Fâ ‘ilâtün Fâ ‘ilün
Remel - . - - / - . - - / - . - - / - . -

- Yârümün ruhsâresi şûr-efken-i güldür benüm
Ol sebebdan nâlişüm mahsûd-ı bûlbûldür benüm
Kâkülün fikriyle dûd-ı âhum oldukça bülend
Miski mest-i şerm ider bir saçlı sünbûldür benüm
3. Olalı leb-rîz sahbâ-yı hayâl-i la‘l-i dost
Hâtırum revnak-şikest-i sâğar-ı müldür benüm
Dilde zahm-ı gamzeñe tedbîr ey genc-i ümîd
Merhem-i nişter-keş-i ye’s-i tahammüldür benüm
Hak budur VAHYÎ bu şi‘r-i tâzemün her nüktesi
Tuhfe-cûy-ı nakd-i hemyân-ı te’emmüldür benüm

196.

Mef'ûlû Mefâ'ilû Mefâ'ilû Fe'ûlûn

Hezec - - . / . - - . / . - - . / . - -

Verd-i ruhuñ izhâr idicek bûy-ı tebessüm
'Âşık-küş ider gamzeñi nîrû-yı tebessüm

Zahm-ı ser-i engüşti yeter Rüstem-i sabra
Pençe-dih olunca aña bâzû-yı tebessüm

3. Biñ 'âkili ser-mest-i cünûn-ı heves eyler
Nîm-i nigeñ-i şâhid-i dil-cûy-ı tebessüm

Nakd-i dil ü can hâk-rehi olsa sezâdur
Ol hûb-likâda ki ola hûy-ı tebessüm

Hep 'aks-nümâ-yı ruh-ı dildâr-ı emeldür
Ol âyîne-i sîne-i bî-mûy-ı tebessüm

6. Hakkâ ki 'aceb tarz-ı dil-âvîz ile geldi
Gülzâr-ı ruh-ı alûñe şeb-bûy-ı tebessüm

VAHYİ hele bu şi'r-i ter-i dil-keşûñ oldu
Meşşâta-i gül-gûne-keş-i rûy-ı tebessüm

Harfû 'n-Nûn

197.

Mef'ûlû Fâ'ilâtü Mefâ'ilû Fâ'ilûn

Muzâri' - - . / - - . / . - - . / - - .

Ey bûs-ı la'li neşve-i câm-ı şarâb olan
V'ey zülf-i nâzı rûy-ı visâle nikâb olan

Bulsa 'aceb midür şeref-i pâ-y-bûsuñı
Sad hasret ile reh-güzerûñde türâb olan

3. Tâ mahşer olmaya heves-i 'işret-âşnâ
Câm-ı şarâb-ı vasluñ ile neşve-yâb olan

Elbette mest-i bâde-i bezm-i visâl olur
Nâr-ı gam-ı firâk ile bağı kebâb olan

Pür-dâğ-ı şevk-i lutfuñ olursa sezâ şehâ
Mecrûh-ı na'l-i eşheb-i hışm u 'itâb olan

6. 'İşkum mı yâ şarâb mı ya gamze mi yâ an
Hüsn ü cemâlûñe sebep-i âb u tâb olan

İtse NAZÎF-i şûha nazîre 'aceb degül
VAHYİ-i şûh-edâ gibi hâzır cevâb olan

198.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

Oldı can pâ-mâl-i rahş-ı hışm-ı cânân el-aman
Sâyeyeş hâke döşendi cism-i bî-cân el-aman

Gamze-i cellâduñ itdi kalbi vakf-ı bîm-i can
El-amân ey dil-ber-i fettân-ı devrân el-aman

3. Var mı ruhsârıñ görüp meyl itmeyen ey reşk-i hûr
Mâh-ı tâban görse dir ey mihr-i rahşân el-aman

Gamzesi fihrist-i katl-i 'âmdur ol âfetüñ
Hışm-ı çeşmin görse dir Sâm u Nerîmân el-aman

VAHYİ-i zârı zülâl-i vasluña şâyeste kıl
Kalmasun hicrân ile giryân u sûzân el-aman

199.

Mef'ûlü Fâ 'ilâtün Mef'ûlü Fâ 'ilâtün

Muzâri ' - - . / - . - - / - - . / - . - -

Bir verd-i 'işve-bûdur ruhsâr-ı lutf-ı cânân
Her lahza hande-rûdur dîdâr-ı lutf-ı cânân

Peyveste gül küşâde bülbül terennüm-âver
Dûr ez-harîf ü deydür gülzâr-ı lutf-ı cânân

3. Tîğ-ı nigâh-ı nâza biñ cân olur harîdâr
Kâsid-mmetâ' olmaz bâzâr-ı lutf-ı cânân

Bezm-i bahâra gelsün sâgar be-kef karanfûl
Fermân-ı 'işret itdi hunkâr-ı lutf-ı cânân

Târ-ı şeb-i belâda râh-ı safâ güm olmaz
VAHYİ zuhûr iderse envâr-ı lutf-ı cânân

200.

Mefâ 'ilün Fe 'ilâtün Mefâ 'ilün Fe 'ilâtün

Müctes . - . - / . . - - / . - . - / . . - -

Şerer-feşân olalı âteş-i mahabbet-i cânân
Derûnum eyledi me'vâ-yı bîm-i fûrkat-i cânân

Şehîd-i hancer-i hun-h^vâr-ı ye's ider beni 'aklüm
Zuhûr idince göñülde hayâl-i vuslat-ı cânân

3. Fiğan fiğan yine itdüm siyeh sitâreligümden
Dil-i sitem-keşi vakf-ı belâ-yı hasret-i cânân

Safâ-yı râhatiyân-ı cihâna reşki ko ey dil
Yeter yeter saña fikr-i nigâh-ı şefkat-i cânân

Hezâr vech-ile ahsent tab‘-ı VAHYÎ-i zâra
Nedür nedür bu pesendide vâsf-ı tal‘at-ı cânân

201.

Müfâ ‘aletün Müfâ ‘aletün Müfâ ‘aletün Müfâ ‘aletün
Vâfir . . . - / . . . - / . . . - / . . . -

Hemîşe dili melâmet ider ümîd-i dem-i vefâ-yı bütan
Derûna ğarîb hâlet ider ğam-ı heves-i likâ-yı bütan
İderdi recâ-yı ‘işreti dil harîk-i tenûr-ı ‘âlem-i ye’s
Olaydı eger neşât-güsîl fütâdelere cefâ-yı bütan

3. Nice kosun ehl-i dil heves-i recâ-yı visâl-i bî-bedeli
Gönülleri habs-i h‘âhiş ider nigâh-ı vefâ-‘atâ-yı bütan
Belâları nev-be-nev irişür hemîşe derûn-ı bû ‘l-hevese
Cihanda velî fesâne imiş mülâhaza-i safâ-yı bütan
Bu tâze zemîn-i dil-keşümi gören didi VAHYÎ hayret-ile
Zihî ğazel-i latîf [ü] zihî medîha-i dil-küşâ-yı bütan

202.

Fe‘ilâtün Fe‘ilâtün Fe‘ilâtün Fe‘ilün
Remel . . - - / . . - - / . . - - / . . -

Güle sûret mi kodı ‘ârız-ı rengîn-i bütan
Müle raġbet mi kodı la‘l-i güher-çîn-i bütan
Sünbûli eyleye endâhte-i çâh-ı melâl
Böyle kalursa eger kâkûl-i müşġîn-i bütan

3. Pestdür câm-ı Cem ü âyîne-i İskender
Var iken la‘l-i leb ü sîne-i sîmîn-i bütan
Ey gönül eyleme ümmîd-i vefâ dil-berden
‘Âşıkı cevır ile öldürmedür âyîn-i bütan
VAHYÎyâ hancer-i nahvetle ider sîneği çâk
Rüstem olsañ da eger ğamze-i pür-kîn-i bütan

203.

Fe‘ilâtün Fe‘ilâtün Fe‘ilâtün Fe‘ilün
Remel . . - - / . . - - / . . - - / . . -

Ey ser-i zülfîni tarf-ı ruh-ı gül-fâma koyan
Hep budur fikr-i visâlün dil-i nâ-kâma koyan
Ola bahtum gibi huffâş-ı şebistân-ı firâk
Seherî va‘dün olan vuslatı ahşâma koyan

3. Eşk-i hasretle yusun perde-y-i çeşmin sarsun
Bîñ niyâz ile soyup dil-beri hammâma koyan

Haşre dek zerre-keş-i hecrün olursa yeridür
Bûs-ı ruhsârûnı te'hîr ile bayrâma koyan
N'eylesün neşve-i câm-ı Cemi VAHYÎâsâ
Bezm-i fikretde şehâ 'aks-i lebün câma koyan

204.

Mef'ûlü Fâ'ilâtü Mefâ'ilü Fâ'ilün
Muzâri' - - . / - . . . / . - . . / - . -

- Ey yâd-ı la'li mevsim-i şeybi şebâb iden
V'ey fikr-i çeşmi 'âşıkı mest-i harâb iden
Pür-'ukdegî-i zülf-i visâlün mi baht mı
Hemvâre kâkül-i dili pür-pîç ü tâb iden
3. Mest itse bir nighle humârı 'aceb degül
Bûs-ı lebünle 'işret-i bezm-i şarâb iden
Olsun mı cezb-i kalbde muhtâc-ı gâzeger
Dest-i nigâha hûn-ı dilümden hizâb iden
Hep cünbiş-i recâ-güsil-i gamzedür şehâ
VAHYÎ-i dil-şikesteyi pür-ıztırâb iden

205.

Mef'ûlü Fâ'ilâtü Mefâ'ilü Fâ'ilün
Muzâri' - - . / - . . . / . - . . / - . -

- Ey derd-i 'ışkı eşkümi bahr-i 'amîk iden
V'ey fikr-i la'li çeşümü reşk-i 'akîk iden
Baht-ı siyâhumı güzelüm bâd-ı âhumı
Ümmîd-i vaslı hûn-ı dil içre garîk iden
3. Âb-ı hayât-ı vuslata irse 'aceb midür
Râh-ı talebde Hızr-ı hulûsı refîk iden
Bulmaz bu âsyâbda bir dâne-i murâd
Bahtı medâr olursa da fikr-i dakîk iden
Bu nev-zemînüme bula tanzîre iktidâr
VAHYÎ gibi kelâmını câm-ı rahîk iden

206.

Mef'ûlü Fâ'ilâtü Mefâ'ilü Fâ'ilün
Muzâri' - - . / - . . . / . - . . / - . -

Ey çeşm-i fikri dîdesi vakf-ı humâr iden
V'ey zülf-i 'aklı turreleri târmâr iden
'Arz eyle nahl-i nâzı tezervâne kıl hırâm
Kimdür bilinsün ehl-i dili bî-karâr iden

3. Çeşmün mi gamze mi ruh-ı alün mi turre mi
Ey şâh-ı 'işve böyle seni şîvekâr iden
Bir vakt olur ki mahrem-i bezm-i nevâl ider
Ümmîd-i vaslî 'âşıkına gam-güsâr iden
Şahs-ı humâr olursa da tâ haşr mest ola
Yâd-ı lebünle nûş-ı mey-i hoş-güvâr iden
6. Zülf ü 'izârın eylemiş evvel bahâr-ı hüsn
Berg-i hazân idüp beni zerd ü nizâr iden
VAHYÎ-i tâze-lehcenün aklar kemâlini
Bu şî'ri zîver-i nazar-ı i'tibâr iden

207.

Mefâ 'ilün Mefâ 'ilün Mefâ 'ilün Mefâ 'ilün
Hezec . - - - / . - - - / . - - - / . - - -

- Dil-i şûrîde mehcûr oldu yâr-i nâzenîninden
Zemîn ü âsmânı n'ola inçletse enîninden
Gül-i mihr ü mehi harc-ı gül-âb-ı hayret eylerdi
O meh-rû itmese rû-pûş hatt-ı 'anberîninden
3. Ne şûh-ı 'işve-perverdûr ki kasd itse cefâsından
Vefâ fehm itdürür 'âşıklara çîn-i cebîninden
Görüp mir'ât-ı rûyın tûfî-i şîrin-makâl olsun
Alanlar harf-i vuslat la'l-i nâb-ı sükkerîninden
Budur ümmîd tahsîn ide ol şûh-ı suhan-pîrâ
Bu şî'ri gûş edince VAHYÎ-i sihr-âferîninden

208.

Fe 'ilâtün Fe 'ilâtün Fe 'ilâtün Fe 'ilün
Remel . . - - / . . - - / . . - - / . . -

- Âftâba bakılır mı ruh-ı dil-ber var iken
Mâha kim râğbet ider mihr-i münevver var iken
Heves-i 'ûd u gül-âb olmaya mı vakf-ı ferâğ
'Ârızunda 'arak u zülf-i mu'anber var iken
3. Kalb-i 'uşşâk degül belki ecel havf eyler
Dest-i dildâr-ı kazâ-gamzede hancer var iken
Murğ-ı dil lâne-güzîn-i ruhuñ olmak güçdür
Anda çeşmün gibi şeh-bâz-ı ecel-per var iken
Bakmazuz her büt-i 'Îsî-dem-i deyr-i hüsne
Sanemâ sencileyin rûh-ı musavver var iken

6. Gayre şâyeste mi vâsf-ı dehenüñ insâf it
VAHYİ-i nâdire-perdâz-ı suhanver var iken

209.

Mef'ûlû Fâ 'ilâtü Mefâ 'ilü Fâ 'ilün
Muzâri' - - . / - . - . / . - - . / - . -

- Meyl itmez âftâba ruh-ı enverin gören
Bakmaz şarâb-ı Kevsere la'l-i terin gören
Ser-mâye-i hayâtı ider müjde-i helâk
Destinde ol kazâ-nigehüñ hancerin gören
3. Âyîne içre mihr-i küsûf-âşnâ sanur
Deryâda ol mehüñ ruh-ı zülf-âverin gören
Rehn-i nezâregâh-ı ferâğ eylese sezâ
Sünbûsitân-ı 'âlemi kâküllerin gören
Tâ mahşer itmeye heves-i neşve-i neşât
Sahbâ-yı bezm-i vuslatınun sâğarın gören
6. Bîñ cân ile 'aceb mi olursa helâk dost
Âğyâr içinde dil-ber-i meh-peykerin gören
VAHYİ-i zârün eylesün idrâk rütbesin
Bu nev-zemîn-i pâk-i fûsun-perverin gören

210.

Fâ 'ilâtün Fâ 'ilâtün Fâ 'ilâtün Fâ 'ilün
Remel - . - - / - . - - / - . - - / - . -

- Zülfini fikr eylesün şeb-bûy u reyhân isteyen
La'lini endîşe kılsun âb-ı hayvân isteyen
Hâl-i rûy-ı al-i gîsû-perverin seyr eylesün
Sûziş-i pervâne-i şem'-i şebistân isteyen
3. 'Ârızın görsün iden gülzâr-ı cennet ârzû
Âhumı gûş eylesün bûlbûlden efgân isteyen
Tal'at-ı hûy-kerde-i yâri temâşâ eylesün
Verd ü şeb-nem âb u âteş dürr ü mercân isteyen
Leyle-i bedr-i vas[ı]lda şevk-ile ol gül-ruhı
Hâleveş âğuşa çeksün derde dermân isteyen
6. Nakd-i cân u dille varsun kûyına ol âfetün
Dil-rubâ-yı şûh-meşreb pâk-dâmân isteyen
Yâre can benden nigâh-ı merhamet senden dime
Sulha virsün mi rızâ her demde bîñ kan isteyen

- Meclisinde fikr-i hattıyla çekersem âh-ı serd
Rûyını görsün kûsûf-ı mihr-i rahşân isteyen
9. Bir nigâh-ı lutfına biñ cân kurbân eylesün
VAHYÎyâ ‘âlemde zevk-i vasl-ı cânân isteyen

211.

Mefâ‘ilün Fe‘ilâtün Mefâ‘ilün Fe‘ilün
Müctes . - . - / . - . - / . - . - / . - . -

- Gel ey ümîd-i dem-i vaslî peyk-i ceşş-i cünun
Nezâre-i der-i fûrkatle oldı dîde zebun
- Hayâl-i ‘ârız-ı alûñ fikir-keş-i ruh-ı meh
Tasavvur-ı nigeñ tûtiyâ-yı çeşm-i fûsun
3. Reh-i talebde olurduk fûtâde-i çeñ-i ye’s
Fîrîb-i ğamze-i şûh olmayaydı râh-nûmun
- Düşerse bûs-ı leb-i lutfî fikrî ‘uşşâka
Kesâd-ġîr ola bâzâr-ı bâde-i gül-gun
- Cihanda VAHYÎ gibi reng-i kâma düş olmaz
Giyerse şâhid-i bahtı kabâ-yı bûkalemun

212.

Mef‘ûlü Fâ‘ilâtü Mefâ‘ilü Fâ‘ilün
Muzâri‘ - - . / - . - . / . - . - / - . -

- Âh eyle dem-be-dem eser olmazsa olmasun
‘Arz it niyâzı kârger olmazsa olmasun
- Bûs it dem-i visâlde la‘l ü ‘izârını
Meydân-ı ‘ışkda hüner olmazsa olmasun
3. Deryâ-yı ‘ışka fûlk-i dil-i zârı kıl revan
Vuslat diyârına güzer olmazsa olmasun
- Sâf eyle jeng-i şekveden âyîne-i dili
Ol şâh-ı hüsnden nazar olmazsa olmasun
- Bî-bûs-ı la‘l ider dili tûtî ‘izâr-ı yâr
Mir’ât-ı sâf var şeker olmazsa olmasun
6. Bir kerre ‘âşıkunla ne var ‘azm-i gülşen it
Cânâ rakîb-i bed-güher olmazsa olmasun
- Aldum o mâhı hâle-i âġuşuma bu şeb
Tâ haşr bir dahı seher olmazsa olmasun
- Saġ olsun ‘ârız u kad-i mevzûn-ı dil-rubâ
Gülşende serv [ü] verd-i ter olmazsa olmasun

9. VAHYÎ bu nev-zemîn degül kâbil-i nazîr
A‘dâ yanında mu‘teber olmazsa olmasun

213.

Fâ‘ilâtün Fâ‘ilâtün Fâ‘ilâtün Fâ‘ilün
Remel - . - - / - . - - / - . - - / - . -

- ‘Âşıkuz ol şûha ağyâr-ülfet olsun olmasun
‘Andelîbüz ol güle hâr-ülfet olsun olmasun
Bu dil-i âvâre vakf-ı hüzn-i mâder-zâddur
Ol perî-ruhsâr âzâr-ülfet olsun olmasun
3. Ey dil-i şeydâ dahı mest-i mey-i hûş olmadın
‘Arz-ı hâl it yâre her-bâr ülfet olsun olmasun
Rûyına dil-besteyüz gîsûsı olmuş olmamış
Tâlib-i gencîneyüz mâr-ülfet olsun olmasun
Kâğıd-ı kalbüm hat-ı ümmîd-i vasl itmez kabûl
Nazra-i lutfuñla âhâr-ülfet olsun olmasun
6. H‘âbda görmez visâl-i dil-beri bu baht ile
Kalb-i zârum çeşm-i bîdâr-ülfet olsun olmasun
Bî-nazîr olmakdadur güftâr-ı pâkûñ VAHYÎyâ
Tab‘-ı şûhuñ vasf-ı dildâr-ülfet olsun olmasun

214.

Mefâ‘ilün Fe‘ilâtün Mefâ‘ilün Fe‘ilün
Müctes . . . - / . . - - / . . - - / . . -

- Şarâb-ı bezm-i elem mâtem olmasun n’olsun
Sirâc-ı meclis-i hasret ğam olmasun n’olsun
Sipâh-ı sabr-ı dile bâ‘is-i perîşânî
Hayâl-i zülf-i ham-ender-ham olmasun n’olsun
3. Derûn-ı ‘âşık-ı şeydâda derd-i mâder-zâd
‘Îlâc-sâzı o ‘Îsî-dem olmasun n’olsun
Göñülde zâhir olan verd-i ye’s-i vuslatuñ
Sirişk dâneleri şeb-nem olmasun n’olsun
Humâr-ı dûrî-i la‘lûñle bâde kan ağlar
Ya dîde-i leb-i can pür-nem olmasun n’olsun
6. Hayâl-i çeşm-i tesellâ-nümâsı cânânûñ
Dil-i figârumuza merhem olmasun n’olsun
Hemîşe VAHYÎ-i tenhâ-nişîn-i künc-i firâk
Ümîd-i vasluñ ile hem-dem olmasun n’olsun

215.

*Müfte 'ilün Fâ 'ilün Müfte 'ilün Fâ '
Münserih - . . - / - . - / - . . - / -*

Çün gül-i bî-hâr yok hâr ile olsun
Kenz de bî-mâr yok mâr ile olsun

Yâr heman dünyede bî-keder olsun
Gâh bizümle geh ağıâr ile olsun

3. Rûşen olur kalbümüz zevk ü kederle
Nûr ile olmaz ise nâr ile olsun

Gam yimezem cevrlere eylese bî-had
Tek dil-i şûrîdemüz yâr ile olsun

‘Âşık-ı dîdârûña bir nazar eyle
Lutf-ıla olmazsa âzâr ile olsun

216.

*Mefâ 'ilün Fe 'ilâtün Mefâ 'ilün Fe 'ilün
Müctes . . - / . . - - / . . - / . . -*

Nikâb-ı zülfünî aç rûyuña nigâh olsun
Ko reşkden ruh-ı mihr-i felek siyâh olsun

Recâ-yı neşve-i câm-ı Cem eylemem sâkî
Heman baña leb-i dildâr bûsegâh olsun

3. O gonçenün gülüp açıldığı baña besdür
Hezâr-ı zâr-ı dilün kârı âh u vâh olsun

Nişân-ı nâvek-i ta‘n olmadan kaçır mı diyen
Harîm-i gûşe-i ebrûsı dil-penâh olsun

Ben eyleyem o mehi zîb-i hâle-i âğuş
Hasûd necm-şumâr-ı şebângâh olsun

6. Gönül gönül seni medhûş-ı câm-ı vasl iderem
Rakîb tâbe-ecel baña kîne-h^vâh olsun

Bu nev-zemîni şeref-bahş-ı levh-i izhâr it
Ki hâl-i ehl-i hased VAHYÎyâ tebâh olsun

217.

*Mef'ûlü Mefâ 'ilü Mefâ 'ilü Fe 'ülün
Hezec - . . / . . - . / . . - . / . . -*

Rûyî benüm olsun gül-i ra‘nâ senün olsun
Gîsûsî benüm sünbül-i bûyâ senün olsun

Zâhid yetişür baña temâşâ-yı ruh-ı dost
Gülşende olan seyr ü temâşâ senün olsun

3. Ey rind-i harâbât baña lebleri besdür
Bezm-i Cem ile sâgar-ı sahbâ senüñ olsun
Bir gûşe-i çeşm ile nigâhın nazar eyle
Ey çarh aman yek-sere dünyâ senüñ olsun
Feth olmadı ‘uşşâka mu‘ammâ-yı visâlün
Gel şöyle şehâ VAHYÎ-i gûyâ senüñ olsun

218.

Mef'ûlü Fâ 'ilâtü Mefâ 'ilü Fâ 'ilün
Muzâri' - - . / - . . / . - . / - . -

- Hoşdur gamı vefâları gelmezse gelmesün
Derdi yeter devâları gelmezse gelmesün
Bir şâh-ı ‘işve-ceyşün esîr-i hayâliyüz
Hışmı gelür vefâları gelmezse gelmesün
3. Erbâb-ı bezme müjde-i sahbâ yeter gönül
Sâkî-i meh-likâları gelmezse gelmesün
Agyâr ile safâda o dildâr-ı pür-cefâ
Derd ü gam-âşnâları gelmezse gelmesün
VAHYÎ o şem‘-i hüsn-ile germ-ülfet ol yüri
‘Uşşâk-ı bî-nevâları gelmezse gelmesün

Harfû 'l-Vâv

219.

Müfte 'ilün Müfte 'ilün Fâ 'ilün
Serî' - . . - / - . . - / - . -

- Verd-i ruhuñdan idelüm kesb-i bû
Eylemedin leşger-i hicran gülû
Deşt-i gamı geşt ü güzâr eyledük
Vuslatuñ ümmîdi ile sû-be-sû
3. Def‘-i gama bâde gerekmez yeter
Hûn-ı dil-i zâr ile pür bir kedû
Hasret-i yâr ile sirişküm gezer
Zîbak-ı devvâr gibi kû-be-kû
Bir nigeñ-i lutf-ıla şâd it dili
Şâhid-i bahtı görelüm hande-rû
6. Bezmümüze sâkî-i lutfuñ gelür
Câm bir elde bir elinde sebû
Vuslat-ı yâre ire dil VAHYÎyâ
Râh-ı talebde iderek cüst-cû

220.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

- Seyr-i rûy-ı yâr için 'azm eyledi gülzâra su
Berg-i gülle iktifâ itdi velî bî-çâre su
- Reşkdâr-ı hâk-pây-ı dil-rubâdur var-ısa
Gitdi seyl-âb-ı sirişküm gibi kûy-ı yâre su
3. Âteş-i hicrân ile hâkister olurdu eger
Virmeseydi yâd-ı la'lün bu dil-i bîmâra su
- 'Aks-i rûyuñ zann idüp mâhı der-âğuş eylemiş
Var-ısa dîvâne olmuşdur şehâ âvâre su
- Cûy sanmañ intizâr-ı ru'yet-i cânândan
Zânû-yı şimşâda indi gülsitanda kara su
6. Fıkr-i kaddünle n'ola rûyuñda olsam eşk-rîz
Pây-ı serve hûbdur neşr itseler hemvâre su
- Hâk-pây it cism-i âteş-tâbuñ ey VAHYÎ ki tâ
Rûzgâr ile seni îsâl ide dîdâra su

221.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

- Seyr olunmaz tal'at-ı pür-âb u tâb-ı ârzû
Var-ısa baht-ı siyâh oldu nikâb-ı ârzû
- Söyle ey sâkî-i kâm-ı ehl-i 'ışk olan felek
Var mıdur 'âlemde bir mest-i harâb-ı ârzû
3. Bezm-i gamda biz hele kem-katresin nûş itmedük
Var-ısa sad pâredür câm-ı şarâb-ı ârzû
- İtme meyl-i hall-i eşkâl-i temennâ ey gönül
Çünkü zîb-i nâr-ı ye's oldu kitâb-ı ârzû
- Terk-i ümmîd it dilâ âzâde ol VAHYÎ gibi
Görmedük âşüftelerde feyz-yâb-ı ârzû

222.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

- İdeli meyl-i mey-i vuslat sebû-yı ârzû
Rehn-i zehr-âb-ı firâk oldu kedû-yı ârzû
- Bî-hicâb-ı zülf göstereñ cemâlün bir nefes
'Âlemi vîrân ideydi hây u hûy-ı ârzû

3. Ârzû güm-geşte-i fikr-i hat-ı cânândur
İdemem ey dil senünle cüst-cûy-ı ârzû
Oldı san‘atla ta‘alluk-yâb-ı vasl-ı dil-rubâ
El-hased kuvvetdedür baht-ı nigû-yı ârzû
Bu ne hikmetdür gülistânın ider âteşsitan
Feyz-pâş oldukda bâğ-ı kalbe cûy-ı ârzû
6. Ol siyeh-bahtam ki ser-tâ-ser leb olsam eylemem
Devlet-i ye’sümde meyl-i bûs-ı rûy-ı ârzû
Ârzû-yı nâ-ümîdî eyle gel VAHYÎ gibi
Ey gönül tâ key hevâ-yı güft-gûy-ı ârzû

Harfü ‘l-Hâ’

223.

Fâ ‘ilâtün Fâ ‘ilâtün Fâ ‘ilâtün Fâ ‘ilün
Remel - . - - / - . - - / - . - - / - . -

- Hırz-ı can genc-i nihan reşk-i cihandur kaplıca
Dâ’imâ manzûr-ı ebnâ-yı zamandur kaplıca
Germ ü serd-i dehri çok görmiş bir ‘ârif pîrdür
Mâ-cerâsın söylese âb-ı revandur kaplıca
3. Zâl-i çarhı havza ser-bâzîçe-i etfâl ider
Böyle hem-meşreb-kün-i pîr ü cüvandur kaplıca
Zâhidi ‘uşşâk ile yek-reng ider hâssiyeti
Germ ü serde şübhesiz ülfet-resandur kaplıca
Âsmânun mihr ü mâh u encümin hayrân ider
Ol zaman kim cilvegâh-ı dil-berandur kaplıca
6. Zîver-i âğuş-ı havz itdükçe her meh-pâreyi
Havzı hâle kendi gûyâ âsmandur kaplıca
VAHYÎ-i mu‘ciz-beyâna kendüyi vasf itdürür
Gûyiyâ bir nev-cüvân-ı dil-sitandur kaplıca

224.

Mef‘ûlû Fâ ‘ilâtü Mefâ ‘ilü Fâ ‘ilün
Muzâri‘ - - . / - . - . / - . - . / - . -

- Bakmaz lebün gören kadeh-i gevher olsa da
Sâkîsi âftâb meyi Kevser olsa da
Düşmez bu baht ile baña bir kez nigâh-ı hışm
Ser-tâbe-pây ‘âlem eger dil-ber olsa da
3. Bâz-ı hayâlüm olmaya nâhun-zen-i visâl
Endîşe-intikâl ü melek-şeh-per olsa da

- Olmaz tamâm nâle-i mâtem-güzîn-i hecr
Erbâb-ı derd-i yek-sere şîvenger olsa da
Olmaya çâk-i ceyb-i safâ bahye-âşnâ
Müjgân-ı şa‘r sûzen-i nişter-fer olsa da
6. Dil böyle vakf-ı mihnet-i eyyâm iken visâl
Olmaz velî ne fâ‘ide olur ger olsa da
Bu nev-zemîne olmaya mânend VAHYÎyâ
Mecmû‘a-i cihan tolı şî‘r-i ter olsa da

225.

Fâ‘ilâtün Fâ‘ilâtün Fâ‘ilâtün Fâ‘ilün

Remel - . - - / - . - - / - . - - / - . -

- Ol ‘arak kim devr ider taraf-ı ruh-ı gül-fâmda
Lü‘lû-yi şehvârdur gûyâ mücevher câmda
Bend olup dil ‘ışk-ı ruhsârıñla târ-ı zülfüne
Muztarib bir ‘andelîb-i bî-nevâdur dâmda
3. İnkisâf-ı nısf-ı mihr-i ‘âlem-ârâ isteyen
Sînesin seyr eylesün ol âfetün hammâmda
Geh cemâlün gâh zülf-i ‘anberînün yâd idüp
Âh u efgân eylerüz hasretle subh u şâmda
Bezm-i vasluñda dil itse n’ola meyl-i bûs-ı rûy
Vaz‘-ı güstâhî-i tıflan ‘afv olur bayrâmda
6. Sâyeveş düş pâyına al dâmen-i hâşâkvâr
‘Âr u nâmûs olmaz ey dil ‘âşık-ı bed-nâmda
Nâvek-i gamzen yeter geçdük nigâh-ı lutfdan
Yâdgârıñ vardur ey meh VAHYÎ-i nâ-kâmda

226.

Gazel-i Bî-Nukat

Mef‘ûlû Fâ‘ilâtü Mefâ‘ilü Fâ‘ilün

Muzâri‘ - - . / - . - . / - . - . / - . -

- Ol mürde dil ki vâsıl-ı va‘d-i visâl ola
Merg-âver olmasa meger ol ehl-i hâl ola
Dildâr olursa mâha mu‘âdil gerek dilâ
Hem dil virilmemek aña emr-i muhâl ola
3. Mahsûd-ı mihr olursa revâdur o al-rû
Kim dûd-ı âh hâle o mâh-ı kemâl ola
Her geh revâ olursa hased-kerde-i melek
Ol sâde-rû ki mevrîd-i sihr-i helâl ola

Her dem-i vasl su'âl ol ol mâha VAHYÎyâ
Kilkün müdâm ke's-i müdâm-ı me'âl ola

227.

Fâ'ilâtün Fâ'ilâtün Fâ'ilâtün Fâ'ilün
Remel - . - - / - . - - / - . - - / - . -

Dil ki câm-ı h'âhiş-i baht-ı siyeh ser-pûş ola
Bezm-i vuslatdan ümîd olmaz ki sahbâ-nûş ola
'Âşıkâne cânı pây-endâz idersem çok degül
Ol perî yolında kim şâl-ı vefâ ber-dûş ola

3. Huccet-i isfendegî-i hâl-i ehl-i 'ışkdur
Bülbülan pür-cûş olup pervânegan hâmûş ola
Hisse-yâb-ı derd-nûş-ı pür-cünûn-ı 'ışk olan
Bezm-i 'âlemde ne mümkün nîm-mest-i hûş ola
Şevkden fark-ı şeb ü rûz itmese şâyestedür
Ber-zükâ tâlî' çün ol mâh ile hem-âğuş ola
6. Ruhların fıkır eyleyüp hasretle olsam girye-pâş
Haşre dek rûy-ı zemin deryâ gibi pür-cûş ola
Feyz-yâb-ı yâd-ı la'l-i yâr olup VAHYÎ gibi
Bir gâzel tarh eyledüm kim gûş iden medhûş ola

228.

Müfte'ilün Fâ'ilün Müfte'ilün Fâ'ilün
Münserih - . . - / - . - / - . . - / - . -

Şâhid-i dil rûyına gâliye-i gam koma
Gonçe-i zevk üstine jâle-i mâtem koma
Revzen-i eltâfuñı eyle küşâd ey perî
Pîle-i hûn-âver-i zahmumı der-hem koma

3. Deşne-i merg-âşnâ oldu fetîl-i şifâ
Dâğ-ı dil-i zâruma bîhüde merhem koma
Cevrde itme şerîk baña rakîbi şehâ
Cennet-i bezm-i gama dîv ile Âdem koma
Va'd-i visâlün nedîm eyleyüp ey meh-likâ
VAHYÎ-i gam-perveri hecr ile hem-dem koma

229.

Mef'ûlû Fâ'ilâtü Mefâ'ilü Fâ'ilün
Muzâri' - . . - / - . . - / - . . - / - . -

Bir vasl-ı dil-ber olsa soñı fûrkat olmasa
Bir gonçe-i ter olsa ki hâr-ülfet olmasa

Her sifle-bîne ‘arz-ı cemâl itmese nigâr
Bir mihr-i hâver olsa ki bî-minnet olmasa

3. Zahmuñla şâd olur dil-i mihnet-keşüm velî
Sînemde hancer olsa saña zahmet olmasa

Zevk-i visâlün âhiri hecr olmasa şehâ
Âdem tüvanger olsa sonı nekbet olmasa

VAHYÎ cihanda bu dil-i mihnet-keşîdeye
Bir mâh-peyker olsa ki bî-şefkat olmasa

230.

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

Kalb-i zârum zevk-yâb-ı vasl-ı yâr itmek nice
Hâleveş ol mâh-ı tâbânı kenâr itmek nice

Yâr merhem-sâz-ı zahm-ı sîne-i ağıyâr iken
Dâ’imâ cism-i nizârum pür-figâr itmek nice

3. Deşt-i hasretde kemend-i âh-ı âteş-zâd ile
Sen gözi âhûyı san’atla şikâr itmek nice
‘Akd olunmaz silk-i evsâfa fûsun-sâzî-i yâr
Mest iken çeşm-i siyâhın pür-humâr itmek nice

Bûse-çînî-i leb-i dildâr ile bî-vehm ü bâk
Mevsim-i gül-nârda seyr-i Hisâr itmek nice

6. Bir nigâh-ı şefkat-âlûd-ı vefâ-âmîz ile
VAHYÎ-i bîmârı vakf-ı intizâr itmek nice
Kâbil iken FEYZîyâ her vech-ile saña cevâb
Kûçe-i sabr u sükûnı ihtiyâr itmek nice

231.

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

Şevk-i dille ‘işret itdük sahn-ı Kâğıd-hânede
Bezmi reşk-i cennet itdük sahn-ı Kâğıd-hânede

Bülbül-i zâr-ı dil-i şûhı be-kûrî-i rakîb
Ol güle hem-sohbet itdük sahn-ı Kâğıd-hânede

3. Sâgar-ı vuslat be-dest ü câm-ı bâde leb-be-leb
Yâr ile hoş ülfet itdük sahn-ı Kâğıd-hânede
Bâde bûs u câm rûy-ı al ü sâkî çeşm-i dost
Tarh-ı bezm-i vuslat itdük sahn-ı Kâğıd-hânede

VAHYÎ-i hoş-tab‘ ile bir şi‘r inşâd eyleyüp
Halkı vakf-ı hayret itdük sahn-ı Kâğıd-hânede

232.

Fe‘ilâtün Fe‘ilâtün Fe‘ilâtün Fe‘ilün
Remel . . - - / . . - - / . . - - / . . -

- Bize rahm eylemede yâr ider ‘izzet ‘îde
Biz de itsek n’ola biñ cân ile rağbet ‘îde
Ol mehi hâle ber-âverde görüp fehm itdüm
Ki düşermiş geh ü geh mevsim-i vuslat ‘îde
3. Meclis-i meyde bu şeb haylî münâsib düşdi
Mey saña sen baña ben ‘işrete ‘işret ‘îde
‘Arz-ı dîdâr idüp âşüftelere gonçe-leban
Nev-be-nev virmededür revnak u zînet ‘îde
Mâh-rûlar o kadar oldı letâfet-bahşâ
Ki didi ehl-i nazar mâh-ı letâfet ‘îde
6. Rûze-i hecr gidüp ‘îd-i visâl olmaz mı
Hasretüz ey şeh-i bî-rahm ü mürüvvet ‘îde
VAHYÎ-i nâdire-güftâr berây-ı tebrîk
Eyledi nesr-i le’âlî-i fesâhat ‘îde

233.

Mefâ‘ilün Mefâ‘ilün Mefâ‘ilün Mefâ‘ilün
Hezec . - - - / . - - - / . - - - / . - - -

- Şeb-i târîk-i hecre mâh mihr-i yârdur dilde
Çerâğ-ı bezm-i ğam fîkr-i ruh-ı dildârdur dilde
Ümîd-i bûs-ı ruhsâr-ı gül-i vasluñla sultânum
Hemîşe ‘andelîb-i derd hicran-zârdur dilde
3. İrişmez dest-i sâkî-i müjem peymâne-i h^vâba
Hemîn etfâl-i feryâd u fîğan bîdârdur dilde
Çekerdi leşger-i hicrâna tîğın Rüstemâsâ lîk
Şeh-i endîşe-i vuslat katı bîmârdur dilde
Harîdâr-ı mmetâ‘-ı vuslat-ı dildâr olan VAHYÎ
Alup can nakdini gelsün bugün bâzârdur dilde

234.

Nazîre-i Antakî-zâde

Fe‘ilâtün Fe‘ilâtün Fe‘ilâtün Fe‘ilün

Remel . . . - / . . . - / . . . - / . . . -

Ruh-ı dil-ber var iken zülf-i semen-sâsı ile
Gülşene meyl idemem sünbül-i bûyâsı ile

Başa endîşe-i çeşm ü leb-i dil-ber besdür
İstemem bezm-i Cemi câm-ı musaffâsı ile

3. Bilmezüz n’idüğün ‘âlemde dahı zevk-i visâl
Kâni‘üz biz o mehûn va‘de-i ferdâsı ile

Vakf-ı hecr olsun o ‘âşık ki dem-i vuslatda
İde âzürde dil-ârâyı temennâsı ile

Eyleyüp FEYZÎ-i hoş-gûya nazîre VAHYÎ
Oldı reşk-i bülegâ lehce-i zîbâsı ile

235.

Mefâ‘ilün Fe‘ilâtün Mefâ‘ilün Fe‘ilün

Müctes . . . - / . . . - / . . . - / . . . -

Şehâ nezâre-i ‘uşşâkdan hicâb itme
Cemâl-i pâkûnî ‘arz eyle ictinâb itme

Belâ-yı fûrkatüğe nev-fütâde bî-dilden
Recâ-yı vuslatuñı gûş idüp ‘itâb itme

3. Dem-i visâlde mu‘tâd-ı lutf olan diller
Tahammül eylemeye hışm ile hitâb itme

Felek de hüsn-i meh-i hâledârı pest eyler
Siyâh zülfünî ruhsârûña nikâb itme

Firâk-ı yâr dil-i zâra VAHYÎyâ besdür
Ümîd-i vasl ile bîhûde ıztırâb itme

236.

Fe‘ilâtün Fe‘ilâtün Fe‘ilâtün Fe‘ilün

Remel . . . - / . . . - / . . . - / . . . -

‘Işk tahsîl idelüm dünyede hem-dem yerine
Tal‘atun seyr idelüm gülşen-i hurrem yerine

Dehen-i hande-kün-i yâre dönerdi gonçe
Dür-i nâ-süfte nihân eylese şeb-nem yerine

3. Müje vü kâkûl ü ebrûsı olaydı mihrün
Meyl iderdi gönül ol rûh-ı mücessem yerine

O tabîb eyler ise baña devâ-perdâzî
Hancer-i tîzi yeter yâreme merhem yerine
Bî-nazîr olmağ-ıla sâkî-i meh-peykerümüz
‘Aksini seyr iderüz câmda tev’em yerine

6. Bizi redd eyledün ağıâr varur meclisüñe
Ey perî dîv koduñ cennete âdem yerine
VAHYîyâ itmez isem n’ola dem-â-dem girye
Zahm-ı hun-pâşî kodum dîde-i pür-nem yerine

237.

Müfte ‘ilün Mefâ ‘ilün Müfte ‘ilün Mefâ ‘ilün
Recez - . . - / . . - / . . - / . . -

Düşmese ger cemâlünüñ sâyesi kâkûl üstine
Eylemez idi bülbülan hîç fîğan gül üstine
Hâlünü içinde mû degül kâtib-i lem-yezel komış
Fenn-i füsûmı büsbütün dâne-i fülful üstine

3. Âb-ı hayât-ı sîneden itdi lebünü beni ganî
Ola mı nûş-ı âb hîç iki kadeh mül üstine
Lâyık-ı tab‘-ı gül degül şâh-ı nebât iken bu kim
Nâle-i zâğî gûş ide nağme-i bülbül üstine
Saña niyâzumuz bu ey şûh heman ki VAHYîye
Kûyunu içinde bakmayup geçme tecâhül üstine

238.

Fâ ‘ilâtün Fâ ‘ilâtün Fâ ‘ilâtün Fâ ‘ilün
Remel - . . - / . . - / . . - / . . -

Handesin fikr it dür-i nâ-yâb gelsün çeşmüñe
La‘lini endîşe kıl hûn-âb gelsün çeşmüñe
Bezm-i fûrkatde ‘izâr u cebhesin yâd eyleyüp
Gâh hurşîd ü gehî meh-tâb gelsün çeşmüñe

3. Bak kefi sâkîde câm-ı ergavân-ı bâdeye
‘Ârız-ı gül-gûn-ı âteş-tâb gelsün çeşmüñe
H^vâbgâh-ı lutf-ı dildâr-âşnâ ol gâh u geh
Bir nefes ey ye’s-i vuslat h^vâb gelsün çeşmüñe
Künc-i gamda VAHYî-i âvârenünüñ gör hâlini
Ey şeh-i şefkat-nigâhum âb gelsün çeşmüñe

239.

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

Göñül sûzân-ı nâr-ı 'ışk o gül-ruhsâr nâ-puhte
Ne hâletdür ki ola âb puhte nâr nâ-puhte

İder germî-i câm-ı fahr ile taklîd-i la'l-i yâr
N'ola yâd olsa bezm-i 'işvede gül-nâr nâ-puhte

3. Gül-i gülzâr olurdu gül-şeker sûz-ı nevâsından
Egerçi olmayaydı 'andelîb-i zâr nâ-puhte

Yakarken sûz-ı âhum yârî-i 'ışk ile kühsârı
Ne sırdur itmeyüp te'sîr ola dildâr nâ-puhte

Gehî mihr-i hayâlün pertev-endâz-ı fesâhat kıl
Suhan bâğında VAHYÎ kalmasun esmâr nâ-puhte

240.

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

Meyl idersen eyile bir hurşîd -tal'at şeb-reve
Kim felek tercîh ide ebrûsını mâh-ı neve

Gûş tutma bezm-i vuslatda rakîbün ta'nına
Hâle-i âğuşa al ol mâhı bakma 'av-'ava

3. Dime mihr-i evc-i hüsn itmez siyeh necmâna meyl
İmtihân it tâlî'ün bir mâh-ruhsârı seve

Halka-i bâb itdi çeşmüm halkasın bir va'd ile
İntizârum def' ide lutf ide gelmekde eve

Hâl-i müşgin-mû ki hüsnün hırmeninden habbedür
Seyr idenler necm-i gîsûdârı almaz bir ceve

6. Yâd-ı la'lün câna bir câm-ı halâvet sundı kim
Sunmamışdur 'ışk-ı Şîrîn anı kalb-i Husreve

Gam yimez fersûde kalsa çün ketan tâ rûz-ı haşr
Bir şeb olan pîrehen ol sîne-i meh-perteve

Bir 'Acem fettânına oldu rubûde gönlümüz
İltifât itmez biyâyâ gûş tutmaz bişneve

9. Âdem ol dildâr-ı gendüm-günü sevsün kim bihişt
Rûyına nisbetle beñzer bûm-ı pür-hâr u heve

Gâzî Sultan Mustafâya VAHYÎyâ budur du'âm
Kim kemîne bendesi mahsûd ola Keyhusreve

241.

Fe‘ilâtün Fe‘ilâtün Fe‘ilâtün Fe‘ilün
Remel . . . - / . . . - / . . . - / . . . -

- Olalı lâzime-i meclis-i hûban kahve
Oldı reşk-efken-i câm-ı mey-i rahşan kahve
İktibâs eyleyeli pertev-i mihr-i ruhuñı
Şu‘le-pâşîde olur mâh ile yeksan kahve
3. Cilvegâh idüp anı ‘aks-i cemâl-i dildâr
Kıldı âyîne-i İskenderi hayran kahve
Yârî-i Hızr ile zulmetde bulur âb-ı hayât
Ol ki ‘izzetle vire destine cânan kahve
Eser-i feyz-i cemâlünle idüp kesb-i kemâl
Oldı bir şûh-ı siyeh-çerde-i pür-an kahve
6. Yandı yakıldı gubâr oldı reh-i ‘ışkuñda
N’ola bûs-ı lebûñe olsa da şâyan kahve
La‘l-i dildâr ile bir lahzada germ-ülfet olur
Mey-i nâb üzre bulursa n’ola ruchan kahve
Nakd-i cân u dili VAHYîveş ider kahve-bahâ
Nûş iden yârûñ elinden iki fincan kahve

242.

Mef‘ûlü Mefâ‘ilü Mefâ‘ilü Fe‘ûlün
Hezec - - . / . - - . / . - - . / . - -

- Zîb-i ruhuñ oldukda şehâ kâkül-i şîve
Bâğ-ı nazarum eyledi bir sünbül-i şîve
Reftârûñ ile olmasa bir ân müşerref
Peyveste olur ‘arşa heman ğulğul-i şîve
3. ‘Âlemleri sûzân ide te’sîr-i fîğânı
Rûyuñdan eger olsa cüdâ bülbül-i şîve
Ber-bâd olur âdemde olan sabr u tahammül
Gamzeñ olıcak mest-i harâb-ı mül-i şîve
VAHYî o gülistâna hezâr oldı gönül kim
Bî-hâr nümâyân olur anda gül-i şîve

243.

Fâ‘ilâtün Fâ‘ilâtün Fâ‘ilâtün Fâ‘ilün
Remel - . - - / - . - - / - . - - / - . -

Meyl iderler dâ’imâ hûbân Kâğıd-hâneye
N’ola ‘uşşâk olsalar pûyân Kâğıd-hâneye

- Zıll-i eşcâr u çimenzâr u kenâr-ı cûybâr
Niçe meyyâl olmasun insân Kâğıd-hâneye
3. Bir yaña âb u hevâ bir yaña seyr-i dil-rubâ
Diseler kân-ı safâ şâyân Kâğıd-hâneye
Ey olan seyr-âşnâ-yı çeşm-i dil-ber âbda
Gör ne yüzden cân atar yârân Kâğıd-hâneye
Yûsufistân eylemiş gül-pîrehenler cûyını
Anuñ-içün ‘azm ider ihvân Kâğıd-hâneye
6. Müjde teşrîf-i şehâdet nazra-sâz-ı rûyına
Seyre gelmiş nâz ile cânân Kâğıd-hâneye
Leb be-yâd-ı la’l bâzû bâ-miyân-ı fikr-i dost
VAHYİYâ ‘azm it gâzel-gûyân Kâğıd-hâneye

244.

Mef’ûlû Fâ’ilâtün Mef’ûlû Fâ’ilâtün
Muzâri ‘ - - . / - . - - / - - . / - . - -

- ‘Uşşâk-ı dil-figâra başlarsa tâze tâze
Müş tâkdur gönülden harf-i niyâza tâze
‘Âşık görince yârûñ her âşnâ nigâhın
Meftûn olur o şûh-ı hâtır-nevâza tâze
3. Pinhân iderdi ‘ışkı kendinden ‘âşık-ı zâr
Âyîne olmayaydı mahbûb-ı râza tâze
Dîrîne va’d-i vaslın inkâr idüp dil-ârâ
Bend itdi yine va’din dîr u dîrâza tâze
La’lûñ beyânıdur çün gitmez dehânumuzdan
VAHYİNÜñ ey perî-rû eş’ârı tâze tâze

245.

Mef’ûlû Fâ’ilâtün Mef’ûlû Fâ’ilâtün
Muzâri ‘ - - . / - . - - / - - . / - . - -

- Oldukça ol perî-rû bahşîş-resân-ı gamze
Cânumda cilve eyler zahm-ı sinân-ı gamze
Kûyunda seyl-i eşküm itsem füzun ‘aceb mi
Şûyendedür anuñla çün küşteğân-ı gamze
3. Çeşm ü ruh u dehânuñ her biri şâh-ı fîtna
Ammâ su’âl idersen hep bendegân-ı gamze
Tâkat götürmez âdem ol şûh-ı ‘işve-sâza
Kâküller ile itmiş imdâd ân-ı gamze

Her hâl-i mûy-perver sahn-ı ruhuñda VAHYÎ
Olmuş sipâh-ı hüsne râyet-keşân-ı ğamze

246.

Fe 'ilâtün Mefâ 'ilün Fe 'ilün
Hafîf . . - - / . . - - / . . -

Şu'le-i dûd-pûş ya'nî âh
Sünbül-i la'l-gûş ya'nî âh
Çeşme-i âb-ı hecr ya'nî çeşm
Mest-i hûn-âb-nûş ya'nî âh

3. Micmer-i 'ûd-ı 'ışk ya'nî dil
Dûd-ı ahker be-dûş ya'nî âh

Gül-i hicrân-bûy ya'nî dâğ
Bülbül-i pür-hurûş ya'nî âh

Meclis-ârâ nedîm-i rûşen-dil
Kıssa-h'ân-ı sürûş ya'nî âh

6. Sâgar-ı nüktedân-ı bî-sûret
Dikkat-âmûz-ı hûş ya'nî âh

Gerden-i düşmen-i dil-âzâra
Tîğ-ı âteş-fürûş ya'nî âh

Dâğ dâğ itdi VAHYÎ-i zârı
Nâr-ı tûfân-ı cûş ya'nî âh

Harfû 'l-Yâ'

247.

Mef'ûlû Fâ 'ilâtü Mefâ 'ilü Fâ 'ilün
Muzâri' - - - / - - - - / . - - - / - - -

Hayfâ hicâb-ı şeng-i temennâ açılmadı
Gülzâr-ı dilde verd-i tesellâ açılmadı
Hattun irişdi la'lûñi bûs itmedük şehâ
İrdi bahâr gonçe-i zîbâ açılmadı

3. Pür-hande oldı dîdesi mahmûr-ı nâz iken
Güller açıldı nergis-i şehlâ açılmadı

Nûş itmeyince câm-ı leb-i al-i dil-beri
Meclisde çeşm-i meşreb-i sahbâ açılmadı

Kaldı humâr-ı hecr ile bezm-i cihânda
Tab'-ı hazîn-i 'âşık-ı şeydâ açılmadı

6. Gîsûsıdur 'izâr-ı nazîfnde hat degül
Şeb-bûy çıkdı sünbül-i ra'nâ açılmadı

Zülfinde olmadı ruh-ı dildâr rû-nümûd
Def'-i gamâm idüp meh-i garrâ açılmadı
Çokdan tebessüm-i dehen-i yâri görmedük
Kaldı sadefde lü'lü-yi lâla açılmadı

9. Her demde mest-i 'işve iken gamze-i nigâr
VAHYÎ-i dil-figârına aslâ açılmadı

248.

Mefâ'ilün Mefâ'ilün Mefâ'ilün Mefâ'ilün
Hezec . - - - / . - - - / . - - - / . - - -

Visâlin görmedüm hicrân ile zâr olduğum kaldı
Gülin şemm itmedüm nişter-hor-ı hâr olduğum kaldı
Fenâ mey-hânesinde dökmedüm bir cür'a ya hayfâ
Heman bîhûde hâk-i pâ-yı hammâr olduğum kaldı

3. Müyesser olmadı bir kerre yârûñ bûs-ı dâmânı
Benüm bu kûçede pâ-mâl-i agyâr olduğum kaldı
Ne gördüm habbe-i hâlûñ ne içdüm şerbet-i la'lûñ
Tabîbüm hecr ile yıllarla bîmâr olduğum kaldı
Harîm-i lutfâ itdi VAHYÎ-i âşüftesin mahrem
Benüm kör tâli'üm kim vakf-ı âzâr olduğum kaldı

249.

Mef'ûlü Mefâ'ilü Mefâ'ilü Fe'ûlün
Hezec - - . / . - - . / . - - . / . - -

Nutk eyledük ol la'l-i suhan-perver açıldı
Pîrâmen-i Kevserde şehâ güller açıldı
Rûyunla ruh-ı zerdümi peyveste gören dir
Gülşende ne takrîb ile nîlûfer açıldı

3. Âşüftelere itdi o meh 'arz-ı tebessüm
Tüccâr-ı gama dürc-i dür ü gevher açıldı
Müjgân-ı nîgeh şâneledi turre-i yâri
Meclisde yine nâfe-i müşg-i ter açıldı
Ey bâğ-ı vefâ nâmiye-i vasf-ı ruhuñla
Gül gibi dil-i VAHYÎ-i sihr-âver açıldı

250.

Mefâ'ilün Mefâ'ilün Mefâ'ilün Mefâ'ilün
Hezec . - - - / . - - - / . - - - / . - - -

Çü gamzen nûş-ı câm-ı bâde-i şîveyle mest oldı
Nigâh-ı 'işve çü müjgân-ıla hancer be-dest oldı

- ‘Îzâr-ı tâbnâk-i yârda mâlîde-rû gördüm
Ne hâl oldu ki zülf-i ‘anberîn âteş-perest oldu
3. Şerâr-ı âh-ı âteşnâküm olmuşdu fûrûzan lîk
Görince cûşîş-i seyl-i sirişküm şu‘le pest oldu
- Recâ-yı bûs-ı la‘l-i dil-rubâ düşvârdur zîrâ
Yem-i fûrkatde hecri mâhî-i ümmîde şest oldu
- Ser-i evsâf-ı zülfün rû-nümûd oldukda tab‘ında
Dil-i VAHYÎ sipâh-ı fitneye cây-ı nişest oldu

251.

Gazel ü Müstezâd

Mef‘ûlü Mefâ‘ilü Mefâ‘ilü Fe‘ûlün

Hezec - - . / . - - . / . - - . / . - -

Mef‘ûlü Fe‘ûlün

- - . / . - -

- Hüsn-i dehenün gonçe-i gülşende olaydı / Ey şûh-ı suhandan
Her hârı birer bülbül-i nâlende olaydı / Her lahza vü her an
- Bu behcet ile eylese ebrûnı temâşâ / Mâh-ı nev-i eflâk
Hurşîd gibi pâyuña efkende olaydı / Bî-tâkat u derman
3. Görseydi eger neşve-i câm-ı leb-i la‘lün / Keyfîyyet-i sahbâ
Mest-i mey-i hayret ola şermende olaydı / Ey fitne-i devran
- Hep itdigün ihsânın iderdüm saña ecrin / Ey tâli‘-i vârun
Yârümde olan gamze eger bende olaydı / Çün tîğ-ı nümâyan
- Mihr ü meh olurdu saña pervâne-i sûzan / Mânende-i hirbâ
Hurşîd ‘izârün gibi rahşende olaydı / Ey şem‘-i fûrûzan
6. Vâsf eyler isen lezzet-i güftârını yârün / Ey VAHYÎ-i hoş-gû
Bârû suhanun böyle hoş-âyende olaydı / Tâ fehm ide yâran

252.

Mef‘ûlü Mefâ‘ilü Mefâ‘ilü Fe‘ûlün

Hezec - - . / . - - . / . - - . / . - -

- Tâ câna geçer nevk-i ecel-zâğ-ı nigâhı
Hışm-âver olunca o mehün çeşm-i siyâhı
- Gîsû-yı ‘izârün olalı deşne-i enzâr
Vakf eyledi dâğ-ı hevese sîne-i mâhı
3. Nûr-ı meh ü hurşîd olur sâye yanında
‘Uşşâk fûrûzân idicek meş‘al-i âhı
- Ol şûh olıcak gurre gibi deşne-bürehne
‘Uşşâk degül havfa düşer mâh ile mâhî

Seyr itmedi mevcûd olalı taht-ı zarâfet
VAHYÎ gibi bir pâdşeh-i nûkte-sipâhı

253.

Mef'ûlû Fâ'ilâtü Mefâ'ilü Fâ'ilün
Muzâri' - - . / - . - . / . - - . / - . -

Tolsa mey-i ümîd ile mey-hâneler gibi
'Âşık açılmaz o güle mestâneler gibi

La'lüm hayâl ider diyü mecrûh ider dili
Zâhid şikeste itdiği peymâneler gibi

3. Kalbünde var-ısa heves-i zülf-i dil-rubâ
Pür-şerha eyle sîneşi gel şâneler gibi
Hâl-i 'izârı merdüm-i çeşmümle kavlı idüp
Dir yanalum bu şem'ada pervâneler gibi
Bağladı fikr kâkül-i hûbâna hayf hayf
Zencîre çekdiler dili dîvâneler gibi

6. Gencîne-i visâl olayum derseñ ey gönül
Ol hâk-i pâý sen-dahı vîrâneler gibi
Bu nev-zemîn bahr-i füsûn oldu VAHYÎyâ
Çokdur nikâtı hak bu ki dîr-dâneler gibi

254.

Mefâ'ilün Fe'ilâtün Mefâ'ilün Fe'ilâtün
Müctes . - . - / . . - - / . - . - / . . - -

O turre kim taraf-ı la'l-i sâf-ı dil-bere düşdi
O sünbül-i tere beñzer ki havz-ı Kevsere düşdi

Hayâl-i gamze-i çeşm-i humâr-perverişünle
Dil-i sitem-keş-i her-bâra-mest hancere düşdi

3. Geline bu dil-i ahker-güdâza fikret-i hâlün
Hemân o 'anbere döndi ki kalb-i micmere düşdi
Dehân u rûyuña teşbîh olındı sehv ile çün-kim
O şerm ile kızarup gonçe-berg-i gül yere düşdi
İdince vasfıñı taksîm vâsıfân-ı zamâne
Bu şi'r-i nev dahı VAHYÎ-i nûkte-pervere düşdi

255.

Nazîre-i Şehrî Çelebi

Fe‘ilâtün Fe‘ilâtün Fe‘ilâtün Fe‘ilün

Remel . . . - / . . . - / . . . - / . . -

Gördüm ol yâri baña hande-künan şöyl’itdi
Sabr u ârâm u karârın dil ü can şöyl’itdi

Olmadum vâsıl-ı menzilgeh-i ümmîd dirîğ
Kâmet-i tîrûmi ol kaşı keman şöyl’itdi

3. Görüp ağıyâr ile ol âfet-i bî-merhameti
‘Âşık-ı şîfte-dil sîne-zenan şöyl’itdi

Hall-i eşkâl-i gubâr-ı hatın endîşe idüp
Künc-i hayretde gönül nice zaman şöyl’itdi

Eyledüm hasret ile rûyına bir nîm-nigâh
Hışm idüp baña o fettân-ı cihan şöyl’itdi

6. Siklet-i hattı görüp bezm-i ruh-ı dil-berde
Meclis-i hüsne vedâ‘ eyledi an şöyl’itdi

VAHYÎ-i nâdire-gû pâye-i i‘câz üzre
Nazm-ı ŞEHRÎ ile bu şi‘ri heman şöyl’itdi

256.

Fe‘ilâtün Fe‘ilâtün Fe‘ilâtün Fe‘ilün

Remel . . . - / . . . - / . . . - / . . -

Der-miyân itse o meh-pâre eger hancerini
Cânib-i ‘âşık-ı gam-gîne eger hancerini

Mahzen-i câna revân itmege âb-ı lutfın
Çıkarup belden o şûh itdi kemer hancerini

3. Ten-i zahm-âver-i ‘uşşâkı delüp câna geçer
Rîşe-i rîş ile men‘ itmeseler hancerini

Gûşe-i dâğda bir şerha-i nev-peydâ var
İmtihân eylemiş ol gönçe-i ter hancerini

VAHYÎ-i haste devâ-h^vâh ise olmaz çâre
Yâre-i câna fetîl ide meger hancerini

257.

Fe‘ilâtün Fe‘ilâtün Fe‘ilâtün Fe‘ilün

Remel . . . - / . . . - / . . . - / . . -

Cem‘ olur yârda çün hatt u ‘izârıñ ikisi
Olsa peyveste sezâ keyf ü humârıñ ikisi

- Yok yere fikr-i miyân u dehen eyler dil-i zâr
Dûrdur bahtum ile bûs u kinârûn ikisi
3. Hat-ı mevhûm ile âlûde gören zülfüñi dir
İmtizâc eyler imiş mûr ile mâruñ ikisi
Cân u dil mâ'il-i serv-i kad-i cânân oldı
Âşyân eyledi bir nahli hezârûn ikisi
Gâh endîşe-i ruhsâr iderem geh sîne
Dil-i sûzânuma bir nûr ile nârûn ikisi
6. Gamze-i yâr cüdâ olmadı dilden hergiz
Ülfet itmek ne 'aceb bâz u şikârûn ikisi
Zülfini çözdı tırâş eyledi hattın cânan
Bir yere geldi hazân ile bahârûn ikisi
Yâri hem-sohbet-i ağıâr görenler didiler
Gûyiyâ oldı musâhib gül ü hârûn ikisi
9. VAHYİYâ dilde ber-â-ber heves-i kâkûl ü rûy
Şehr-i gamda bir olur leyl ü nehârûn ikisi

Gazeliyyât-ı Nâkısâ

258.

Dîger

Mef'ûlû Fâ'ilâtü Mefâ'ilü Fâ'ilün
Muzâri' - - . / - . - . / . - - . / - . -

Dil zevk-i vuslat u gam-ı hicrâna bakmasa
Dildâr dahı 'âşıkâ bî-gâne bakmasa
Mâh eylemezdi cismîni reşk-ile dâğ dâğ
Hâl-i siyâh-ı 'ârız-ı hûbâna bakmasa

259.

Dîger

Mefâ'ilün Mefâ'ilün Mefâ'ilün Mefâ'ilün
Hezec . - - - / . - - - / . - - - / . - - -

Göñül memnûn-ı ye's ol zevk-i vuslat kanda sen kanda
O istîgnâ-nigeh dil-berle ülfet kanda sen kanda
Mükerrer da'vî-yi hüsn ü bahâ ey gül-şeker tâ key
O la'l-i gönçe-şekl ü kand-lezzet kanda sen kanda

260.

Mef'ûlû Mefâ'ilün Fe'ûlün

Hezec - - . / . - - / . - -

'Afv eyle günâhumuz İlâhî
Sensin çü penâhumuz İlâhî
Târîk-keş-i şeb-i hevâyuz
Göster bize râhumuz İlâhî

261.

Dîger

Fâ'ilâtün Fâ'ilâtün Fâ'ilâtün Fâ'ilün

Remel - . - - / - . - - / - . - - / - . -

Ey harîm-i revza-i pâkûn matâf-ı kudsiyan
V'ey şemîm-i hâk-i müşgînün 'abîr-i ceyb-i can
Rûy-mâl-i dergehün fikriyle itdüm 'azm-i râh
Himmetünle eyleye teshîl umûrum müste'an

262.

Dîger

Mefâ'ilün Fe'ilâtün Mefâ'ilün Fe'ilün

Müctes . - - - / . - - - / . - - - / . - -

- Ne lutf u rahm u ne bûs u kinârdan bilürüz
Safâ-yı vuslatı biz intizârdan bilürüz
Nigâh-ı mest ile remz itse bûs-ı la'lini yâr
Yine o lutfi mey-i hoş-güvârdan bilürüz
3. Gubârveş bizi pâ-mâl iderse hışm-ı nigâr
O cevri kendümüze rûzgârdan bilürüz

[FARŞA GAZELLER]

263.

Mefâ'ilün Mefâ'ilün Mefâ'ilün Mefâ'ilün

Hezec . - - - / . - - - / . - - - / . - - -

- Şehâ ber-micmer-i dil hecr-i rûyet ahker endâzed
Peseş endîşe-i zûlf-i girih-gîr 'anber endâzed
Be-gird-i tal'at-ı cânan me-pendâr ez-hat-ı nev-mû
Zi-bîm-i bâz gamze murğ nigeht şeh-per endâzed
3. Eger dîdî mey-i gül-fâm-ı ruhsâr-ı 'arahnâkeş
Habâbâsâ külâh ez-mestî-i şevkeş ber-endâzed

Der-în deşt-i hevesnâkî ne-gîred dil zi-düşmen hûn
Ki û-râ tîr-i müjgân-ı hayâl-i dil-ber endâzed
Hayâl-i la'îl-i cânân VAHYÎ ez-gencîne-i hâtır
Be-cây-ı rîg ber-satr-ı kelâmet gevher endâzed

264.

Müzeyyel Bâ-Sitâyiş-i Maktûl Feyzu 'Ilâh Efendi Rahmetu 'Ilâh

Fe 'ilâtün Fe 'ilâtün Fe 'ilâtün Fe 'ilün
Remel . . - - / . . - - / . . - - / . . -

- Nî'metî k'ez pey-i û minnet-i nâ-kes bâşed
Câm-ı zehrîst ki ser-pûş-ı vey atlas bâşed
Çeşm dârem ki resed tîr-i ümîdüm be-hedef
Der-dilem tâ gam-ı ebrû-yı mukavves bâşed
3. Eşk der-sîne-i hicrân-keşan tâb efzâst
Bahr der-gül-han-ı gam reşk-dih-i hes bâşed
Nâzenînî ki zi-tû çîn-i cebîn-i âzâr
Ez-şeker-hande-i hûbân bes enfes bâşed
Tâ ki bâ-tost çonîn çeşm ü 'izâr u ebrû
Der-cihan şeş cihet-i vefk-i müseddes bâşed
6. Men u endîşe-i vasl u tû u icrâ-yı vefâ
Yek murabba' şode k'ez ye's-i muhammes bâşed
VAHYÎyâ ger talebi pâye-i mihr-i gerdûn
Zerre-i lutf-ı veliyyü 'n-ni'amet bes bâşed
Zât-ı Mahmûd-siyer hazret-i şeyhü 'l-İslâm
Hâr bâ-terbiyeteş gonçe-i nev-res bâşed
9. Mâhî-i sayd şode ger keremeş endîşed
Mahbes-i şest be-dô sakf-ı mukarnas bâşed
Ger koned heft bahir bâ-kef-i cûdeş taklîd
Genc-i emvâc tehî gerded u eflas bâşed
Tâ felek micmere-i mihr ü meheş gerdâned
Vasf-ı pâk-i tû der-û 'ûd-ı mülebbes bâşed

Metâli'

1.

Mefâ 'ilün Mefâ 'ilün Mefâ 'ilün Mefâ 'ilün
Hezec . . . - - / . . . - - / . . . - - / . . . - -

1. Gören hicran deminde cûş-ı eşkin çeşm-i giryânun
Yanında katre saymaz havzını Sultân 'Osmânun

2.

Dîger

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. Dü-çeşmüm çüfte havz oldu kemerler ebruvânumdur
Suyı fûrkat deminde dökdiğüm eşk-i revânumdur

3.

Dîger

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

1. Yapsa biñ muksim revâdur dîde-i giryândan
Lûle-i hûn eyleyen müjganların hicrândan

4.

Dîger

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. Gehî ak sâde gâhî mâ'î hâreyle gezüp cânan
Gehî Cûy-ı Kebûd eyler sirişküm gâhî Ak Çağlan

5.

Dîger

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

1. Küşte-i meydân-ı vasl olmaz begüm çâkşır ile
Sîne 'uryân ol da çeng âhengin it çak şîr ile

[TARİHLER}

1.

Târîh-i Vefât-ı Kerîme-i Hasan Paşa el-Vezîrû 'ş-Şehîd Vâlî-i Bağdâd

Müstef'ilün Müstef'ilün Müstef'ilün Müstef'ilün

Recez - - . - / - - . - / - - . - / - - . -

Demdür ki fart-ı nâleden medhûş olup halk-ı cihan

Ola hücûm-ı âh ile mihr ü mehi çarhuş siyâh

Bâğ-ı siyâdetde yine bir serv oldu ser-nigun

Kim mislini görmez felek eylerse sad sâle nigâh

3. Seyyid Hasan Paşa gibi düstûr-ı 'âlî-himmetün
Bir duhter-i sa'd-ahteri 'ukbâya oldu rû-be-râh

Duhter degül nûr idi ol mahsûde-i hûr idi ol

Sûretde sîretde aña hayrân idi şâh u sipâh

Oldı Hanîfe aña nâm itdi 'ibâdâtle kıyâm

Oldı şefî'i pes enâm 'afv ola var-ısa günâh

6. Kârı salâh u zıkr idi mestûre idi bîkr idi
Almışdı zîr-i 'akdine bir vâlî-i leşger-penâh

Kim nâmı İbrâhîm idi düstûr-ı hoş-takvîm idi

Da'vâ-yı 'ilm ü hilmine olurdı a'dâsı güvâh

Oldı egerçi Müşterî ol Zühre-hadde bu perî

Ammâ felek cem' itmedi bir burca çün mihr ile mâh

9. Bulmadı 'ömri imtidâd almadı dünyâdan murâd
H'âb-ı ecelle mest olup kabr oldu aña h'âbgâh

Ol gerden ü rû n'oldı âh ol çeşm ü ebrû n'oldı âh

Ol zülf-i hoş-bû n'oldı âh ol la'l-i pür-gû n'oldı âh

Kabr içre n'oldı ol beden kim yâsemendi yâsemen

Endîşe kıl bu hâli sen kalbe gele tâ intibâh

12. Ol tûtî-i şîrin-beyan hâk içre düzdi âşyan
'Adn eyleyüp me'vâsını pür-nûr ide kabrin İlâh

Gûş eyleyince fevtini VAHYÎ didüm târîhini

Ola Hanîfe hânıma bezm-i cinânı cilvegâh [1124]

2.

Târîh-i Kerîme-i Hasan Paşa Merhûm

Mefâ'ilün Fe'ilâtün Mefâ'ilün Fe'ilün

Müctes . . . / . . . - / . . . - / . . . -

- Figân ki bâd-ı ecel gülşen-i siyâdetde
Dağıtdı bergini bir tâze verd-i ra'nânun
Hadîce hânım olup zahmnâk-i tîr-i vebâ
Bırakdı hâk-i fenâyâ vücûdını anun
3. Yegâne olmağ-ıla hüsn-i hulk u halkda ol
Tutar eliydi görür çeşmi kalb-i dânnânun
Ol idi duhter-i pâkîze-i Hasan Paşa
Ki kaddin itdi dü-tâ lutfi zîr ü bâlânun
Vezîr-i 'ârif ü kâmil müşîr-i deryâ-dil
Ki virdi hükmini lutf u 'atâ vü ihsânun
6. Budur o bahr-i himem kim olurdı vaktinde
Kemîne katresi mahsûdı heft deryânun
Budur o kân-ı kerem kim iderdi 'asrında
Dehân u dîdesini dûhte temennânun
Bu zât-ı muhteremün ol sülâle-i pâki
Ki nûr-ı çeşmi idi cümle-i ahibbânun
9. Göreydi şîve-i refîâr-ı kadd-i mehzûn
Olurdu kâmeti ham serv-i gülşen-ârânun
Duyaydı lezzet-i güftâr-ı la'l-i şîrîn
Akardı ağızı suyu tûtî-i şeker-hânun
Alaydı bûy-ı dil-âvîz-i zülf-i müşgîn
Satardı hîçe sabâ sünbûlin bu sahrânun
12. Cemâli halka unutturdu mihr ile mâhı
Kemâli kadrini pest itdi çarh-ı vâlânun
Velî ne fâ'ide olup cerîh-i tîğ-ı kazâ
Değişdi kasrını kabre sarây-ı dünyânun
İdüp mezârını pür-nûr hazret-i Allâh
Makâmın eyleye cây-ı refî'i me'vânun
15. Vefâtını işidüp VAHYÎyâ didüm târîh
Hadîce ola İlâhî enîsi Zehrânun [1124]

3.

Târîh-i Mahdûm-ı Mükerrerrem-i Hasan Paşa el-Mükerrerrem

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

Âh kim şîvengeh-i ‘âlem olup vakf-ı gümûm
Kalmadı bir dil ki anda olmaya jeng ü melâl

Eyledi ‘Abbâs Big ‘azm-i bekâ efsûs u hayf
Olmadın aña ‘arûs-ı kâmdan ‘arz-ı cemâl

3. Necl-i mes‘ûd-ı Hasan Paşa şerîf ibn-i şerîf
Buldu zahm-ı nîze-i tâ‘ûn ile çün i‘tilâl
Şerbet-i câm-ı şehâdetle ‘ilâc itdi aña
Ol Hakîm-i lem-yezel kim hükmi redd olmak muhâl
Ol nihâl-i ‘işvenüñ bân-ı hazân-ı mevt ile
Berg ü bâr-ı hüsnî oldı zerd-fâm u pâ-y-mâl
6. Olmadı mihr-i cemâli zîb-i vakt-i irtifâ‘
Şanzdeh sâl iken ‘ömri oldı ma‘rûz-ı zevâl
Bî-tavakkuf kasr-ı ‘ayşî kabre tebdîl eyledi
İrci ‘î fermânına cân ile itdi imtisâl
Ravza-i cennet idüp kabrin makâmın ‘Adn ide
Göstere aña cemâlin pâdşâh-ı zü ‘l-celâl
9. Düşdi bir pâkîze mısra‘ VAHYÎyâ târîhine
Eyledi ‘Abbâs Big mülk-i fenâdan irtihâl [1124]

4.

Târîh-i Vefât

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

Âh kim oldı yine bâğ-ı fenâda ser-nigun
Sarsar-ı merg ile bir serv-i bülend-i hoş-hırâm

‘Azm-i ‘ukbâ itdi İbrâhîm Big efsûs u hayf
Nev-bahâr-ı ‘ömrde ruhsârı oldı zerd-fâm

3. Görmedin bezm-i cihânun bir kemîne neş’esin
Sundı sâkî-i ecel sahbâ-yı mevti câm câm
Merkadin lutfıyla pür-nûr eyleyüp Rabbü ‘l-‘ibâd
Menzilin ‘ukbâda kılsun revza-i dârü ‘s-selâm
Fevtine târîh içün VAHYÎ du‘â-gû ne didi
Bula İbrâhîm Big gülzâr-ı ‘Adn içre makâm [1106]

5.

Târîh-i Vefât

Mefâ'ilün Fe'ilâtün Mefâ'ilün Fe'ilün

Müctes . . . / . . . - / . . . - / . . . -

Hücûm-ı bâd-ı ecelden bu gülsitanda yine
Dirîğ oldı perîşân bir gül-i handan

Selîm Big gibi bir nev-nihâl-i devleti hayf
Bırakdı hâke kazâ eyledi çü genc-i nihan

3. 'Îzârını gül-i al iken eyledi nesrin
Bahâr iken o gülistân-ı hüsne düşdi hazan

Peyâm-ı fevti irişdükde gûş-ı ahhâba
Pür itdi 'âlemi feryâd u nâle vü efğan

Suhanveran bu du'âdan çıkardı bir târîh
Hudâ Selîm Bigi eyleye mukîm-i cinan [1127]

6.

Târîh-i Vefât

Fe'ilâtün Fe'ilâtün Fe'ilâtün Fe'ilün

Remel . . . - / . . . - / . . . - / . . . -

Oldı ber-geşte yine bâğ-ı fenâ sahnında
Sarsar-ı merg ile bir gül-bün-i ra'nâ sad âh

'Âyişe kadın o mahdûme-i 'ismet-pîrâ
Eyledi 'âlem-i 'ukbâya teveccüh nâ-gâh

3. Mesned-i 'izzet iken nâz u na'îm içre yeri
Gûşe-i kabrde hâk oldı aña menzilgâh

Lutf idi şefkat idi halka kerîmâne işi
Kimseye şiddet ile itmez idi nîm-nigâh

Âteş-i fûrkat ile olup ahibbâ sûzan
Didiler hasret ile girye idüp vâ-hüznâh

6. Gark idüp lücce-i eltâfına Mevlâ-yı Kerîm
Eyleye rahmet ü gufrânın aña cây-ı penâh

Şerha-i cân u dil ile didi VAHYÎ târîh
Meskenin 'Âyişenün eyleye Firdevs Îlâh [1120]

7.

Târîh-i Dîger

Fe‘ilâtün Fe‘ilâtün Fe‘ilâtün Fe‘ilün

Remel . . - - / . . - - / . . - - / . . -

‘Âyişe kadın o mahdûme-i ‘ismet-pîrâ
İrci ‘î emri ile eyledi ‘azm-i ‘ukbâ

Nazar-ı rahmet ü gufrân ile manzûre idüp
Hem-civâr eyleye Zehrâ-yı Betûle Mevlâ

3. Bu du‘â ile didüm fevtine VAHYÎ târîh
‘Âyişe eyleye *Firdevs-i berinde me’vâ* [1120]

8.

Târîh-i İntikâl-i Divitçi-zâde Efendi Kuddise Sırruhu

Fâ‘ilâtün Fâ‘ilâtün Fâ‘ilâtün Fâ‘ilün

Remel - . - - / - . - - / - . - - / - . -

Âh sad âh itdi bu çarh-ı denî-perver yine
Leşger-i âlâmı izhâr olmuş-iken der-kemin

Halk-ı ‘âlem gûyiyâ bahr-i gama gark oldılar
Gitdi çün-kim dünyeden ol şeyh-i kâmil rûkn-i din

3. Gavs-ı a‘zam mürşid-i a‘lem Divitçi-zâde kim
Vâsıl-ı esrâr idi ‘ilme ’l-yakin ‘ayne ’l-yakin

Rûh-ı pâki çün ‘urûc itdi şeb-i Mi‘râcda
Menzil-i a‘lâ-yı *ev-ednâya* dek gitdi hemin

İns ü cin ağlaştılar feryâd-ı âh u vâh ile
Didiler hayfâ dirîgâ gitdi ol cennet-mekin

6. Dest-ber-gûş eyleyüp mâh-ı receb bir iki gün
Âh u efgâna tahammül itmeyüp gitdi hazin
Geldi dâl idüp kadın hâtif didi târîhini
Gitdi *biñ toksanda* yâ Hû diyü kutbu ’l-vâsılın [1090]

9.

Târîh-i Vefât-ı Seyyid ‘Alâ‘u ’d-dîn Efendi Rahmetu ’llâh

Fâ‘ilâtün Fâ‘ilâtün Fâ‘ilâtün Fâ‘ilün

Remel - . - - / - . - - / - . - - / - . -

Âh kim tîg-ı ecelle gülsitân-ı ‘ışkdan
Bir gül-i sad-bergi kesdi emr-i Rahmân u Rahîm

‘Azm-i ‘ukbâ eyledi ya‘nî o zât-ı muhterem
Keşf olunca zevk-i bezm-i vuslat-ı Hayy u Kadîm

3. Hazret-i Seyyid ‘Alâ‘u ’d-dîn Efendi kim odur
Şâh-ı evrenğ-i tarîkat sâhib-i kalb-i selîm
Çihl sâl irşâd idüp tâlibleri sâlikleri
Dâmenin tutdı iden meyl-i sırât-ı müstakîm
Hân-kâh-ı cennet içre hûr-ı halvet-gîr imiş
Rûh-ı pâkin anları irşâda gönderdi ‘alîm
6. Gûş idince fevtini halk-ı cihân itdi fîğan
Fûrkati ahhâbı kıldı kûçe-i gamda mukîm
Âb-ı dîdeyle yazıldı VAHYÎ bu târîh-i pâk
Öldi *biñ toksan bir* içre ‘âzim-i sûy-ı na‘îm [1091]

10.

Târîh-i Lihye

Mef‘ûlü Fâ ‘ilâtü Mefâ ‘ilü Fâ ‘ilün

Muzâri‘ - - . / - . . . / . - . . / - . -

- Gül-gonçe-i hadîka-i Firdevs-i i ‘tisâm
Ya‘nî Muhammed Ağa o mahdûm-ı tâbnâk
Verd-i ‘izâr-ı nâzûkini jâledâr idüp
Nahl-i cemâl-i mehveşini itdi pür-sitâk
3. Ruhsat-dih oldı ya‘nî hat-ı müşğ-bârına
‘Uşşâk içinde fark ola tâ ‘âkil ü hüzâk
Tahsîn ol musavver-i bî-irti‘âşe kim
Nakş ide safha-i güle san‘atla berg-i tâk
Reşk-i ruh-ı hat-âverünğ itse sezâ şehâ
Ruhsâr-ı mâh-ı hâlever-i çarhı çâk çâk
6. VAHYÎ budur niyâz cenâb-ı Hudâya kim
‘Ömrin füzûn idüp hatını ide yümnnâk
Çıkıldıkda câ-be-câ hatı târîhini didüm
Biñ toksan ikide yüze çıkdı o hatt-ı pâk [1092]

11.

Târîh-i Vefât

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - . / - . - . / - . - . / - . -

Âh kim bâd-ı ecel bâğ-ı fenâda eyledi
Bir gül-i neşkûfte-evrâkı perîşân u ‘adîm
Ya‘nî bir ma‘sum-ı pâk-endîş-i nüzhet-pîşeyi
Zîb-i bezm-i cennet itdi hükm-i Feyyâz-ı Hakîm

3. Rûy-ı gül-reng ü ten-i sîmîn olup zerrîn-fâm
Gûyiyâ oldı gül-i zerd gülsitân-ı na‘îm
Geldi emr-i *irci* ‘î fermân-ı lâ-yeste’*hirun*
Virmedi ârâma ruhsat bir nefes Hayy u Kadîm
Eyleyüp pür-nûr kabrin revzasın bâğ-ı cinan
Mazhar-i eltâf ide dâ’im Hudâvend-i ‘alîm
6. ‘Azm-i gülzâr-ı bekâ idüp dirîğâ eyledi
VAHYÎyâ dâmân-ı şevk-i kalb-i ahbâbı dü-nîm
Kaldırup iki elüm didüm du‘â târîh ile
İde İsmâ ‘ile me’vâ gülşen-i ‘Adni Kerîm [1095]

12.

Târîh-i hatt-ı Yeki ez-Ehl-i Keyf-i Sütürde Rîş

Mef‘ûlü Fâ ‘ilâtün Mef‘ûlü Fâ ‘ilâtün

Muzâri‘ - - . / - . - - / - - . / - . - -

- Ruhsat-dih-i hat olduñ çün-kim Selîm şâhum
Budur niyâz Hakdan kalbün ferahla tolsun
Çün-kim zuhûr-ı hatla hâr-âver oldı gülzâr
‘Uşşâk-ı zâruñ ey yâr ol demde hâli n’olsun
3. La‘lün şarâb u hattun esrâr u hâlün afyun
Gel meclis-i vefâya bezm-i safâ kurulsun
Ruhsâr-ı tâbnâke hatt-ı vefâ yazıldı
Şimden-girü cefânun defterleri dürülsün
Gördükde hatt-ı pâkün rûyunda bi ‘l-bedâhe
VAHYÎ dimiş ki *mâhâ hattun mübârek olsun* [1092]

13.

Târîh-i Vilâdet Ber-vech-i Mülemma‘

Fe ‘ilâtün Mefâ ‘ilün Fe ‘ilün

Hafîf . . - - / . . - - / . . -

- Nahmedu ‘llâh bi’ktizâ’i ‘l-lutf*
Ahsene ‘n-nâse mâ de‘âhu hevâh
Ez-gülistân-ı feyz-bahş koned
Heme râ verd-i kâm-ı dil her gâh
3. İtdi bir tıfl-ı bî-nazîr ihsan
Tal‘atın görse reşk iderdi mâh
Haddehu bi ‘z-ziyâ ‘adîle ‘ş-şems
‘Aynuhu ‘ayn^{un} ‘avvene ‘l-Îlâh

Yâ İlâhî kün ‘ömr-i û efzun
Be-hakkı lâ İlâhe illa ‘llâh

6. Sulehâ zümresinde server idüp
Eyle ‘irfândan anı âgâh
Bi ‘d-du‘â kâle VAHYÎ târîhâ
Şerrefa ‘llâh kadra ‘abdi ‘llâh [1092]

14.

Târîh-i Binâ-yı Kasr

Mefâ ‘ilün Mefâ ‘ilün Mefâ ‘ilün Mefâ ‘ilün
Hezec . - - - / . - - - / . - - - / . - - -

Ta ‘âla ‘llâh zihî me’vâ-yı Firdevsin ‘Adenâsâ
Ki şüd mahsûd gülzâr-ı na‘îm ü cennetü ‘l-Me’vâ
Be-din nakş-ı nigâr in hâne reşk-i sâde levhân est
Gül ü şeb-bûy u nergis rûy u zülf ü dîde-i bînâ

3. *Be-te’sîr-i nevâ-sâzî-i ‘uşşâk-ı müberka’ kâm*
Makâm-ı kâr-ı kâm sâhib-şerâr-ı ester ü bâdâ
Zi-tab’-ı VAHYÎ âmed bâ-du‘â târîh-i itmâmeş
Mübârek bâd in kasr-ı mu ‘allâ menzil-i a ‘lâ [1094]

15.

Târîh-i Kasr-ı Âhir

Mefâ ‘ilün Mefâ ‘ilün Mefâ ‘ilün Mefâ ‘ilün
Hezec . - - - / . - - - / . - - - / . - - -

Ta ‘âla ‘llâh zihî me’vâ-yı matbû‘-ı bihiştâsâ
Ki fikr-i makdem-i şâh-ı cihân oldı aña bennâ

O şâh-ı Cem-livâ İskender ü Rüstem-veğâdur kim
Cihânı ‘adl ü dâdı itdi reşk-i cennetü ‘l-Me’vâ

3. *Cenâb-ı hazret-i Sultan Muhammed Hân-ı Gâzî kim*
Cihân vakf-ı du‘â-yı tûl-i ‘ömrî oldı ser-tâ-pâ
İdüp lutf u ‘atâsın pey-rev-i meyl-i dil-i pâki
Muzaffer eyleye her demde anı hazret-i Mevlâ
Anuñ bir bende-i hâsı vezîr-i râst-tedbîri
Odur paşa-yı Mahmûdü ‘l-hisâl-i sâhibü ‘l-âlâ
6. *Binâ itdi bu kâh-ı can-fezâ-yı ‘âlem-ârâyı*
Sarây-ı devletin ma‘mûr ide Rahmân-ı zî ‘l-a‘tâ
Nedür ol nakş-ı hayret-zâ nedür ol resm-i gam-fersâ
Ki hergiz mislini seyr itmemişdür dîde-i dünyâ

Nesîm-i rûh-bahşından safâ kesb eyleyüp dâ'im
Ola erbâbı zevk ü şevkde bî-bâk ü bî-pervâ

9. Bu tarh-ı dil-keşe tahsîn ile VAHYÎ didi târîh
Zihî kasr-ı muḥallâ menzil-i a'lâ-yı rûh-efzâ [1095]

16.

Târîh-i Ta'mîr-i Bezzâzistân-ı 'Atîk
Fe'ilâtün Fe'ilâtün Fe'ilâtün Fe'ilün
Remel . . - - / . . - - / . . - - / . . -

Mütevellî-i Ayâ sofya Hüseyin Ağanın
İki 'âlemde ola kalb-i şerîfî mesrûr

Eski bezzâz-sitan kühnelenüp niçe zaman
Olmış idi nazar-ı ehl-i 'imâretten dûr

3. İtdi ta'mîrine biñ cân ile bezl-i himmet
Çeşm-i insâfına bir kerre olunca manzûr

Virdi tedbîr-i pesendîdesi bir sûret kim
Dîde-i hâtırı nezzâresi eyler pür-nûr

Bî-tekellûf göricek VAHYÎ didi târîhin
Eski bezzâz-sitân oldu yeñile ma'mûr [1101]

17.

Târîh-i Lihye-i Musâhib Paşa-zâde Rahimehüma 'llâh
Fâ'ilâtün Fâ'ilâtün Fâ'ilâtün Fâ'ilün
Remel - . - - / - . - - / - . - - / - . -

Lev haşa 'llâh sun'-ı nakkâş-ı ezel tarz-ı 'acîb
Kim bulupdur berg-i gülde sûret-i şeb-bû vücûd

Necl-i mes'ûd-ı nedîm-i şehryâr-ı pâk-zâd
Menkabet-pîrâ Muhammed Big yem-i ihsân u cûd

3. Eyleyüp ruhsat-güzârı hatt-ı 'anber-fâmına
Oldı hakkâ rûy-ı pâkinde o hat revnak-füzûd

Hattını mes'ûd idüp 'ömrin füzûn itsün Hudâ
Câ-nişîn oldukça dilde fikret-i bûd u nebûd

Lafz^{an} u ma'n^{en} görüp VAHYÎ didi târîhini
Lihye-i müşgîne *biñ yüz birde* oldı rû-nümûd [1101]

18.

Târîh-i Lihye

Mefâ'ilün Fe'ilâtün Mefâ'ilün Fe'ilün

Müctes . . . / . . . - / . . . - / . . . -

Hezâr hamd Hudâ bâğ-ı kâm-ı 'âlemde

Küşâde olmada ümmîd-i sünbülîstânı

O zât u hulk ile dervîş kim Muhammed Ağa

Hemîşe âğuş-ı tab'ında şûh-ı 'irfânî

3. Hat-âver oldu kıyâs eylemeñ anı almış
Salâh milketini zabta hatt-ı şâhânî

Muharrem içre tırâş-ı hatın harâm idüp

Sahîfe-i dile yazdı hat-ı peşîmânî

Hatın mübârek ü 'ömrin füzûn ide Mevlâ

Be-hakk-ı lutf-ı latîfî be-hakk-ı Rahmânî

6. Ferâğ idince tırâş itmeden hat-ı pâkin
Sevâbı rûyına oldu nüvişte gör anı

Çıkar bu hâl-i musahhafla VAHYÎYâ târîh

Yazıldı levh-i cemâlünde hatt-ı reyhânî [1107]

19.

Târîh-i Cülûs-ı Sultan Mustafâ Han 'Aleyhi 'r-Rahmeti ve 'l-Gufrân

Fâ'ilâtün Fâ'ilâtün Fâ'ilâtün Fâ'ilün

Remel - . . . / . . . - / . . . - / . . . -

Bâreka 'llâh neşr idüp âfâka lutfın zü 'l-celâl

Hâne sûr-ı 'âlem oldu kalmadı vech-i 'abûs

Geldi sadr-ı devlete bir şâh-ı 'âlî-rütbe kim

Câh-ı iclâli kıbâb-ı çarhı eyler tabl u kûs

3. Saltanat böyle şehenşâha çekerdî intizâr
Gonçe-i bahtı açıldı buldı dâmâdın 'arûs

Tâc-ı şâhân-ı cihan reşk itse lâyık tahtına

Eyledi hengâm-ı teşrîfinde çün-kim pây-bûs

Hak ta'âlâ düşmen-i dîn üzre mansûr eyleyüp

Pây-mâl-i rahş-ı kahrı ola mülk-i Üngürüs

6. Dâ'im olup mesned-i devletde 'adl ü dâd ile
Sâye-i lutfında kimse görmeye hayf ü füsûs

VAHYÎYâ erbâb-ı dâniş didiler târîhini

Ahsen-i hâliyle Sultan Mustafâ itdi cülûs [1106]

20.

Târîh-i Vefât

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

1. 'Azm-i 'ukbâ itdi 'Abdu 'l-vâhid ol mahdûm-ı pâk
Şemm idüp gülzâr-ı cennetden dimâğı râyiha
2. *Kaldırup iki elin VAHYÎ didi târîhini*
Ola 'Abdu 'l-vâhide me'vâ makarru 'l-Fâtîha [1093]

21.

Târîh-i Vefât

Fâ 'ilâtün Fâ 'ilâtün Fâ 'ilün

Remel - . - - / - . - - / - . -

- Rahmetî-zâde o mahdûm-ı güzin
Câmi'-i cümle-sıfât-ı mâdiha
İsmi Ahmed zâtı Mahmûdü 'l-hisâl
İsm ü zâtında sa'âdet vâziha
3. N'eyleyem ammâ ki sûk-ı 'ömrde
Herkes olmaz ticâret râbiha
Dehr-i dînuñ gonçesin şemm itmedin
Aldı gülzâr-ı bekâdan râyiha
Gûş idince *irci 'î* fermânını
Oldı 'illiyyîne rûhı sâyiha
 6. Mâtemi ahbâbı medhûş eyleyüp
Fûrkatinden oldı dünyâ nâyiha
Didi VAHYÎ fevtinüñ târîhini
Meskenüñ Firdevs ola el-Fâtîha [1107]

22.

Târîh-i Namâzgâh Der-Sarây-ı Cedîd

Mefâ 'ilün Fe 'ilâtün Mefâ 'ilün Fe 'ilün

Müctes . . - - / . . - - / . . - - / . . -

- Semiyy-i fahr-i cihan hazret-i Muhammed Ağa
Ki zâtın eyledi Hak hüsn-i hulk ile teşrîf
Sitûde-hû ser-i bostânyân-ı hâtime kim
Du'â vü medh ü senâsındadır vazî' u şerîf
3. 'Atâ vü lutf u kerem lâzım-ı tabî'atıdur
Sehâ ile ider ma'dâsı eylese ta'rîf

Kemîne nazra-i ta'mîrine olup manzûr
Namâzgâh-ı latîf oldu bu mahall-i nazîf
Gelüp ziyâretine VAHYÎyâ didüm târîh
Makâm-ı dil-keş ü ra'nâ namâzgâh-ı latîf [1116]

23.

Târîh-i Vilâdet-i Şeh-zâde-i Cüvan-baht-ı Âhir

Fâ'ilâtün Fâ'ilâtün Fâ'ilâtün Fâ'ilün

Remel - . - - / - . - - / - . - - / - . -

- Şâh-ı 'âlî-rütbe Sultân Ahmed-i Dârâ-haşem
Hak bu kim şâyestedür eltâf-ı Rabb-i erhama
Yümn-i ikbâli cihâmı hâne-i sûr eyleyüp
Feyz-i lutfi 'âlemi hasr eyledi 'ayş ü deme
3. Kalb-i pâkin dâ'imâ Mevlâ neşât-âmîz idüp
Pây-mâl ide 'adûsın leşger-i derd ü gama
Virdi bir şeh-zâde-i hurşîd-kevkeb anı Hak
Kim nazîri olmadı manzûr çeşm-i âdeme
'Ârız-ı gül-fâmı reşk-endâz-ı tab'-ı mihr ü mâh
Dîde-i bâdâmı evsâfında yok tâkat feme
6. *Bâreka 'llâh* serv-i sîm-endâm-ı bâğ-ı saltanat
Kim ider şevk-i kudûminden melâ'ik zemzeme
Şübhesiz tevîk-i Mevlâdur şeh-i devrân için
Nâ'il olmak böyle bir necl-i sa'âdet-makdeme
Olsa bu şeh-zâde sâ'irden 'aceb mi ser-firâz
Çün semiyî oldu sa'âdetle habîb-i ekreme
9. Hak ta'âlâ 'ömrin efzûn eyleyüp iclâl ile
Satl-ı ıstablın hased-fermâ ide câm-ı Ceme
Gûş idince müjde-i teşrîfini şâdân olup
Lâyih oldu bir güzel târîh kalb-i hurreme
Zevk ü şevk ile teşekkür-gûne didüm VAHYÎyâ
Şükr geldi yümn-ile Sultan Muhammed 'âleme [1117]

24.

Târîh-i Vilâdet-i Şeh-zâde-i Cüvan-baht

Fâ'ilâtün Fâ'ilâtün Fâ'ilâtün Fâ'ilün

Remel - . - - / - . - - / - . - - / - . -

Hazret-i Sultân Ahmed Hân-ı 'âlî-şân kim
Görmedi ikbâlini Cemşîd ü İskender bile

- Rub‘-i meskûnı n’ola doldursa sıyt-ı şevketi
Vasf-ı pâki çünki neşr olmakdadur ilden ile
3. Virdi bir şeh-zâde-i sa‘d-ahter aña zü ’l-celâl
Seyr iden ruhsârın almaz bir dahı mihri dile
Cebhe-i pür-nûrına olmaz mu‘âdil mâh-tâb
Dest-mâl-i ebr ile Zühre meger rûyın sile
Gûş-ı eflâke n’ola ırgürse bang-ı vasfını
Ol ki Rûhu ’llâha hem-nâm idigin anuñ bile
6. *Bâreka ’llâh* yümn ile dünyâyı teşrîf ideli
Hirmen-i âlâmı şevk-i makdemi virdi yile
‘Ömrin efzûn eyleye şeh-zâdenüñ hem kendinüñ
Hazret-i Hakdan hemân ey dil bu ihsânı dile
Gûş idüp teşrîfîni VAHYÎ didi târîhini
Geldi ’İsî ibn-i Hân Ahmed vücûda ’izz-ile [1117]

25.

Târîh-i Binâ-yı Menzil

Mefâ ’ilün Mefâ ’ilün Mefâ ’ilün Mefâ ’ilün

Hezec . - - - / . - - - / . - - - / . - - -

- Sitûde-haslet İbrâhîm Ağa zât-ı kerem-pîşe
Bu devlet-hâneyi itdi binâyı himmet-i ‘uzmâ
Yapıldı feyz-i tedbîriyle bir menzilgeh-i dil-keş
Ki her nezzâresinde kesb olur bir hâlet-i uhrâ
3. İder intâc-ı hayret fikr olınsa şekl-i matbû‘ı
Olınsa midhat-i kübrâ aña nisbet olur suğrâ
Zihî zîbende menzil kim nukûşı gayret-i Mânî
Zihî rahşende me’vâ kim mesâsı dahvet-i kübrâ
Gül ü sünbül ruh u zülf-i nigârıñ evvelin resmi
Benefşe hatt-ı ‘anber-fâmına müsvedde-i ûlâ
6. Açılmış lâlenüñ dâğ-ı derûnı anı remz eyler
Ki derd-i dildür ancak ehl-i ‘ışka maksad-ı aksâ
Musaffâ câm ile ‘âlem-nümâ revzenlerin seyr it
İçinde bir nefes sohbet olur biñ seyrden a‘lâ
Hudâ idüp mu‘ammer sâhibin ikbâl ü devletle
Sa‘âdet-hânesin kılsun kirâma mesned-i isnâ’
9. Görüp tahsîn ile VAHYÎ du‘â-gûne didüm târîh
Müferrih cây-ı âsâyiş mübârek eyleye Mevlâ [1119]

26.

Târîh-i Dîger

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

Bi-hamdi 'llâh yine Sultân Ahmed Hân-ı Cem-câhuñ
Şu'â-i mihr-i ikbâlinden oldı pür-ziyâ dünyâ

Vücûda geldi bir şeh-zâde-i zîşânı anuñ kim
Görince cebhesin medhûş-ı reşk olur meh-i garrâ

3. Mu'anber turesi 'itr-ı meşâm-ı sünbül-i hoş-bû
Mutarrâ ruhları gül-gûne-i rûy-ı gül-i ra'nâ

Ta'âla 'llâh zihî necl-i hümayun-makdem ü mes'ûd
Bulınmaz kulzüm-i devletde mânendi dür-i yektâ

Ne işitdi nazîrin gûş-ı 'âlem olalı sâmi'
Ne gördi mislin anuñ çeşm-i dünyâ olalı bînâ

6. Semiyy-i hazret-i 'Îsâ-yı Rûhu 'llâhdur çün-kim
Ba'îd olmaz idersem vasfını eflâke dek a'lâ

Velî çün vafına yokdur nihâyet ol cüvân-bahtuñ
Revâ semt-i du'âya eylesem 'atf-ı suhan hâlâ

Mu'ammer eylesün devletle Mevlâ şâh-ı devrânı
Yetişsün bâğ-ı ikbâlinde ol şeh-zâde servâsâ

9. Tamâm^{en} lafz^{an} u ma'n^{en} didüm târîhini VAHYÎ
Cihâna geldi *biñ yüz on yedide* hamd Han 'Îsâ [1117]

27.

Târîh-i Lihye vü Mansıb Berây-ı Kethudâ-yı Kilâr-ı 'Âmire

Fâ 'ilâtün Fâ 'ilâtün Fâ 'ilün

Remel - . - - / - . - - / - . -

Hamd kilâr-ı şeh-i Cem-haşmetün
Kethudâsı hazret-i Dervîş Ağa

Hüsn-i hulk ile olup 'âlem pesend
Ma'rifetle buldı şânı irtikâ

3. Eyleyüp beş pâdşâhuñ hidmetin
Her birinden aldı tahsîn ü du'â

Oldı çün pergârveş hidmet-güzâr
Merkez-i nısfu 's-sülûki kıldı câ

Devlet-i Hân Ahmed-i zîşânda
Kâm-yâb itdi anı feyz-i Hudâ

6. Eyledi i'fâ-yı lihye izn ile
Oldı rûzî mansıb-ı 'âlî aña
Virdi bir hatt-ı hümâyûn-ı şerîf
Destine şâhenşeh-i sâhib-'atâ
H'âce-i dîvân sultânı olup
Anatolıda muhâsib ola tâ
9. Eyleyüp hattın sefid 'ömrin mezîd
Rütbesin Hak eyleye fevka 'l-'alâ
Hıfz idüp ekdârdan Bârî anı
Kalbine lutf ile vire incilâ
Oldı bu peygâm-ı şevk-engîz ile
Düşmenan mağmûm ahibbâ pür-safâ
12. Yazmağa târîh-i hatt u câhını
Hâmesin tahrîk iderken VAHYÎyâ
Didi hâtif gûşına bu mısra'ı
Hatt ile mansıb nasîb oldı saña [1121]

28.

Târîh-i Şeyhü 'l-İslâm-şüden Mahmûd Efendi Rahmetu 'llâh

Mef'ûlü Fâ 'ilâtü Mefâ 'ilü Fâ 'ilün

Muzâri' - - . / - . . . / . - - . / - . -

- Sad hamd mihr-i feyz-i Hudâ eyleyüp tulû'
İtdi hevâ-yı hâtır-ı ahbâb def'-i reyn
Mahmûd Efendi yümn ile müftî 'l-enâm olup
Oldı du'â-yı hayri 'avâm u havâsa deyn
3. İtdi Hakîm-i lem yezel âyîne-i dilin
Sûret-nümâ-yı cûd-ı 'Alî gayret-i Hüseyin
Hükmi virilmez âb-ı revân-ı nevâlinün
Eylerse de benânını fevvâre-i lüceyn
Zât-ı şerîfin eyleye Hak dâ'imâ masun
Ol hâlden ki anda ola ihtimâl-i şeyn
6. Evlâd-ı pâk-zâd-ı kirâmı bulup kemâl
Her biri 'ilm-i ma'rifete ola nûr-ı 'ayn
Efdâl ü fazla menba' idüp hânedânını
Lutfıyla hem-nişînin ide 'izz-i menzileyn
Zıll-ı hümây-ı hıfzın aña Hak penâh idüp
Hussâdın ide hem-dem-i bûm u gurâb-ı beyn

9. VAHYÎ görüp bu mertebe târîhini didüm
Mahmûd Efendi mesned-i fetvâyı kıldı zeyn [1125]

29.

Târîh-i Vefât-ı Birâder-zâde-i Sâhib-Dîvân

Müfte ‘ilün Fâ ‘ilün Müfte ‘ilün Fâ ‘ilün

Münserih - . . - / - . - / - . . - / - . -

Âh ki bâd-ı ecel bâğ-ı fenâda yine
Hâke salup itdi bir serv-i bülendi ‘adîm

Eyledi ‘Abdu ’l-Halîm dâr-ı bekâya sefer
Menzilini ‘Adn ide hazret-i Rabb-i Rahîm

3. Almadı dünyâda kâm görmedi rûy-ı merâm
Hâline virsün nizâm rûz-ı cezâda Hakîm

‘İlm ile me’lûf idi hilm ile ma’rûf idi
Sadrına mazrûf idi hak bu ki kalb-i selîm

Fevtine târîh ile eyledi VAHYÎ du‘â
Cennetî ide Kerîm mesken-i ‘Abdu ’l-Halîm [1118]

30.

Târîh-i Feth-i Cezîre-i Mora

Mefâ ‘ilün Mefâ ‘ilün Mefâ ‘ilün Mefâ ‘ilün

Hezec . - - - / . - - - / . - - - / . - - -

Ta ‘âla ’llâh zihî sâl-i hümâyun-fâl-i sa‘d-encâm
Ki oldı sûg-ı ehl-i küfr ü sûr-ı fırka-i İslâm

İdüp Sultân Ahmed Hân-ı Gâzî dîne i ‘zâzı
Guzât nusret-i âyâta cihâdı eyledi ifhâm

3. Mora mülkin ‘adû-yı dînden tahlîse kasd itdi
Olındı bahr ü berde iktizâ iden umûr itmâm

Vezîr-i a‘zam u dâmâd-ı ekrem dâver-i ‘âlem
‘Alî Paşa-yı sâ’ib-re’ye virdi râyet ü a‘lâm

Sa‘âdetle olup serdâr-ı nasr-âsâr-ı heybet-bâr
Freng-i hîle-âhenge çeküp ceyş itdi katl-i ‘âm

6. Kılâ‘ın feth idüp zabt itdi ser-tâ-ser Mora mülkin
Gazâ-yı ekber itdi sa‘yini meşkûr ide ‘Allâm

Bu tevfkûn olur mı şükri kim hükmi olup nâfiz
İde bir ülkenün teshîrine bir hamlede akdâm

Sadâkat-pîşe düstûr-ı savâb-endîşedür hakkâ
N’ola tekmîl-i ‘arz-ı devlete eylerse sa‘y-i tâm

9. Şecâ'atde salâbetde sehâvetde zarâfetde
Misâli olmadı revnak-dih-i âyîne-i evhâm
Zihî şâhenşeh-i ferhunde-kevkeb kim ide Mevlâ
Bunuñ gibi vezîr-i bî-nazîr ile aña ikrâm
Hudâ zât-ı şerîfin eyleyüp âfâtdan mahfûz
Du'âsın eyleye vird-i zebân-ı halk subh u şâm
12. Bağışlaya şeh-i devrâna ol düstûr-ı zîşânı
Ola devletlerinde hâs u 'âm âzâde-i âlâm
İdüp mihr ü mehâsâ birbirinden iktisâb-ı feyz
Umûr-ı devletüñ bula esâsı dâ'im istihkâm
Du'â-yı hayr u tahsîn âsmâna oldu peyveste
Olinca bu fütûhât-ı celîle zîver-i eyyâm
15. Bu feth-i bî-nazîre VAHYÎ-i dâ'î didi târîh
Mora mülkin yine aldı 'Alî Paşa-yı 'âlî-nâm [1127]

31.

Târîh-i Vefât-ı Mahdûm-ı Vezîr Muşâr^{um} İleyhi Rahimehüma 'llâh

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

- Hayf kim nâ-gâh mat'ûn^{en} idüp 'azm-i bekâ
Hâşimiyyü 'z-zât-ı mahdûm-ı necîb 'Abbâs Beg
Olıcak mecrûh-ı zahm-ı nîş-i zenbûr-ı ecel
Hun-feşân oldu şehâdetle vücûdı reg-i berg
3. Kimseye virmez amân ile zaman cellâd-ı merg
Hazır ol tîğ-ı kazâ-yı hissesinde başuñ eg
Bu zen-i dünyâya dil virme vefâ-düşmendür ol
Ne hayâl-i vuslat it ne hâtır-ı ağıyâra deg
Çün buyurmışdur hadîsinde resûl-i kibriyâ
Cîfe-i dünyâya rağbet eylemez illâ ki seg
6. Bülbül-i rûhı idüp pervâz târîhin didüm
Gülşen-i 'Adn içre mesken eyleye 'Abbâs Beg [1124]

32.

Târîh-i Vefât-ı Fâyik Efendi Rahmetu 'llâh

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

Dirîgâ tünd-bâd-ı mevt ile bâğ-ı ma'ârifde
Yine oldu hamîde bir nihâl-i müntehâ-kâmet

İdüp ‘azm-i bekâ Fâyik Efendi yakdı ahhâbı
Revân-ı pâkini Mevlâ ide ğark-ı yem-i rahmet

3. Müsellim fâyiku ’l-akrân idi semt-i ma‘ârifde
Husûsâ şî‘r ü inşâda kemâlin vasfa yok hâcet

Bilenler lezzet-i güftârını tercîh ider kanda
Anuñla gitdi gûyâ resm-i ülfet vâdî-i sohbet

Ma‘ârifle letâ’ifle sadâkatle zarâfetle
Kuzât içinde buldı şân u şöhet devlet ü ‘izzet

6. Olup kâzî-i İznikmîd iderken müddetin tekmîl
Olındı *irci’î* emriyle semt-i cennete da‘vet

Peyâm-ı fevtini gûş eyleyüp VAHYÎ didüm târîh
Ola Fâyik Efendinüñ İlâhî meskeni cennet [1127]

MUSAMMATLAR

1.

İlâhî-i Murabba‘-ı Na‘t-i Şerîf
Fâ‘ilâtün Fâ‘ilâtün Fâ‘ilâtün Fâ‘ilün
Remel - . - - / - . - - / - . - - / - . -

I

- Nefse uydum ğaflet ile eyledüm cürm ü hatâ
Yâ Resûla ‘İlâh şefâ‘at kıl baña rûz-ı cezâ
3. Bî-kes ü bî-çâreyem hâlüm saña kaldı saña
Yâ Resûla ‘İlâh şefâ‘at kıl baña rûz-ı cezâ

II

- Nev-be-nev fikr-i nevâlün itmese reşş-i zülâl
Hânuman-sûz-ı ümîd olurdu çokdan sû’-i hâl
3. Şefkat it oldumsa da ğavvâs-ı deryâ-yı vebâl
Yâ Resûla ‘İlâh şefâ‘at kıl baña rûz-ı cezâ

III

- Hayf kim sehv ile oldum deşt-peymâ-yı heves
Olmadum hâlî şenâ‘atden cihanda bir nefes
3. Çün ‘usât-ı ümmete sensin mu‘în ü dest-res
Yâ Resûla ‘İlâh şefâ‘at kıl baña rûz-ı cezâ

IV

- Rû-siyâhem mücrimem gerçi niyâza yok yüzüm
Hâk-i pâya saçmada eşk-i recâ ammâ gözüm
3. Mest-i ümmîdem *bi-hamdi ‘İlâh* budur dâ‘im sözüm
Yâ Resûla ‘İlâh şefâ‘at kıl baña rûz-ı cezâ

V

- Nâle-i şeb-gîrin iden sıdk-ıla hârâ-güdâz
Derd-i ‘isyâna bulur lutfun gibi bir çâre-sâz
3. Dimedede VAHYÎ kuluñ idüp saña ‘arz-ı niyâz
Yâ Resûla ‘İlâh şefâ‘at kıl baña rûz-ı cezâ

2.

Dîger

Fâ‘ilâtün Fâ‘ilâtün Fâ‘ilün

Remel - . - - / - . - - / - . -

I

- Hecr ile dil oldı zâr u nâ-tüvan
El-amân ey şâh-ı kevneyn el-aman
3. Vuslatuñla eyle anı şâdman
El-amân ey şâh-ı kevneyn el-aman

II

- Nefs-i bed-kîş eyleyüp hâlüm tebâh
Kâmetüm dâl eyledi bâr-ı günâh
3. Kendümi itsem yeridür vakf-ı âh
El-amân ey şâh-ı kevneyn el-aman

III

- Zîre-çîn-i sofrâ-i ihsânıñam
Neşve-cûy-ı sâğar-ı gufrânıñam
3. Mâ-hasal âvîze-i dâmânıñam
El-amân ey şâh-ı kevneyn el-aman

IV

- Dâ‘imâ sehv ü hatâ ef‘âlümüz
Sû‘-i a‘mâl olmada a‘mâlümüz
3. Lutfuñla kaldı hemân ahvâlümüz
El-amân ey şâh-ı kevneyn el-aman

V

- Kıl şefâ‘at VAHYİ-i âvâreye
Çâre yokdur ğayriden bî-çâreye
3. Merhem ur lutfuñla ol pür-yâreye
El-amân ey şâh-ı kevneyn el-aman

3.

Dîger

Fâ‘ilâtün Fâ‘ilâtün Fâ‘ilâtün Fâ‘ilün

Remel - . - - / - . - - / - . - - / - . -

I

- Müstemendem bî-kesem cürm ü kusûrum bî-‘aded
El-meded ey mefhar-i dünyâ vü ‘ukbâ el-meded
3. Kıl şefâ‘at ‘afv ide ‘isyânım Allâhü ’s-Samed
El-meded ey mefhar-i dünyâ vü ‘ukbâ el-meded

II

- Virmede nefis ü hevâ zevk ü safâya ihtilâl
Olmada günden güne efzûn ‘isyân u vebâl
3. Böyle kalursa helâk eyler beni bu sû’-i hâl
El-meded ey mefhar-i dünyâ vü ‘ukbâ el-meded

III

- Nâme-i a‘mâl olunca rûz-ı mahşer âşkâr
Çok gül-i ümmîd olur bâd-ı gazabla târmâr
3. Kendi hâk-i dergehüdüdür lutf umar VAHYÎ-i zâr
El-meded ey mefhar-i dünyâ vü ‘ukbâ el-meded

4.

Murabba‘

Fâ ‘ilâtün Fâ ‘ilâtün Fâ ‘ilâtün Fâ ‘ilün
Remel - . - - / - . - - / - . - - / - . -

- Merd-i ‘ârif kıl Hudâyâ ben kulun kim bî-kesem
Meskenüm yâ Rabbi ben ‘ukbâda ‘âlî isterem
3. Mertebem a‘lâ olur ise olur senden kerem
Merg irişmezse İlâhî şevk ile yâ Hû derem

5.

Tahmîs-i Pervâzı Na‘t-i Şerîf-i Nâdirî Rahmetu ‘Ilâhi Ta‘âlâ

Fâ ‘ilâtün Fâ ‘ilâtün Fâ ‘ilâtün Fâ ‘ilün
Remel - . - - / - . - - / - . - - / - . -

I

- Ey cemâlün şem ‘-i bezm-ârâ-yı kurb-ı Girdgâr*
V’ey cebînün mülk-i dîne âftâb-ı nûr-bâr
3. Enbiyâdur gülşen-i ‘ışkuında nâlende hezâr
Sen ki mahbûb-ı Hudâsın şevk-ile olsa ne var
Cebre ‘il âvâre-i nûr-ı ruhu pervânevâr

II

- ‘Âcizân-ı mahşer üzre zillüni teksîr için*
Harr u tâbından rehâyı ümmete takrîr için
3. Halka mihr-i ‘âlem-ârâ oldıgu tenvîr için
Şahs-ı pâkûn ser-te-ser nûr oldıgu teşhîr için
Sakladı dâr-ı fenâda sâyeşi Perverdgâr

III

- Şem‘-i zâtuñ olmasa dönmezdi fânûs-ı felek*
Zâhir olmazdı nukûş-ı hilkat-i ins ü melek
3. Mûcid-i arz u semâ vü Hâlik-i tayr u semek
İtmese lem‘ân nûr-ı vech-i pâkûñ şem‘i tek
Bunca eşkâl ü suver kandan olurdu âşkâr

IV

- Matlab-ı a‘lâ-yı ev-ednâyı cây itseñ n‘ola*
Rûtbe-i mevsûfî-i Tâhâyı cây itseñ n‘ola
3. Dâ‘imâ vuslatuña Mevlâyı cây itseñ n‘ola
Bir nefesde Sidre vü Tûbâyı cây itseñ n‘ola
Tîrveş itdün makâm-ı kâbe kavseyni güzâr

V

- Âsmânı âstânun zann idüp bekler Mesîh*
Ârzûmendî-i vasluñdur eyâ server Mesîh
3. Dest-bûsuñla şeref tahsîlini ister Mesîh
Mâ-hasal ger Hızr u ger İlyâs zinde ger Mesîh
Ümmetün den olmağa çekmekde dâ‘im intizâr

VI

- Yâ Resûla ‘llâh bir ednâ çâkerüñdür NÂDIRİ*
Mazhar-i lutfuñ olup ahz ide hazz-ı vâfirî
3. Kıl şefâ‘at tâ ki ola cennetü ‘l-Me‘vâ yiri
Tâlibân-ı feyzünün VAHYÎ-i ‘âsîdür biri
Gerçi cürmî çokdur ammâ lutfuña yokdur şumâr

6.

Terkîb-bend

Fe‘ilâtün Fe‘ilâtün Fe‘ilâtün Fe‘ilün
Remel . . . - / . . . - / . . . - / . . -

I

- Ey şeh-i ‘işve-sipeh düşmen-i eltâf u vefâ
V‘ey meh-i mihr-keş ü dil-ber-i pür-istignâ
Nigeh-i lutf ile evvel dili itdün yağmâ
Sonra kılduñ hedef-i nâvek-i dil-dûz-ı cefâ
3. Cânı itmekde esîr ol şiken-i zûlf-i dü-tâ
Dili itmekde şehîd ol nigeh-i hûş-rubâ
Hâne-i kalbi yıkup dest-i sitemle cânâ
Eyledün cilvegeh-i renc ü ‘anâ derd ü belâ

Âh u zâr eyler isem tutsun ahibbâ ma‘zûr
Âh u zâr ile olur ‘âşık-ı şeydâ meşhûr

II

Dil-berâ gamze-i gammâzuña kurbân olayım
Nazra-i çeşm-i fûsun-sâzuña kurbân olayım

Tîğ-i ‘uşşâk-keş-i nâzuña kurbân olayım
Hancer-i cevri ecel-bâzuña kurbân olayım

3. Gâh hışm u gehî i‘zâzuña kurbân olayım
O nigâhunadaki i‘câzuña kurbân olayım

Lutf-ıla şîveye âğâzuña kurbân olayım
Vakt-i güftârda âvâzuña kurbân olayım

Geh cefâ eyler isen gâhî vefâ eyle dile
Hastedür cevri ile lutfunla devâ eyle dile

III

Kıl tebessüm sanemâ dürr-i ‘Aden seyr idelüm
Eyle güftârûña bir gönçe dehen seyr idelüm

Göster ol kâkül-i müşgîni resen seyr idelüm
Sâha-i Rûmda âhû-yı Hotan seyr idelüm

3. Hasret-i rûyun ile verd ü semen seyr idelüm
Fıkr-i hattunla yine tâze çimen seyr idelüm

Sîne-i ‘âşık gel dâğ-ı kühen seyr idelüm
Bir zaman bâğçe-i derd ü mihen seyr idelüm

Çeşm-i dil bâde-i hicrâna olupdur sâğar
Kevser-i lutf ile toldur anı ey meh-peyker

IV

Dil-i şûrîdeyi mâtem-keş-i hicrân itdün
Giceler tâbe-seher derd ile nâlân itdün

Hasret-i la‘l-i lebünle cigerüm kan itdün
Âteş-i hecr ile bağrum dahı biryân itdün

3. Çeşmümi cûy gibi ‘ışk-ıla giryân itdün
Cismümi mûy-miyânun ile yeksân itdün

Ser-te-ser mülk-i dili cevri ile vîrân itdün
İtdigün cevri cihan halkını hayrân itdün

Yeter oldı yeter ey mâh-ruh insâf insâf
Eyle mihr-i dilümi ebr-i tazallumdan sâf

V

Nice bir dîde bu âlâm ile giryân olsun
Nice bir sîne bu ekdâr ile sûzân olsun

Sahn-ı kalbüm nice bir mahzen-i ahzân olsun
Bâğ-ı tab‘uñda gül-i lutf nümâyân olsun

3. Dimedün ‘âşık-ı şûrîdeñe şâdân olsun
Olsun ey şûh-ı cefâ-pîşe-i pür-ân olsun
Râziyüz cevre gam-ı hecrûñe pâyân olsun
Tek temâşâ-yı ruhuñ ‘âşıkâ âsân olsun
İdemem sabr şehâ çeşm-i gâzabla bakma
VAHYÎ-i haste-dili âteş-i hecre yakma

7.

Tahmîs-i Gazel-i Yahyâ Efendi

Mefâ ‘ilün Mefâ ‘ilün Mefâ ‘ilün Mefâ ‘ilün
Hezec . - - - / . - - - / . - - - / . - - -

I

- İden pür nergis ü gül câmı yârün çeşm ü gûşından
Alur bûy-ı vefâyı gonçe-i la‘l-i hamûşından
3. Gelince bezme dil-ber fart-ı lutf-ı bahr-i cûşından
Dirîğ itmez vefâsın ‘âşık-ı bî-sabr u hûşından
Niçe hazz itmesün dil sâde-rûnuñ bâde-nûşından

II

- Bulanlar halka-i ‘işretde bir bezm-i Cem ü Keyde
Görürler neş’e-i âvâz bülend ü nağme-i neyde
3. Riyâdur sûfî ta‘nuñ rind-i bî-pervâya her şeyde
Düşer tenhâda zâhid şübhesiz pây-ı hum-ı meyde
Düşürmez gerçi kim seccâdesin zâhirde dûşından

III

- Şehâ gamzen niçün âşüfteni pür-ıztırâb eyler
Dil-i şeydâyı zülfün gibi vakf-ı pîç ü tâb eyler
3. Unutmuş resm-i lutfi dâ’imâ hışm u ‘itâb eyler
Esâs-ı kârbân-ı hüsnüñi sakın harâb eyler
Hazer kıl seyl-i eşk-i ‘âşıkun cûş u hurûşından

IV

- Dil-i âvâre sayd oldu yine bir bû 'l-'aceb dâma
Giriftâr oldu derd-i 'ışka hem âlâm-ı eyyâma
3. Yeterken vaz'-ı ebrû hışm-ı gamze kalb-i nâ-kâma
Görinmez bir belâdur 'âşık-ı bî-sabr u ârâma
Meded göstermesün zülf-i siyâhın kelle-pûşından

V

- Ne rütbe ser-keş ü tünd olsañ ey şûh-ı melek-sîmâ
Licâm-ı sa'y ile teshîr ider 'uşşâkı bî-pervâ
3. Ne dir gûş eyle VAHYÎ şeyh-i fen pîr-i suhan-pîrâ
Alur biñ cân ile nakd-i revâna 'âkıbet YAHYÂ
Lebüñ kandini bâzâr-ı vefâ sükker-fürûşından

8.

Tahmîs-i Gazel-i Nasûhî

Mefâ 'ilün Mefâ 'ilün Mefâ 'ilün Mefâ 'ilün
Hezec . - - - / . - - - / . - - - / . - - -

I

- Gam-ı hecri idüp vuslat deminde yâd n'eylersin
Humârı bezm-i meyde eyleyüp îrâd n'eylersin
3. Zamîrûñ itme fikr-i nâ-becâ mu'tâd n'eylersin
Bu gündür gün ko olsun dil neşât-âbâd n'eylersin
Olup endîşe-i ferdâ ile nâ-şâd n'eylersin

II

- Niçe demdür ki dil sûzân-ı rûy-ı tâbdârûñdur
Esîr-i kâkülûñ mecrûh-ı tîğ-ı şu'le-bârûñdur
3. Harâb-ı la'l-i nâbuñ mest-i çeşm-i pür-humârûñdur
Nağam-gû bülbülûñ pervâne-i zâr u nizârûñdur
Yakup pervâneñi ey şem'-i âteş-zâd n'eylersin

III

- Dil-i şeydâ niyâz itdükçe efzûn olmada nâzuñ
Şikâr-ı kebg-i câna rağbet itmez çeşm-i şeh-bâzuñ
3. Ne gördük iltifâtûñ ne işitdük sarf-ı i'zâzuñ
Bulınmaz mülk-i istignâda şâhum şimdi enbâzuñ
Nedür kasduñ bu nahvetlerden ey bî-dâd n'eylersin

IV

- Bilen erbâb-ı ‘irfandur yine mikdâr-ı ‘irfânı
Olan sâhil-nişîn idrâk ider mi ka‘r-ı ‘ummânı
3. Suhan dürr-i yetîmin itme zîb-i gûş-ı nâ-dânî
Kelâmuñ ehle tevcîh eylemekdür saña erzânı
İdüp erbâb-ı cehle ‘arz-ı isti‘dâd n’eylersin

V

- Bilendi bu nazîreñle NASÛHÎ kuvvet-i tab‘uñ
‘Îyân oldu suhan erbâbına keyfiyyet-i tab‘uñ
3. Cihân olsa sezâ ahsent-h^vân-ı kudret-i tab‘uñ
Bu nazm-ı pâkden fehm oldu VAHYÎ hiddet-i tab‘uñ
Varup bir tâze vâdî eyleyüp îcâd n’eylersin

9.

Tahmîs-i Gazel-i ‘Avnî Efendi
Mefâ ‘ilün Mefâ ‘ilün Mefâ ‘ilün Mefâ ‘ilün
Hezec . - - - / . - - - / . - - - / . - - -

I

- Hayâl-i yârsuz bu çeşm-i eşk-efşânım eglenmez
Birer Yûsuf olursa ser-te-ser müjgânım eglenmez
3. Ba‘îd olmaz disem bir dem dil-i nâlânım eglenmez
Sefer ‘azmin mukarrer eylemiş cânânım eglenmez
N’ola tenhâ ‘adem mülkine gitsem cânım eglenmez

II

- Ne kanlar yutdurur gör ey perî-rû âdeme ‘ışkuñ
Derûn-ı ‘âşıkânı vakf ider derd ü gama ‘ışkuñ
3. Gamuñla eylenüp fâş eylemezdüm ‘âleme ‘ışkuñ
Hele muhtâc itmez ehl-i ‘ışkı hem-deme ‘ışkuñ
Seni andukça ammâ dîde-i giryânım eglenmez

III

- Niçe kesb-i safâ itsün bu mihnetzârda âdem
Göñül bî-sabr u dil-ber bî-rah[i]m derd ü belâ hem-dem
3. Firâkuñla olupdur verd-i kâm-ı dil yaşı şeb-nem
Baña hâr-ı belâdur gül yüzüñsüz gülşen-i ‘âlem
Bütün dünyâ benüm olsa dil-i nâlânım eglenmez

IV

- Yeter ey ğamze-i hod-re'y dehri pür-şürûr itme
Gel ey çeşm-i vefâ-kirdâr kendün reşk-i hûr itme
3. Dil-i 'uşşâkı cânâ cevrun ile pür-fütûr itme
Serîr-i hüsne şâh olduysa da şâhum gurûr itme
Bahâr-ı gülşen-i hûbî geçer sultânım eglenmez

V

- Harâb itse sezâdur VAHYÎ çeşm-i dil-rubâ kevnî
'İyandur her nigehe lutf-ıla âzârınun bevni
3. Dimiş ol şâ'irânun şûhî sâhib-nazm-ı hoş-levni
Bugün gül-geşt idermiş ol ser-âmed dil-berüm 'AvNî
Gelür kâşâneçe sabr it gül-i handânım eglenmez

10.

Terkîb-bend-i Tevbe-nâme

Fe 'ilâtün Fe 'ilâtün Fe 'ilâtün Fe 'ilün

Remel . . - - / . . - - / . . - - / . . -

I

- Ey gönül meyl-i gül-i 'ârız-ı dil-ber tâ key
Heves-i sünbül-i gîsû-yı mu'anber tâ key
Gülsitân-ı nazar-ı 'ibret olan çeşmünde
Nergis-i çeşm-i bütân ola musavver tâ key
3. Gâh olup mest-i visâl ü gehî mahmûr-ı firâk
Eylemen kendünî 'âlemlere manzar tâ key
Deşne-i ğamze vü tîr-i müjesin yâd iderek
Olasın haste vü mecrûh u mükedder tâ key
Gördigün servün olup pâyına su gibi revan
Dil-i âzâde ola hâk ile hem-ser tâ key
6. Niçe bir ârzû-yı vasl ile hasret çekelüm
Kıştâr-ı dile bir tohm-ı nedâmet ekelüm

II

- Yeter ümmîd-keş-i vuslat-ı dildâr olduk
Yeter âlâm-hor-ı ğamze-i hun-hâr olduk
Yeter ol turre hevâsıyla düşüp sevdâya
Dîdesin fikr iderek derd ile bîmâr olduk
3. Câm-ı lutfın umarak devlet-i tâli'de hele
Nâ'il-i sâgar-ı zehr-âbe-i âzâr olduk

Ârzû-yı nîgeh-i merhamet-i yâr iderek
Niçe müddet hedef-i ta‘ne-i âgyâr olduk

‘İşk-ı ruhsârı ile sînemüz itdük pür-dâğ
Zahm ile reşk-dih-i hâtır-ı gülzâr olduk

6. Geldi ol dem ki dili hâtıradan pâk ideyüz
Eşk-i ihlâs ile can çeşmini nemnâk ideyüz

III

Niçe bir nakd-i dili eyleye hûban yağmâ
Nahl-i kalbe niçe bir lerze sala bâd-ı hevâ

Niçe bir bahtum ile zülfini hem-şekl görüp
Dest-i endîşe kura başuma çetr-i sevdâ

3. Niçe bir ceyb-i emel rehn-i kefi ye’s olsun
Vakf-ı hâr-ı gam olup gûşe-i dâmân-ı recâ

Derd-i ‘ışkıyla olup bir büt-i şûhuñ rencûr
Niçe bir ola dil-i zâr-ı talebkâr-ı şifâ

Niçe bir ‘ârî idüp habs-i çeh-i rüsvâyî
İdesün kalbi rezîlâne tufeyl-i süfehâ

6. Vaktidür şimdi hevâ vü hevesi terk eyle
Hazret-i Hakka ‘ubûdiyyetünjî berk eyle

IV

Geçdi ‘ömrün heves-i midhat-i hûbanda senün
Kaldı ‘akluñ girih-i zülf-i perîşanda senün

Kaddine ‘ârızına mâ’il olup cânânun
Serv ü gül gibi dilün kaldı gülistanda senün

3. Fikret-i gerden-i kâfûr ile murğ-ı kalbün
Yandı pervâne-sıfat şem‘-i fûrûzanda senün

Masrafın tîr ü kemân itdi nukûd-ı eşkün
Ârzû-yı müje vü ebrû-yı cânanda senün

Tîğına hancerine ol kadar itdün tahsin
Ki hayâl olsa çıkar iki elün kanda senün

6. İmdi şimden-girü mir’ât-ı dilün sâf eyle
Yeter oldu ko elün sîneye insâf eyle

V

Rişte-i bâsıraya gevher-i ‘ibret nazm it
Silk-i endîşeye yâkût-ı sadâkat nazm it

- Vasf-ı dendânda tarh itdigün eş‘âr yeter
Turre-i h^vâhişe lü’lü-yi nedâmet nazm it
3. Demidür dîde-i dilden akıdup derd-ile hun
Sübha-i ‘özüne mercân-ı inâbet nazm it
Rîze-seng-i reh-i ebrâra sürüp pîşânî
Efser-i devlete elmâs-ı kerâmet nazm it
Zînetün eyleme har-mühre-i efkâr-ı mecâz
Târ-ı zülf-i dile gel la‘l-i hakîkat nazm it
6. Leşger-i himmet idüp fikr-i sivâyı yağmâ
Cilvegâh eyleye tâ kalbünî ‘ışk-ı Mevlâ

VI

- Kaysveş lâne-i murgân-ı hevâdur serümüz
Evc-i maksûda ‘urûc itmege yokdur yerümüz
İtmeyüp zühd ü ‘ibâdât ile tahsîl-i sevâb
Oldı mu‘tâd-ı güneh tab‘-ı hatâ-perverümüz
3. Rütbemüz göklere ırgürmek iken lâyıkomuz
Böyle kalursa eger yerde de kalmaz yerümüz
Hirmen-i ‘ömri bu gafletle yakup nâr-ı ecel
Şöyle ber-bâd olayuz kalmaya hâkisterümüz
Ne kadar derd ü belâ gelse gerek başumuza
Ne kadar renc ü ‘anâ görse gerek gözlerümüz
6. Baña yâ Rab o hâletleri teshîl eyle
Kemligüm fazlun ile eylige tebdîl eyle

VII

- Tevbe yâ Rab suhan-pâş-ı niyâz oldıguma
Tevbe yâ Rab heves-perver-i nâz oldıguma
Bir mehün hasret-i hâliyle olup necm-şumâr
Subha dek hem-nefes-i âh-ı dirâz oldıguma
3. Tevbe yâ Rab hevâ vü hevesi ‘ışk sanup
Mest-i ser-şâre-keş-i bezm-i mecâz oldıguma
Fikr-i vuslatla girüp ma‘reke-i ikdâma
Nev-be-nev zahm-hor-ı deşne-i âz oldıguma
Tevbe yâ Rab olup bülbüli her gonçe-femün
Âh-ı cangâh çeküp sîne-güdâz oldıguma
6. Tevbe sad tevbe reh-i ma‘siyete gitdigüme
Tevbe sad tevbe dilâ nefse uyup itdigüme

VIII

- Bir dahı meyl-i dem-i vuslat-ı yâr itmeyeyüm
Bir dahı ârzû-yı bûs u kinâr itmeyeyüm
Ruhların dîdelerin kâkülün anmak degil e
Bir dahı fikr-i gülistân u bahâr itmeyeyüm
3. Gülşen-i kûyını vasf eyleyerek dildârıñ
Kendümi bîhüde bûlbûl gibi zâr itmeyeyüm
Leblerin ağzıma almak degül ol gönçe-femün
Vakt-i gül-nâr olıcak ‘azm-i Hisâr itmeyeyüm
Ol kadar eyleyeyüm fikr-i kadın dilden dūr
‘Âlem-i h^vâbda da bâğa güzâr itmeyeyüm
6. Şol kadar eyledigüm işlere oldum nâdim
Ki hatâ mülkin olur na‘ra-i âhum hâdim

IX

- Zû ‘l-celâlâ beni nişter-hor-ı hırmân itme
Cürm ü ‘isyân ile ser-geşte vü hayrân itme
Tünd-bâd-ı gâzabuñdan beni hıfz it yâ Rab
Kâkül-i hâl-i dil-i zârı perîşân itme
3. Rûz-ı mahşerde idüp câh-ı hacâlet yerimi
Gül-nihâl-i emelüm hâk ile yeksân itme
Yüzümün karasını âb-ı keremle pâk it
Bu fezâhatle beni mazhar-i hüsrân itme
Varıcak şerm ile lutfuñ umarak hazretüñe
Sarsar-ı hışm ile mülk-i dili vîrân itme
6. Ne kadar mücrim isem gark-ı yem-i ihsân it
İki ‘âlemde beni mest-i mey-i gufrân it

X

- Yâ İlâhî şeref-i fahr-i cihan hurmetine
Âdeme nefh olınan rûh-ı revan hurmetine
*Leyle-i Kadr*deki vakt-i mübârek hakkı
Şeb-i İsrâda olan râz-ı nihan hurmetine
3. Eyleyüp sübha-i enfâsını vakf-ı ihlâs
Mest-i ‘irfân olan âgâh dilan hurmetine
Çeşm-i terden dökilen eşk-i nedâmet hakkı
Sûz-ı dille çekilen âh u figân hurmetine

Şeb-i fürkatde olan vahşet ü dehşet yerine
Dem-i vuslatda olan emn ü aman hurmetine

6. Ne kadar oldu ise lââyık-ı habs-i derekât
VAHYİ-i rû-siyehi eyle mukîm-i cennât

EL-ELGÂZ

1.

Fe 'ilâtün Mefâ 'ilün Fe 'ilün

Hafîf . . - - / . - - / . . -

- Nedür ol dil-ber-i cihân-ârâ
Kâm-bahşâ vü menkabet-pîrâ
Şekli matbû' u kâmeti merbû'
Vaz'ı masnû' u pâyesi merfû'
3. Rûyı gül-rîz ü zülfî 'anber-bîz
Hatı nev-hîz ü câme reng-âmîz
Geh kabâsı sefid ü geh gül-gun
Geh siyeh câme ile fitne-nümun
Gâh olur çün 'arûs-ı dîbâ-pûş
Zer ü zîverle halka 'işve-fürûş
6. Aña meşşâta tab'-ı pâk-i kibâr
Zînet-i zâhire ne minneti var
Hâs u 'âm olmuş aña dil-dâde
Kimse 'ışkından olmaz âzâde
Pâk-dâmân u şûh-ı şîrînkâr
İder 'uşşâkı bir nigehele şikâr
9. Zülf-i pür-çîni murğ-ı câna kafes
Hanceri kûçe-i recâya 'ases
Beyze-i tîğ-ı ğamzesini kazâ
Kârgâh-ı ezelde çekmiş tâ
Aña kimse tasaddur eyleyemez
Mîr u paşa tekebbür eyleyemez
12. Meger ol nev-hat olına tercîh
Ki ide hüsni 'âlemi tefrîh
VAHYîyâ fehm iden müsellim olur
Ehl-i 'irfân içinde mükrim olur

2.

Lügaz-ı Dîger

Fe 'ûlün Fe 'ûlün Fe 'ûlün Fe 'ûl

Mütekârib . - - / . - - / . - - / . -

Nedür ol 'arûs-ı murassa'-libâs
K'ola h'âbgâhında mahsûd-ı nâs

- Seb[i]z-pûş olup gâh u geh sürh-pûş
Olur dâ'imâ meskenetle hamûş
3. Firâşındadır rûzda dâ'imâ
'Acebdür şebe irse olur cüdâ
Gıdâsı olupdur anuñ sîm ü zer
Yidügin yine yer virürseñ eger
Çü 'âşık ser-â-ser olup cismi dâğ
Yine 'ışk-ı dil-berden itmez ferâğ
6. Der-âğuş ola şûh-ı gül-ruhlara
O kasdı hemîşe safâlar süre
Murâdı olup dest-bûs-ı nigâr
Olur subh u şâm ol murâd aña yâr
Bakan cismine seyr-i gülzâr ider
O şevk ile fıkır-i ruh-ı yâr ider
9. Olup cismi mânendi anda zeban
Dahı vûs'at üzre begâyet dehan
Olur evveli cîm ü nûn âhiri
Dilâ reşk-i 'uşşâk olursa yeri
Bu ma'nâyı fehm eyleyen VAHYÎyâ
Re'îs-i zarîfân olursa sezâ

3.

Lügaz-ı Dîger

Fe 'ilâtün Mefâ 'ilün Fe 'ilün

Hafîf . . - - / . . - - / . . -

- Nedür ol tuhfe kulle-i mînâ
Meyl-i sebz üzre oldu cılve-nümâ
Burc ber-burc eyleyüp üstâd
Eylemiş muhkem anı çün pûlâd
3. Yıkmadın kimse kapusın açamaz
Habs olan anda taşraya kaçamaz
Ni'meti çok bilen koyup gidemez
Şûredür âbı kimse nûş idemez
Kişi nâ-puhte olsa her ne kadar
Bir zarâfetle yol bulup anı yer
6. Hakk-ı nân u nemek sayan âdem
Diyemez ben o ni'meti sevmem

VAHYÎyâ feth iden bu nev-lügazı
H^vân-ı ‘irfândan yedi çerezi

4.

Lügaz-ı Dîger

Fe ‘ilâtün Mefâ ‘ilün Fe ‘ilün

Hafîf . . - - / . . - - / . . -

Nedür ol mâr-ı ejdehâ-kâmet
Mâr iken kârı ‘âleme hidmet
Ekli yok şûrb ile ta‘ayyüş ider
Ekserî şerbete ta‘attüş ider

3. Zahmet-i cû‘ ile nizâr olmuş
Za‘f ile zâr u bî-karâr olmuş

Yine kan dökmedür velî kârı
Zehri çok kimseye olur sârî

Gice olur ininde h^vâb-âlûd
Ya‘nî bî-hûş u pîç ü tâb-âlûd

6. Rûz olunca yine olup ber-pâ
San‘atın başlar itmege icrâ
Güci yetdiği kimseye ulaşur
Lâgarî tekyesin bile dolaşur
Bildürür nice âdeme haddin
Cezm ider fehmi fikr iden kaddin

9. VAHYÎyâ keşf iden suhandâne
Câ‘ize ber ‘asâ-yı şeş-hâne

5.

Lügaz-ı Dîger

Fe ‘ilâtün Mefâ ‘ilün Fe ‘ilün

Hafîf . . - - / . . - - / . . -

Nedür ol dil-küşâ cihân-nümâ
Gâh olur pest ü gâh olur bâlâ
İhtimâm eylese anı mi‘mâr
Bir nefesde yıkar yapar tekrâr

3. Vardur içinde havz u fevvâre
Ki virür zîb ü zînet ol dâra

Çıkup inmekde olarak devvâr
Âb-ı fevvâresinde bir gül-nâr

- Var meger bir kemer terâzûsı
Gâh irür sakfa âb-ı dil-cûsı
6. Sakfı zîbende vü mukarnesdür
‘Alem-i kubbesi mukavvesdür
- Gerçi sûrâh çok zemîninde
Vehn yok lîk şeh-nişîninde
- Dökilür katre katre âb andan
Hâne olmaz velî harâb andan
9. VAHYÎyâ anı idinen ma‘lûm
Sahn-ı ‘âlemde itdi def‘-i gumûm

6.

Lügaz-ı Dîger

Fe ‘ilâtün Mefâ ‘ilün Fe ‘ilün

Hafîf . . - - / . . - - / . . -

- Nedür ol kal‘a-i ‘acîb ü rasin
Aña bir hıttâ olmamış ta‘yin
- Bâb-ı sakfında bâb sîne gibi
Geşt ider ‘âlemi sefine gibi
3. İçi bahr-i sefidür anuñ
Eseridür o bahr-i tûfânıñ
- Anda var bir cezîre-i matbû‘
Kürre-i zemherîrveş merfû‘
- Seyr iden anı kulle zann eyler
Sâhil-i bahre zülle zann eyler
6. Bir cezîre bu kim bihişt-misâl
Bî-bedeldür hevâsı âbı zülâl
- Var anuñ da içinde bir deryâ
Ki letâfetde yok nazîr aña
- Eylemiş anı bir semek menzil
Semek ammâ ki haylî deryâ-dil
9. Kadi bâlâ vücûdı dahı kebîr
Olmış ol bahr aña havz-ı sağîr
- Kuyruğı ferş ile bitişmişdür
Fevk-i ‘arşa başı yetişmişdür
- Nûş idüp bahri bir harâret ile
‘Arz ider âdeme zarâfet ile

12. İdemez ‘arz olmasa ğavvâs
Bu kelâmı nişanla parmak bas
Kuyruğında dehânı gör ‘acebî
Burnı başında anla olma ğabî
Cümle evsâfin eyledüm işrâb
Fıkr-i tağlîta düşmesün ahbâb
15. VAHYÎyâ feth iderse bir ‘ayyâr
Bula ehl-i suhan yanında vakâr

7.

Lügaz-ı Dîger

Fe ‘ilâtün Fe ‘ilâtün Fe ‘ilün

Remel . . - - / . . - - / . . -

- Nedür ol çâker-i nâzûk-reftâr
Ayağı yok topuğı parmağı var
İncedür sarığı kalyoncu gibi
Kavuşu çizmelerün koncu gibi
3. Gündüz ahşâma dek eyler hidmet
Gice âzâd olup olur râhat
Gicede hidmete itse ikdâm
Yakar âteşlere anı huddâm
Harfî penç evveli cîm âhiri yâ
Bilmeyen itmeye da‘vâ-yı zekâ

8.

Lügaz-ı Dîger

Fe ‘ilâtün Mefâ ‘ilün Fe ‘ilün

Hafîf . . - - / . . - - / . . -

- Nedür ol iki ahter-i seyyâr
Ki feleklerle oldılar devvâr
Eyler iken bile tulû‘ u gurûb
Biri birini görmemişler hûb
3. Her biri gerçi ahter-i kihter
Lîk hurşîd ü mâhdan bihter
Görinür sûretâ sehâbâsâ
Nûrı ammâ ki âftâbâsâ
Rûzı mağmûm olursa da mekşûf
Şebi mekşûf olursa da meksûf

6. Ahter-i sa‘d-ı burc-ı hikmetdür
Reh-nümâ-yı fezâ-yı ‘ibretdür
Bir siyeh şâlı gûyiyâ bürinür
Halka tîr ü kemân ile görünür
Oldı bârân anuñla germ-ülfet
Berf ile var bürûdeti gâyet
9. Hükmin ol ahterüñ beyân idelüm
Eseri n’idügin ‘iyân idelüm
Nazar iden aña olur hod-bin
Bunı ‘ilmü ’l-yakîn kıl ta‘yin
Bu eser olsa munkatı‘ ammâ
Ola peydâ kıyâmet-i suğrâ
12. VAHYİYâ fehm iden nazar-bâzuñ
Yeridür sadrı bezm-i i‘zâzuñ

9.

Lügaz-ı Dîger

Mefâ ‘ilün Mefâ ‘ilün Fe ‘ûlün

Hezec . - - - / . - - - / . - -

- Nedür ol nev-cüvân-ı sîm-pehlû
Dem-â-dem dîdelerden akıdur su
Aña dil-dâde iken şâh u dervîş
Esîr-i ‘ışk o da giryân u dîl-rîş
3. Vücûdî şerha şerha dâğ-ber-dâğ
Yine ğusl ü vuzûda eyler isbâğ
Şifâ-yı sadr bulmaz dökmese yaş
Aña rahm eyler âdem olsa da taş
Zer ü zîverle ol şûh-ı dîl-ârâ
Olur ‘uşşâk-ı zâra hâlet-efzâ
6. İder zevk-i bihişti nutk u tezkîr
İderse mâ-cerâsın saña takrîr
Bunı fehm eyleyen sâhib-tabî‘at
İde VAHYÎ derûnın bâğ-ı cennet

10.

Lügaz-ı Dîger

Mefâ 'ilün Mefâ 'ilün Fe 'ülün

Hezec . - - - / . - - - / . - -

Nedür ol münzevî dervîş-i hayran
Ki çıkmaz hânesinden taşra bir an

Lisân-ı halka tutarsañ velî gûş
Sayarlar anı rind-i hâne-ber-dûş

3. Fakîr-i bî-nevâ ser-pâ bürehne
Komışdur câmesin var-ısa rehne

Meşin tennûre idinmiş o kallâş
Metânetle murakka' hırkası taş

Olursa ol murakka' pâre pâre
Medâr olur yine bir pâre kâra

6. Se harf oldu anuñ tâzîce nâmı
Gezer seyyâh olup Mısır ile Şâmı

İder VAHYÎ bu remzi fehme himmet
Çeküp baş hırkaya bulan selâmet

11.

Lügaz-ı Dîger

Fe 'ilâtün Mefâ 'ilün Fe 'ilün

Hafîf . . - - / . - - - / . . -

Nedür ol iki havz-ı pâk-i latîf
Çüfte havz aña nisbet ile kesîf

Oldı bir tâka ikisi beste
Buldı kuvvet suyn içen haste

3. Suyı gâyetle sâf turna gözi
Kimsenün yok letâfetine sözi

Dibine akçe düşse pâre olur
Sûzen içinde san menâre olur

VAHYÎyâ fehm iden kebîr olsun
Ma'rifetle kemâl pîr olsun

12.

Lügaz-ı Dîger

Fe‘ilâtün Mefâ‘ilün Fe‘ilün

Hafîf . . - - / . . - - / . . -

Nedür ol kulle-i cihân-nümâ
Ki olur kıblegâh-ı mîr ü gedâ
Rûzgâr itmez aña hîç zarar
Kühnelenmez geçerse biñ yıl eger

3. Tarzı matbû‘ u resmi şevk-efzâ
Fî ‘l-mesel bir ‘arûs-ı bî-hemtâ

Aña bânîsi ‘arşı sakf itmiş
Fukarâ ola diyü vakf itmiş
Lîk süknâsın eylemiş meşrût
Olana ‘ışk u şevk ile mahlût

6. Bir gice sâkin olan anda velî
Sağ çıkmaz sabâha gör keseli
Keşf iden VAHYÎyâ bu ma‘nâyı
Açdı dilden zalâm-ı sevdâyı

13.

Lügaz-ı Dîger

Fe‘ilâtün Mefâ‘ilün Fe‘ilün

Hafîf . . - - / . . - - / . . -

Nedür ol şahs-ı münhanî-i nahîf
Kendi pâkîze vü libâsı nazîf
Münzevî meyl-i ihtilât itmez
Kimseye ‘arz-ı inbisât itmez

3. Lîk pîr ü cüvân ile mahrem
Ber-ser ü rû tutar anı âdem
Gerçi kim bâğban degüldür bu
Dolıdur desti sünbül ü şeb-bû
Dil-berün zülf ü hattı fikriyle
Cebhe vü rûy-ı alı zikriyle
6. Cismini ‘ışka lâlezâr itmiş
Sînesin ya‘nî şerhadâr itmiş
Nâm u şâna yok i‘tibârı anuñ
Lîk ma‘lûmdur ‘iyârı anuñ

- Gâh künc-i hafâda kâ'id olur
Gâh kasr-ı zücâca sâ'id olur
9. Ekseriyâ olur ta'âm u şarâb
Aña 'ûd u 'abîr ü 'itr u gül-âb
Sulehânun enîs ü gam-h'ârı
Süfehânun mu'în ü pindârı
Ceyş-i hîre talî'a-i cerrâr
Sipeh-i fitneye dahı dümdâr
12. Nâmı Türkî vü Fârisî se vü çâr
Kılca yok 'aybı vü hüner bisyâr
Her kim eylerse n'idüğün ta'yin
Aña bir kîse tolusı tahsin
İsmi resmini beyân itdüm
Mâ hüve 'l-vâki 'i 'iyân itdüm
15. Bilmeyen gayri dil-hırâş olsun
Bıyığı dikine tırâş olsun

14.

Lügaz-ı Dîger

Fe 'ilâtün Mefâ 'ilün Fe 'ilün

Hafîf . . - - / . . - - / . . -

- Nedür ol tuhfe kubbe-i suğrâ
Yapmış anı mefâzede bennâ
Üstüvâr u musanna' u hemvâr
Dil uzatma dilün yanar zinhâr
3. Vech-i teşbîhi var aña yâran
Diseler türbe-i şeh-i mâran
Mahzen-i sükker eylesen anı
Nâmı olurdu zehr dükkânı
VAHYîyâ çâr harfdür ismi
Şerbet-i hecre şîşedür cismi

15.

Lügaz-ı Dîger

Fâ 'ilâtün Fâ 'ilâtün Fâ 'ilün

Remel - . . - / . . - - / . . -

Ol ne nâzük mîve olur ey piser
Mazhar-i hayrû 't-ta'âm-ı mâ-hazar

- Ni‘met-i cennet gibi tabh istemez
Dûzah erbâbından olanlar yimez
3. Kesret-i ekinde yokdur imtilâ
Belki ekl oldukça artar iştiâ
Vardur ekinde hezârân intifâ‘
Lîk heftâdı müberhen bî-nizâ‘
Ekl iden bel‘ itmez anı def‘ ider
Def‘ idüp terk itmez anı ref‘ ider
6. Şekl-i kissâ gibidür ammâ nahîf
Ekli insânı ider pâk ü nazîf
VAHYÎyâ elden koma ikrâmını
Bî-vuzû alma lisâna nâmını

16.

Lügaz-ı Dîger

Fe ‘ilâtün Mefâ ‘ilün Fe ‘ilün

Hafîf . . - - / . . - - / . . -

- Nedür ol turfe şehr-i bî-mânend
Evleri muhkem ü mülûk-pesend
Yolı hemvâr u çeşmesi cârî
Ratb iken hâk sebzedden ‘ârî
3. Halkınun ekseri siyeh-pûşan
Mestleri velî ‘arak-nûşan
Tîg der-kâr ü küşteler pâ-mâl
Fî ‘l-hakîka ne ceng var ne cidâl
Satılan anda kâle-i Hama
Semeni dürr-i pâk-i bî-hemtâ
6. Hîle ta‘lîm iderken İblîse
Ehl-i sûkı yine tehî kîse
Emredi mültefit şuyûhı mihan
Fukarâ ağniyâ ile yeksan
Kimse kânûnını anuñ bozamaz
Ehl-i küfr anda râkib^{en} gezemez
9. Ol ki VAHYÎ bu remzi fehm eyler
Hâs ola aña belde-i ‘Abkar

17.

Lügaz-ı Dîger

Fe‘ilâtün Fe‘ilâtün Fe‘ilün

Remel . . - - / . . - - / . . -

Nedür ol Mevlevî-i sebz-külâh
Ki fenâ itmiş anı mahv ü tebâh

Cismi yok görünür ancak bir ser
Sâ‘at-i ‘ömrine olmuş mihver

3. Külehi gayr idinür başına tâc
Bu külâhı başa eyler îlâc

Külehi çıksa eger başından
Ola pür-kâse kefi aşından

Bunı fehm eylese bir nâdire-bin
VAHYÎyâ başına tâc-ı tahsin

18.

Lügaz-ı Dîger

Fe‘ilâtün Mefâ‘ilün Fe‘ilün

Hafîf . . - - / . . - - / . . -

Nedür ol pâk-tab‘ hizmetkâr
Kâbil ü nükte-fehm ü kâr-güzâr

İtmez izhâr-ı ‘acz efendisine
Kûhı tahmîl iderse kendisine

3. Def‘ idüp şerr ü şûr u gavgâyı
Dost eyler senûñle ma‘dâyı

Keşf-i râz eylemez emânetkâr
Sîne-i sâfi mahzen-i esrâr

Ehl-i ‘ilm ü suhanver ü ‘ârif
Var mı bir fen ki olmaya vâkıf

6. Söylese sözde hiç lâf itmez
Ne diseñ anı dir hilâf itmez

Dir isem aña ‘askerî yeridür
Sanki üsküfli bir yeñiçeridür

Giydügi hep libâs-ı fâhirdür
Gâhî pinhân u gâhî zâhirdür

9. Gâh ider âteş-i gamı teskin
Gâh olur bâ‘is-i figân u enin

Gâh sükker akar zebânından
Gâh âteş çıkar dehânından
Ağzın öp VAHYÎ ol suhan-sâzuñ
Çöze bendin bu kîse-i râzuñ

19.

Lügaz-ı Dîger

Fe ‘ilâtün Mefâ ‘ilün Fe ‘ilün

Hafîf . . - - / . . - - / . . -

- Nedür ol pâsbân-ı bî-fânûs
Şeb-rev-i kûçe-gerd çün câsûs
Ceng-cûyende erkegi dişisi
‘Ases ammâ ki yok ‘ases başısı
3. Eylemez havf mîr ü paşadan
Çekmez el şerr ü şûr u gavğâdan
Aña kâdir ki eyleyüp tedbîr
İde bir sa‘b kal‘ayî teshîr
Gâh bir şehre katl-i ‘âm eyler
Halkınuñ kârını tamâm eyler
6. Gâh anı bir ‘acûz sayd eyler
Defter-i küşteğâna kayd eyler
VAHYÎyâ fehm iden bula rif‘at
Avcı başılığa giye hil‘at

20.

Lügaz-ı Dîger

Fe ‘ilâtün Mefâ ‘ilün Fe ‘ilün

Hafîf . . - - / . . - - / . . -

- Nedür ol turfe mâr-ı pîçîde
Tu‘me berçîde vü cihan-dîde
Nısfı bî-rûh u âhiri zî-rûh
Gelür anuñla niçe kâra fûtûh
3. Hamle eylerse âdemi kaçırur
Kaçmayup dursa zehrler içirür
Süzilüp gâh olur levendâne
Sarılur nahl-i kadd-i cânâne
Unıdup fikr-i turre vü ca‘dı
Görse insân aña olur sa‘dî

6. Kârı şerr ü fesâd bir ef'î
Lîk neyl-i merâma var nef'î
VAHYÎ fehm iden eylesün idrâk
Olur insâf o mâr içün tiryâk

21.

Lügaz-ı Dîger

Mefâ 'ilün Mefâ 'ilün Fe 'ülün

Hezec . - - - / . - - - / . - -

1. Nedür ol al yañahlı tâze mahbûb
Gehî Yûsuf olur gâhîce Eyyûb

22.

Lügaz-ı Dîger

Fe 'ilâtün Mefâ 'ilün Fe 'ilün

Hafîf . . - - / . - - - / . . -

1. Nedür ol selh-hâne-i memdûh
Bulınur anda günde biñ mezbûh
2. Kesilür gerçi dâ'imâ kurban
Damlamaz taşına velîkin kan
3. Anlayan levnden selâmetini
Bildî kassâbınun hazâkatini

23.

Lügaz-ı Dîger

Mefâ 'ilün Mefâ 'ilün Fe 'ülün

Hezec . - - - / . - - - / . - -

- Nedür ol pür-hüner cerrâh-ı dâna
Hıcâmetde bulunmaz aña hemtâ
Açar bir def'ada yüz şerha-i ter
Tutar her şerha içün başka nişter
3. Acıtmaz şerhasından kan akıtmaz
Velîkin yarası yıllarca gitmez
Birinün ursa nişter sînesine
Urur evvel dil-i bî-kînesine
Olursa VAHYÎyâ hâtır-pesendi
Bu 'akdi hall ider ŞEHDÎ EFENDÎ

24.

Lügaz-ı Dîger

Fe‘ilâtün Fe‘ilâtün Fe‘ilün

Remel . . - - / . . - - / . . -

Nedür ol tekve-i hemvâr-ı binâ
Oldı meşrûta-i erbâb-ı fenâ
Cümle sükkânı nemed-pûşândur
‘İşk bezminde kadeh-nûşândur

3. Giyinüp hırkaların halvetde
Çıkarırlar olıcak kesretde

İnkisâr almadan olan hâ’if
Anlaruñ semtini olmaz tâ’if

VAHYÎyâ her kim anı feth eyler
Zurefâya olur o ser-defter

25.

Lügaz-ı Dîger

Fe‘ilâtün Mefâ‘ilün Fe‘ilün

Hafîf . . - - / . . - - / . . -

Nedür ol muttasıl iki hâne
Ru’yeti feyz-bahş olur câna

Biri fevkânî biri tahtânî
Kendine mâ’il eyler insânı

3. Beyt-i süflî vesî‘ ü ‘ulvî teng
Zâhir egerçi ikisi hem-reng

Kürevî ikisi de sûretde
Degül ammâ küre hakîkatde

Beyt-i ‘ulvîde revzen ü bâbı
Andan almalı dâne vü âbı

6. Koşşı kapısı vardur ‘ulvîden
Geçe süflîye istedükçe geçen

Bu iki hâne şey’-i vâhiddür
Sâhibi zâhid ü mücâhiddür

Gâlibâ ‘âbidâna kâ’im olur
Sanma kim gâfilâna nâ’im olur

9. Gâh âteşlere olur gül-han
Gâh olur âb ü tâb içün mahzen

Gâh kandîlveş mu‘allak olur
Geh muhallâ gehî müverrik olur
Bu lügaz VAHYÎ ‘ârifânecedür
Hallinüñ semti nâzükânecedür

26.

Lügaz-ı Dîger

Fe ‘ilâtün Mefâ ‘ilün Fe ‘ilün

Hafîf . . - - / . - - - / . . -

- Nedür ol murg-ı yek-per ü deh-pâ
Şekli matbû‘ u kâmeti bâlâ
Şâh-bâz ile eylesem temsîl
Tîz-perlikde olmaz aña ‘adîl
3. Hüsni tâvûsdan füzunterdür
Belki ‘ankâ ile ber-â-berdür
Mâlik olmuş egerçi deh deste
N’eyleyem destî pâyına beste
Rûyî yâ mültehî ya sâdecedür
Cânî yâ penç ü yâ ziyâdecedür
6. Penç ü yekdür ser ü dehânî bil
Cümle şeyden alurlar anî bil
Dürlü dürlü ta‘âmı var anuñ
Enfesi hüsndârî insânuñ
Günde ekl itse on nefer âdem
Sıyr olmaz ğıdâsı olmaz tam
9. Mübtelâ sût’-i mi‘deye ammâ
Kay’ ider her ne yerse subh u mesâ
Peri olsa şikeste bî-pervâ
Pâylarla ider o tayy-i hevâ
Pâylerde şikeste olsa eger
Yine düşmez zemîne geşt eyler
12. Seri kat’ olsa olmaya eseri
Rûhî kabz olsa görmeye zararı
VAHYÎyâ fehm iden suhan-perdâz
Evc-i rif‘atde eylesün pervâz

27.

Lügaz-ı Dîger

Fâ'ilâtün Fâ'ilâtün Fâ'ilün

Remel - . - - / - . - - / - . -

- Bil nedür ol kal'a kim olmuş 'iyan
Bir gürûh olmuşlar anda pâsban
Ni'mete müstağrak iken subh u şâm
Yimez içmez söylemez anlar kelâm
3. Bunların eşkâline itseñ nigâh
Kimi ak kimi kızıl kimi siyâh
Cümlesi ol kal'ada mahbûsdur
Taşra çıkmakdan bular me'yûsdur
Ol zaman kim ola ol kal'a harâb
Pâsbanlar için olur feth-i bâb
6. Cümlesi eylerler 'azm-i sebzezâr
Her biri yapar başına bir hisâr
Evveli kâf oldu zâdur âhiri
Rağbete lâıyıkdur el-hak fâhiri

28.

Lügaz-ı Dîger

Fe'ilâtün Mefâ'ilün Fe'ilün

Hafîf . . - - / . . - - / . . -

- Nedür ol iki şahs olup zevceyn
Biri birini eylemişler zeyn
Birisi merddür anuñ biri zen
Müttehidler arada yok sen ben
3. Her biri serv-kadd ü hûb-likâ
Lîk yek-pâ vü nâkısı 'l-a'zâ
Birinüñ pâyı kendüye bînî
Anda hem dîde-i cihan-bîni
Birinüñ pâyı enfidür hem fem
N'eyleyem nutka yok mecâl ebkem
6. İçirürler aña budur 'âdet
Kırmız ile benefşeden şerbet
İçer ammâ ki hazma yok imkân
Başı döner gelür heman gaşeyan

- Kay' idüp def' iderse râhat olur
İtmese haste-i yübûset olur
9. Yine içer müli olur şerbet
Hükmin icrâya tâ bula kudret
Elde h^vânende gibi dâ'iresi
Bilür edvârı lîk yok nefesi
Gâh olur kutb-ı vakte hidmetkâr
Gâh olur mest ü gâh esîr-i humâr
12. VAHYÎyâ penç harfdür nâmı
Fehm iden aldı 'ilmden kâmı

29.

Lügaz-ı Dîger

Müfte 'ilün Müfte 'ilün Fâ 'ilün

Serî' - . . - / - . . - / - . -

- Bil nedür ol cünd-i Süreyyâ-nizâm
Fâtih-i ebvâb-ı kılâ'-ı-merâm
Olmasa bir kal'aya bunlar yakın
Çihre-nümâ olmaya feth-i mübin
3. Her birinün var siperi başda
Sihr-nümâ hamle vü perhâşda
Tîğ u sinân ile degül müftehir
Âlet-i harb ancak aña münhasır
Birbirine nusret idüp dâ'imâ
Oldı bular rifk ile müşkil-küşâ
6. Ekl-i nefâyisle bulup iştihâr
Eylediler niçeleri hissedâr
Bunlar için ekser olur intihâb
Kakma ilik kuş başı fâhir kebâb
Kimisi sünnî kimisi sürh-ser
Her biri bir san'at ile mu'teber
9. Kimi tavîl ü kimisi mu'tedil
Kimi kasîr olmağa da muhtemel
Kimi sunar câm-ı şehâdet saña
Olmuş iken şemmede âlet saña
Kimi 'ibâdetde olur muktedâ
Ehl-i hevâya kimi lu'bet-nümâ

12. Kimi muhallâ kimisi sâdedür
Tâc-ı ‘izâma kimi dil-dâdedür
Kâ'im ü râki‘ dahı sâcid bular
Geh müte‘addid gehî vâhid bular
Olmasa bunlar okınur mı kitâb
Olmasa bunlar bilinür mi hisâb
15. Didiler erbâb-ı suhan VAHYÎyâ
Bu lügazı feth idene merhabâ

30.

Lügaz-ı Dîger

Fe‘ilâtün Fe‘ilâtün Fe‘ilün

Remel . . - - / . . - - / . . -

- Nedür ol leşger-i sâhib-savlet
Mağribî-sûret ü Hindî-sîret
Milket-i Rûmda hükmi gâlib
‘Arabistâna çok olmaz râğib
3. Düşmene girmede haylî pür-fen
Siper ü nîzesi a‘zâsından
Hasmınun âletin alup sipere
Cismine irmez anuñ yara bere
İdinür her biri bir hânesi teng
Tûşesi olur anuñ âhen ü seng
6. Gerçi hâkim degül ammâ zâbit
Biri birine kulûbı râbit
‘Âlem olurdı harâb olmasa ol
Bulamazdı kişi eyvânına yol
Kad ü kâmetde kimi ‘ivec gibi
Cücedür kimisi Ye‘cüc gibi
9. Bunlaruñ başına çok hâl gelür
Gâh nîk ü gehî bed-fâl gelür
Kimi evrengde sultanlık ider
Kimi keştîde kapûdanlık ider
Oğrı gibi tutılurlar gâhî
Olmamışlarken o râha râhî
12. Kiminüñ boğazına ip takılır
Kimi âteşlere yanar yakılır

- Kapularda kimi olur mahbûs
Kimisi dâra çekilür menkûs
Kimisi tomruğa urılur anuñ
Kimisi de işe sürilür anuñ
15. Gerçi sârik degül anlar mesrûk
Olur işkencede ammâ medkûk
VAHYÎyâ bu lügazuñ haylî adak
Feth iden itdi der-i dânişi dak

31.

Lügaz-ı Dîger

Fe ‘ilâtün Mefâ ‘ilün Fe ‘ilün

Hafîf . . - - / . . - - / . . -

- Nedür ol altı hem-dem ü hem-râh
Mahrem ü râzdân-ı bende vü şâh
Her biri nev-cüvân u sâde-‘izâr
Her biri hoş-nihâd u hoş-kirdâr
3. Kişi anlarla hıfz-ı sıhhat ider
Hem ‘ibâdetde isti‘ânet ider
Altısı birden olsa isti‘mâl
Her mahalde olur münâsib hâl
Olsa yâ dördü yâ ikisi eger
Yine sâhiblerinüñ işi biter
6. Olsa yâ beş ya üç ya bir ammâ
Eyler insânı suhre-i zurefâ
VAHYÎyâ bu lügaz müsellemdür
Çıkaran bezm-i zevke mahremdür

32.

Lügaz-ı Dîger

Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . -

- Bil nedür ol ‘âlem-ârâ merd ü zen
Kim gelür anuñ elinden her düzen
Biri zulmet birisi âb-ı hayât
Zulmeti ‘ayn-ı hayât âbı memât
3. Bahr-i esveddür biri biri sefîd
Ak deñiz ammâ telâtumda şedîd

Ma‘denî biri nebâtîdür biri
Oldı hayvânî ve lîkin zâhirî

Ma‘denî düzmiş nebâtîden mihâd
Ol da hayvânîye itmiş istinâd

6. Ma‘denîden idinüp ol da libâs
Birbirinden hüsn iderler iktibâs
Bu lügazdur gûyiyâ genc-i defin
VAHYİYâ fehm idene sad âferin

33.

Lügaz-ı Diğer

Fe‘ûlün Fe‘ûlün Fe‘ûlün Fe‘ûl
Mütekârib . - - / . - - / . - - / . -

Nedür ol siyeh-çerde mahdûm-ı pâk
Olur dâ‘imâ ‘ışk-ıla tâbnâk

Perî-rû melek-hû semen-bû latîf
Sehî-kadd ü gül-had nazîf ü nahîf

3. Rubûde aña ins ü cinn ü melek
Olnca perî böyle olmak gerek
‘İbâdetle me‘lûfdur dâ‘imâ
Salâh ehline bu olur pîşvâ
Külâh-ı seri tâc-ı zerrîndür
Nişîmen aña taht-ı la‘îndür

MU‘AMMEYÂT

1.

Be-nâm-ı Mustafâ

Mefâ‘ilün Fe‘ilâtün Mefâ‘ilün Fe‘ilün

Müctes . . . / . . . / . . . / . . .

1. Dehân u çeşm ü ruh-ı yâri eyle gel seyran
Anuñladur göñül ‘âlemde feyz-i bî-pâyan

2.

Be-nâm-ı Seyfî

Fâ‘ilâtün Fâ‘ilâtün Fâ‘ilâtün Fâ‘ilün

Remel - . . . / . . . / . . . / . . .

1. Hoş yaraşdı taraf-ı rûy-ı yâre zülf-i ser-nigun
Kim ider nezzâresi ‘uşşâka îrâs-ı cünun

3.

Be-nâm-ı ‘Abbâs

Fâ‘ilâtün Fâ‘ilâtün Fâ‘ilâtün Fâ‘ilün

Remel - . . . / . . . / . . . / . . .

1. Dîde çeşm-i mest-i cânânı görüp pür-nûr olur
Bânî-i dildür diyü hâtır dahı ma‘mûr olur

4.

Be-nâm-ı İmâm

Fâ‘ilâtün Fâ‘ilâtün Fâ‘ilâtün Fâ‘ilün

Remel - . . . / . . . / . . . / . . .

1. Cismini sûzân iderdi reşk-ile itdükçe âh
İki zülf-i ‘anberînün resmini görseydi mâh

5.

Be-nâm-ı Sinân-ı Ümmî

Mefâ‘ilün Fe‘ilâtün Mefâ‘ilün Fe‘ilün

Müctes . . . / . . . / . . . / . . .

1. Çü meyl-i bî-had-i dil rûy-ı yâredür her dem
Yine anuñla bulur zahmına göñül merhem

6.

Be-nâm-ı Yahyâ

Fâ‘ilâtün Fâ‘ilâtün Fâ‘ilâtün Fâ‘ilün

Remel - . . . / . . . / . . . / . . .

1. Bir zamîri nakşını yârün lebi hâmûş iken
İntikâl eylerdün ammâ gamzedür hep men‘ iden

7.

Be-nâm-ı ‘Ömer

Fe‘ilâtün Fe‘ilâtün Fe‘ilâtün Fe‘ilün

Remel . . . - / . . . - / . . . - / . . -

1. Gördüğüm dil-bere çün hâle sarılmam dir imiş
Dil-i şûrîde meger mâh-‘izâr ister imiş

8.

Be-nâm-ı ‘Alî

Mefâ‘ilün Fe‘ilâtün Mefâ‘ilün Fe‘ilün

Müctes . . . - / . . . - / . . . - / . . -

1. O mâh ile gice bî-had safâ-yı vuslat iden
Cihanda biñ yaşasun kalur ise sağ ve esen

9.

Be-nâm-ı Bekir

Fâ‘ilâtün Fâ‘ilâtün Fâ‘ilâtün Fâ‘ilün

Remel - . . - / - . . - / - . . - / - . -

1. Bir nigehle şöyle zahm urduñ dile kim gûyiyâ
Sînede peykânı kaldı tîrûñ ey kaşı ya

10.

Be-nâm-ı Temîm

Mefâ‘ilün Fe‘ilâtün Mefâ‘ilün Fe‘ilün

Müctes . . . - / . . . - / . . . - / . . -

1. Leb-i tebessüm-i cânâna bezl-i cân eyler
Meger ki ‘ışk-ıla âşüfte oldı gönçe-i ter

11.

Be-nâm-ı Sâbit

Mefâ‘ilün Fe‘ilâtün Mefâ‘ilün Fe‘ilün

Müctes . . . - / . . . - / . . . - / . . -

1. Bütânı itdi dil-âşüfte lezzet-i leb-i yâr
Hisâbı var serine dâğın eylese tekrâr

12.

Be-nâm-ı Ca‘fer

Mef‘ûlü Fâ‘ilâtü Mefâ‘ilü Fâ‘ilün

Muzâri‘ - . . - / - . . - / - . . - / - . -

1. Zülfün ser-i dili idüp ey mâh kendîden
Mecrûh-ı cevır olsa n’ola sonra pâ-şiken

13.

Be-nâm-ı Dâvûd

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. Mudârâ câmesin çâk itdi dest-i ye's ile hâtır
N'ola peyveste kılsañ tîrûñ oldı cân u dil hâzır

14.

Be-nâm-ı Zâtî

Fe 'ilâtün Fe 'ilâtün Fe 'ilâtün Fe 'ilün

Remel . . - - / . . - - / . . - - / . . -

1. Kendi dâ'î olur âşüftelige 'âşıkı yâr
Ki ruh u zülfine bir iki dūr asmış tekrâr

15.

Be-nâm-ı Râmî

Mefâ 'ilün Fe 'ilâtün Mefâ 'ilün Fe 'ilün

Müctes . . - - / . . - - / . . - - / . . -

1. Şarâb câmesin eylerdi çâk 'âşıkvâr
Olaydı kendüye peyveste neş'e-i leb-i yâr

16.

Be-nâm-ı Zeynî

Mefâ 'ilün Fe 'ilâtün Mefâ 'ilün Fe 'ilün

Müctes . . - - / . . - - / . . - - / . . -

1. Çü mâh rûy-ı nikâb-âverin göre yârûñ
Yanında ebrû-yı pür-çîn ola o ruhsârûñ

17.

Be-nâm-ı Sinân

Fâ 'ilâtün Fâ 'ilâtün Fâ 'ilün

Remel - . - - / - . - - / - . -

1. Mihre bî-had nâz ider ol şîvekâr
Yüzi nûrından idince hissedâr

18.

Be-nâm-ı Şâhîn

Fâ 'ilâtün Fâ 'ilâtün Fâ 'ilün

Remel - . - - / - . - - / - . -

1. Mihrveş eylerdi rûyın şu'le-bâr
Mâhı kendüye mukârin görse yâr

19.

Be-nâm-ı Ahmed

Fe‘ilâtün Mefâ‘ilün Fe‘ilün

Hafîf . . - - / . . - - / . . -

1. İsm-i cânân ki harfî çâr olur
Birin ihrâc idince biri kalur

20.

Şu‘ayb

Fe‘ilâtün Fe‘ilâtün Fe‘ilün

Remel . . - - / . . - - / . . -

1. Didüm ismün nedür ey meh-peyker
Didi ol nısfı durur zıdd-ı hüner

21.

‘Osman

Fâ‘ilâtün Fâ‘ilâtün Fâ‘ilâtün Fâ‘ilün

Remel - . - - / - . - - / - . - - / - . -

1. Ol perî-rû dâ‘imâ çün-kim Hudâya şükr ider
Başı ucında bulur kalkınca bir zer her seher

22.

Hüseyin

Fe‘ilâtün Mefâ‘ilün Fe‘ilün

Hafîf . . - - / . . - - / . . -

1. İsm-i ‘Osmân olunca nâ-bînâ
Gelse bir sîn olur adı peydâ

23.

Muhammed

Mefâ‘ilün Mefâ‘ilün Fe‘ülün

Hezec . . - - - / . . - - - / . . - -

1. Didüm bir dil-bere ismün beyân it
Didi nâz ile ol bir medde muhtâc

24.

‘Alî

Fe‘ilâtün Mefâ‘ilün Fe‘ilün

Hafîf . . - - / . . - - / . . -

1. Dil-bere ismünî bağışla didüm
Didi esmâ içinde birdür adum

25.

İsmâ'îl

Mefâ 'ilün Mefâ 'ilün Fe 'ülün

Hezec . - - - / . - - - / . - -

1. Şu ismün pâyna neşr it 'iyâlün
Ki bir bûseyle hâsıldur hayâlün

26.

Halîl

Fe 'ilâtün Fe 'ilâtün Fe 'ilâtün Fe 'ilün

Remel . . - - / . . - - / . . - - / . . -

1. Gicede hecrün-ile uyhunun âb ü tâbı
Gitdi sun câna mey-i la'l-i leb-i nâ-yâbı

27.

Sâlih

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

1. Âb u âteş sulh olurdu çeşmin itse tîredâr
Bir nighle Rüstemi kılsa hirâsan vechi var

28.

Ziyâ

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. Sabâ yârün ruhından almış iki hâl-i şûrîde
Birisin cânına kor birin eyler merhem-i dîde

29.

Tâhir

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. Reh-i bî-gâyede işkeste-pâ eyler gamun cânı
İçende âh idersem ey perî ma'zûr tut anı

30.

Zahîr

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

1. Hüsn-ile ruhsâr-ı pâki eyledi kendin şehîr
Eyleyüp izhâr bir hâl-i siyâh-ı bî-nazîr

31.

‘Âlî

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

1. Nûr-ı mahz olmışdur ey dil ol meh-i ‘âlî-cenâb
Hâle itse âftâbı ola bî-had feyz-yâb

32.

Garîb

Mefâ ‘ilün Fe ‘ilâtün Mefâ ‘ilün Fe ‘ilün

Müctes . - . - / . - - - / . - . - / . - -

1. Recâ-yı vuslata havfıyla gerçi varmaz dil
Dil-i hazîn düşer hâsılı bu şübheye bil

33.

Fethî

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

1. ‘Âşık-ı güm-geşte-dil fevt itdi vakt-i vuslatı
Muttasıl oldukça zinde beklesün ol fursatı

34.

Kadrî

Mefâ ‘ilün Mefâ ‘ilün Mefâ ‘ilün Mefâ ‘ilün

Hezec . - - - / . - - - / . - - - / . - - -

1. O bâlâ-kâmetün dâmânın öpse mâh lâyikdur
Ki vechi ile ol şâh-ı cihân akrâna fâyikdur

35.

Kemâl

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

1. Mâh-rûyî âh-ı bî-had çekdürür bülbüllere
Gül den itdi hâlesin var-ısa hüsn ol dil-bere

36.

Latîf

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

1. Hüsnüğe dil-bestedür ‘akl-ı Felâtün-kemâl
Zülfüne peyvestedür dilde hemîşe hem hayâl

37.

Velî

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. Dem-i nezzâre oldı şevk-bahş-ı hâtır-ı gamgin
Miyân-ı mûy u rûy-ı lâle-reng ü ebrû-yı pür-çin

38.

Hâşim

Fe 'ilâtün Mefâ 'ilün Fe 'ilün

Hafîf . . - - / . - - - / . . -

1. Olsa peyveste tâk-ı 'arşa sezâ
Âh-ı dil mihr-i bî-hadûnle şehâ

39.

Yûsuf

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. Olup me'yûs akıtdı âb-ı dîde 'âşık-ı sâ'î
N'ola lutfından âhir olsa kendi vuslata dâ'î

40.

Be-nâm-ı Seyyid Ahmed Sûzî-i Âteş-nihâd

Mef'ûlû Fâ 'ilâtü Mefâ 'ilü Fâ 'ilün

Muzâri ' - - - / - - - - / . - - - / - - -

1. Ol mihr-i hüsni nev-be-nev idüp nezâregâh
Rûy u miyân u pâyna toyınca kıl nigâh

41.

Hâmid

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. Görüp ebrûnı geldi gurre şevke bî-karâr oldı
Ruhun fikriyle bedr oldı velîkin dil-figâr oldı

42.

Mustafâ

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. Dehân u çeşmine bî-had tufeyl ol dil-berün ammâ
Göz açdurmaz hirâs-ı gamzesi 'âşıklara aslâ

43.

Mustafâ

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. Şarâbî câme giydükde safâ-yı bî-had eyler yâr
Derûnında tutar bir âftâbuñ rûyını her-bâr

44.

Muhammed

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. Mahal bî-hadd ü bî-pâyan meded-res olsa cânâna
Cihânuñ bendedür halkı ser-â-pâ şâh-ı devrâna

45.

Enîs

Mef'ûlü Mefâ 'ilü Mefâ 'ilü Fe 'ûlün

Hezec - - . / . - - . / . - - . / . - -

1. Dil-ber ki ser-i zülf ola ruhsârına perde
Medhûş ider 'uşşâkını hengâm-ı nazarda

46.

Muhammed

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . - -

1. Dil tahammül câmesin çâk itdi gördi meh yüzün
Zülfini dahı göreydi çâk iderdi kendüzün

47.

Mâdih

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. O âfetsiz eger mihr olsa meclis olmaya rûşen
İki zülfün añup âhir dü-tâ kıl kaddi hasretten

48.

Ahmed

Fe 'ilâtün Fe 'ilâtün Fe 'ilâtün Fe 'ilün

Remel . . - - / . . - - / . . - - / . . - -

1. Çâre-i yâre-i dil gamze-i hun-hâr olsa
Şerha içre baña bir hancer-i zerkâr olsa

49.

‘Ömer

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

1. Gerçi gamzen gösterür her lahzada zîbâlığıñ
Lîk hüsnüñ hışm ile tahkîk ider ra‘nâlığıñ

50.

Mûsâ

Fe ‘ilâtün Fe ‘ilâtün Fe ‘ilâtün Fe ‘ilün

Remel . . - - / . . - - / . . - - / . . -

1. Târ-ı zülfüñ leb-i la‘lînüñ peyveste gören
Gird-i hâtemde şehâ hurde sevâd eyler zan

51.

Ahmed

Fe ‘ilâtün Fe ‘ilâtün Fe ‘ilâtün Fe ‘ilün

Remel . . - - / . . - - / . . - - / . . -

1. Göñül bâğ-ı tahayyülde gül-i maksûdına yetdi
Leb-i hasretle geldi bûs-ı rûy-ı fikr-i yâr itdi

52.

Hasan

Mefâ ‘ilün Mefâ ‘ilün Mefâ ‘ilün Mefâ ‘ilün

Hezec . - - - / . - - - / . - - - / . - - -

1. Çû bîned şûh-ı ‘aklem zülf-i tû der-dest-i nâ-dânî
Leb-i hayret gezîd ez-gam be-dendân-ı perîşânî

53.

İbrâhîm

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

1. İki cânibden tarîk-i ‘ışkı su almış şehâ
Biri eşk ü birisi fikr-i cemâl-i dil-rubâ

54.

İshak

Mefâ ‘ilün Fe ‘ilâtün Mefâ ‘ilün Fe ‘ilün

Müctes . . - - / . . - - / . . - - / . . -

1. Didüm o dil-bere ismüñ ne ise di başa gel
Didi kim âhir-i eshârdan çıkar evvel

55.

Tâhir

Fâ 'ilâtün Fâ 'ilâtün Fâ 'ilün

Remel - . - - / - . - - / - . -

1. Bilmek istersen kim oldığın nigâr
İsmi tashîf ile olur âşkâr

56.

Muvaşşahât-ı Be-nâm-ı Ahmed

Mef'ûlü Mefâ 'ilü Mefâ 'ilü Fe 'ülün

Hezec - - . / . - - . / . - - . / . - -

1. İzhâr idemez sûzişini 'âşık-ı şeydâ
Hâl-i dil-i zârum güzelüm âhdan anla
2. Meyl eyleyeli zülfüne bir tûl-i emelvâr
Dilde anı feryâd-ı sehergâhından anla

57.

Muvaşşah-ı Be-nâm-ı İsmâ'îl

Fâ 'ilâtün Fâ 'ilâtün Fâ 'ilün

Remel - . - - / - . - - / - . -

- Âh kim tîğ-ı gam-ı hecrün şehâ
Sînede ârâm eyler dâ'imâ
Mâ'il-i hüsnün olanlar sıdk-ıla
'İşret-i hecrünle kesb eyler safâ
3. Yansa nâr-ı fûrkatünle gam degül
Lâyıkıdur 'âşıkun derd ü belâ

58.

Mustafâ

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

1. O meh pâyn çeküp dâmânın öpdürmez saña bir kez
Hayâl olsa dil-i âşüfte ammâ hîç aman virmez

RUBAÎLER

1.

Rubâ'î

1. Yâ Rab suhanum riyâz-ı 'irfân olsun
Her harfî nazîre-i Gülistân olsun
2. Bir vech-ile âb u tâb bahş it aña kim
Mahsûd-ı ruh-ı zekâ-'izârân olsun

2.

Rubâ'ıyyât Der-Teveccüh-i Râh-ı Hicâz Gofte-end Elif

I

1. Ey mûcid-i kâr-hâne-i arz u semâ
V'ey mevkid-i meş'al-i zuhûr-ı dü-serâ
2. VAHYÎ kuluñı şeh-i rusûl hurmetine
Kıl iki cihanda mazhar-i zevk ü safâ

II

1. Ben haste vü bî-kes ü garîbem yâ Rab
Hasret-keş-i hem-dem-i tabîbem yâ Rab
2. Lutf u keremün tabîb ü gam-h^vârûm kıl
Çün 'âzim-i dergeh-i habîbem yâ Rab

III

1. Yâ Rab baña mahabbetün her dem yâr it
Gehvâre-i dilde tıfl-ı 'ışkî bîdâr it
2. Tâ hatt-ı lutf kabûl ide kâğıd-ı kalb
Mesh-i yed-i feyz ü kudretünle âhâr it

IV

1. Yâ Rab dilümi hizâne-i 'irfân it
Kirdârımı rişte-i dür-i ihsân it
2. Serdî-i hevâ marîz-i cürm itdi beni
Ma'cûn-ı nevâl-i 'afv ile dermân it

V

1. Yâ Rab kederüm safâya eyle bâ'is
Derd-i dilümi devâya eyle bâ'is
2. Çün eyledigüm hatâya oldum nâdim
Lutfunla anı 'atâya eyle bâ'is

VI

1. Her derdüm idüp ‘inâyetünle ifrâc
Ben hasteyi eyleme tabîbe muhtâc
2. Lutfuñla mukaddemât-ı fikrüm itsün
Yâ Rab netâyic-i murâdum intâc

VII

1. Ey zerre-i lutfi mihr-i rahşan ferah
Kıl bendeñi zîb-i sadr-ı eyvan ferah
2. Aç verd-i murâdumı nesîm-i fazluñla
Eyle dil-i zârumı gülistan ferah

VIII

1. Yâ Rab beni itdi nefsi-i zâlim güstâh
Kim oldu makâlüm ü fa‘‘âlüm güstâh
2. Güstâhlığum karîn-i ‘afv u lutf it
Oldıysa da ger cemî‘-i hâlüm güstâh

IX

1. Ey şâh-ı cemî‘-i pâdşâh-ı ‘âlem
‘Afv eyle günâha mübtelâdur âdem
2. Serdâr-ı gürûh-ı müznibânam lîkin
Her demde recâ-yı ‘afvuñ ile şâdam

X

Mef‘ûlü Mefâ‘ilü Mefâ‘ilü Fe‘ûlün
Hezec - - . / . - - . / . - - . / . - -

1. Ey vâhid ü Kakhâr olan hazret-i Allâh
V’ey ‘Âlim ü Settâr olan hazret-i Allâh
2. ‘Afv eyle günâh-ı bî-şumâr-ı ehl-i zenbi
Ey Ekrem ü Gaffâr olan hazret-i Allâh

3.

Rubâ‘iyyât Der-Ravza-i Mutahhara Be-Muvâcehe-i Şerîfe-i Mu‘allaka est

I

1. Ey VAHYÎ açup hizâne-i ebyâtı
Çek silk-i beyâna dürr-i hüsnıyyâtı
2. Yaz na‘t-i şerîf mefhar-i ‘âlem için
Tertîb-i hurûf ile rubâ‘iyyâtı

II

1. Ey 'illet-i 'âfirîniş arz u semâ
V'ey rûyı yanında mihr ü meh 'ayn-ı hebâ
2. Bir lem'a-i feyzün isterem ihsân it
Eyle dil-i pür-melâli memnun-ı 'atâ

III

1. Ey efdal-i enbiyâ habîb-i vehhâb
Olmaz mı kitâb-ı fazluğa bu bir bâb
2. Kim devlet ile sen olmadıkça dâhil
Feth itmeye kimseye bihişti bevvâb

IV

1. Ey şâh-ı 'atâ sipâh-ı vâlâ-himmet
İskender olur kuluğ olan bî-minnet
2. Hızır-ı keremün refik iden râh-reve
Zehr-âb hayâtdur ziyâdur zulmet

V

1. Ey zâtı olan zuhûr-ı kevne bâ'is
Nûruñdan olur ziyâ-yı hestî hâdis
2. Ol bezm-i visâle evvelin sânisin kim
Ma'sûk ile 'âşık bulınmaz sâlis

VI

1. Ey cebhe-i enverî sirâc-ı vehhâc
Zulmetden olan senünle olur ihrâc
2. Cibrîl iremez sürâdik-i rif'atüne
Yetmez mi delîl aña emr-i Mi'râc

VII

1. Ey bâb-ı şefâ'ati 'usâta meftûh
Lutfunğdur iden dil-i hazîni meşrûh
2. Sar dest-i keremle merhem-i ihsânun
Peykân-ı hevâ derûnum itdi mecrûh

VIII

1. Ey resm-i der-i nevâline sed güstâh
V'ey kâ'ide-i 'atâsına red güstâh
2. Çok mı döşenince h^vân-ı lutfun ferdâ
Şeb'ân-ı şefâ'at olsa bî-had güstâh

IX

1. Ey Hâmid ü Ahmed ü Muhammed Mahmûd
İsmündür olan redîf-i ism-i ma'bûd
2. Şâhid dileyen fazîlet-i bâhireçe
Kılmaz mı teşehhüd-i salâtı meşhûd

X

1. Ey gâm-ı güneş şefâ'atünle mültez
V'ey bende vü şeh himâyetünle mültez
2. Elbette olur gîdâ-yı mikrâz nedem
Leb k' olmaya kand-i midhatünle mültez

XI

1. Ey cism-i şerîfî gayret-i nûr-ı basar
Pervâne-i şem'-i 'ârızun şems ü kamer
2. Vasfun sığamaz sahîfe-i imkâna
Yüz binde birin beyân-ı kasd itsem eger

XII

1. Ey h^vâce-i kâm-bahş-ı erbâb-ı niyâz
H^vân-ı keremün vesîle-i tohme-i âz
2. Bir bezm-i kemâle zîb-i sadr oldu eger
İdrâk olamaz o meclise mahrem-i râz

XIII

1. Ey kulzüm-i bî-kerân-ı feyz-i akdes
Dest-i keremün yanında Hâtem nâ-kes
2. Bir mertebe bezl-i nakd-i cûd itdün kim
Hemyân olamaz o nakde çarh-ı atlas

XIV

1. Ey hulkı tabîb-i derd-i şâh u dervîş
Bîmâr-ı gam-ı firâkam oldum dil-rîş
2. Ma'cûn-ı nevâl ü şerbet-i lutfunla
Bulmaz mı şifâ derûn-ı vuslat-endîş

XV

1. Ey dürc-i dür-i giran-bahâ-yı ihlâs
Feyzün dile eyle reh-nümâ-yı ihlâs
2. Zulmet kapuğa gelince kesb eyler nûr
Kûyunda bulur riyâ safâ-yı ihlâs

XVI

1. Ey zerre-i hâk-i pâyi kân-ı zer-i feyz
Hak tab‘unı kıldı bahr-i pür-gevher-i feyz
2. Rü’yâda bile humâr-ı haclet göremez
Destünğden içen piyâle-i Kevser-i feyz

XVII

1. Ey vafına mahfil-i sa‘âdet meşrût
V’ey medhine minber-i siyâdet merbût
2. Bir nokta kadar kusûr yokdur sende
Olmazsa ‘aceb mi nâm-ı pâkûn menkût

XVIII

1. Ey sırr-ı suhan-sütûr-ı *Levh-i Mahfûz*
Ferş olsa yolunğda ‘arş olurdu mahzûz
2. *Levlâke lemâ halektüden* fehm olunur
Sen olmasağ olmaz idi ‘âlem melhûz

XIX

1. Ey besmele-i kitâb-ı sun‘-ı sâni‘
Yıllarca gören cemâlün olmaz kâni‘
2. Biñ şerm ile eylerem recâ vuslatunı
‘Afv eyle kusûrum olma lutf it mâni‘

XX

1. Ey pâdşeh-i serîr-i hüsn-i iblâğ
Bir kâlîba nush u pendî itdün ifrâğ
2. Kim lezzet-i nutk-ı pâküne reşkinden
Yakdı serine ‘akîde-i sükker dâğ

XXI

1. Ey mâye-i iftihâr-ı eşrâf-ı selef
İtdi seni Hak Halîline hayr-i halef
2. Bir dürr-i yetîm-i bahr-i hikmetsin kim
Mevlâ saña ‘ışk-ı pâkini kıldı sadef

XXII

1. Ey tab‘ı le‘âl-i lutf deryâ-yı ‘amîk
La‘l-i lebün oldu gayret-i câm-ı rahîk
2. Her katresin itdi bahr mercân-ı kemâl
‘İşkuñla sirişkin eyleyen reşk-i ‘akîk

XXIII

1. Ey taht-nişîn-i milket-i *erselnâk*
V'ey yekke-süvâr-ı 'arsa-i *a 'taynâk*
2. Şeh-bâz-ı nigâhuñ evvelin saydında
Cibrîli iderse çok mı zîb-i fîtrâk

XXIV

1. Ey neyyir-i mihr-i zerre-i evc-i kemâl
Çık ebr-i hafâdan eyle izhâr-ı cemâl
2. Mahmûr-ı firâk olan dil-i zârımı kıl
Ser-mest-i şarâb-ı câm-ı leb-rîz-i visâl

XXV

1. Ey rûy-ı melîhi asl-ı hüsn-i takvîm
V'ey nutk-ı fasîhi gıbtagâh-ı *Tesnîm*
2. Her bir nefesinde cümle-i zî-rûhuñ
Saña ola biñ salât ile biñ teslîm

XXVI

1. Ey şekl-i bedî'i mahz-ı nûr-ı Yezdan
V'ey sadr-ı vesî'i kehf-i 'afv ü ihsan
2. Bir zerre degül ruhuñ yanında hurşîd
Bir katre degül 'atâña nisbet 'umman

XXVII

1. Ey haste-i 'ışka zikri dürc-i dârû
V'ey kal'a-i şevke fikri burc u bârû
2. Zülf ü hatuñ itdi bâğbân-ı hikmet
Bostân-ı kemâle sünbül ü 'anber-bû

XXVIII

1. Ey kûy-ı matâf-ı kudsiyân-ı dergâh
V'ey bâb-ı melâz-ı 'ârifân-ı âgâh
2. Kân-ı kerem ü 'atâ vü ihsansın sen
'Âlemlere rahmet itdi zâtıñ Allâh

XXIX

1. Ey 'ışkı sa'âdet-i dü-kevnüñ semeni
Hak iki cihâna pâdşâh itdi seni
2. Pür-cürm iken isterem yine rûz-ı cezâ
Manzûr idesin nigâh-ı lutfuñla beni

XXX

Hâtime-i Rubâ'ıyyât

1. Sad hamd ki na't-i pâk irüp pâyâna
Dergâhuña oldı tuhfe dervîşâna
2. VAHYÎ kuluña şefâ'at it sultânum
Oldıysa da ğark lücce-i 'isyâna

4.

Rubâ'ıyyât

I

1. La'lûñ mül-i neşve-bahşâdur cânâ
Rûyuñ gül-i 'ıška zîbâdur cânâ
2. Fıkr-i ruh-ı vuslatuñ nigâr-ı ümmîde
Âyîne-i bî-ğış u mücellâdur cânâ

II

1. Fıkr-i mey-i vasluñ itdi cânı mest-i harâb
Kim şevk ile sîne-i figârum oldı rebâb
2. Hûn-ı dil-i zâr bezm-i 'ıška besdür
Bûs-ı leb-i la'l-i yârdan lâzım mı şarâb

III

1. Cânâ bir lutf-ı nigâh ile kalbüm şâd it
Güm-geşte esâs-ı kâh-ı 'ayşî âbâd it
2. Güm-râh-ı fezâ-yı derd-i hicrân u gamem
Lutf ile tarîk-i şevk-i vasla irşâd it

IV

1. Feryâd-ı hezâr-ı zâra rûyuñdur bâ'is
Mestî-i dil-i figâra bûyuñdur bâ'is
2. Güm-kerde-reh-i mesâcid olmağa zühhâd
Meyyâlî-i gülsitân-ı kûyuñdur bâ'is

V

1. Ey fıkr-i ruhı mecâlis-i hicrâna sirâc
V'ey bûs-ı 'izârı derd-i bî-pâyâna 'ilâc
2. Lâyıkdur ol şeh-i fiten-leşger eger
Hûbân-ı cihandan hemîn alursa harâc

VI

1. Ey zülf-i siyâhı sünbülîstan ferah
V'ey lutf-ı nigâhı cân-ı bî-can ferah
2. Elden komam ey perî-likâ dâmânun
Çâk olsa da ye's ile girîban ferah

VII

1. Ol zülf-i siyâh-ı müşg-âsâr ferruh
Hem 'ârız-ı âftâb-ı envâr ferruh
2. Biñ cân ile bende olsam itmeñ ta'yîb
Ruh ferruh u gamze ferruh u yâr ferruh

VIII

1. VAHYÎ benem ol zarîf-i mu'ciz-îcâd
Kim her suhanumda oldu biñ sihr îrâd
2. Mahsûd-ı tıbâ'-ı ehl-i 'îrfân oldu
Her şî'r-i ferah-fezâña itdüm inşâd

IX

1. La'lün gören eylemez çü meyden iltizâz
Âhum işiden ider mi neyden iltizâz
2. Âşüfteye cevır ü lutf yeksandur k'olmaz
Medhûşa ne kemden ü ne eyden iltizâz

X

1. Ol hâl-i siyeh ne sihr-perver Hindûdur
Bir fitnesinün helâki yüz biñ câdûdur
2. 'Âşıkları düşmen-i gül ü sünbül iden
Ol 'işve-gûn ruh u vefâ-bû gîsûdur

XI

1. Ey dîde-i mesti pâdşâh-ı 'âlem-i nâz
V'ey 'âşık-ı zârı sâ'il-i bâb-ı niyâz
2. Rahm eyle rahm ki bağrumı pür-hûn itdi
Şeb-tâbe-seher figân u zâr-ı dırâz

XII

1. 'Âşık ki ola visâl-i cânandan me'yûs
Bir haste-i muztaribdûr ol candan me'yûs
2. Dil-hastelere kazâ-yı mübremsin sen
Kim çeşmünji görse ola dermandan me'yûs

XIII

1. Ey dürc-i dehânı gönçe-i gülden hoş
V'ey bûs-ı lebi piyâle-i mülden hoş
2. Mecnû'a-i hüsnün içre söyle var mı
Ol iki latîf mısra' kâkülde hoş

XIV

1. Can gâreti ol nigâr-ı sehâra mahsûs
Gam hâleti 'âşık-ı giriftâra mahsûs
2. Hemvâre kalursa böyle katl-i 'âm eyler
Ol gamze ki oldu çeşm-i bîmâra mahsûs

XV

1. VAHYÎ benem ol mâlik-i gencîne-i feyz
Benden irişür cihâniyâna çîne-i feyz
2. Ol mihr-tab'-ı cihân-ârâ zihnüm
Reşkümle yanar kamerde dâğ-ı kîne-i feyz

XVI

1. Ey 'âşık-ı zâr eyleme gamda ifrât
Çün itdi o meh saña keremde ifrât
2. Lâyık mı ki ben olam mey-i hicrân ile mest
Ağyâr ideler 'ayş ile demde ifrât

XVII

1. Ol kim ola seyr-i gülsitandan mahzûz
Olmaz mı nezâre-i bütandan mahzûz
2. Sad serzeniş ü hezâr tevbih ey dil
Ol tab'a ki olmaya cüvandan mahzûz

XVIII

1. Mevl eyledi var-ısa ruh-ı cânâne şem'
Meclisde yanup yakıldı çün pervâne şem'
2. Çün eylediler 'izâr-ı yâre teşbîh
Dür dökdi düşüp hicâba dâne şem'

XIX

1. Yâr eylemez ise bendeden ihsânı dirîğ
Bende ide mi o yârdan cânı dirîğ
2. Sun la'lüñi ey tabîb-i can dil-hastelere
Çün hâzık olanlar eylemez dermânı dirîğ

XX

1. Rûyuñ da güzel o zûlf-i hoş-bû da latîf
La'lûñ de güzel fem-i suhan-gû da latîf
2. Seyr eyleyen olsun mı dâğ-ı 'ışk bedel
Gerden de güzel o hâl-i hindû da latîf

XXI

1. Dil ol hat u ol 'izâra 'âşıkdur 'âşık
Bûlbûl çü gül ü bahâra 'âşıkdur 'âşık
2. Âyîne-i rûyuñı göreliden tûtî-i dil
Ol la'l-i şeker-şî'âra 'âşıkdur 'âşık

XXII

1. Bir zâlim-i bî-amân fettandur ğamzeñ
İşkeste dilâna fitne-i candur ğamzeñ
2. Şâyeste nişânesi dil ü cân olsa
Bir nâvek-i hüsn ü peykân-ı andur ğamzeñ

XXIII

1. Bir dil-bere mübtelâ-yı bî-cân oldu göñül
Evvel nazarında zâr u hayrân oldu göñül
2. Hun katresi kuhl-i çeşm-i sıhhat olsa yeri
Bir tâze tabîb-i câna kurbân oldu göñül

XXIV

1. Ol dem kanı kim visâlûñe mahrem idüm
Nezzâre-i tal'atunla şâd u hurrem idüm
2. Şimdi ferihüm bu sözdür ancak ki dirüm
Ol yâr ile ben de bir zaman hem-dem idüm

XXV

1. Ol dil ki ola esîr-i çeşm-i hûban
Tîr-i eleme vücûdını itdi nişan
2. Hûn-ı dil ile laht-ı ciger buldı heman
Ol kimse ki oldu tekye-i 'ışka mihman

XXVI

1. VAHYÎ kanı ol zamân-ı vasl-ı cânan
Ki her nefesi degerdi sad dil ü sad can
2. Gitdi o zamân u geldi ol demler kim
Hicrânı bile çok görür oldu devran

XXVII

1. Cânândur ol siyâh u müşgîn gîsû
Kim zühdi ider imâm-ı mihrâb-ı ebrû
2. Bir nazrasına tahammül itmez ol çeşmün
Sad sâhir-i Bâbil ü hezâran câdû

XXVIII

1. Ey meh beni hâk-i rehle yeksân eyle
Tek pertev-i mihr-i rûyuñ erzân eyle
2. Çekdün gam u fûrkat ü cefâ niçe zaman
Lutf ile vefâlar ile ihsân eyle

XXIX

1. Cânâ dilümüz hecr ile mağbûn itme
Âşüftelerün bağrını pür-hûn itme
2. Yâ va‘d-i dem-i vasl ile memnûn itme
Yâ eyler iseñ hulf ile mahzûn itme

XXX

1. VAHYÎ yeter yeter bu mu‘cize-perdâzı
Neşr eyledün ‘âleme nukûd-ı i‘câzı
2. Bir lehcede cünbiş itdi dildâr suhanuñ
Reşk eyledi dil-berün nigâh-ı gammâzı

5.

Rubâ‘î-i Fârisî

1. Gül-gonçe-i bâğ-ı hikmetest îñ û hoşest
Dürr-i sadeğ-i hakîkatest îñ û hoşest
2. Goft ân-ki nezâre gerd bâ-çeşm-i insâf
Mu‘ciz-eser-i tabî‘atest îñ û hoşest

MUKATTA‘ÂT

1.

Mef‘ûlû Fâ ‘ilâtü Mefâ ‘ilü Fâ ‘ilün
Muzâri‘ - - . / - . . . / . - . . / - . -

1. Şevk-i ziyâret-i haremeyn idüp işti‘âl
Yakdı hezâr dâğ-ı mahabbet bu sîneye
2. VAHYİ-i dil-fîgâr girîbân-çâk olup
Hakka tevekkül eyledi girdi sefîneye

2.

Dîger

Mef‘ûlû Fâ ‘ilâtü Mefâ ‘ilü Fâ ‘ilün
Muzâri‘ - - . / - . . . / . - . . / - . -

1. Mısr engininde kum çeken adam yerindedür
Virse ‘abîr rütbesi rîg-i beriyyeye
2. Mir’ât-ı dehrde göremez rûy-ı râhatı
Keştîden ol ki çıkmaya İskenderiyyeye

3.

**Der-Mesîre-i Kadem-i Nebî ‘Aleyhi ’s-Selâm Nüvişte şüd Der-Mısr-ı Meşhûre
est**

Fâ ‘ilâtün Fâ ‘ilâtün Fâ ‘ilâtün Fâ ‘ilün
Remel - . - . / - . - . / - . - . / - . -

1. Çihre-sây-ı resm-i pâ-y-ı Ahmed-i muhtâr olan
Neş’e-yâb-ı feyz olup ser-tâ-kadem envâr ola
2. Hâk-i pâ-y-ı şâh-ı mâ-zâğ-ı idenler tûtiyâ
Dûr-bîn-i bî-nazîr-i ‘âlem-i esrâr ola

4.

Dîger

Fâ ‘ilâtün Fâ ‘ilâtün Fâ ‘ilâtün Fâ ‘ilün
Remel - . - . / - . - . / - . - . / - . -

1. Pây-ı şevk olsa eger zîb-i rikâb-ı rahş-ı seyr
Kasr-ı mîrâhûra ‘atf eyle ‘inân-ı râğbeti
2. Zevk-i enhâr u çimenzâr u dıraht-ı sâyedâr
Âdeme tezkîr ider hakkâ safâ-yı cenneti

5.

Dîger

Mef'ûlû Mefâ 'ilû Mefâ 'ilû Fe 'ilûn

Hezec - - . / . - - . / . - - . / . - -

1. İnsâf ile bak ey dil-i bisyâr-siyâhat
Zevki bu mahallün hele bir câda bulunmaz
2. Mânendini çak cennet ü Kevserde görseñ
Bu âb u hevâ hâsılı dünyâda bulunmaz

6.

Dîger

Fe 'ilâtün Fe 'ilâtün Fe 'ilâtün Fe 'ilün

Remel . . - - / . . - - / . . - - / . . -

1. Brusada bir büt-i 'Îsî-dem-i tersâyînün
Deyr-i hüsn içre 'aceb rûh-ı musavverliği var
2. Gam-ı hecr-ile Keşiş tağı idüp dâğ-ı dili
Eşk-i 'uşşâkı Pınar başın ider reşk-ile zâr

7.

Dîger

Fâ 'ilâtün Fâ 'ilâtün Fâ 'ilâtün Fâ 'ilün

Remel - . - - / - . - - / - . - - / - . -

1. Bir kalem kaşlı mürekkeb saçlı kâtib dil-beri
Halkı mecnûn ideyazdı sahn-ı Kâğıd-hânede
2. Hakk olunmaz nakş-ı vaslı safha-i endîşeden
Açsa biñ şak gezlek-i hicran dil-i dîvânede

8.

Dîger

Fe 'ilâtün Mefâ 'ilün Fe 'ilün

Hafîf . . - - / . . - - / . . -

1. Mihr ü mâhuñ kırânı var didiler
Bir yere cem' olunca Ahmed 'Alî
2. Başlasa âh u zâra 'âşıklar
Çağırur tağlar Muhammed 'Alî

9.

Ve lehu Dîger

Mefâ 'ilün Mefâ 'ilün Mefâ 'ilün Mefâ 'ilün

Hezec . - - - / . - - - / . - - - / . - - -

Cenâb-ı mefharü 'l-akrân İbrâhîm Efendinün
Bu kasr-ı dil-keşi olmuş neşât-efzâ vü gam-fersâ

İder ezhâr-ı reng-â-reng ile eşcâr-ı gûn-â-gun
Dil-i ashâb-ı 'irfânı şikûfte çün gül-i zîbâ

3. Husûsâ sünbül ü zerrîn ü şeb-bûy u karanfûl fûl
Açup erbâb-ı tab'ı tab'ın eyler bülbül-i gûyâ
İdüp zevk-i derûnıyla mu'ammer sâhibin Allâh
Ola kasr-ı ferah-fermâsı yârân-ı safâya câ
Gelüp ihvân ile VAHYÎ bu cây-ı 'işret-âbâda
Bedîhice bu birkaç beyti itdi şevk-ile imlâ

10.

Mefâ'ilün Mefâ'ilün Fe'ûlün
Hezec . - - - / . - - - / . - -

Elif kaddin görüp 'âşıklarından
Biri bûs itdi anuñ pûşt-i pâsın
Harâm olsun meye teşbîh idersem
Leb-i dil-berdeki Kevser şarâbın

3. Meded ey şâh-ı mülk-i fitne-kâkül
Nihân itme o meh-rûnuñ 'izârın
Dem-â-dem ârzûmend-i vefâdur
Sorarsañ VAHYÎ-i âvâre hâlin

11.

Mef'ûlû Fâ'ilâtü Mefâ'ilü Fâ'ilün
Muzâri' - - . / - . - . / . - - . / - . -

Çün rişte-i dilem be-firâkat keşide est
Zevk-i ümîdvârî-i vuslat çeşide est
Goft an ki dîd turre-i müşgîn ber-ruhet
Der-berg-i verd-i sünbül-i hoş-bû demîde est

3. Deryâ-yı heft-râ be-sûy-ı gark mî-keşed
Her katre k'ez-û dîde-i zahmem çekide est
Cânâ zi-hâl-i rûy-ı hayâl-i tû dâne-dih
'Ankâ-yı dil zi-lâne-i vuslat perîde est

12.

Fâ'ilâtün Fâ'ilâtün Fâ'ilâtün Fâ'ilün
Remel - . - - / - . - - / - . - - / - . -

1. Kâred ânân-ı mahabbet nakş-bendân-ı hulûs
Ez-firâkat dest-i ber-zânû-yı hasret mî-zenend
2. Tabl u kûs u çeng ü mûsikâr u sentûr erğanun
Ez-cüdâyî-i tu gül-bang-ı şikâyet mî-zenend

13.

Nazm-ı ‘Arabî

Fâ ‘ilâtün Fâ ‘ilâtün Fâ ‘ilâtün Fâ ‘ilün

Remel - . - - / - . - - / - . - - / - . -

1. Reşşeha ’d-dîvâne bi ’l-ifsâhi ‘arrîfû ’z-zaman
Reşşaha ’l-elfâza bi ’t-telmîhi ve ’l-ma‘nâ ’l-melîh
2. Habbe-zâ şems^{ün} ‘alet envâruhâ fevka ’l-‘ulâ
Yencelî minhâ бүдүри ’l-kalbi ke ’l-vechi ’s-sabîh